


Makhuwa-Meetto do
Novo Testamento



The New Testament in the Makhuwa-Meetto Language of
Mozambique

Makhuwa-Meetto do Novo Testamento **The New Testament in the Makhuwa-Meetto Language of** **Mozambique**

copyright © 1927, 2009 Wycliffe Bible Translators, Inc.

Language: Makhuwa-Meetto

Translation by: Wycliffe Bible Translators

Contributor: The Word For The World

O utilizador pode copiar e distribuir a obra.

You may copy and distribute the work.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

PDF generated using Haiola and XeLaTeX on 21 Feb 2024 from source files dated 31 Aug 2023
5f709f83-645e-56c9-a248-d710f5a5b2ab

Contents

Mphattuvelo	1
Yona	49
Marku	51
Yakopu	71

Mphattuvelo

Upattusiya wo citthu cothene.

¹ Wuupaceroni Nluku hopattusa irimu ni ithaya. ² Ilapo yaari yoohinnanna ni yoohithu; ipiphi yahokhuneela ipahari ni Nnepa wa Nluku wanaweetakaca waculu maasi. ³ Ni Nluku aheera: Ukhale waarya, ni uhokhala waarya. ⁴ Nluku ahoona wiira waarya uri wooreera, phimaana ahokawaniha waarya ni ipiphi. ⁵ Nluku aheehana waarya nwe uthana, nuuripela nwe aheehana uhiyu. Wahela nuusa; nno naari nihuku noopacera.

⁶ Wahoolo Nluku aheera tho: Iriyari yo maasi nikhale nlaka ninhala ukawaniha maasi wayaya wayaya. ⁷ Vano Nluku ahopanka nlaka ni ahokawanihaca maasi yari vathi ni ale yaari uculu. Ni commo waheerannyya. ⁸ Nlaka nno Nluku aheehana irimu. Waheela nuusa; nno naari nihuku nonayeeli.

⁹ Vaavale Nluku aheera: Maasi ari vathi waya irimu, athukumane nipuro nimoca, ikhale ithaya yowuuma. Ni commo waheerannyya. ¹⁰ Mphantte wo wuuma Nluku aheehana ithaya, ni nthukumano wo maasi aheehana ipahari. Ni Nluku ahoona wiira wari wooreera. ¹¹ Vano Nluku aheera: Itthaya yothene ikhuneeliye ni itakhwa, maphumpulu ni miri cimmaha mihokorokho ni ipyo co khula nnanna. Ni commo waheerannyya. ¹² Itthaya yahomela itakhwa yaarina maphunpulu o khula nnanna. Ni miri cowiima cavaha inuku co khula nnanna. Nluku ahoona wiira wari wooreera. ¹³ Waheela nuusa; nno naari nihuku noneeraru.

¹⁴ Nluku aheera: Cikhale imwaleelo wirimu wiira cikawanihe uthana ni uhiyu. Wiira cikhale cennyo nthoonyero wo ukati, mahuku ni myakha, ¹⁵ ni cikhale coomwaleela wirimu ni vathi. Ni commo waheerannyya. ¹⁶ Nluku ahopanka imwaleelo piili cuulupale; imwaleelo yuulupale iyo wiira ilamulele uthana ni yankani iyo wiira ilamulele uhiyu. Ciicammo ahopanka itthoottwa cinci. ¹⁷ Nluku aheesa cennyo wanlakani no wirimu wiira cimwaleele itthaya, ¹⁸ cilamulele uthana ni uhiyu, ni cikawanihe waarya ni ipiphi ni Nluku ahoona wiira wari wooreera. ¹⁹ Wahovira ucoocilo ni wicisu; nno naari nihuku noneecese.

²⁰ Ciicammo Nluku aheera: Mmaasini mmo akhale makoto onama coomumula, ni iriyariru irimu ni ithaya avaave asaanuni. ²¹ Commo Nluku ahopattusa inama cuulupale co mpahari ni inama cikhwawe coomumula cinkhala mpharya co khula nnanna, ni asaanuni othene o khula nnanna. Ni Nluku ahoona wiira wari wooreera. ²² Vano Nluku ahoreeriha eeraka: Ntotholane ni muncereranyee! Ncare mmasini o mpahari! Ni inuni citholane vathi va! ²³ Waheela nuusa; nno naari nihuku noneethanu.

²⁴ Ni vaavale Nluku aheera: Itthaya ikhale inama cikumi co khula nnanna; nhuwo ni inama contacthwani ni masene o mwiilaponi, o khula nnanna. Ni commo waheerannyya. ²⁵ Nluku ahopanka masene o khula nnanna, nhuwo wo khula nnanna, ni inama cineepurula co mwiilaponi co khula nnanna. Ni Nluku ahoona wiira wari wooreera.

²⁶ Vano Nluku aheera; nimpanke ntthu oolattana ni hi ni ookhala toko hii. Uyo alamulele ihopa cothene co mpahari, inuni cothene co wirimu ni inama cothene cuulupale co mwiilaponi, ni inama cothene cikani cineepurula vathi. ²⁷ Nluku ahompattusa ntthu oonlattana naawe oolattana ni Nluku ahompattusa; nlopwana ni nthiyana phaapattusiyawe.

²⁸ Nluku ahaareerihaca, ni aheerelaca: Ntotholane ni muncereranyee! Ncare ni mmwareele ilapo yothene! Nlamulele ihopa cothene co mpahari, inuni cothene co wirimu ni inama cothene cineetta vathi. ²⁹ Nluku aheera tho: Kinawuvaha miri cothene cowiima cimenle ilapo yothene ni cinvaha ipyo, ni miri cothene cinvaha mihokorokho ni inuku. Cennyo cinwookhala coolya cinyu. ³⁰ Ni kinawuvahani mataakhuru othene wiira akhale yoolya eenyu mpaka ciicammo inama cothene cirina ukumi: inama cothene cuulupale co mwiilaponi, ni inuni cothene co wirimu ni inama cothene cineettakaca ilapo yo vathi. Ni commo waheeranya.

³¹ Phimaana Nluku hoona wiira citthu cothene cipankilyawe, ciri cooreera venci cinnenne. Wahela nuusa; nno naari nihuku nonasiita.

2

¹ Commo, cahomala upankiya irimu ni ithaya ni citthu cothene ciriwo. ² Nluku namalihilene uvara miteko cothene carinawe, nihuku noonasaapa ahomumula. ³ Nluku ahoreeriha nihuku nonasaapa ni ahottakattifih, kontha nanno nihuku nno ahomumulela miteko cothene cavanryawe waapattusawe ilapo.

Maphattuvelo orimu ni ithaya

⁴ Nnya phicookhumelela cinttonka cinryaya woopattusiya irimu ni itthaya, ukati Apwiya Nluku waopattusilyaya itthaya ni irimu. ⁵ Naari nihinamela niphumpulu, ni hata mwiri mmoca mwiilaponi, kontha Apwiya Nluku yaari ahinawaana ipula ilapo yothene yo vathi, ni ciicammo khaariwo ntthu oolima itthaya iyo. ⁶ Maasi yanacekuwa vathi phimiceraka ilapo yothene.

⁷ Vano Apwiya Nluku yahomuumpa ntthu ni ntthupi notthaya ni yahommucelela mphulani iphumu cookumi, ni ntthu ule ahothatuwa nkumi.

⁸ Vaavale, Apwiya Nluku yahopanka iluwani yo Eeteni yaari mphantte unkela ncuwa, ni yahomweesa ntthu yampankilyaya. ⁹ Wahoolo, Apwiya Nluku yahomeliha itthaya yothene miri co khula nnanna, cooreera wa miithoni ni cociva ulya. Ni wariyari iluwani wahaawo mwiri wookumi ni mwiri nkina uncuweliha yooreera ni yoonanara.

¹⁰ UEeteni wahophattuwa mooloko waamicera iluwani. Ni uhooolo nwo wahekawani-haca nuukhala myoloko micese. ¹¹ Mooloko woopacera uyo uneehaninya Pisomi. Uvinre ilapo yothene yo Havila, uri iwooru. ¹² Iwooru yo yeeyo ilapo iyo iri yooreera; ciicammo, wonwo haawo lumpani ni maluku ocaayira. ¹³ Wonayeeli uvinre ilapo yothene yo Kuusi uneehaninya Kihoni. ¹⁴ Woneeraru uvinre mphantte unkhuma ncuwa weemelaka ilapo yo Uusiiriya, uneehaninya Tikire; ni woneecese uneehaninya Ufarati.

¹⁵ Apwiya Nluku yahomweesa ntthu iluwani yo Eeteni wiira awehawehe ni alime. ¹⁶ Vano Apwiya Nluku yahonlamulela ntthu yiiraka: Ulyeeye woothunawaa mihokorokho cothene ciri nluwani mmo, ¹⁷ nanso uhilye nhokorokho wo mwiri uncuweliha yooreera ni yoonanara, kontha nihuku ninhalaa ulya, khweeli unaakhwa.

¹⁸ Wahoolo, Apwiya Nluku yahoolumaca yiiraka, khawanreera nlopwana ukhala veekha. Kinaampankela oonkavihera wiira amwiiwanane. ¹⁹ Vano noompileene itthaya ni inama cothene co ntakhwani, ni asaanuni othene ooculu, Apwiya Nluku yahomwiihera nlopwana ule, wiira amoone caahalawe wiiana, ni wo khula ncina nivahilyawe nlopwana, khula itthu yoomumula, nenno phiri ncina naya. ²⁰ Phimaana nlopwana ule hovaha macina mihuvo cothene, asaanuni ooculu ni inama cothene contakhwani. Nanso Attamu khaaphwannye oonkavihera wiira amwiiwanane.

²¹ Vano Apwiya Nluku yahonvaha ikhove cinci nlopwana ule, ni waarupawe vaa yahonkumiha niparari nimoca nuuttiya nenno nipuro nno ni ithayi. ²² Niparari nakumihiyawe nlopwana ule, Apwiya Nluku yahompanka nthiyana nunrwehela nlopwana. ²³ Vano nlopwana aheera:

Khweeli nna nikhuva no makhuva aka
ni ithayi yothayi aka!

Ula nohala wiihaninya nthiyana,
kontha khumile mwa nlopwana.

²⁴ Phimaana nlopwana haana aahiyaka athumwane ni anumwane aluttaanaka na amwaarawe, ni oyeeli ankhala irutthu imoca.

²⁵ Nlopwana na amwaarawe yaakhalaca woohiwara nanso khayoonelana ihaaya.

3

Itampi woopacera

¹ Yooyo ukati uyo inwaa phaari yotepa ulavilavi wopwaha cikhwamwe capankilyaya Apwiya. Inwaa yahaakoha athiyana yiiraka: Nluku phinryawe ciicammo, wiira nhilye mihokhorokho cothene ciri nluwani? ² Vano athiyana yahaakhula yiiraka: Mihokhorokho co miri ciri nluwani niireliye nilye, ³ nanso nhokhorokho wo mwiri uri iriyari iluwani, Nluku eenre nhilye, ni nhikwanyakwanye wiira nhikwe.

⁴ Vano inwaa yaheerela athiyana ale: Khweeli khannokhwa. ⁵ Kontha Nluku naacuwela wiira, nihuku ninhalenye ulya, anawuuhulyani miitho enyu nuukhala toko Nluku, nuupacera ucuwela yooreera ni yoonanara.

⁶ Woonyaya athiyana wiira mwiri ule uri wooreera ulya ni woociva wamiithoni, ni mwiri woophwanela uvaha ankhili, yahorukula nhokorokho aya ni ulya, ni ciicammo yahaavaha awaanyaya nayo yaholya. ⁷ Phimaana oyeeli yahottukuwa miitho aya ni yahopacera ucuwela wiira ari phwitipwiti. Yahottotthanihaca matakharu o mwiri ni yahowaraca. ⁸ Wathekuwaya ncuwa, yaheewa uwuka wophyoo wawaaya Apwiya Nluku weetakaca nluwani. Vano nlopwana wamoca na amwaarawe yaheepithaca Apwiya Nluku mmirini co nluwani. ⁹ Vaavale Apwiya Nluku yahomwiihana nlopwana ule yiiraka: Uri vayi?

¹⁰ Ule ahaakhula: Kihowiiwa uwuka wophyoo yawinyu nluwani, vano mi kihoova, kontha kiri pwitipwiti phimaana wiipithiyaka.

¹¹ Ni Nluku ahonkoha: Tipani uthonyenre wiira uri pwitipwiti? Uholya nhokhorokho wo mwiri uwirenyaka wiira uhilye?

¹² Vano nlopwana ule ahaakhula eeraka: Athiyana akivahilyaa ayo wiira akhale nkhwaa, yaayo phikivahile mi nhokorokho uyo, ni kiholya.

¹³ Apwiya Nluku yahaakoha athiyana ale: Nyu mpankacenreni ciicammo? Athiyana ale yahaakhula yiiraka: Inwaa phikithepile, ni mi kiholya.

¹⁴ Phimaana Apwiya Nluku yaheerela inwaa: Upanka waa commo, kihoolapha woopwaha mihuwo cothene ni inama cothene co ntakhwani, unhala weettela wamirimani, ni yoolyaa inhala ukhala ntthupi mahuku othene ookumi aa. ¹⁵ Ni wariyari waa we ni athiyana ayo, ni wariyari wo ucuulu aa we ni ucuulu wa nthiyana uyo, kinaweesa umwiinani. Yooyo ucuulu uyo unaahala wuurakaliha muru we, ni we unkoorakaliha ikottokottho aya. ¹⁶ Vano Apwiya yaheerela athiyana ale:

Kinawuuncerera coowerya cinyu
 ukati unkeelenyu ukhala ni irukulu;
 ni ukati wooyara nnokowoona uwerya;
 nyu nnokoophavela waapwaha awannyu
 nanso ayo phinhala wuulamulani.

¹⁷ Vano Apwiya yahomwiirela Atamu:
 Ukhala wiira we uheewelega amwaaraa,
 ni uholya nhokhorokho wawiirenyaka uhilye,
 iholaphyaa ithaya iyo mwanlattu wawaa we;
 muuhuvani unarwaa weelihe mahuku othene ookumi aa.

¹⁸ Itthaya iyo inkomeela miwa ni malasi,
 ni we unkoolya matakuru o ntakhwani.

¹⁹ Ni unhala ulya ni nttukuttha nomwiirutthuni mwa,
 mpaka wanhalaa uturuwela watthayani;
 kontha we wuupiye ni ithaya, nna va uri ntthupi,
 ni unaturuwela ukhala ntthupi.

²⁰ Vaavale nlopwana ule ahaavaha amwaarawe ayo ncina na Hawa; kontha ayo yaari anumwanaya atthu othene. ²¹ Vano Apwiya Nluku, yahompakela nlopwana ule na amwaarawe ikuwo co nrapala ni yahaawarihaca.

²² Wahooo Apwiya Nluku yaheera: Nkoonani, ntthu ula ri toko hii, naacuwele yooreera ni yoonanara; vano wiira hitaphule ntata nawe, ciicammo arukulaka nhokorokho womwiri wookumi, alyaka nukhala wohikwa. ²³ Apwiya Nluku, yahomoomola ule nluwani yo Eeteni wiira alime ithaya yakumihyaawe. ²⁴ Paahi, noomoliyene ntthu ule, yaheesiya Makerupii ookhaliha, mphantte unkhuma ncuwa woluwani yo Eeteni, ni ikatana yoopharela yaarukurerya nceresere mothene, wiira isunke iphiro inrwaa uryaya mwiri wookumi.

4

Kayini ni Apeli

¹ Atamu ahaathukumanana amwaarawe yeehaninya Eva, ni ale yahorupala irukulu ni yahonnyara Kayini. Ale yaheera: Ni nkavihero na Mwaneene Nluku kihomphwany nlopwana. ² Ahorupala tho irukulu. Ula nkwaaha ula ahonnyara Apeli, nhimaawe Kayini. Apeli aari nhakheli okhontwaa, ni Kayini aari mayoolima.

³ Unaphilieene ukati, Kayini ahowana mihokorokho co mmattani wiira anvelelihere Mwaneene Nluku. ⁴ Apeli ahowana nlipu no mihuwo cawe cootepa uneneva ni Mwaneene Nluku ahomwakhelela Apeli ni itthuvo cawe. ⁵ Nanso ayo khayaamwakhelenle Kayini ni itthuvo cawe. Vaavale Kayini ahorusiya ni ahotthuka iyuuci. ⁶ Vano Mwaneene Nluku ahomwiirela Kayini: Nlattuni we urusiyaka? Untthukelani iyuuci aa? ⁷ We wapankaka yooreera, khunhala ukupaliya? Nanso waahipankeke yooreera, ucuwele wiira itampi iri wankhora ni inoowipithela. Iyo imphavela wuutthema, nanso we unlamuliya usintta.

⁸ Wahooo, Kayini ahomwiirela Apeli nhimaawe: Nrwee umattani. Ukati wakhalacilya umattani, Kayini ahontuphela nhimaawe nuumwiwa.

⁹ Vano Nluku ahonkoha Kayini: Nhima Apeli ri vayi? Uyo ahaakhula eeraka: Akin-cuwela. Mi kihokhala mayonsunka nhimaaka?

¹⁰ Vano Nluku ahonkoha eeraka: Ipankilyaa ila isiyani? Ukiviriyanee: Ukhuma watthayani, iphome ya munnaa inakhuwela. ¹¹ Vano uholaphiya we ni ithaya ihunle malaku wiira yaakhelele mmattani mwaa iphome ya munnaa. ¹² Ukati unkelaa ulima

watthayani, ila khinkela yovahaka tho icaayira. We unkokhala namatthawatthawa ni nanniyatha umwilaponi.

¹³ Kayini aheerela Apwiya: Uttarusiya waka nwo uhotepa. Nkilevelele. ¹⁴ Ileo nnakoomola mwiilaponi mu, kiwiiipithakani ni kitthawatthawaka toko nanniyatha, kontha ntthu phi ntthu nohala ukikumana uyo nokookiiva.

¹⁵ Nanso Mwaneene Nluku ahomwaakhula: Khunhala ukhala commo. Ntthu amwiivaka Kayini, nokowiiveleliya ikuhukuhu imaara saapa. Ni Mwaneene Nluku ahomweesera Kayini nthonyero, wiira ntthu phi ntthu nohala unkumanana uyo himwiive. ¹⁶ Vano Kayini ahokhuma wamiithoni wa Mwaneene Nluku ni ahorwaa ukhala ilapo yo Nooti, mphantte unkhuma ncuwa wo Eteni.

Ucuulu wa Kayini

¹⁷ Kayini ahaathukumanana amwaarawe ni yahorupala irukulu ni unnyara Enoki. Wahoolo Kayini ahoteka iparasa awe, yaavahilyawe ncina na mwamwanawe Enoki.

¹⁸ Enoki ahonnyara Iraati. Iraati ahonnyara Mewucayeli. Mewucayeli ahonnyara Metusayeli ni Metusayeli ahonnyara Lameki.

¹⁹ Lameki ahaathela athiyana eeli. Amoca ayo yeehaninya Aata ni akina ayo, Silaa. ²⁰ Aata ahonnyara Yapaali. Yaari athumwanaya atthu ankhalakhalaca mmaheemani ni mayoohuwa inama. ²¹ Ncina na munnaawe neehaninya Yupaali, yaari athumwanaya atthu othene ammoopa ceece ni mpetta. ²² Siila ciicammo ahonnyara mwana mmoca ee-haninya Tupalakayimi, aahana ikaruma cothene co ncukhuma ni coyuuma. Tupalakayimi ahaana mwanrokorawe ee-haninya Naama.

²³ Lameke aheerela asaarawe yeehaninya:

Aata ni Silaa: Nkiiwace asaara a Lameki,

mwiiwelele moolumo aka:

Mi kihomwiiva nlopwana mmoca kontha hookirakaliha,

ni mmirawo mmoca kontha hookinyakela.

²⁴ Wakhalaka wiira Kayini nawiiwelelihiya ikuhukuhu imaara saapa,

Lameki wanwookhala sapini (70) uyo umwaakulelaca imaara saapa (490).

Uyarya wa Seeti

²⁵ Atamu ahaathukumanana tho amwaarawe ni ale yahonnyara mwana nkina, yanvahile aya ncina na Seeti, yiiraka: Nluku hokivaha mwana nipuro na Apeli, yoole Kayini mwiivilyawe. ²⁶ Seeti ciicammo ahonnyara mwana anvahile awe ncina na Enosi. Vano Yooyo ukati uyo, phapaceriyaya ulapeliya ncina na Mwaneene Nluku.

5

Ucuulu wa Atamu mpaka Nowee.

¹ Ila phi iliivuru yomayaranacelo o nloko na Atamu. Ukati Nluku waampankilyawe ntthu, eelattanihaka mwaneene, ² ahaapanka nlopwana ni nthiyana. Ukati waampankilyawe, uyo ahaareeriha ni aheehana atthu.

³ Wapihenryawe Atamu myakha iminya nuuwa talaathini (130) ahonnyara mwana mmoca oolikana nuuyo ni oonlatta venci, ni ahonvaha ncina na Seeti. ⁴ Nannyanreene Seeti, Atamu ahokhala nkumi myakha iminya naane (800) ni ahaayara asaana akina asilopwana na asithiyana. ⁵ Mahuku othene ookumi awe Atamu yahophiyera myakha iminya khentta nuuwa talaathini (930) ni ahokhwa.

⁶ Seeti waapihenre awe myakha iminya nuuwa mithanu (105), ahonnyara Enosi. ⁷ Seeti nannyanreene Enosi ahokhala nkumi myakha iminya naane nuuwa saapa (807) ni ahaayara tho asaana akina asilopwana na asithiyana. ⁸ Mahuku othene ookumi awe, yaari myakha iminya khentta nuuwa khumi na mili (912) ni ahokhwa.

⁹ Wapihenryawe Enosi myakha miloko khentta (90) ahonnyara Kenani. ¹⁰ Enosi nannyanreene Kenani, ahokhala nkumi mpaka myakha iminya naane nuuwa khumi na mithanu (815) ni ahaayara asaana akina asilopwana na asithiyana. ¹¹ Mahuku othene ookumi awe, yaari myakha iminya khentta nuuwa mithanu (905) ni ahokhwa.

¹² Waapihenryawe Kenani myakha sapini (70) ahonnyara Malaleli. ¹³ Kenani nannyanreene Malaleli, ahokhala nkumi mpaka myakha iminya naane nuuwa arupayini (840) ni ahaayara asaana asilopwana na asithiyana. ¹⁴ Mahuku othene ookumi awe, yaari myakha iminya khentta nuuwa khumi (910) ni ahokhwa.

¹⁵ Wapihenryawe Malaleli myakha sitiini nuuwa mithanu (65) ahonnyara Yereti. ¹⁶ Nannyanreene Yereti Malaleli, ahokhala nkumi mpaka myakha iminya naane nuuwa talathini (830) ni ahaayara asaana asilopwana na asithiyana. ¹⁷ Mahuku othene ookumi awe, yaari myakha iminya naane nuuwa miloko khentta na mithanu (895) ni ahokhwa.

¹⁸ Wapihenryawe Yereti myakha iminya wo sitiini na miili (162) ahonnyara Enoki. ¹⁹ Nannyanreene Enoki Yereti ahokhala nkumi mpaka myakha iminya naane 800 ni ahaayara asaana asilopwana na asithiyana. ²⁰ Mahuku othene ookumi awe, yaari myakha iminya khentta nuuwa sitiini na miili (962) ni ahokhwa.

²¹ Wapihenryawe Enoki myakha sitiini na mithanu (65) ahonnyara Metusalemu. ²² Nannyanreene Metusalemu, Enoki aheetta ni Nluku myakha iminya ttharu (300) ni ahaayara asaana asilopwana na asithiyana. ²³ Mahuku othene ookumi awe, yaari myakha iminya tthaaru wo sitiini nuuwa mithanu (365). ²⁴ Enoki aheetta ni Nluku, ni ahorim-yarinya kontha Nluku ahonkusa.

²⁵ Wapihenryawe Metusamemu myakha iminya nuuwa miloko khentta na saapa (187) ahonnyara Lameke. ²⁶ Nannyanreene Metusalemu Lameke ahokhala nkumi mpaka, myakha iminya saapa nuuwa miloko khentta na miili (782) ni ahaayara asaana asilopwana na asithiyana. ²⁷ Mahuku othene okumi awe, yaari myakha iminya khentta wo sitiini nuuwa naane (969) ni ahokhwa.

²⁸ Wapihenryawe Lameke myakha iminya nuuwa miloko khentta na miili (192), ahonnyara mwana mmoca. ²⁹ Ahonvaha ncina na Nowee ni aheera: Ula naahala uniwukula miteko cihu ni uhwa wo mmatatani mwihu ommwaaninya ni ithaya ilaphiye ni Mwaneene Nluku. ³⁰ Nannyanreene Lameke, Nowee ahokhala nkumi mpaka myakha iminya thanu nimiloko khentta nuuwa mithanu (595) ni ahaayara asaana akina asilopwana na asithiyana. ³¹ Mahuku othene ookumi awe, yaari myakha iminya saapa ni miloko saapa nuuwa saapa (777) ni ahokhwa.

³² Wapihenryawe Nowee myakha iminya thanu (500) ahaayara tho asaana akina yeehaninnya: Seemu, Kani ni Yafeti.

6

Nantuthi ankurukuttunle nkhasya

¹ Waapacenryaya athu wuncererannyya mwiilaponi ni yaayaracaka asaana asithiyana, ² asaana asilopwana a Nluku yahoona wiira asaana asithiyana aathu ayo yaari ooreeraca, ni yahaathanla ale yatepile wacivela.

³ Vano Mwaneene Nluku aheera: Nlattu wotaampi ca athu, Nnepa aka khunhala ukhala ukati wothene ni athu, kontha ule ri irutthu. Uyo nohala ukhala myakha iminya wo sirini (120) paahi.

⁴ Yoole ukati ule, mwiilaponi yahaawo athu oosancamaca. Wahoolo asaana asilopwana a Nluku wathukumaanannyaya asaana asithiyana a athu ni yayaranacaka asaana. Ayo phaari anakhotto okuru ni ooruma ncina okhalayi.

⁵ Mwaneene Nluku ahoona wiira itampi ca athu caanatepa winciva mwiilaponi ni moopuwelo, omunrimani mwaya yaari ukati wothene upanka paahi coonanara. ⁶ Vano Mwaneene Nluku aheera: Koonne wene kaapankaka athu mwiilaponi mu, ni iyo yahonrusiha venci wanrimani wawe. ⁷ Mwaneene Nluku aheera: Kinawaamalamaliha mwiilaponi athu yapankilyaka, athu ni ciicammo inama cuulupale ni cikani ni asaanuni o wirimu. Koonne wene kipattusaka cothene nnya.

⁸ Nanso Nowee ahophwanya nnema wamiithoni wa Mwaneene Nluku.

Nowee nawitthenkaca wiira hinkhwe naphuvu.

⁹ Nnya phi cokhumelela co neethi wa Nowee. Nowee aari ntthu mayasariya, ookhweeli na athu o yooyo ukati uyo. Uyo eetta ni Nluku. ¹⁰ Nowee ahaayara asaana araru: Semu, Kani ni Yafeti.

¹¹ Vaavale, ilapo yahohononnya wamiithoni wa Nluku ni yahocara coonanara capankaya athu. ¹² Woonnyawe wiira ilapo ihotankannyya, kontha athu othene omwiilaponi ahohapuwa malamulo aka. ¹³ Nluku ahomwiirela Nowe: Kinawaamalamaliha athu othene, kontha ilapo yothene ihocara coonanara cimpankaya. Phimaana mi kinawakwanyulaca ni ilapo eyo.

¹⁴ Nanso we, upanke ikalawa yothaapwa co mpila. Ukawanihace, cikhale ikatti mwiitayi mwaya ni uttiyace ni uloko nhina ni vate. ¹⁵ Mwiitayi mwaya ulike imaara iminya tharu (300), mwiikhuvi mwaya imaara hansini (50) ni yeemelelo aya imaara talathini (30). ¹⁶ Upanke ithari ni upanke icanela nliko wo nuusu no moonoo mmoca ithari ni isiri yokalawa. Upanke nkhora nceresere ikalawa ni upanke ithari; waculu, iriyari ni vathi.

¹⁷ Nkoonani. Kinnowiha maasi o naphuvu mwiilaponi, wiira kikwanyulace ilapo yothene ni cithu cothene coomumula cipattusilyaka. Cothene ciri mwiilaponi cimmo-mala. ¹⁸ Nanso, ni we, kimmopanka nleehano naka, ni ummokela nkalawani mmo, we na asaana, na amwaaraa ni asaraya asaana ayo. ¹⁹ Ni cothene cimmumula co khula ikhapila yonama, yo nlopwana ni yo nthiyana unlamuliya ukelana nkalawani mmo pilli

piili, wiira usunke ukumi aya ni we. ²⁰ Asaanuni o khula ikhapila, inama co khula ikhapila, inama cowiipurula co khula ikhapila; cinari piili piili cinawuwela we, wiira usunke ukumi aya. ²¹ Vano we, ukuse coolya cothene cinliya ni wiisunkere, cinhala ukhala coolya ca waa ni coolya conama.

²² Ahopanka Nowee toko cahimeriyawe ni Nluku. Commo phaapankilyawe.

7

Maasi o naphuvu

¹ Wahoolo Mwaneene Nluku ahomwiirela Nowee: Ukele nkalawani, we ni ntthoko naa nothene, kontha kihowoona we ukhala ntthu oosariya wariyari wa atthu othene. ² Ukuse inama saapa co nlopwana ni inama saapa co nthiyana co khula ikhapila cinari cohalali. Nanso ciri coharamu nnyo, ukuse piili piili co nlopwana ni co nthiyana. ³ Ciicammo ukuse inuni cooculu saapa co nlopwana ni saapa co nthiyana, wiira cikhale cikumi ni ipyo yo mwiilaponi mothene. ⁴ Kontha yaviraru mahuku saapa, kinawana ipula mwiilaponi mothene, mahuku arupayini uhiyu ni uthana. Ni kinakhwanyulaca citthu cothene cipankilyaka vathi va.

⁵ Nowee ahopanka cothene ceereliyawe ni Mwaneene Nluku. ⁶ Yooyo ukati uyo Nowee aahaana myakha iminya siita ceyarelo, ukati wawilyawe naphuvu oocara maasi ilapo yothene. ⁷ Nowee, na asaanawe, na amwaarawe, na asaraya asaana awe ayo, yahokelaca nkalawani, mwanlattu wo maasi o naphuvu. ⁸ Ukhuma inama cohalali, inama coharamu, asaanuni, ni inama cothene cowiipurula ciri vathi va, ⁹ cahonwela Nowee, nuukela piili piili nkalawani mmo, toko Nluku canlamunlenlyawe Nowee. ¹⁰ Wanowiira avirakaru mahuku saapa ale, phapacenyaya uwa maasi o naphuvu vathi wothehe.

¹¹ Ukati warinawe Nowee myakha iminya siita (600) cokumi awe, weettelaya mweeri wo nayeeli, waaphiyeraya mahuku khumi na saapa o mweeri, nenno nihuku nno, cahottinwa miliwi co maasi, ni mikhora cothene co wirimu cahohulya, ¹² ni yahorupa ipula mwiilaponi mothene, mahuku arupayini, uhiyu ni uthana. ¹³ Vano nenno nihuku nno Nowee na asaanawe, Seemu, Kani ni Yafeti, ciicammo amwaara a Nowee na asaraya asaana ooraruru yahokelaca nkalawani. ¹⁴ Ale ni inama cothene co khula ikhapila, mihuwo cothene co khula ikhapila, inama cothene cowiipurula co khula ikhapila, covava cothene co khula ikhapila, asaanuni othene o khula ikhapila, ¹⁵ ni inama cothene carina ukumi, cahokela piili piili ni Nowee nkalawani. ¹⁶ Paahi, inama cothene caakenle caari cowiiraana, co nlopwana ni co nthiyana, toko Nluku canlamunlenlyawe. Wiimaleloni, Mwaneene Nluku ahothyya nkhora vate.

¹⁷ Vaavale, naphuvu ule ahokhala mahuku arupayini nari mwiilaponi, maasi yaheen-civa, ni yahoteesa ikalawa iyo, ni ile yahohiya itthaya. ¹⁸ Vano maasi ale yahocara venci cinenne mwiilaponi mothene; nanso ikalawa iyo yaamphepa waculu maasi. ¹⁹ Vano maasi ayo yanatepa wuncereryaana mwiilaponi, mpaka myako coorekama cothene cari vathi waya irimu cahomiriya ni maasi. ²⁰ Maasi ayo yahocara tapha mpaka upwaha miyoono saapa ni nuusu, mpaka myako nnyo cahomiriya.

²¹ Phimaana cahokhwa inama cothene cariwo vathi va, ukhuma mihuwo, inuni, masene, inama cowiipurula cothene mpaka atthu othene. ²² Cothene carina ukumi, cimumulelaka mphulani mwaya, caakhala vathiva, cahokhwa. ²³ Paahi, cahotankanyaa cothene cariwo vathi va, ukhuma ntthu mpaka inama cowiipurula ni nnyo coweetta, mpaka asaanuni oovava uculu, yahomalamalihya mwiilaponi. Aahanle paahi phi Nowee ni ayo yarinawe nkalawani. ²⁴ Maasi ayo yahokhala nlaponi mpaka mahuku iminya wo hansiiini (150).

8

Umala wo Naphuvu

¹ Vano, Nluku ahomuupuwela Nowee wamoca ni inama cothene co ntakhwani ni coohuwiya caarinawe nkalawani, ni ahowana iphyoo yuulupale mwiilaponi ni maasi yahopacera uwukuwa. ² Miliwi co vathi ni mikhora co wirimu cahottiyannyya ni ipula yahohiya urupa. ³ Maasi yahopacera uwukuwa vakani vakani mwiilaponi. Wiimaleloni wo mahuku iminya wohansiiini (150), maasi ale yahowukuwa, ⁴ ni nihuku nonakhuumi na saapa no mweeri wonasaapa, ikalawa ile yaheemela umyakoni co Ararati. ⁵ Maasi naanlelo yeera awukuwaka, mpaka mweeri wonakhumi. Vano nihuku noopacera no mweeri wonakhumi cahopacera woonnyaa myako.

⁶ Anavinre mahuku arupayini, Nowee ahohula icanela yapankilyawe nkalawani. ⁷ Vano ahonkumiha nakhuku mmoca, aamakenle urukureryaca paahi, awehereryaka maasi ale wuuma vathi wothehe. ⁸ Wahoolo ahottukulela ikhunnta wiira oone yakhala

wiira maasi ayo yahowukuwa mwiilaponi. ⁹ Nanso ikhunnta khayaaphwanyile nipuro nookotela kontha maasi yahokhuneela ithhaya yothene. Phimaana ikhunnta ile yahoturuwela nkalawani mwaaryawe Nowee. Ule ahotaphulela moonoo awe vate ni ahovara ikhunnta ile awaanaka nkalawani mmwe.

¹⁰ Vaavale Nowee ahowehererya tho mahuku saapa ni ahoruma tho ikhunnta ile. ¹¹ Utthekuwa waya ncuwa, ukati waturuwilyaya ikhunnta ile, yahowa inapapile umalakuni nwo ntaakhuru no mwiri. Nowee ahokhala oocuwela wiira maasi ayo ahowukuwa mwiilaponi mmo. ¹² Ahowehererya tho mahuku saapa ni ahoruma tho ikhunnta, nanso ila ikwaha ila ikhunnta khayaaturuwile tho.

¹³ Nihuku noopacera no mweeri woopacera wo mwakha iminya siita na mmoca (601), maasi ale yahowelega mwiilaponi mmo. Nowee ahopattakula nivatho nokalawa. ni aheera: mwiilaponi mmo ithhaya iyo ihooma. ¹⁴ Khweeli, nihuku nonasiriini na saapa no mweeri wonayeeli, ithhaya yahomalela wuuma.

Upacera makhalelo onaanano mwiilaponi

¹⁵ Vano Nluku ahomwiirela Nowee: ¹⁶ Ukhume nkalawani mmo, we na amwaaraa, wamoca na asaanaa ni asaaryana asaanaa ayo. ¹⁷ Ni ukumihace inama cothene cirinaa nnyo: asaanuni, inama cuulupale ni cikani cineetta ciipurulaka. Ukumihe wiira cimwaele mwiilaponi, cikhale cocaayiira ni citotholane.

¹⁸ Phimaana, Nowee na amwaarawe, wamoca na asaana awe na asaryana yahokhumaca nkalawani. ¹⁹ Inama cothene cuulupale ni cikani cineetta wowiipurula, ni asaanuni othene, cothene coweetta mwiilaponi caari nkalawani, cahokhuma.

²⁰ Wahoolo Nowee ahopanka ikhilompi yoonlapelela Mwaneene Nluku, ni ahokusa inama cikina ni asaanuni oohalali, ni ahaavelelihera isataka yoopahiya. ²¹ Mwaneene Nluku ahoona unukhela ni aheera: Akinhala tho ulapha ithhaya mwanlattu wa pinattamu, kontha wuupuwela wa pinattamu uri woonanara ikhumelo. Ni akinhala wiivakaca tho cithu cikumi cothene toko cipankilyaka ula nkwhaha ula.

²² Paahi, ilapo ela yapicaru nuumala,

waala nuhepha,
uririya ni nttukuttha,
ilimwe ni iyiita,
uhiyu nuuthana
kunhala umala.

9

Nleehano na Nluku ni Nowee

¹ Nluku ahonreerihya Nowee na asaanawe amwiirelaka coo: Nnyaranace, muncereryane ni ncarace mwiilaponi. ² Inama cothene co mwiilaponi cinkowuttetemelani ciwoovakani nyu; inama co ntakhwani, asaanuni o wirimu, inama cineepurula vathi ni ihopa co mpahari, cothene nhovahiya mmatatani mwinyu.

³ Cithu cothene cirina ukumi ni ceettaka cinkokhala coolya cinyu; toko cuvahilyakani mataakhuru, nna vaa kinawuvahani cithu cothene. ⁴ Nanso nhikhure inama ni iphome aya, kontha iphome aya phiri ukumi. ⁵ Ntthu phi ntthu nohala umwarusa iphome, pooti ukhala ya ntthu atthuna yonama, kinkoonkohaca; wo khula ntthu kinkohukumu nlatu wokumi wa nkhwawe.

⁶ Ntthu nohala umwarusa iphome ya nkhwamwe,
iphome awe inhala umwarusiya ciicammo ni ntthu,
kontha, ni ilatta ya Nluku,
phipankiyawe ntthu.

⁷ Nanso nyu, nkhole ooyaranaca ni muncereryane. Mmwaryeele mwiilaponi ni ncaranace mommo.

⁸ Vano Nluku ahomwiirela Nowee, na asaanawe: ⁹ Nkoonani, kinkopanka nleehano naka ni nyu wamoca ni ucuulu inyu wohoolo, ¹⁰ ni cithu cothene cirina ukumi ciri ni nyu; asaanuni, inama coohwiya ni inama co ntakhwani, cithu cothene co mwiilaponi cirina ukumi. ¹¹ Kinapanka nleehano naka ni nyu. Itthu phi itthu irina ukumi khinhala tho wiiyiya ni maasi oocara mwiilaponi. Khaanhala tho ucara maasi mwiilaponi. ¹² Nluku ahopwaherera wuulumaca eeraka: Ila phi ikanyero yo nleehano naka ninoopanke-laakani, ukhuma nyu mpaka cithu cothene cirineenyu, cirina ukumi; mpaka maloko othene oohoolo. ¹³ Nkhwii naka kiheesa mmahutteni. Ninkookhala ikanyero yo waataana waka ni ilapo. ¹⁴ Ukati unkelaka uwaana mahutte mwiilaponi ni nawaaka nkhwii, ¹⁵ vano mi kinkowuupuwela nleehano naka ni nyu wamoca ni cithu cothene cirina ukumi co khula nnanna. Maasi khaanhala tho ucara mwiilaponi wiira yiivakace cithu

cirina ukumi. ¹⁶ Ukati wothene unkelaya woonnyaa nikhwii mmahutteni, kinkooweha ni kinkowuupuwela nleehano noohimala na athu ni cithu cothene coomumula co khula nnanna, cinkhala mwiilaponi. ¹⁷ Namalihileene wuulumaca, Nluku ahomwiirela Nowee coo: Ila phi ikanyero yo nleehano nipankilyaka mi ni cithu cothene cirina ukumi mwiilaponi.

Asaana a Nowee

¹⁸ Vano asaana a Nowee yakhumile nkalawani yaari: Seemu, Kani, ni Yafeti. Kani phiri athumwanaya Kanaa. ¹⁹ Ala phaari asaana araru a Nowee. Ukhuma mwa yaayo, ilapo yothene yahokhaliya na athu. ²⁰ Nowee aari mayoolima, phapacetre waala ivinya yoopacera. ²¹ Nowee ahowurya ivinyu, ahohapaliya, ni ahokhala pwitipwiti nheemani mwawe. ²² Kaamu, athumwanaya Kanaa, ahoona uhiwara waathumwane ni ahorwaa waahimiyacera asunnawe eeli yaari vate. ²³ Nanso Seemu ni Yafeti yahokusaca ikacako, yaheesaca wanikhatani ni, yeetaka nntuli nntuli wiira ahoonace athumwanaya anari pwitipwiti, yahaakhuneelaca.

²⁴ Nowee, ukati wonwilyawe muuhapaliyani, ni oonenelaka yapankilyawe mwanawe omwankaani ule, ²⁵ aheera coo:
Kanaa holaphiya!

Unkookhala ipottha copottha ca asunnaa.

²⁶ Aheera tho coo:

Attittimihinye Mwaneene Nluku, Nluku a Seemu!

Ni Kanaa akhale ipottha awe.

²⁷ Nluku uncerere ncoko wa Yafeti;

uyo akhale mmaheemani mwa Seemu,

ni Kanaa akhale ipottha awe.

²⁸ Uvira waya ucara wo maasi mwiilaponi, Nowee ahokhala nkumi myakha iminya tthaaru wo hansini (350). ²⁹ Mahuku othene ookumi awe, yaari myakha iminya khentta wo hansini (950) ni ahokhwa.

10

Maloko a Nowee

¹ Ala phi mayaranacelo aya asaana a Nowee: Seemu, Kaamu, ni Yafeti. Ni ayo yahoyaranaca uvira wawe naphuvu.

² Ala pha asaana a Yafeti: Komeri, Makoki, Mattaayi, Yavani, Tupali, Mesekhi ni Tirasi. ³ Ni asaana a Komeri yaari pha ala: Asikenasi, Rafiki ni Tokarima. ⁴ Asaana a Yavani yaari pha ala: Elisa, Tarisisi, Kitimi, ni Tamini. ⁵ Nhina wo yaala, phikhumakhumilyaya athu ankhalkhala mmaacivirini, akawanacaka ncoko aya nhina wo nuulumo naya, wo khula nthu nhina wo nihimo neelapo awe.

⁶ Ala phaari asaana a Kaamu: Kuusi, Misirayimi, Fuute ni Kanaa. ⁷ Ala phaari asaana a Kuusi: Sepaa, Havila, Sapita, Ramaa ni Sapiteka. Ala phaari asaana a Ramaa: Sapaa ni Tetaa. ⁸ Kuusi ciicammo ahonnyara Ninroti, nlopwana oopacera ookhomaala cienne mwiilaponi. ⁹ Ule ari nlupa muulupale wamiithoni wa Mwaneene Nluku, phimaana wiiriyaka: Nlupa toko Ninroti wamiithoni wa Mwaneene Nluku. ¹⁰ Wiipaceroni umwene awe wamphiya uPapeli, Ereki, Akkate ni Kalineha, ilapo yo Sinari. ¹¹ Ukhuma wawe yeela ilapo ela ahorwaa waAsiiriya wantekilyawe Ninive, Riyopoti-Iri, Kalaa ¹² ni Resemi, inkhala ncoko wo Ninive ni Ukalaa, iparasa yuulupale.

¹³ Misirayimi ahaayara annalutita, annamita, annaleyapita, annafutuwita, ¹⁴ annapaturusita, annakasuluwita, mwa yaala phikhumelenle annafilisitiya ni annakaftori. ¹⁵ Kanaa ahonnyara Sitomi, mwana omuulupale, ni Hetee, ¹⁶ ciicammo toko annayepusi, annamori, annakirkasiti, ¹⁷ annahiviti, unnarkiti, annasiniti, ¹⁸ annariviti, annasemara ni annahatitha. Wahoolo mahimo o annakanani yahomwaryaca. ¹⁹ Miinano co Kanaa caakhuma uSitomi, ni carwaa mpaka uKerari, ni camphiya uKaasa ni, ukhuma wonwo, canrwaa mpaka uSotoma, uKomora, uHatamaa ni Sepoyimi ciphiyaka mpaka uLaasa. ²⁰ Ala phi mayaranacelo a Kaamu, nhina mahimo aya ni moolumo aya, mmicokoni ni mwiilaponi mwaya.

²¹ Seemu aari nhimaawe Yafeti ni ciicammo ahaayaraca asaana. Ule phaari muulupale a athu othene oHeperi. ²² Ala phaari asaana a Seemu: Elawu, Asuuri, Arifacate, Luuti ni Arami. ²³ Ala phaari asaana a Arami: Usi, Huli, Kether ni Meseki. ²⁴ Arifacate ahonnyara Selah, ni Selah ahonnyara Heperi. ²⁵ Heperi ahaayarela asaana eeli: Mmoca uyo eehaninya Peleki, kontha ukati awe ilapo yahokawaninya; ni nhimaawe eehaninya Yokitani. ²⁶ Yokitani ahonnyara Almotati, Salefi, Hasaramarvete, Yerah, ²⁷ Haturami, Usaali, Tikala, ²⁸ Opal, Apimayeli, Sepaa, ²⁹ Ofiri, Havilaa ni Yopapi. Ala othene ala yaari

asaana a Yokitani. ³⁰ Ncoko wakhalacaya uyo weecatala ukhuma uMeesa mpaka uSefari, mmwakoni uri mphantte unkhuma ncuwa. ³¹ Ala phi mayaranacelo a Seemu, nhina mahimo aya ni moolumo aya, mmicokoni ni mwiilaponi mwaya.

³² Ala phi mahimo a asaana a Nowee, ookawanaceene mwiilaponi mwaya, toko ciriya mayaranacelo aya. Ukhuma wo yaayo, atthu ahomwareela mwiilaponi, uvira wawe naphuvu.

11

Inupa yoorekama yoophiya wirimu

¹ Mwiilaponi mothene nariwo paahi nuulumo nimoca ni moolumeliyo mamoca. ² Vano atthu akhumaka mphantte unkhuma ncuwa, yahophwanyaca nikuwa uSinari ni vaavale yahokhalaca. ³ Yaheerelana ayaayoru coo: Nrwee nuupe incirwa ni nipaheehe sana sana. Yatthuminri incirwa nnyo nipuro no maluku, ni alikatarawu nipuro no mattope. ⁴ Wahoolo yaheerelana tho: Nrwee niteke iparasa ni inupa yoorekama yoophiya wirimu. Commo ncina nihu ninkoruma ni khaninhala umwaruseliya mwiilaponi.

⁵ Vano Mwaneene Nluku ahokhuruwa wiira oone iparasa ile ni inupa yatekaya atthu ale. ⁶ Ni Mwaneene Nluku aheera coo: Nkoonani, atthu ala ari nloko nimoca paahi, anoolumaca nuulumo nimoca paahi, ni ahopacera nteko ule. Woohipica khiiwo inhala waahiha uvara yuupuwenlyaya. ⁷ Nrwee, nikhuruwe ni naavirikanihe nuulumo naya, wiira ahiwanane ntthu ni nkhwawe. ⁸ Vaavale, Mwaneene Nluku ahaamwarusela atthu ale ilapo yothene, ni yahohiyaca uteka iparasa ile. ⁹ Phimaana waheehaninya uPapeli, kontha vaavale Mwaneene Nluku ahovirikaniha moolumelo ottuniya yothene. Ukhuma vaavale Mwaneene Nluku ahaamwarusela atthu ale mwiilaponi mothene.

Mayaranacelo onrukulu na Seemu

¹⁰ Ala phi mayaranacelo o nloko na Seemu:

Uvira wawe naphuvu mwiilaponi, cahovira myakha miili, ni Seemu ahopiihera myakha iminya (100) ceyarelo ni ahonnyara Arifacate. ¹¹ Nannyanreene Arifacate, Seemu ahokhala nkumi mpaka myakha iminya thanu (500) ceyarelo ni ahaayara asaana akina asilopwana na asithiyana. ¹² Arifacate wapiihenryawe myakha talathini nuwa mithanu (35) ceyarelo, ahonnyara Selah. ¹³ Nannyareene Selah, Arifacate ahokhala nkumi mpaka myakha iminya cese nuwa miraru (403) ceyarelo ni ahaayara asaana akina, asilopwana na asithiyana.

¹⁴ Upiihera wawe myakha talathini (30) ceyarelo, Selah ahonnyara Heperi. ¹⁵ Nannyareene Heperi, Salah ahokhala nkumi myakha iminya cese nuwa miraru (403) ceyarelo ni ahaayara asaana akina, asilopwana na asithiyana.

¹⁶ Upiihera wawe Heperi myakha talathini nuwa micese (34) ceyarelo, ahonnyara Peleki. ¹⁷ Heperi unyara wawe Peleki, ahokhala nkumi mpaka myakha iminya cese nuwa talathini (430) ceyarelo ni ahaayara asaana akina, asilopwana na asithiyana.

¹⁸ Peleki upiihera wawe myakha talathini (30), ahonnyara Rewu. ¹⁹ Peleeki unnyara wawe Rewu, ahokhala nkumi mpaka myakha iminya piili na khenta (209) ni ahaayaraca asaana akina, asilopwana na asithiyana.

²⁰ Rewu upiihera wawe myakha talathini na miili (32) ceyarelo, ahonnyara Sirukwe. ²¹ Rewu ahokhala nkumi mpaka myakha iminya piili na saapa (207) ni ahaayaraca asaana akina, asilopwana na asithiyana.

²² Sirukwe upiihera wawe myakha talathini (30) ceyarelo, ahonnyara Nahori. ²³ Sirukwe nannyareene Nahori, ahokhala nkumi mpaka myakha iminya piili (200) ceyarelo ni ahaayaraca asaana akina, asilopwana na asithiyana.

²⁴ Nahori upiihera wawe myakha sirini na khenta (29) ceyarelo, ahonnyara Tera. ²⁵ Unyara wawe Tera, Nahori ahokhala nkumi mpaka myakha iminya imoca nuwa khumi na khenta (119) ceyarelo ni ahaayaraca asaana akina, asilopwana na asithiyana.

²⁶ Tera upiihera wawe myakha sapini (70) ceyarelo, ahonnyara Aparamu, Nahori ni Harani.

Mayaranacelo o nrुकulu na Tera

²⁷ Ala phi mayaranacelo o nloko na Tera: Tera ahonnyara Aparamu, Nahori ni Harani; ni Harani ahonnyara Loti. ²⁸ Harani akhwenle uUri yo Kasiti wayareenlyawe, ukati waryaya athumwane akumi.

²⁹ Aparamu ni Nahori yahaathelaca asaaraya. Ncina na amwaarawe Aparamu naari Sarayi, ni ncina na amwaarawe Nahori naari Milika; ula aari mwana a Harani, athumwane Milika ni Isikaa. ³⁰ Vano Sarayi aari oohiyara, khaarina asaana.

³¹ Tera ahonkusa Aparamu mwanawe, wamoca ni Loti mwanculawe, mwana a Harani, ni Sarayi mwaara a mwanawe ni othene yahorwaa ikwaha yookhuma uUri yo Kasiti

arwaaka uKanaa. Nanso uphiyaca waya yahokhalaca wonwo. ³² Tera ahokhala nkumi mpaka myakha iminya pili na thanu (205) ceyarelo ni ahokhwela uHarani.

12

Apwiya Nluku ahomwiirela Aparamu

¹ Nkwaha mmoca Mwaneene Nluku ahomwiirela Aparamu: Ukhume ilapo aa iyo, iriyari ya alokwa ni wapuwanu wa athumwana, ni urwee ilapo inhalaka wuthonyera. ² Kinawuvaha athu enci ookhuma mwirutthuni mwa mmo ni kinawuvaha iparakha, ni kinawunnuwiha ncina naa nno ni we unhala ukhala iparakha. ³ Kinawareeraha anhala wureeraha ayo ni watapaniha anhala wulaphakaca ayo. Vano mwanlattu wo we, athu othene omwilaaponi anakhala ooreerihya.

⁴ Vaavale Aparamu ahokhuma toko Mwaneene Nluku camwiirenyawe, ni warwawe va ahonthukana ikwaha Loti. Ukati wakhumawe uHarani, Aparamu ahaana myakha sapini na mithanu. ⁵ Wakhumawe va ahonkusa Sarayi mwaarawe, Loti mwana amunnawe, mihakhu cawe cothene caphwanyilyawe ni ipottha cawe cathumilyawe uHarani. Yahokhumaca arwaka ilapo yo Kanaa ni yahophiyaca salama. ⁶ Aparamu ahottupulaniha ilapo eyo mpaka uphiya nipuro no Siken. Yooyo ukati uyo annakanaa phakhala ilapo eyo.

⁷ Mwaneene Nluku ahonkumelela Aparamu phimwiirelaka: Ipyo aa iyo kinaahala uvaha ila ithaya ela. Vano ahoteka ikhilompi yoonalapelela Mwaneene Nluku ankhumelele. ⁸ Vaavale aheetta arwaka myako ciri ncoko woohitto wo Peteli. Wonwo ahonkuru-tutula heema awe, akakhelaka uPeteli moonu unkelu ncuwa ni Ayi unkhuma ncuwa. Vano ahontekela ikhilompi Mwaneene Nluku ni ahonlapela Mwaneene Nluku. ⁹ Wahoolo Aparamu ahokhuma arwaka mphantte wo Nekepi.

Aparamu ni Sarayi Wiciipitu

¹⁰ Yooyo ukati uyo ilapo iyo yahovola itala yinci. Vano Aparamu ahokhuruwela ilapo yo Wiciipitu wiira akhale ukati vakani kontha itala eyo yanatapa mwilaaponi mmo. ¹¹ Ukati wattamenryawe Wiciipitu, ahomwiirela Sarayi mwaarawe: Yoowe! Mi kihocuwela wiira we uri nthiyana ooreera venci. ¹² Phimaana annaciipitu ayo yakela yawoonaka, ankocuwela wiira: Ala amwaarawe! Vano ankokiiva ni wuhiya we nkumi. ¹³ Sontte weere mwanrokora wiira yakipanke nnema mwanlattu wo we ni commo kxanhala ukiivaca. ¹⁴ Khweeli Aparamu uphiya wawe Wiciipitu, annaciipitu yahoonaca wiira amwaarawe ayo ari ooreera venci. ¹⁵ Asuulupale a Farawoo yahomoonaca Sarayi nunttotopelela venci, mpaka Sarayi yahonkusaca uhano wa Farawoo. ¹⁶ Vano mwanlattu wa Sarayi, Aparamu ahopankiya nnema. Ule ahovahiya ikhontwaa, imope, apuuru, ipottha cilopwana ni cithiyana, apuuru onthiyana ni inkamela.

¹⁷ Nanso Mwaneene Nluku ahonrakaliha Farawoo na akhuulupale awe othene ni iretta cowoopiha mwanlattu wa Sarayi, amwaara a Aparamu. ¹⁸ Phimaana Farawoo ahomwi-hana Aparamu, ni ahomwiirela: Isiyani yeeyo ikipankilyaa iyo? Wahakihimyacyenyaa wiira ala mi amwaaraka? ¹⁹ Weerelani wiira ula mi mwanrokora? Hapo mi kahonthela! Pahi, yakhala amwaaraa wakuseke ni urweke. ²⁰ Farawoo ahomwiirela Aparamu na amwaarawe wiira akhume mWiciipitu mmo ni ahaaruma anakhotto awe wiira anevele mpaka umpikani ni citthu cothene carinawe.

13

Umwalanana wa Aparamu ni Loti

¹ Vano Aparamu ahokhuma Wiciipitu ni ahorwaa uNekepi na amwaarawe ayo, ni citthu cothene carinawe ni Loti ahonthukana ikwaha. ² Aparamu ahothaciri venci, ahaana inama, ipheetta ni iwooru. ³ Ule ahokhuma uNekepi arwaka uPeteli, mpaka ahophiya nipuro naapacenyawe unkhurutula heema nipuro niri iriyari uPeteli nu Ayi. ⁴ Ahophiya nipuro naapacenyawe uteka ikhilompi ni Aparamu ahonlapela Mwaneene Nluku.

⁵ Ciicammo Loti, antthukannyawe ikwaha Aparamu ahaana mihuwo cawe, imope na aheema. ⁶ Vano nipuro nno khanaatosa wiira oyeeli akhalace nttetthe mmoca, kontha yahaanaca mihakhu cinci cahaalamulyaya ukhala khala nipuro nimoca. ⁷ Phimaana yahokhuma ipokoho ya ahakheli a Aparamu na ayo a Loti; ni yooyo ukati uyo maKananewu ni maPerisewu yakhalaca yeeyo ilapo eyo.

⁸ Vano Aparamu ahomwiirela Loti: Va ihikhume ipokoho we ni mi, ni ihikhume ipokoho ya ahakheli aa na ahakheli aka kontha va niri ayaayoru. ⁹ Ilapo eyo khimale, va nrwee nimelane. Weeraka kinthanla moonu nthiyana mi kinhala urwa moonu nlopwana; athuna weeraka kinthanla moonu nlopwana mi kinrwa moonu nthiyana.

¹⁰ Vaavale ahowehe Loti micoko cothene niwahoncivela uthako wo Yortani, wari wuwunttelana ratta mpaka uSowari; wari toko iluwani ya Mwaneene Nluku, toko wenyaya itthaya yo Wiciipitu. Iyo yeeranele Mwaneene Nluku hinakwanyula uSotoma nuKomora. ¹¹ Loti ahothanla uthako wo Yortani eettaka arwaka unkhuma ncuwa, ni oyeeli yahomwalaanaca. ¹² Aparamu ahokhala ilapo yo Kanaa. Nanso Loti ahorwaa wakhurutula aheema awe mmaparasa ciri muuthakoni cocoo uSotoma. ¹³ Nanso alopwana yaakhalakhalaca uSotoma ayo yaari oohiloka ni yaanankosera Mwaneene Nluku.

¹⁴ Aparamu namwalanne ni Loti, ni Mwaneene Nluku ahomwiirela: Uwuse miitho aa ayo ni uwehe ukhuma nipuro niryaa mpaka mphantte wooculu ni woohitto, unkhuma ncuwa mpaka unkela ncuwa. ¹⁵ Kontha ilapo yothehe inoonaa eyo, kimmowuvaha we ni ucuulu aa wothene mpaka khalayi. ¹⁶ Ni ipyo aa kinopanka toko ntthupi no mwiilaponi mothene; maana aya ntthu ooryaka waalikela ntthupi no mwiilaponi mothene, ciicammo ni ipyo aa nahala woorya waalikela. ¹⁷ Wunwe ni weettakace ilapo yothehe. Mwiittayi waya ni mwikhuvi waya kontha kimmowuvaha we.

¹⁸ Ni Aparamu ahonkhuna heema awe, mpaka urwaa ukhala ilapo yo Manree iri cocoo Heporoni, ni anttitthimihaka Nluku ahontekela ikhilompi.

14

Mamwene macese yaanaka ikhotto ni mamwene mathanu

¹ Ila yaakhumelenle ukati waryawe mwene uSinyari eehaninya Anrafeli, Ariyoki ari mwene o Elasari, Ketolameri nari mwene o Lamu ni Titali ari mwene o Koyimi. ² Yahowana ikhotto ni Peera, mwene o Sotoma, ni Pirisa mwene o Komora, ni Sinape mwene o Atama, ni Semeperi mwene o Sepoyimi ni amwananaka ni mwene o Pela weehaninya Sowari. ³ Othene ale yahaatakaniha anakhotto aya unikuwani no Sitimi, niri ipharyaa yo maakha.

⁴ Myakha khumi na miili yahommarela nteko Ketolameri, nanso mwakha wonakhumi na miraru yahonhanyurihela. ⁵ Mwakha wonakhumi ni micese, ahowa Ketolameri ni mamwene yarinawe ni yahaatthema Amarefayimi o Asteroti-Karimeyimi ni Asusimi o Hamu ni a Emini o Save-Kiriyatayimi. ⁶ Ni Mahorewu o myakoni co Seyiri, mpaka El-Parani uri vakhiviru ni itakhwa. ⁷ Wahoolo yahoturuwa ni yahophiyaca o En-Misipati uneehaninya uKate ni yahoththema ilapo cothene ca Amalekita ni ca Amorewu, yakhala uHasasoni-Tamar. ⁸ Vano yahokhuma mamwene o Sotoma, ni o Komora, o Atima, o Sepowimi ni o Pela uneehaninya Sowari ni yaholamulelana ni wanca ikhotto yaananaka yaale onikuwani no Sitimi, ⁹ amwaanana Ketolameri, mwene o Lamu ni Titali mwene o Koyimi ni Anrafel, mwene o Sinar, ni Ariyoke, mwene o Elasar. Mamwene macese yaanaanaka mamwene mathanu. ¹⁰ Vano nikuwa no Sitimi nahocara maliti o marove. Mamwene o Sotoma nu Komora yahothhawa. Akina yahovariya ni yahanle ayo yahoththawela umwakoni. ¹¹ Yahokusaca mihakhu cothene co Sotoma ni uKomora ni coolya caya cothene ni yohorwaca. ¹² Ni ciicammo ahovariya Loti, mwana a munnaawe Aparamu, akhala oSotoma, ni mihakhu cawe ni yahokhumaca.

¹³ Nanso ahowa mmoca ootopweele, phunttonkelaka Aparamu, Nheperewu; aakhala ncoko wo Manre, Mmorewu, munnaawe Esikole ni Aneri, othene yari asikhwawe Aparamu. ¹⁴ Wiiiwa wawe Aparamu wiira mwana amunnawe hotthukiya, ahaakumiha alopwana iminya ttharu nuwa khumi na nanne (318), yayareliye wapuwani wawe ni yahoomolanihaca mpaka uTani. ¹⁵ Ni yahokawanaca uhiyu yaavyaka mananna owaatthema. Uyo ni ipottha cawe, yaheevaca eenani ni akina ayo woomolanihaca mpaka uHopaa, unkhala mphantte wonthiyana wo Tamasiku. ¹⁶ Ni ahaakihera mihakhu cothene ni ahomwakihera Loti mwana amunnawe, ni mihakhu cawe, athiyana othene ni ananthukiya othene yariwo.

Aparamu ni Melekesatiki

¹⁷ Mwene o Sotoma ahomwikamela Aparamu akhumaka okhottoni yonrakaliha Ketolameri ni mamwene yarinawe onikuwani no Save, niri nikuwa na amwene.

¹⁸ Melekesatiki, mwene o Salemu, ahowiha nkatthe ni ivinyu ni yooyo ari nhooleli ottiini ya Nluku o wirimu. ¹⁹ Ahonreeriha numwiirela: Nluku muulupale mwaneene irimu ni itthaya oreeriheni Aparamu.

²⁰ Ni attottopeliye Nluku o wirimu oovahile eenani mmatatani mwaa.

Ni ahommaha mphantte wonakhumi wo citthu cothene carinawe. ²¹ Ni mwene o Sotoma ahomwiirela Aparamu: Ukivaheke atthu ayo, weva ukuseke mihakhu nnyo.

²² Nanso Aparamu ahomwiirela mwene o Sotoma: Kihowusa matata aka kilupelaka wa

Mwaneene Nluku, Nluku Ooculu, mwaneene irimu ni itthaya. ²³ Akinthhuna ithu phi itthu iri yawaa, hata nripwe wokwakwaatta caa, wiira we uhikiirele: Kihonthaciriha Aparamu. ²⁴ Khiwo imphavelaka, kahiki yoolya iliyaya ipottha caka ni mphantte ommwaca Aneri, Esikoli ni Manree, yakiveleenle. Ayo yakheleke mphantte aya.

15

Nluku nankhuluveliha mwana

¹ Cinavinrene nnya citthu nnya, nuulumo na Mwaneene Nluku nahowa waAparamu munttorani:

Uhoove, Aparamu! Mi

phi mi, mwaakahi aa.

Itthuvo aa inhala ukhala yuulupale.

² Nanso Aparamu ahokoha: Pwiya Nluku, unhala ukivahani, kamana nanlelo akirina mwana ni nohala uhalana cirinaka phi Eliyeseri o Tamasiku? ³ Ni ahoncerera tho eeraka: We khukivahile mena mwana! Karumeya aka phinhala ukhala nkalanupa aka.

⁴ Vano Mwaneene Nluku ahomwaakhula eeraka: Nkalanupa aa kxanhala ukhala uyo. Mwana oonyara yo weva phinhala wuurantela. ⁵ Ankumiheraka vate inupa, ahomwiirela: Uwehe wirimu ni waalikele itthoottwa, wooryaka waalikelala. Ni ahopwaherera eeraka: Nloko naa nno phinhala ukhala toko nnya itthoottwa nnya.

⁶ Aparamu ahonkupali Mwaneene Nluku ni yeeyo yahopankiya ukhala ikhweeli aya.

⁷ Ahomwiirela nanlelo: Mi Mwaneene Nluku kuukumihile Ur yo Kasiti wiira kuvahe ila ilapo ela ukhala yawaa.

⁸ Aparamu ahonkoha eeraka: Pwiya Nluku, kinhala ucuwela cani wiira khweeli kim-mopattha?

⁹ Ule ahomwaakhula: Ukiwiihere mwamope, ipuri ni ikhontwaa, cothene cokhalana myakha miraru cookumi ni ciicammo nciya nimoca ni ikhunnta imoca.

¹⁰ Aparamu ahowiha cothene nyene inama nnye, ahottupula iriyaruru ni aheekathi khula mphantte uhoole wa nkhwaya, nanso asanuni ayo khattupulanihile. ¹¹ Vano inaka cahopacera ukhuruwela vanamani vale, nanso Aparamu anhakha. ¹² Wakelaya ncuwa, Aparamu cahomola ikhove cuulupale ni yahommwela iphiphi yiinci.

¹³ Vano Apwiya yahomwiirela: Ucuwele wiira uneethi aa unkokhala ilapo ihiri yawaya, inkelaya upankiye ipottha ni uhuvihya myakha iminya cese. ¹⁴ Nanso mi kimmottarusa ilapo inhala wupankani ipottha ni wahoolo mumokhuma ni mihakhu cinci. ¹⁵ Nanso we unaahala urwaa ni mpuha waanhakhalayi aa ni unhala uvithiya unooluvanle cinenne.

¹⁶ Nloko noneecese, uneethi aa unaturuwela va kontha utakhali wa Amorewu khunaya uphiya nliapa naya.

¹⁷ Wahoolo ncuwa ninakenlene ni iwaaka iphiphi, yahoonya niikho yotthuwa mwiisi ni nthuko woopharela wahovira nmanani coottupulanihaciya nye. ¹⁸ Nenne nihuku nne Mwaneene Nluku aholeehana ni Aparamu. Uneethi aa kihovaha ilapo ela ukhuma mooloko wo Wicipitu mpaka mooloko muulupale uneehaninya Ufarati, ¹⁹ ilapo yo maKenii, yo maKenesii, yo maKetimonii; ²⁰ yo maHitita, yo maFeresii; yo maRefayinii, ²¹ ya Amorewu, yo maKanaa, yo maKirkasii ni yo maYepusii.

16

Uyarya wa Sumayili

¹ Vano, Sarayi, amwaarawe Aparamu khaayanre. Kamana ahaana ipottha awe yo mwanthiyana o Wicipitu, eehaninya Hakari. ² Sarayi ahomwiirela Aparamu: Kamana Mwaneene Nluku hokateliha uyara, nkuseke ipottha aka. Pooti kinapanka nloko nhina mo yeeyo. Aparamu ahewelela yahimilyawe Sarayi. ³ Wakhumelenlyaya ukati wapihenryaya Aparamu awaanyawe myakha khumi akhalaka uKanaa. Wari yooyo ukati uyo, Sarayi wanvahile awe Aparamu ipottha awe yo Wicipitu yiihanilyaka Hakari. ⁴ Uyo ahonthukumanana Hakari ni ahorupala. Woonyaya irukulu, Hakari ahopacera waweha nseru athiyana a akunya awe.

⁵ Vano Sarayi ahomwiirela Aparamu: Wumorele yo weva ula uruttu ula ukihuvihya waa. Kihooovaha ipottha aka mmatatani mwaa, vano woonyaya wiira ihorupala, inakitarawa. Mwaneene Nluku akhale mayohukhumu; ni mayonihukhumu mi ni we. ⁶ Aparamu ahomwaakhula Sarayi: Ipottha aa iri mmatatani mwaa. Upanke inhala wucivela. Vano Sarayi ahonhuvihya Hakari mpaka ule utthawa.

⁷ Ncelo aApwiya ahomphwanya Hakari vakhiviru ni ilusi muthakoni, ni iphiro irwaa uSuri, ⁸ ni ahonkoha: Hakari, ipottha ya Sarayi, unkhuma vayi? Unkela vayi? Ule ahaakhula eeraka: Kinonththawa Sarayi, nkunya aka. ⁹ Ncelo a Mwaneene Nluku

ahomwiirela: Uturuwele wa nkunya aa ni weevaherere wa yooyo. ¹⁰ Ncelo aheera tho: Kimmowuncerera nloko naa ni khaawo nohala woorya waalikela. ¹¹ Aheereliya tho ni Ncelo a Mwaneene Nluku:

We uhorupala ni unamphwanya mwana
ni urwaa ummaha ncina na Sumayili,
kontha Mwaneene Nluku homwiiwa muhuvani mwaa.

¹² Uyo nohala ukhala toko mwaapuru oontakhwani.

Ntata nawe ninhala ukhala no waanana othene
ni matata a atthu othene anhala ukhala umwanana uyo,
ni makhalelo awe anhala ukhala uwaana na asunnawe.

¹³ Nna phi ncina nanvahilyawe Mwaneene Nluku amuulumannyawe: We El Royi, kontha enre: Kihomoono ule nokoona? ¹⁴ Phimaana ilusi iri iriyariru o Kattes ni Perete, wiihaninye iluusi yo Lahayi-Royi.

¹⁵ Hakari ahonnyara mwana a Aparamu ni ule ahommaha ncina na Sumayili. ¹⁶ Aparamu aarina myakha thamanini na siita (86) ceyarelo ukati wannyanryawe Hakari Sumayili.

17

Wuula icantto phi ikanyero yo nleehano

¹ Aparamu unhaleelaka mwakha mmoca wiira apiihere iminya (99) ceyarelo, ahomphwanyinya ni Mwaneene Nluku ni ahomwiirela:

Phi mi Nluku Okuru Cothene.

Weette toko cinthunaka ni wiivaherere wa mi.

² Kinawuleehanana we.

Kinawuncerera venci ucuulu aa.

³ Aparamu ahooromela vathi ni Nluku ahomwiirela: ⁴ Uviriyane. Nna phi nleehano naka we ni mi. We unhala ukhala athumwanaya ilapo cinci. ⁵ Khunhala wiihaninya tho Aparamu. Ncina naa ninhala ukhala Aparahamu, kontha mi kihoohelela ukhala athumwanaya ilapo cinci.

⁶ Kinaahala uwunnuwiha venci ni nhina mwawe kinapanka maloko menci mwawe ammokhuma mamwene. ⁷ Kimmopanka nleehano naka mi ni we ni ucuulu aa uttuli waya mmalokoni mwaya, wiira kikhale Nluku aa ni Nluku a alokwaa, nimmokhala nleehano noohimala. ⁸ Ilapo yothene yo Kanaa, uryaa nletto, kimmowuvaha toko yawaa mpaka khalayi; we ni ucuulu aa ni mi kinhala ukhala Nluku aya.

⁹ Vaavale Nluku ahomwiirela tho Aparahamu: Usunke nleehano naka, ukhuma we mpaka ucuulu aa wothene unhala ukhalana. ¹⁰ Nna phi nleehano naka kimpankaka we nu ucuulu aa, ninlamuliya usunkiya, alopwana othene nhina wa nyu, anlamuliya wuula icantto. ¹¹ Nnolamuliya upanka ila icantto ela toko ikanyero yo nleehano naka mi ni we. ¹² Ukhuma nloko naa urwaka uhoolo, mwana mwanlopwana rina mahuku nanne, nolamuliya wuula icantto, akhale ooyariya wapuwani waa hata nayo oothuminya toko ipotha pooti ohikhala alokwaa. ¹³ Akhale ooyariya wapuwani waa, atthuna oothuminya ni nsuruku, anlamuliya wuulihya icantto wiira nleehano naka nooheliya ikanyero mwirutthuni mwinyu nikhale nleehano noohimala. ¹⁴ Ntthu phi ntthu mwanlopwana oohuula icantto, nolamuliya ukumihinya iriyari wo uneethi aka, hohanyuriha nleehano naka.

Asaara anannyara mwana

¹⁵ Nluku ahomwiirela tho Aparahamu: Ukhuma nenna vaa mpaka wahoolo, amwaaraa kxanhala wiihaninya tho Sarayi. Ncina naya ninhala ukhala Asaara. ¹⁶ Mi kinawareeriha ni nhina wa yaayo kinnowuvaha mwana. Khweeli, mi kinawareeriha ni mwa yaayo ammokhuma maloko, mamwene ni ilapo ca atthu.

¹⁷ Vano, Aparahamu ahooromela vathi, ahothya ni aheera: Wanawooryaa nlopwana o myakha iminya (100) ceyarelo unnyara mwana? Wanawooryaa Asaara uyara toko wari-naya myakha miloko mithanu na micesei (90)? ¹⁸ Aparahamu ahomwiirela Nluku: Unhiye Sumayili akhale nkumi wamiithoni waa. ¹⁹ Vano Nluku ahomwaakhula: Khweeli Asaara amwaaraa, unannyarana mwana ni we unnomwiihana Isaki. Ni yooyo kimmopankana nleehano noohimala wamoca nu ucuulu awe wothene. ²⁰ Mwaha wa Sumayili, kiheewa. Uviriyane. Kinonreeriha, kinnonvaha atthu enci ni kimmowuncerera ucuulu awe. Uyo nohala ukhala athumwanaya mamwene khumi na meeli ni nhina wo yooyo immokhuma ilapo yuulupale. ²¹ Nanso nleehano naka, mi kinhala upanka ni Isaki, mwana nohala

unnyara Asaara mwahiyu yoola ukati ula. ²² Wamanlyawe wuulumaca na Aparahamu, Nluku ahothama nuuwela.

²³ Nenno nihuku nno, Aparahamu ahonkusa Sumayili ni othene yayarenle wapuواني wawe na ale yathuminye, alopwana othene owapuواني wawe ahooliha icantto toko Nluku canlamulenlyawe.

²⁴ Ukati woolihiyaya, Aparahamu wahalela mwakha mmoca wiira apihere iminya (99) ceyarelo ²⁵ ni mwanaya aarina myakha khumi na miraru. ²⁶ Aparahamu ni Sumayili yoonle icantto nenno nihuku nno. ²⁷ Wamoca na Aparahamu, yahoolihya icantto athu othene owapuواني wawe, ooyareela vava na ale oothuminya uttayi.

18

Aletto araru wa Aparahamu

¹ Nihuku nimoca ukati woothana Mwaneene Nluku ahonkhumelela Aparahamu nonkomile wankhora wo heema ankhuruttunlyawe mmitthucini co mooko co Man-ree. ² Aparahamu ahowusa miiitho awe ni ahoona alopwana araru anamwemeleene vakhiviru. Woono wawe ahonwa wankhora wonkomilyawe ni wowakuvyaca wene aheekamela ni ahooromela mpaka vathi. ³ Aheera: Pwiya, wakhala wiira wanakiphwanela, nhipwahe wakarumeya enyu, woheemela. ⁴ Kinaruma wiira awaaniye maasi wiira nrapihe inyaa cinyu ni mmumule vathi mwiri ula. ⁵ Kinawuwiiherani yoolya wiira mphwanye ikuru, wahoolo nnapwahaka ukhala wiira nhophiya wakarumeya enyu. Ale yahaakhulaca: Aye, upanke toko cuulumacilyaa.

⁶ Wowakuvyaca wene, Aparahamu ahokela nheemani ni aheerela Asaara wiira ahaawule iphepa yotteela ya athu araru, ni anyatte ni apanke mikatthe. ⁷ Wahoolo ahorwaa muncini ni ahonthanla mwaamope omaana, ahonvaha ipotha awe wiira anthenkace wowakuvyaca. ⁸ Ahowana nhuci wookikitthiya, ileeti ni ipilipica onama catthenkacye ni ahaavahaca. Alyacaka ono, yaheemelelaca wantthucini.

⁹ Vano yahonkohaca: Amwaara Asaara ayo, ari vayi? Ule ahaakhula: Ari nheemani mwe. ¹⁰ Vano nlopwana mmoca aheera: Kinawuphwanya tho mwaahiyu ni amwaaraa Asaara kinhala waphwanyana ni mwana. Asaara yeera yiiwaka moolumo ayo nari wiithela nkhora wo heema.

¹¹ Aparahamu ni Asaara yahooluvalaca venci ni Asaara wahaanvirela ukati wooyara. ¹² Phimaana yahothyaa veekhawee yupuwelaka wiira, kinooluvanlene wanaahala ukitteeliha tho nrima?

¹³ Nanso Mwaneene Nluku ahomwiirela Aparahamu: Asaara ayo anthyani yiiraka: Khweeli kinaahala uyara mi kinooluvanlene? ¹⁴ Ihaawo ithu inolwanawe Mwaneene Nluku? Kinawuphwanya tho mwaahiyu yoola ukati ula ni Asaara kinhala waphwanyana anayanre. ¹⁵ Vano Asaara yahooava phimaana yahoruna yiiraka: Mi akithyele. Ule aheerela: Nhirune, nthothyaa nyu.

Aparahamu naswalela uSotoma ni uKomora

¹⁶ Vano alopwana ale warwaya yahoono uhitto nwo ilapo yo Sotoma. Aparahamu ahaavelelela ni waleeha. ¹⁷ Vaavale Mwaneene Nluku aheera: Kinanvithela Aparahamu ithu inhalaka upanka, ¹⁸ ukhala wiira Aparahamu nohala ukhala athumwanaya ilapo yuulupale ni yokuru, ni mwanlattu wo yooyo ilapo cothene cinareerihya. ¹⁹ Kontha mi kihonthanla wiira aahimerye asaanawe ayo ni ucuulu awe uyo wiira yiisunke mphironi mwa Mwaneene Nluku, apaankaka coosariya ni ceekhweeli wiira Mwaneene Nluku anvaha Aparahamu citthu cinkhuluvelihiyawe.

²⁰ Mwaneene Nluku aheera tho: Cinriyeleliyaya a Sotoma ni a Komora ciri ciinci ni itaampi caya nnyo cihotepa. ²¹ Kinakhuruwela wonwo koone wakhala wiira cinhiminya nnyo ciri ceekhweeli, cakhala cowoothiya kacuwele.

²² Vano alopwana ale yahokhumaca arwaka uSotoma nanso Aparahamu ahohala ninlelo ni Mwaneene Nluku. ²³ Aparahamu ahaattamerya ni aheerela: Unantankanyaa nasariya wamoca ni nkaafiri? ²⁴ Kaahiki yakhalaka anasariya hansii ni mparasa mmo nanlelo nnatankanyaa ni khannohala unemecera nipuro nno mwanlattu wo wafenta anasariya hansii ariwo ayo? ²⁵ Yukhaleni uttayi upanka yeeyo ithu iyo, umwiiva nasariya wamoca ni nkaafiri toko wiira oyeeli ayo analikana, yukhaleki uttayi! Khanhala wuuluma wosariya hukhumu olapo yothene?

²⁶ Mwaneene Nluku ahaakhula: Mi kaaphwanyaka anasariya hansii ni uSotoma nwo, mwanlattu wo wafenta yaayo, kinaahala unemecera iparasa eyo yothene.

²⁷ Aparahamu ahaakulela tho: Kihocuwela wiira kihocurweelani uwuulumanani Pwiya, mi kinari ntthupi ni ittura. ²⁸ Nanlelo kinakoha: Kaahiki yahalaka athanu wiira

aphiyere anasariya hansiini? Nnatankanyaa iparasa eyo mwanlattu wo yaayo athanu ayo? Ayo yahaakhula: Kaaphwanyaka nwo arupayini nathanu akintankanya.

²⁹ Ahaakhanyereriha Aparahamu: Kaahiki mwaphwanyaka arupayini paahi? Ayo yahomwaakhula: Mwanlattu wowafenta atthu arupayini ayo, akintankanya.

³⁰ Vano ule ahopwaherera: Nhiviruwe Pwiya, nkilevele kuulume. Kaahiki mwaphwanyaka talathini pahi? Mwaneene Nluku ahomwaakhula: Kaaphwanyaka talathini akintankanya.

³¹ Aparahamu aheera tho: Kihocuwela wiira kihocurweelani uwuulumanani Pwiya; kaahiki mwaphwanyaka nwo siriini? Mwaneene Nluku ahaakhula: Mwanlattu wowafenta siriini ayo, akintankanya.

³² Vano Aparahamu aheera tho: Nhiviruwe Pwiya, nanso nkilevele wiira kuulume ikwaha imoca pahi. Kaahiki mwaphwanyaka khumi pahi? Mwaneene Nluku ahaakhula: Mwanlattu wo wafenta khumi ayo, akintankanya.

³³ Namanleene umuulumana Aparahamu, Mwaneene Nluku ahokhuma ni Aparahamu ahoturuwela uwaani.

19

Ancelo eeli yahophiyaca uSotoma

¹ Wakelaya ncuwa nno ancelo eeli ale yahophiyaca uSotoma, ni Loti onkomile wankhora woparasa. Ukati woonnyawe ahoonwa ni ahorwaa wakhelelaca. Ahokhoroma ni ahopiiha iyuci awe vathi, ² ni aheerelaca: Asuulupale aka, sontte. Nkivelele mpani wa karumeyi inyu. Wonwo nnaahala urupa nuurapa. Wasaka meelo mpwaweke nrwaka. Ayo yahaakhulaca: Mena, ninkorupa vate. ³ Nanso ule ahaakhanyereriha, ni ale yahommelelaca ni yahokelaca mpani. Loti ahoruma watthonkomanerihaca yoolya ni woosa mikatthe cohi miropo, ni ale yaholyaca.

⁴ Ahinaya urwaca wurupani, alopwana othene o miphantte cothene co Sotoma, ukhuma acikani ni oolupale yahovirelaca inupa eyo. ⁵ Ni yahomwiihanaca Loti amwiirelaca: Ari yayi alopwana awacile wapuani waa ayo ula uhiyu ula? Uniwiihere vate va nimphavela waarupana. ⁶ Loti ahokhuma mpani mmo, ni ahotthyaa nkhora uyo ntuli ntuli, ⁷ ni aheerelaca: Mena asimpwanaka! Nhipankace itthu yoonanara! ⁸ Moonace, kihaana asaana eeli asithiyana asimwarusi. Kinawawana wiira nyu mwapankace itthu imphavelenyu. Nanso ala asilopwana ala nhaapankace itthu, kontha ari mmatatani mwaka ni ankhikicera ipuwa aka. ⁹ Yahokhuwelaca yiiraka: Ukhume va! Ni yaheeraca tho: Ula nlopwana ula ri nletto, vano nophavela ukhala mayoohukhumu! Ninkowupanka we itthu yootepa wavikana ayo. Vano yahonkakhaca Loti wonkhitto ni yahorwaa uhoole wiira yaakace nkhora. ¹⁰ Commo, aletto eeli ale yahonvaraca Loti nuumpurulela mpani ni yahotthyaca nkhora oyo. ¹¹ Vano yaharakalihaca ni iretta yohoona alopwana yari wankhora wonupa ayo, ukhuma acikani mpaka asuulupale ayo, mpaka wahinooryaya uphwanya nkhora.

Nluku ahokurusela mooro iparasa yo Sotoma ni uKomora

¹² Alopwana eeli ale yahonkohaca Loti: We uhaana tho ntthu mparasani mu, mivokohica, asaana asilopwana na asithiyana, atthuna mmuci nkina? Mwatamihace va, ¹³ kontha nimphavela ukwanyulaca nna nipuro nna. Cinariyelelawe Mwaneene Nluku ala atthu ala ciri cinci, phimaana honiruma ukwanyula iparasa. ¹⁴ Vano Loti ahorwaa wuulumana mivokohi cawe, ale yahala waathelaca asaanawe, ni yaheerelaca: Nkhumace wowakuvyaca nna nipuro nna, kontha Mwaneene Nluku nophavela ukwanyulaca iparasa ela! Nanso ayo yahopuwelaca wiira uyo aanawathwelana.

¹⁵ Ukhuma waya ncuwa, ancelo ale yahonkhanyereriha Loti yiiraka: Wakuve! Wakuse amwaaraa na asaana eeli, atthuna ni yu nnaahala ukhwaca wanhalaya utarusiya iparasa eyo. ¹⁶ Amananihaka ukhotta, asilopwana ale yahommaraca moonoo oyo, wamoca na amwaarawe na asaanawe, ni yahaakumihaca nipuro nno wokuru ni yahohiyaciya uta waya iparasa, kontha Mwaneene Nluku ahoonelaca ikiriri. ¹⁷ Ukumihiya waya mparasa mmo, ncelo mmoca ahomwiirela Loti: Nthawe mwanlattu wofenta ukumi! Uhiwehe uttuli wala uheemele nipuro nnikuwani! Utthawele umyakoni, atthuna we nnaahala wiiviya!

¹⁸ Wahoolo Loti aheerelaca: Mena, Pwiya aka! ¹⁹ Karumeyi inyu hokhala uwoopwa mwanlattu wokiriri cinyu, kontha nyu nhokoonela ikiriri nrattavelelaka ukumi aka. Aki-noorya utthawela mpaka umwakoni, wiira yowerya ila ihikiphwanye ni mi kikhwaaka. ²⁰ Vakhiviru va ihaawo iparasa yankani. Iri vakhiviru cinenne wahoreera utthawa mpaka uphiya wonwo. Nkihiye kirwee wonwo! Hata ikhale yankani cinenne, kinkokhala uwoopwene. ²¹ Ule ahaakhula: Wahoreera. Mi kinaahala wukavihera yeeyo ivekenlyaa

eyo. Akinhala ukwanyula iparasa inhimilya eyo. ²² Wakuve utthawe. Akinhala upanka ithu we uhinaya uphiya wonwo. Phimaana iparasa iyo yihiyaniyaka Sowari, manaaya ikani.

²³ Loti, uphiya wawe uSowari, ncuwa nahokhuma mwilaponi mmo. ²⁴ Vano Mwaneene Nluku ahokurusela ilapo yo Sotoma nuKomora mooro wowopiha wookhuma wirimu. ²⁵ Commo yahokwanyula nye iparasa nye ni nikuwa nothene, wamoca na athu yakhalaca ayo ni imatta caya nyo. ²⁶ Nanso amwaarawe Loti yahowehe uttuli ni yahothatuwa iruwa yo maakha.

²⁷ Wasilyaya, Aparahamu ahonwa ni ahoturuwela nipuro namoonananyawe Mwaneene Nluku. ²⁸ Ni ahoweha uSotoma nuKomora, nu nikuwani nothene, ni ahoona mwiisi mwinci uwelaka ukhuma vathi, toko mwiisi wo nttukutthani.

²⁹ Ukati wakwanyunlyawe iparasa ciri unikuwani, Nluku ahomuupuwela Aparahamu ni ahonkumiha Loti mmasakhani wokwanyuliya iparasa cakhalawe.

Loti ahokhuma uSowari na asaanawe eeli asithiyana

³⁰ Loti ahokhuma uSowari na asaanawe eeli asithiyana ni yahorwaca ukhala umyakoni, kontha anawoova ukhala uSowari. Ule akhala nnikhukuni wamoca na asaanawe eeli asithiyana.

³¹ Nihuku nimoca, mwana mwanthiyana omuulupale, ahomwiirela omwankani uyo: Apaapehu ahooluvala, ni khaawo nlopwana vakhiviru unithela toko ilemalelo yolapo yothene. ³² Nrwee naavahe nipha apaapehu ni wahooo va nathukumananeke wiira nloko nihi nihikhwelakhwele. ³³ Yoole uhiyu ule yahaavahaca nipha apaapaya. Vano mwana mwanthiyana oomuulupale uyo ahokela ni ahaathukumanana athumwane. Ni ale khayaacuwenlenle ukati warupilyawe ni wonwilyawe. ³⁴ Usa waya, mwana mwanthiyana oomuulupale uyo ahomwiirela omwankani uyo wiira: Uhiyu kihaathukumanana apaapa. Nrwee naavahe tho nipha ula uhiyu ula, ni we unaahala waathukumanana, wiira nihikhwelakhwele nloko na apaapehu. ³⁵ Vano tho yahaavahaca nipha athumwanaya yoole uhiyu ule, ni mwana mwanthiyana omwankani uyo ahorwaa wathukumanana. Ni ayo khayaacuwenlenle ukati warupawe ni wonwilyawe. ³⁶ Commo, asaana oyeeli a Loti yahorupalihaciya na athumwanaya.

³⁷ Omuulupale uyo ahonnyara mwana, ni ahommaha ncina na Mwape. Yooyo phiri athumwane Amwape oleelo. ³⁸ Omwankani uyo ciicammo ahonnyara mwana, ni ahommaha ncina na Pin-Amii. Ula phiri athumwane athu Amonii oleelo.

20

Aparahamu na Apimeleke

¹ Aparahamu ahokhuma vale arwaaka nttette the wo Nekepe ni ahorwaa ukhala iriyaruru Katesi nuSuri. Wahooo ahokhala ukati vakani uKerari. ² Uyo eerela: Asaara wiira mwanrokoraka. Vano, Apimeleke, mwene uKerari ahoruma urweliya Asaara ni ahaakusa ukhala awawe. ³ Yooyo uhiyu uyo Nluku ahowa waApimeleke munttorani ni ahomwiirela: We unaakhwa! Athiyana yakusilyaa ayo ahotheliya. ⁴ Nanso Apimeleke, hinaya waarupana aheera: Pwiya, nnowa ukwanyula uneethi wohicuwela ithu? ⁵ Kahimmwe yooyo phikiirene: Nthiyana ola mwanrokoraka? Ni ayo khayinre: Nlopwana ola nrokoraka? Ipankilyaka iri yo nrima wooreera ni wohinlattu.

⁶ Vano Nluku ahomwaakhula munttorani: Aye, mi kinacuwela wiira upankile ithu iyo ni nrima wooreera. Mi kihohiha wiira uhikufuru phimaana kiwathelihaka warupana. ⁷ Vano waturusele athiyana ayo wa awannyaya. awannyaya Ayo nnapiyu, ni anawuswalela wowufentelela, wiira we uhikhwe. Nanso wahaturuseke ukupali wiira we ni awaa othene nnakhwaca.

⁸ Wasilyaya wicisuru Apimeleke ahaalattula mahumu awe ni wattonkela cothene cankhumelenle, ni yahoovaca venci.

⁹ Wahooo Apimeleke ahomwiirela Aparahamu ni ahomwiirela: Unipankile cani? Kukosenre isiyani mpaka ukikosiha venci ni omwene aka wothene? Ikipankile iyo khampankiya nthu. ¹⁰ Ni Apimeleke ahonkoha Aparahamu: Yupankihile isiyani commo? ¹¹ Aparahamu ahaakhula: Kahoopuwela wiira: Khweeli khaawo nomoova Nluku nna nipuro nna ni kinawiviya nlattu wa amwaaraka. ¹² Uhiya commo, ayo khweeli mwanrokoraka mphantte wa apaapa, nanso wohikhala mpanite wa maama. Vano ahokhala amwaaraka. ¹³ Ni Nluku wakikumihilyawe uwaani wa apaapa, mi kaheerela amwaaraka ayo: Nkiweele irati: Nipuro phi nipuro ninhalehu uphiya, nkiireleke wiira: Ule nrokoraka.

¹⁴ Vano Apimeleke ahowiha ikhontwaa ni imope, ipottha cilopwana ni cithiyana, ahommaha Aparahamu ni ahonturusela amwaarawe ayo. ¹⁵ Ni Apimeleke aheera: Ilapo

aka iri ni we. Ukhaleke nipuro phi nipuro ninoocivela. ¹⁶ Apimeleke ahomwiirela Asaara: Arokoraa ayo kihaavaha ncurukhu elufu (1000) wopheeta, wiira walivyane wutthekenlyaka va wamiithoni wa atthu othene. Commo othene phinhalaya ucuwela wiira we khiwo incuwelaa yookosa.

¹⁷ Wahoolo, Aparahamu ahonvekela Nluku wiira avone, ni Nluku ahomvoniha ni amwaarawe ni ipottha cawe, mpaka yahanca uyaraca, ¹⁸ kontha Mwaneene Nluku ahaapankaca eekupa asithiyana othene a Apimeleke nlattu wa Asaara, amwaara a Aparahamu.

21

Uyarya wa Isaki

¹ Mwaneene Nluku ari ooloka ni Asaara, toko camwiirenlyawe, ni ahompanka toko cankhuluvelihilyawe. ² Ukati wacilyawe Nluku, Asaara ahonnyara mwana ni ahommaha Aparahamu nooluvanle. ³ Mwana annyarannyawe Asaara, Aparahamu ahommaha ncina na Isaki. ⁴ Isaki wapiihenryawe mahuku mathanu na mararu ookumi, Aparahamu ahomuuliha icaantto, toko calamuleliyawe ni Nluku. ⁵ Ukati wannyanryawe Isaki, Aparahamu ahaana myakha iminya (100). ⁶ Asaara aheera: Nluku hokiteeha, ni othene anhala ucuwela ila itthu ila anaahala uthyaa ni mi wamoca. ⁷ Ni ahopwaherera eeraka: AACuwela tipani wiira Asaara anhala umwaamwiha mwana? Mothene mmo, mi kihommaha mwana Aparahamu nooluvanle.

Uthama wa Akaari ni Sumayili ntthoko na Asaara

⁸ Isaki ahonnuwa ni ahohiihiya nipele. Ni nenno nihuku nno Aparahamu ahopanka isukuhuulu. ⁹ Woonnyaya Asaara wiira mwana a Akaari, munnaciipitu, annanveha Isaki, ¹⁰ yahomwiirela Aparahamu: Umoomole Akaari ni mwanawe uyo, kontha mwanaka mi kxanhala ukhala nkelanupa wamoca ni ula mwana ula. ¹¹ Iyo yahoncukuliha venci Aparahamu kontha ahokela mpwiini mmo mwanawe. ¹² Nanso Nluku ahomwiirela Aparahamu: Uhicukulace nlattu wo mwana ni wopottha. Upanke yothene inhalaya uhimya Asaara, kontha nhina mwa Isaki phinhalaya ulemelihiya amucyaa ayo. ¹³ Nanso, ciicammo nhina wa mwana eepottha unakhala uneethi, kontha ni uyo ri mwanaa.

¹⁴ Wasilyaya wicisuru, Aparahamu ahokusa mikatthe ni nipinka no maasi oocareene, phunvahaka Akaari wiira akuse wanikhatani wawe ni ahonleeha wamoca ni mwanawe ule. Uyo ahottotta nttala, phurwaaka arukureryacaka itakhwa yo Peresepa.

¹⁵ Wamanlyaya maasi nnipinkani mmwe, ahonhiya mwanawe waniphumpuluni ¹⁶ ni ahonkoma vakhiviru wene, mattalivelo aya yaari toko wanvelavelaya muupa wovonyinya ni muura, kontha eera: Akinthuna umoona mwanaka akhwaka. Ni nonkomilene vaavale, ahopacera wunla.

¹⁷ Nluku aheewa wunla wo mwana, ni ncelo a Nluku o wirimu, ahomwiihana Akaari ni ahomwiirela: Unocukulani, Akaari? Uhoove, kontha Nluku heewa wunla wa mwanaa nwo nipuro nimweesilyaa nno. ¹⁸ Unkuse mwanaa uyo, kontha nhina mwa yooyo kimmopanka uneethi mwinci.

¹⁹ Vano Nluku ahontthukula wiitho Akaari ni ahoona iluusi. Ahorwaa mpaka nenne nipuro nne, ahocariha maasi nnipinkani mmwe nuunvaha mwanawe wiira awurye.

²⁰ Nluku ari ni mwana uyo. Uyo ahonnuwa, ahokhala ntakhwani ni ahokhala mayolupattha ni muura. ²¹ Aakhala itakhwa yo Paraa, ni anumwane yahomphavelela nthiyana olapo yo Wiciipitu.

Aparahamu nawaatana ni Apimeleke

²² Yoole ukati ule, Apimeleke naveleeliyene ni Fikoli, nhooleli aanakhotto awe, ahomwiirela Aparahamu: Nluku ri ni we ni cithu cothene cimpankaa. ²³ Vano, ukilupelele, wamiithoni wa Nluku, wiira khunkithepya tho, ukhuma mi mpaka asaanaka nu ucuulu aka wothene. Ulokihe ilapo iwakhelenle unari nletto ni malokelo yupakilyaka. ²⁴ Aparahamu ahaakhula eeraka: mi Kiholupela.

²⁵ Nanso Aparahamu ahonkuphula Apimeleke nlattu woluusi yakhiyaya ipottha cawe ni nkhitto. ²⁶ Nanso Apimeleke ahomwaakhula: Akinoncuwela pankile iyo itthu iyo. Khunakihimerya itthu, ilelo va phincuwelaka.

²⁷ Paahi, Aparahamu ahowiha ikhontwaa ni imope, phimmahaka Apimeleke ni othene yaholehana itthu imoca. ²⁸ Aparahamu ahothandlela nipuro naya ikhontwaa saapa. ²⁹ Apimeleke ahonkoha eeraka: Inthoonyera isiyani ikhontwaa saapa cikumihilyaa munhuwoni mmo? ³⁰ Uyo ahaakhula: Uthhune ikhontwaa cinoovahaaka nnya, toko usaahiti wocuwanyaa wiira thi mi kithipile ilusi ila.

³¹ Phimaana nne nipuro nne nihaaninyaka uPeresepa, kontha oyeeli wonwo phaatanacilyaya. ³² Anaatanacilene uPeresepa, Apimeleke ni Fikoli, nhooleli anakhotto awe, yahohokoleela ilapo yo maflistiya. ³³ Aparahamu arwaaka ahomphattyaa wepa

uPerisepa ni vaavale aholapela ncina na Mwaneene Nluku Oohimala. ³⁴ Ni Aparahamu ahokhala ukati mwinci ilapo yo mafilistiya.

22

Nluku ahonlawiha Aparahamu

¹ Unavinre ukati vakani, Nluku ahonlawiha Aparahamu, amwiirelaka: Aparahamu. Uyo ahaakhula: Phi mi va. ² Vano Nluku aheera: Unkuse mwanaa, mwanaa mmoca yooyo, Isaki nonfentesaa uyo, ni urwee nttetthe wo Muriyaa. Wakipankele yooyo wonwo isataka yoopahiya wamwaakoni unhalaaka wuthoonyera.

³ Wasilyaya vale, Aparahamu ahonwa ni ahontthenkemaniha puuru awe, ahaattukana nloko amirawo awe eeli wamoca ni Isaki mwamwanawe, ahopharula ikhuni cosataka, ahopwaha arwaaka nipuro nahimeriyawe ni Nluku. ⁴ Nihuku noneeraru, Aparahamu ahowusa miittho awe ni ahoona nipuro nno nari uttayi. ⁵ Ule aheerela amirawo awe: Nhalaceke va ni puuru ula. Mi ni mmirawo ola ninrwaa uswali nwe ninawuphwanyacani.

⁶ Aparahamu ahokusa ikhuni nnye coorwa upaha isataka ni ahonrya Isaki, ni uyo ahokusa makhala o mooro ni mwaalo. Ni yeettacaka wamoca. ⁷ Isaki aheerela athumwane: Paapa! Aparahamu ahaakhula: Phi mi va, mwanaka. Isaki ahaakoha: Makhala o mooro ni ikhuni phi nnya, vano iri vayi ikhontwaa yotthuvo yoopahiya. ⁸ Aparahamu ahaakhula: Mwanaka, Nluku nanivaha ikhontwaa yotthuvo yoopahiya. Ni yahopwahaca yeettacaka wamoca.

⁹ Waphilyaya nipuro nathoonyeriyawe ni Nluku, Aparahamu ahoteka ikhilompi yoopaha isataka ni ahotataanihaca ikhuni vaavale. Ahontthuka Isaki, phumweesaka waculu ikhuni vale. ¹⁰ Vano ahaawula ntata nakusilyawe mwalo ule wiira anhitte mwanawe. ¹¹ Nanso Ncelo a Mwaneene Nluku ahomwiihana eeraka: Aparahamu! Aparahamu! Ule ahaakhula: Phi mi va. ¹² Vano Ncelo ule aheera: Uhinhonone mmirawo uyo. Uhimpanke ithhu. Vano kihocuwela wiira we unamoova Nluku, kontha khukithuwile mwanaa, mwanaa yooyo rinaa mmoca paahi.

¹³ Aparahamu ahowusa miittho awe ni ahoona ikhontwaa inaphanre inyaka caya nnyo wataparikhwani. Ahorwaa ukusa ni ahovaherera ithhuvo yoopahiya nipuro no mwanawe. ¹⁴ Aparahamu ahovaha nenno nipuro nno ncina na Mwaneene Nluku Naavaha.* Phimaana mpaka ilelo waneereliyaya: Mmwaakoni mwa Mwaneene Nluku naavaha.

¹⁵ Ikwaha yonayeeli Ncelo a Mwaneene Nluku ahomwiihana Aparahamu ¹⁶ eeraka: Mwaneene Nluku heera: Kinalupela, mwanlattu wa yeela ithhu ipankilyaa, uhikithuwaka mwanaa, mwanaa mmoca yooyo urinaa, ¹⁷ waamini wiira kinawureeriha ni nloko naa kinapanka ninci toko iththotwa co wirimu ni toko nhava wo mpharyaa. Nloko naa nimmothema isittatti ceenani aya, ¹⁸ ni nhina mwa nenno nloko nno, ilapo cothene cimmoreerihya, kontha we uhokiiwelela.

¹⁹ Vano ahohokolela Aparahamu waariya amirawo awe ni othene wamoca yahoturuwela uPereseepa wakhawale.

Ucuulu wa Nahori

²⁰ Unavinre ukati vakani, ahohimerya Aparahamu wiira Milka ahaayara asaana ni Nahori, munnaawe Aparahamu. ²¹ Ussi ari oontthara, Pussi munnaawe, Kemuweli, athumwane Arani, ²² Kesette, Haso, Piltasi, Yitlafi ni Petuweli, ²³ athumwane Repeka. Ala asaana athanu na araru yaayanryawe Milka ni Nahori, munnaawe Aparahamu.

²⁴ Ni mwaarawe oohittelisheraninya, neehaninya Reuma, ahaayara asaana ala: Tevaa, Kahami, Tahasi ni Maaka.

23

Ukhwa wa Asaara

¹ Vano Asaara yahokhala myakha iminya wo siriini na saapa (127) ceyarelo, ² ni yahokhwa anari uKiriati-Arapaa uneehaninya Eforoni, ilapo yo Kanaa. Aparahamu aheekhupanya ni wonlela Asaara. ³ Ni Aparahamu ahiyaka mayithi awe ahonwa arwaaka wa asaana a Heti ni aheerela: ⁴ Mi ki nletto, ni mweetakaci. Kinaalepela nipuro noopanka mahiye wiira kivithe mayithi aka. ⁵ Vano asaana a Heti yahomwaakhula Aparahamu yiiraka: ⁶ Univiriyane muulupale, nhooleli a Nluku uri ni hi. Waavithe amwaaraa ayo mahiye anhalaa utthuna. Khaawo nohala wuuthuwa mahiye wiira waavithe amwaaraa.

⁷ Vaavale, Aparahamu ahonwa ni ahooromela vathi wamiithoni wasineene ilapo, asaana a Heti. ⁸ Ule aheera: Wakhala wiira nhokithunihera wavitha amwaaraka mu,

* 22:14 i.e. Yehova-Yire

nkiviriyane. Mwakulumele Eforoni, mwana a Sowari, ⁹ wiira akivahe nikhuku no Makipela niri unaverihela imatta awe iyo, ni akihimerye ihisapu enoncivela wiira akhale mahiye aka.

¹⁰ Vano Eforoni onkomile wamoca na asaana a Heti, ni Eforoni, nHitita, ahomwaakhula Aparahamu, yiiwaka asaana a Heti ni athu othene yaari wa nkhora woparasa eeraka: ¹¹ Mena, muulupale, ukiviriyane. Imatta iyo kinawuvaha, ciicammo nikhuku niri mmattani ni kinawuvaha wa miithoni wa amucyaka, uvitthe mayithi aa ayo.

¹² Vaavale Aparahamu ahooromela wiitho waya asineene ilapo. ¹³ Ni ahomwiirela Heporoni yiiwaka athu othene: Ukiwe, wakhala wiira unakupali ukihimerye ihisapu yomatta iyo mi kinawuliva, wakhelele ncurukhu aka uyo wiira kivithe mayithi aka.

¹⁴ Vano Eforoni ahomwaakhula Aparahamu eeraka: ¹⁵ Ukiwe muulupale aka: Imatta iyo ncurukhu aya uri iminya cese wopheeta. Isiyani vava vaa we ni mi? Uvithe mayithi aa ayo. ¹⁶ Aparahamu ahokupali ihisapu ile ni ahokumiha ncurukhu nuunliva Eforoni wahimyacyiawe yiiwaka asaana othene a Heti, ncurukhu iminya cese wopheeta wathumeliya ithu nnakosoni.

¹⁷ Phimaana nthala na Efromi naari uMakipela uhoolo waya uManre; ukhuma nthala nno, nikhuku naari munthalani mmo, ni miri cari munthalani mmo ni nnyo cari nceresere nnyo, ¹⁸ cahokhala ca Aparahamu maana ahothuma yoonaka asaana othene a Heti naale yari wa nkhora woparasa.

¹⁹ Wahoolo Aparahamu ahaavitha amwarawe yeehaninya Asaara nnikhukuni niri imatta yo Makipela uhoolo waya uManre uneehaninya Eforoni, ilapo yo Kanaa. ²⁰ Phimaana imatta iyo ni nikhuku nari mmattani mmo yahokhala mahiye Aparahamu kontha anotumiheriya na asaana a Heti.

24

Uthela wa Isaki

¹ Yooyo ukati uyo Aparahamu ahooluvala ni Mwaneene Nluku ahonvaha iparacka wo citthu cothene. ² Vano Aparahamu amwiihanaka karumeyi awe omuulupale owapuwni arina nlamulo no citthu cothene cariwo, ahomwiirela: Weese ntata naa nno wanatarani waka, ³ ni ulupele wa Mwaneene Nluku, mwaneene irimu ni ithaya wiira wamphavele nthiyana oonthela mwamwanaka uhinthanle iriyari ya asithiyana annakanaa anakhalaneehu ala mu. ⁴ Nanso urwee uwaani, ilapo iyareliyaka ni wamucyaka ni wanthanle nthiyana nohala unthela mwanaka Isaki.

⁵ Vano karumeya uyo ahokoha: Kaahiki nthiyana uyo ahithhuneke uwa ni miyano uno, kaankuseke mwamwaninyu uyo nuunrwana ilapo ikhumileenyu?

⁶ Aparahamu ahomwiirela: Kaasope. Akinphela wiira mwamwanaka uyo unturusele uwaani. ⁷ Mwaneene Nluku, Nluku o wirimu kikumihile ilapo yo mayapaapa ni iyareelyaka aholupela ni ahokikhuluveliha ukivaha mi ni ucuulu aka ila ilapo ela. Ayo anaahala wuveleelihera ncelo uhoolo waa, wiira we waanthanle woonwo nthiyana omaana oohala unthela mwanaka. ⁸ Nanso nthiyana uyo ahithhuneke uwa ni we uno, unahala wothopwa ulupela waa nwo. Ithi ihmphavelaka iri unturusele mwana uyo uwaani. ⁹ Vano karumeya ule aheesa ntata nawe wanatarani wa Aparahamu nkunya awe ni aholupela upanka.

¹⁰ Vaavale karumeya ule ahokusa inkamira khumi ca nkunya awe, ni ahokhuma ni mihakhu ca nkunya awe ule mmattani mwawe, ni ahorwaa uMesapotamiya, iparasa yo Nakoori. ¹¹ Ni ahokhoromihaca inkamira cawe uta woparasa, vakhiviru ni iluusi, yocoocilo ukati asithiyana unrwaya urika maasi. ¹² Vano aheera: Mwaneene Nluku, Nluku a nkunya aka Aparahamu, ukivahe ilelo ukumaana wooreera, ni umpanke nnema nkunya aka Aparahamu. ¹³ Kinawoona va kemeenle waluusi, ni asaana asithiyana a athu oparasa ela ammweesa urika maasi va. ¹⁴ Nna va kinoolepelani wiira, mwali nohalaka umwiirela uyo: Wiinamihe mwaapu uyo kiwuryee; ni uyo akiirelaka mmuryeke ni kinavaha maasi inkamira cinyu nnyo; yooyo phimwacileenyu wiira anthele karumeya enyu Isaki, ni mi kinahala ucuwela wiira nnonpanka nnema nkunya aka.

¹⁵ Vaavale, hinamaliha uswali, ahowa Repeka, mwana a Petuweli, mwana a Milka, amwaara a Nakori, munnaawe Aparahamu, nakusile mwaapu wanikhatani. ¹⁶ Mwanthiyana ole aari ooreera venci, mwali oohipaca urupa ni nlopwana; ahophiya waluusi nuucariha mwaapu awe nuuturuwa. ¹⁷ Karumeya awe Aparahamu ahonthimakela numwiirela ukivahe maasi aari mmwapuni ayo kiwurye. ¹⁸ Ule ahaakhula: Uwuryeke nkunya. Wowakuvyaca ahorula mwaapu ule nuunvaha mmattani mwawe wiira awurye. ¹⁹ Vano namanleene unvaha maasi owurya aheera: Kinarika tho maasi kivahe inkamira caa nnyo wiira kiwurye maasi ootosa.

²⁰ Wowakuvyacawene aheethela maasi ale nwuryeryoni monkamira, ni ahorwaa tho uluusi urika maasi mpaka uvaha inkamira cothene. ²¹ Nlopwana ole anomaala aweehaka ni awehereryaka wakhala wiira Mwaneene Nluku khaamweetihaacile mahala ikwaha awe eyo.

²² Wahoolo inkamira nnyo umala waya uwurya, karumeya a Aparahamu ahokumiha ipaara imoca yopirinku cowooru cookhala imaara siita ceelemelelo aya ni ikhankani piili cowooru cookhala imaara iminya wosirini ceelemelelo aya nuunvaha mmatatani mwawe. ²³ Vano ahonkoha eeraka: We mwana awani? Kinawulepela ukihimyacere. Ni kahiki nihaawo nipuro waathumwana nwo wiira nomake? ²⁴ Mwanthiyana ole ahaakhula eeraka: Mi ki mwana a Petuweli, mwana awannyawe Milka, yariye ni Nakori. ²⁵ Ahomwiirela tho: Nihaana malasi, coolya cinci ni nipuro noorupa. ²⁶ Vano nlopwana ule ahooroma phinlepelaka Nluku ²⁷ eeraka: Areeerhiye Mwaneene Nluku a nkunya aka Aparahamu, hitamihile nifento neekhweeli wa nkunya aka. Ni Nluku uhokihola mi ikwaha yothene mpaka ukipiha walokwawe nkunya aka.

²⁸ Vaavale mwanthiyana ole ahokhuma atthawaka mpaka waanumwane ni ahottonka yakhumeleene. ²⁹ Repeka haana nrokorawe ehaniya Lapanu. Ni Lapanu wiiwa wawe mwaha oyo, wowakuvyaca ahokhuma atthawaka mpaka umphwanya nlopwana ule uluusi. ³⁰ Kontha weenre coo: Lapanu wamonnnyawe mwanrokorawe nawanre ipirinku ni ikhankani nnye, ni wamwiiwilyawe mwanrokorawe uyo ni weewilyawe moolumu amwanrokorawe ayo eeraka: Coo phikulumacenryawe nlopwana uyo. Vano Lapanu ahonrwela ni ahomphwanya neemenle waluusi ni inkamira cawe nnyo. ³¹ Ni ahomwiirela: Nrwee uwaani we ooreerhiya ni Nluku unhala urupelani vate? Kontha mi uwaani nwo kihotthenkemaniha mapuro oorupa we mpaka inkamira caa nnyo. ³² Vaavale nlopwana ule uphiya wawe uwaanyawe Lapanu, ahovahiya nipuro noorupa, maasi oorapiha inyaa cawe, wamoca na atthu yarinawe, ni inkamira nnye cahoheleliya malasi ni makukhu. ³³ Vano nawiiheriyeene yoolya, ule aheera: Akinlya mpaka kipacereke uhimyaca itthu yawenlyaka eyo. Lapanu ahomwaakhula eeraka: Wuulumaceke. ³⁴ Ule phenryawe: Mi ki karumeya a Aparahamu. ³⁵ Mwaneene Nluku honvaha iparakhha ciinci nkunya aka, hokhala thaciri, honvaha ikhontwaa ni imope ciinci, ipheeta ni iwooru, haana ipotha cilopwana ni cithiyana, inkamira ni apuuru. ³⁶ Mpaka Asaara mwaara a nkunya aka, honnyarana mwana nooluvanleene ni citthu cothene honvaha mwana uyo. ³⁷ Vano nkunya aka hokilupeliha mi eeraka: Uhinkuse nthiyana Annakanaa ri yeela ilapo inkhalaka ila unvahaka mwanaka wiira anthele, ³⁸ nanso urwee uwaani, ilapo yo mayapaapa ni wamucyaka wonwo wanthanle nthiyana nohala unthela mwanaka. ³⁹ Phimaana mi kahonkoha nkunya aka, wiira kaahiki nthiyana uyo ahitthuneke ukithara uno? ⁴⁰ Ule ahokaakhula eeraka: Mwaneene Nluku ri ni mi. Uyo naahala wuuvelelihera ncelo owuuhola iphiro wiira wankuse nthiyana o wanrukuluni waka, o wapuwanu wa apaapa wiira anthele mwanaka. ⁴¹ Nna unhala wothopwa itthu yurumilyaka weeraka uphiya wamucyaka nwo ukhotiheriyaka uvahiya nthiyana oyo. Paahi uhotopwa itthu yurumilyaka eyo

⁴² Phimaana ilelo uphiya waka uluusi kiholepela kiiraka: Sontte Mwaneene Nluku, Nluku a ankuya aka Aparahamu, wakhalka wiira ikwaha impankaka ila iri yothuna winyu nkeettihe ratta. ⁴³ Nna va kiri waluusi yo maasi, nkiuwe, mwali nohala uwa urika maasi uyo, ni mi kimwiirelaka: Ukivahe maasi kiwurye ommwaapuni mwa ayo; ⁴⁴ ni uyo akiirelaka: Uwuryeke we, ni ciicammo kinahala uvaha maasi inkamira caa nnyo paahi yooyo phi nthiyana mwacilyawe Mwaneene Nluku wiira akhale amwaara a mwana a nkunya aka.

⁴⁵ Wanowiira kihinamaliha uswali nwo, pha wawe waluusi va Repeka nakusile mwaapu awe wanikhatani ahophiya mpaka waluusi ni ahorika maasi. Vano mi kahomwiirela: Ukivahe maasi kiwurye. ⁴⁶ Ule wowakuvyaca aheenamiha mwaapu awe nuukiirela uwuryeke, ni ahovaha uwurya inkamira caka nnyo. ⁴⁷ Vano kahonkoha wiira we mwana awani? Uyo ahokaakhula eeraka: Mi ki mwana a Petuweli mwana a Nakori nnyanryawe ni Milika. Phimaana kihommwariha ipirinku nnyo, ni ikhankani mmyononi mmo; ⁴⁸ ni kahoromela vathi kinlapelaka nuunsukuru Mwaneene Nluku, Nluku a nkunya aka Aparahamu, kiveleene iphiro yomaana wiira koonkuse mwana a alokwawe nkunya aka wiira anthele mwanawe.

⁴⁹ Nna va munthonyihere ikhweeli nkunya aka, mawatthuna nkihimyacere, ciicammo mwahithune nkihimyacere wiira mi kicuwele yoweetela.

⁵⁰ Vaavale Lapanu ni Petuweli yahaakhula: Cothene cipankaciye ni Mwaneene Nluku, hi kxaninoona yowuhimerya yoonanara athuna yoorera. ⁵¹ Nna va Repeka uyo phu ula. Unkuseke ni urweke wiira atheliye ni mwana akunya aa, toko cihimilyawe Mwaneene Nluku. ⁵² Vano karumeya Aparahamu, ahoromela vathi anlapelaka Mwaneene Nluku.

⁵³ Ni ahokumiha mihaca copheeta, cowooru ni ikuwo phummahaka Repeka. Ciicammo ahokumiha cithu comaana phummahaka nrokorawe eehaninya Lapanu ni anumwane.

⁵⁴ Wahoolo, ule na alopwana yarinawe ale aholya nuurupa. Usa waya, karumeya Aparahamu aholeeha eeraka kihorwaa wankunya aka. ⁵⁵ Nanso anumwane ni mwan-rokorawe Repeka yaheera: Unihiyere mwanthiyana ula mahuku vakani, atthuna mahuku khumi paahi uhoolo nwo naarwaka. ⁵⁶ Vano ule aheerela nhikiporonkanihe. Ikwaha ila Mwaneene Nluku hokireeriha. Nkihiye kituruwele ratta wankunya aka.

⁵⁷ Ale yaheeraca: Nrwee nimwiihane mwanthiyana uyo nankohe. ⁵⁸ Vaavale yahomwihana Repeka phunkohaka: Unatthuna urwaa ni ula nlopwana ola? Ule ahaakhula eeraka: Kinatthuna.

⁵⁹ Vano amucyawe yahonleeha Repeka wamoca ni nthiyana amwamwihile, karumeya Aparahamu na alopwana yarinawe. ⁶⁰ Ni yahonreeriha Repeka amwiirelaka: Mwanrokorihu, wunuwe ni waayarace asaana iminya iminya cene, ni ucuulu aa uyo waattheme eenani!

⁶¹ Vaavale Repeka nacikhwawe yahowelaca inkamira, nuntthara karumeya ule. Phimaana karumeya ule ahonkusa Repeka nuurwa.

⁶² Yooyo ukati uyo Isaki aakhuma iphiro yoluusi Ulayi-Royi, kontha akhala ilapo yohitto. ⁶³ Nihuku nimoca ukati wococilo, Isaki anaswali mmattani, ahowusa miitho awe ayo ni ahoona inkamira ciwaka. ⁶⁴ Ciicammo Repeka, ahowusa miitho awe ayo ahoomona Isaki, ni ahokhuruwa munkamirani, ⁶⁵ ni ahonkoha karumeya ule eeraka: Tipani ule non-iscerya mmattani ule? Karumeya ule ahaakhula: Yoole phi nkunya aka. Wowakuvyaca wene Repeka ahekhunela wiitho nwo nikuwo.

⁶⁶ Wahoolo karumeya uyo ahonttonkela Isaki cithu cothene ceeranele. ⁶⁷ Paahi, Isaki ahonkusa Repeka mpaka nheemani mwa anumwane yeehaniya Asaara, ahonthela nuunfenta. Phimaana Isaki ahomaalihya ni Repeka, ukhwa waya anumwane.

25

Ukhwa wa Aparahamu

¹ Aparahamu ahonthela nthiyana nkina, eehaninya Ketura. ² Ketura ahonnyarana Aparahamu ala asaana ala: Sinra, Yookisa, Meeta, Miitiya, Isipaki, ni Suwaa. ³ Yookisa ahonnyara Sapaa ni Tetaa. Ucuulu wa Tetaa waari Asurita, Letusi ni Lewuma.

⁴ Asaanawe Miitiya yari Efa, Eferi, Enoki, Apita ni Elita. Othene ale yaari ucuulu wa Ketura.

⁵ Aparahamu ahonhiyera Isaki mihakhu cawe cothene. ⁶ Nanso asaana a Aparahamu yayanryawe na asarawe oohitteeliheraninya, aavahacile ithuvo vakani; nari nkumi, ahawalaaniha ni mwanawe Isaki nuwarweha uttayi, ilapo iri mphantte unkhuma nuuwa.

⁷ Aparahamu ahokhalana ukumi mpaka ahopiiha myakha iminya wo sapini na thanu (175) ceyarelo. ⁸ Aakhwile noluvaleehile ni myakha cinci ceyarelo ni ahaatthara mayathumwane. ⁹ Nanso, asaana a Aparahamu, Isaki ni Sumayili, yahaavithaca athumwanaya nikhukuni no Makipela, vakhiviru ni uManree, nthala na Eforomi, mwana a Suwari, nHitita, ¹⁰ nenne nthala, Aparahamu nathumanannyawe maHitita. Vaavale phivithiyawe Aparahamu wamoca ni Asaara amwaarawe. ¹¹ Nanso nakhwileene Aparahamu, Nluku ahonreeriha Isaki. Vano Isaki aakhala vakhiviru ni Iluusi yo Lahayi-Royi.

Ucuulu wa Sumayili

¹² Vano ula phu ucuulu wa Sumayili, mwana annyanryawe Aparahamu ni Akaari o Wiciipitu, ipotha ya Asaara. ¹³ Ala phi macina a asaana a Sumayili, yantikhaciye itharihiyaka eyareelo aya: Nepawoti, mwana omuulupale a Sumayili, Ketari, Apeteli, Mipisamu, ¹⁴ Misima, Tuma, Masaa, ¹⁵ Hattatti, Tema, Yeturi, Nafisi ni Ketema.

¹⁶ Ala phaari asaana a Sumayili, yakhalacile ahooleli o mahimo, mmawaani mwaya ni mmapuroni mwamakiya yeehaneliya yaala macina ala. Ahooleli ayo yaari khumi nuuwa eeli.

¹⁷ Sumayili ahokhala myakha iminya wo talathiini na saapa (137) ceyarelo. Ahokhwa ni watthara mayathumwane okhalayi.

¹⁸ Ucuulu awe wahokhala ntetthe unkhuma o Havila urwaka o Suuri, vakhiviru ni mwiniano wo Wiciipitu, mphantte unrwaa o Siiriya. Ni yaheeserana mpika na asunnaya.

Uyarya wa Isawu ni Yakopi

¹⁹ Ala phi mayaranacelo o nrukulu na Isaki, mwana Aparahamu: Aparahamu ahonnyara Isaki. ²⁰ Isaki narina myakha arupayini ceyarelo, ahonthela Repeka, mwana

a Petuweli, Nramewu o Patan-Aramu, aari mwanrokorawe Lapanu, ni uyo ciicammo Nramewu.

²¹ Vano Isaki ahonlepela Nluku, kontha amwaarawe ayo yari mwali eekupa. Phimaana Mwaneene Nluku ahaakhula iswali cawe nnyo ni Repeka ahorupala irukulu. ²² Urupala wawe, asaana ayo munthukwani mmo yaanawaanaca, ni Repeka aheera: Nlattuni ikikhumelelaka ila ithu ila? Ni ahorwaa unkoha Mwaneene Nluku. ²³ Vano Mwaneene Nluku ahomwaakhula:

Ilapo piili phiriwo munthuukwani mwaa mmo,
phimaana anakhuma mommo atthu eeli ni anaahala umwalana:
Mmoca uyo nokookhala okuru oompwaha nkhwawe,
nanso omuulupale uyo naahala unvarela nteko omwankani uyo.

²⁴ Vaavale, waphiilyaya ukati wooyara, khweeli ahorumelelihiya wiira yaari mavatta munthukwani mwawe mmwe. ²⁵ Oopacera uyariya uyo aari okharari cookhwiila, ni irutthu awe yothee yaari yo mapururu; phimaana ahovahiya ncina na Isawu. ²⁶ Wahoolo ahoyarya mwanhimaawe, ntata nawe naavarenle ikottokotho ya Isawu; phimaana ahovahiya ncina na Yakopi. Ukati waayarawe Repeka, Isaki aarina myakha sitiini ceyarelo.

Isawu natumiha iyuulupale awe

²⁷ Asaana ale yahonuwaca. Isawu aari nlupa oocuwela utotha ni aari nantakhwani. Nanso Yakopi waari nteko awe paahi uhakhela imope ni aakhala mmaheemani.

²⁸ Isaki anfenta Isawu, kontha cancivela ukhura inama ceevawe; ni ciicammo Repeka anfenta Yakopi.

²⁹ Nanso ikwaha imoca, Yakopi apyaacaka yoolya, ahowa Isawu navoliye itala, akhumaka utakhwani, ³⁰ ni ahommekela eeraka: Ukimeele vakani nhuci woserya uyo. Ukivola itala! Phimaana eehaninyaka ciicammo Eetomu. ³¹ Vano Yakopi ahomwaakhula eeraka: Woopacera ukitumihereke iyuulupale aa. ³² Vaavale Isawu aheera: Nna vaa kihanle vakani ukhwa. Kimphurela isiyani iyuulupale eyo? ³³ Wahoolo Yakopi ahonkhanyereriha Isawu eeraka: Woopacera unlamuliya ulupela. Ni ule aholupela untumihera Yakopi iyuulupale eyo. ³⁴ Vano Yakopi ahonvaha Isawu isima ni maruru. Ule aholya nuwurerya, ahonwa nurwaa. Commo Isawu ahovyavyeeha iyuulupale awe.

26

Isaki ni Repeka anari uKerari

¹ Yahovola itala yeele ilapo ele, toko weracilyaya ukati wa Aparahamu. Phimaana Isaki ahorwaa ilapo yo Kerari, wonwo Apimeleke waaryawe mwene o mafilisiya. ² Vano Mwaneene Nluku ahomphwana Isaki ni ahomwiirela: Uhihuruwele Wicipitu. Urwee wakhale ilapo inhalaka wuthoonyera. ³ Ukhale ila ilapo ela, mi kinaakhala ni we ni kinawureeriha. Kontha we nuuculu aa uyo kinaahala wuvvahani ila ilapo ela, ni kinarwa uttharihelela yolumacenryaka athumwaninyu aneehaniya Aparahamu.

⁴ Kinaahala wuncerera ucuulu aa toko ithoottwa co wirimu ni waavaha nnya ilapo nnya cothene; ni nhina wo ucuulu aa atthu othene omwiilaponi anaahala ureerihya,* ⁵ kontha Aparahamu hosunka malamulo aka inrumilyaka ni isariya caka.

⁶ Commo Isaki ahokhala o Kerari. ⁷ Vano alopwana o nenno nipuro nno ukati waankohilyaya wiira ala phamwaraa, ule ahaakhula eeraka: Mwanrokoraka. Anawoova uhimya wiira amwaraa, kontha oopuwela wiira, alopwana o yeela ilapo ela anaahala ukiiva nlatu wa Repeka, kontha ahotepa ooreera.

⁸ Isaki ahokhala o Kerari ukati mwinci. Nihuku nimoca, Apimeleke, mwene o mafilisiya, anawehecesa wacanelani yaari uculu, phuukati wamonnyawe Isaki anthwelanaka Repeka amwaraawe. ⁹ Vano Apimeleke ahomwiihana Isaki ni ahomwiirela: Khweeli, uhirune. Ale amwaraa. Vano weerelani mwanrokoraka? Isaki ahaakhula eeraka: Kontha kineenre amwaraa kanawoova wiiviya. ¹⁰ Apimeleke aheera: Unipankenleni commo? Kontha nlopwana phi nlopwana uyo aanawaarupana amwaraa ayo, ni wanani-wiihera ikoosi. ¹¹ Vaavale Apimeleke ahaahimycera atthu othene eeraka: Nthtu nohala umwiiriha ithu ula nlopwana ula athuna amwaraawe ala, naahala ukhwa!

¹² Vano Isaki ahothimpula imatta ni yooyo mwakha uyo ahoruwerya venci, kontha Mwaneene Nluku ahonreeriha. ¹³ Ule ahothaciri ni nhakhu awe wahoncercerya mpaka ahothacireeha. ¹⁴ Ahaana ikhontwaa ni imope cinci ni ipotha cinci mpaka mafilisiya upacera unrama. ¹⁵ Phimaana, mafilisiya yahothuntuwanihaca nuuwuhelela iluusi cothene cathiipiye ni ipotha ukati wa Aparahamu, athumwane Isaki.

* 26:4 Mphattuwelo 22.16-18

¹⁶ Vano Apimeleke ahomwiirela Isaki: Ukhume mwilaponi mwihu mu, kontha uri ntthu oonhaku cinenne woonipwaha hi. ¹⁷ Phimaana Isaki ahokhuma nuthamela wuuthakoni wo Kerari waakhalawe khalayi. ¹⁸ Wahoolo Isaki ahowuhulaca iluusi caathipiye ukati wathumwane. Nnye cawuhelaciye ni mafilisiya ukhwa wawe Aparahamu ni ahovaha macina yavahilyaya athumbwane. ¹⁹ Vano ipottha ca Isaki cahothipaca muuthakoni mmwe ni cahottenla maasi menci oociva. ²⁰ Vano ahakheli o Kerari yahonyakulihana na ahakheli a Isaki, yiirelanaka: Maasi ala awihu! Phimaana Isaki ahovaha iluusi ile ncina na Eseke, nlattu woonyakuliharaninya. ²¹ Vano ipottha nnye cahothipaca iluusi ikina, ni ile yahonyakuliharaniya. Phimaana aheehana Sitina. ²² Wahoolo Isaki ahothama nne nipuro nne ni ahothipa iluusi ikina ni khayanyakuliharaniye tho. Phimaana ahovaha ncina na Riyopoti, eeraka: Vano Mwaneene Nluku honihulela ikhato ninaahala wiithawala yeela ilapo ela.

Isaki naphwanyinya na Mwaneene Nluku munttorani

²³ Ukhuma vaavale Isaki ahorwaa o Peresepa. ²⁴ Yoole uhiyu ule, Mwaneene Nluku ahomphwanya ni ahomwiirela: Mi kiri Nluku a Aparahamu athumbwanaa. Uhoove, kontha kiri ni we. Mi kinaahala wureeriha ni wuncerera ucuulu aa mwanlattu woofenta karumeya aka Aparahamu.

²⁵ Isaki ahoteka ikhilompi ni aholapela ncina na Mwaneene Nluku. Vaavale ahomaka ni ipottha cawe yahothipaca iluusi ikina.

Waataana wa Isaki na Apimeleki

²⁶ Yoole ukati ule, Apimeleki ahowa akhumaka o Kerari wamoca ni Awusate nlakakano awe ni Fikoli, muulupale anakhotto awe. ²⁷ Vaavale Isaki ahaakhaca eeraka: Nlat-tuni mmwaaka ukiweha, mi mwahokipanka mwiinani ni mwahokoomola? ²⁸ Ale yahomwaakhlaca yiiracaka: Kontha nihowona weekhweeli wiira Mwaneene Nluku ri ni we, phimaana niiraka: Nrwee nilupelace we ni hi. Nimphavela waatana ni we. ²⁹ We uhinipanke yoonanara, toko hi cihupankileehu ithu, nanso nihoopanka ratta ni wuleeha wo mpuha. Vano nihocuwela wiira Mwaneene Nluku hooreeriha.

³⁰ Vano Isaki ahaavahaca yoolya ni ale yaholyaca nuuwuryaca. ³¹ Usa waya oyeeli yaholupelihana. Isaki ahaalehaca ni ale yahorwaca ni mpuha.

³² Nenzo nihuku nno ipottha ca Isaki cahowaaca unhimerya ciiraka: Iluusi yathipehu iyo nihottenla maasi! ³³ Isaki ahovaha iluusi ile ncina na Sepa, phimaana mpaka nihuku nolelo, ile iparasa ile icuweliyaka ncina no Peresepa.

³⁴ Isawu naphihenrene myakha arupayini ceyarelo ahonthela Yutiti, mwana a Peeri, nhitita, ni ciicammo ahonthela Pasimati, mwana a Elomi, nhitita. ³⁵ Ale asithiyana ale yahaacukulihaca Isaki ni Repeka.

27

Yakopi nawaakhela iparakha

¹ Ukati wooluvanlyawe Isaki wiitho wawe wahonripela ni khoona. Vano ahomwiihana mwanawe omuulupale eehaniya Isawu, eeraka: Mwanaka. Ni ule ahomwaakhela eeraka: Kiri va. ² Ule ahomwiirela: Mi kihooluvala ni akincuwela nihuku ninkhwaka. ³ Nna va, ukuse myuupa, muura ni nivaka naa nno, urwee utakhwani wakaaverye inama. ⁴ Vano waakaapyele sankanya ookicivela ni ukiwiihere kaanlye wiira kuuvahe iparakha kihinakhwa.

⁵ Ukati woolumacawe Isaki anhimeryaka mwanawe Isawu, moolumo ale Repeka eera eewaka. Vano Isawu ahorwaa utakhwani wiiva inama wiira aawiihere athumbwane.

⁶ Phimaana Repeka ahonhimerya mwanawe eehaniya Yakopi eeraka: Kiheewa athumbwana ayo amwiirelaka munnaa Isawu: ⁷ Wakilupatthele inama ni wakaapyele sankanya oociva wiira kinlye ni kuuvahe iparakha wamiithoni wa Mwaneene Nluku kihinakhwa. ⁸ Nna vaa mwanaka, uviriyanee inoohimeryaka ila. ⁹ Urwee muncicini mmo wakuse ipuri piili. Mi kinnowaapyele sankanya oociva toko athumbwana cinaacivelaya, ¹⁰ ni waarwehele athumbwana yanlye wiira yuvahe iparakha ahinakhwa. ¹¹ Nanso Yakopi aheerela anumwane: Kinawoona amunna Isawu irutthu aya iyo iri yo mapururu. Mi kiri oohimapururu. ¹² Pooti apaapa ayo ankokapaapela ni wamiithoni waya kinkokhala mayowootha. Commo kinawiiwaanala mahusi woohikhala iparakha. ¹³ Anumwane yahomwiirela: Mwanaka, nihusi naa nno ninhala ukhala nawaka. Wiiwelele paahi nuulumo naka. Urwele ni ukiwaanele.

¹⁴ Vano ule ahorwela ni waawiihera anumwane, ni ale yahomwaapyele sankanya oociva, toko athumbwane caacivelaya. ¹⁵ Wahoolo, Repeka ahokusa coowara co-maana ca Isawu, mwana omuulupale, carinawe uwaani ni ahommwariha Yakopi, mwana omwankani. ¹⁶ Vano ahommwariha nrapala nopuri nsiko ni mmatatani, ¹⁷ ni

ahonvaha mmatatani mwa Yakopi, mwana omwankani, sankanya oociva ni nkatthe watthenkacilyawe. ¹⁸ Vano Yakopi ahorwaa woolumana athumwane ni aheerela: Paapa! Athumwane yahomwaakhula yiiraka: Kiri va. We tupani mwanaka? ¹⁹ Yakopi ahaakhula athumwane eeraka: Mi Isawu mwaninyu oontthaara. Kihopanka toko caakirenlenyu. Vano, munkome ni nlye ilupatthilyaka wiira nkireerihe. ²⁰ Isaki ahonkoha mwanawe eeraka: Weeraceele cani wakuvaka ulupattha? Ule ahaakhula: Mwaneene Nluku, Nluku inyu ahokaakuvyehera umphwanya mwannama.

²¹ Vaavale Isaki ahomwiirela Yakopi: Mwanaka, ukaattamerye wiira kiwaapaapele ni kuucuwelele wakhala wiira we khweeli mwanaka Isawu. ²² Yakopi ahaattamerya athumwane ni ale yahomwapapela ni yaheera: Ncu nno na Yakopi nanso myoono nnyo ca Isawu. ²³ Isaki khaancuwelenle Yakopi kontha myoono cawe caari co mapururu toko ca Isawu munnaawe, phimaana ahonreeriha. ²⁴ Wahoolo Isaki ahonkoha tho eeraka: We khweeli mwanaka Isawu? Ni ule ahaakhula eeraka: Phi yeemi. ²⁵ Vaavale Isaki ahomwiirela: Mwanaka, ukiiwihere ilupatthilyaa eyo wiira kilye ni kuureerihe. Yakopi ahaawiihera ni athumwane yaholya, ni ciicammo ahaawiihera ivinyu ni ale yahowurya. ²⁶ Vano Isaki ahomwiirela Yakopi: Nkaawe woono mwanaka ni ukivahe alaahuma. ²⁷ Ule ahaattamerya ni ahaavaha alaahuma. Ukati wonnyawe ikuwo cawe nnyo nhiriri wonama, Isaki ahonreeriha eeraka: Nhiriri wa mwanaka

uri toko inukhelelo yotakhwa ireerihilyawe Mwaneene Nluku.

²⁸ Nluku oovahe ukame wo wirimu,
uruwerye vathi va,
itiriku yinci ni malaaso menci.

²⁹ Wiira athu othene waarume,
ni ilapo cuulemelihe,
ni ukhale nkunya a asihimaa,
na asaana a anumwane yuulemelihe we,
natakhaliya ule nohala wuulapha,
ni nareeriya ule nohala wureeriha.*

³⁰ Isaki umaliha wawe unreeriha Yakopi ni nakhumileene wamiithoni wa athumwane, phawawe Isawu akhumaka wulupatthani. ³¹ Ni ule ahomwaapya sankanya oociva ni ahaawiihera athumwane ni aheerela: Paapa, munnwe ni nkhuureke inama ilupatthilyaka wiira nkireerihe. ³² Vano athumwane yahonkoha yiiraka: We tupani? Ule ahaakhula: Mi Isawu, mwaninyu oontthara.

³³ Vaavale Isaki ahothukumela venci cinenne ni aheera: Tupani ule kiwiihenre inama yoolupatthiya? Mi kihokhuura yothene we uhinaya uwa. Yooyo ntthu uyo, mi kihonvaha iparakha ni ciicammo nakhala ooreerihiya.

³⁴ Vano Isawu weewilyawe moolumo athumwane ale, ahothulana ni unlaka ahokhuwa wowirunya eerelaka athumwane: Nkireerihe ni mi, paapa. ³⁵ Isaki ahomwaakhula phimwiirelaka: Mwanhimaa ahowa va mmirukuni, ni hokusa iparakha caa nnyo. ³⁶ Vaavale Isawu ahopwaherera eeraka: Khweeli ule uhomphwanela wavahiyawe ncina na Yakopi, kontha imaara piili nnya akithepyaka. Woopacera hokaakha iyuulupale aka, nna va hokaakha iparakha caka. Vano Isawu aheera tho: Khankihalihenre tho mi iparakha?

³⁷ Vano Isaki ahomwaakhula Isawu eeraka: Kinawoona kihompanka ukhala owulama mwa, ni asunna ayo othene kihonvaha ukhala ananrumiya awe; mpaka itiriku ni malaaso kihomuncerera. Vano we mwanaka kiwiriheke cani? ³⁸ Vano Isawu aheerela athumwane: Nrina iparakha imoca paahi? Paapa, nkireerihe ni mi ciicammo. Vaavale Isawu ahokhuwa ni wunla. ³⁹ Vano Isaki, athumwane, yahomwaakhula yiiraka:

We nokookhala uttayi ni mapuro oocayira
ni oohikhuruwa ukame.

⁴⁰ Malelyo aa ankokhala okhotto,
ni unhala ukhala nanrumiya a nhimaa.

Nanso we wooryaka wiicopola
phinhalaa urula nipisi niri nsiko mwaa mmo.

Yakopi nantthawa munnaawe

⁴¹ Vano Isawu ahoncukula Yakopi mwanlattu womwakha iparakha yavahiyawe na athumwane. Phimaana ahoopuwela wanrimani wawe eeraka: Anaphiya mahuku ookhwa apaapa. Kimwomwiiva nhimaka Yakopi.

* 27:29 Mphattuwelo 12.3

⁴² Vano Repeka ahohimerya yalakenlyawe Isawu, mwana omuulupale, ahomwiihana Yakopi mwanawe omwankani, phimwiirelaka: Munnaa Isawu neepisiha nrima ni hoolakela uwiiva. ⁴³ Nna vaa, mwanaka, wiiwe inhalaka wuuhimerya: Wunwe ni urwee wamwanrokoraka Lapanu, ilapo yo Harani, ⁴⁴ wakhale wonwo mahuku vakani, mpaka uvire uviruwa wa munnaa, ⁴⁵ mpaka uvire urusiya wa munnaa, ni aliyale itthu impankilyaa. Mi kinaahala uleehera ni wuhokolosiha. Isiyani inhalaka wuhalelacerani oyeeli nihuku nimoca?

⁴⁶ Phimaana Repeka ahomwiirela Isaki coo: Ahokitosa asaana a Heeti, kontha Yakopi aathelaka athiyana o yeela ilapo ela, mi phatari kikhwe.

28

¹ Vano Isaki ahomwiihana Yakopi, ahonreeriha nunhimerya eeraka: Uhaathele athiyana o Nkanani mu. ² Ukhume ni urwee uPatan-Aramu, wa Petuweli, athumwanaya anumwana ni wanthele mwana a Lapanu, mwanrokoraya anumwana. ³ Ni Nluku Okuru Cothene ureerihe, upanke mayoyara ni awuncereryanihe wiira nkhalé atthu enci, ⁴ ni uvahe iparakhá ca Aparahamu, we ni ucuulu aa uyo, wiira uhalane ilapo iryaa nletto, Nluku invahilyawe Aparahamu.

⁵ Phimaana Isaki ahonveleliha Yakopi ilapo yo Patan-Aramu, wa Lapanu, mwana a Petuweli Nramewu, mwanrokorawe Repeka, anumwane Yakopi ni Isawu.

Isawu nanthela Nsumaili

⁶ Vano Isawu woonyawe wiira Isaki honreeriha Yakopi ni honveleliha uPatan-Aramu wiira anthele nthiyana wonwo ni waanreerihawe va ahomwiirela: Uhaathele athiyana o Nkanani mu. ⁷ Yakopi aheewelega athumwane na anumwane ni ahorwaa uPatan-Aramu. ⁸ Isawu woonyawe athumwane wiira khayatteeliye nrima na athiyana o Nkanaa, ⁹ ule ahorwaa wa Sumayili ni ahonthela nthiyana, eehaninya Malati, mwana a Sumayili, mwana a Aparahamu, mwanrokorawe Nepakoti, woohatakanihera athiyana yarinawe akina.

Nluku nankhumelela Yakopi o Peteli

¹⁰ Yooyo ukati uyo Yakopi ahokhuma uPerisepa arwaka uHarani ¹¹ ni ahophiya nipuro narupilyawe kontha waheela. Nenzo nipuro nno ahokusa nluku nimoca, aheesa wiimuru ni aheecatalela. ¹² Vano aholoha nttora woonyawe makwantta aneemesiye vathi mpaka ukwanya irimu ni phoonawe ancelo a Nluku awelaka ni akhuruwaka makwantta ayo.

¹³ Mwaneene Nluku phaari uculu waya makwantta ni aheera: Mi kiri Mwaneene Nluku, Nluku a Aparahamu, athumwana, ni Nluku a Isaki; yeela ilapo irupilyaa ila kinawuvaha we ni ucuulu aa uyo. ¹⁴ Ucuulu aa unhala ukhala toko ntthupi no vathi, ni unhala umwaryeela urwaka unkhuma ncuwa mpaka unkela ncuwa, urwaka uculu mpaka uhitto, ni mwanlattu wawaa we ni ucuulu aa uyo, unkophwanya iparakhá uneethi wothene wo mwilaponi.*

¹⁵ Phi mi kiri ni we. Kinawusunka mapuro othene ankela uvira, kinawuturusela tho ila ilapo ela, kontha akinhala wuuhiya mpaka kipankeke itthu yukhuluvelihilyaka.

¹⁶ Vano Yakopi wunwa wawe nkhoveni aheera: Khweeli Mwaneene Nluku ri nna nipuro nna. Mi akaacuwela. ¹⁷ Ni uvaka aheera: Wopihilyaya nna nipuro nna! Nna khaninakhala nipuro nikina; iri inupa ya Nluku. Ula nkhora wo wirimu.

¹⁸ Paahi, Yakopi ahonwa wicisuru, ahokusa nluku neesilyawe wiimuru nne, aheemesa, ni ahomiinela makhura waculu waya va. ¹⁹ Phimaana ahovaha ncina nenno nipuro nno Peteli*, nanso yeeyo iparasa eyo ncina naya nokhalayi neehaniya Luusi.

²⁰ Ni Yakopi ahomoopa natiri eeraka: Nluku akhalaka ni mi ni akisunkaka ila ikwaha ila, akivahaka yoolya, ni ikuwo coowara, ²¹ ni kituruwelaka wosalama uwaani wa apaapa, Mwaneene Nluku nahala ukhala Nluku aka. ²² Ni nenna nluku neemesilyaka nna ninwa ukhala inupa ya Nluku ni cothene cinhalaa ukivaha, khweeli kinawuvaha mphantte wonakhumi.

29

Yakopi naphiya uHarani

¹ Vaavale Yakopi ahokhuma arwaka ilapo iri mphantte unkhuma ncuwa. ² Nanaanoru ahoona iluusi mmathalani ni mihuwo miraru cokhontwaa cinarupile nceresere mmo, kontha yeeyo iluusi iyo phawuryaya ikhontwaa nnyo. Nahaawo nluku nuulupale nakhuneliya iluusi iyo. ³ Nenne nipuro nne canthukumana mihuwo, ahakheli yantamiha

* 28:14 Mphattuvelo 12.3; 22.18 * 28:19 manaaya wiira: Inupa ya Nluku

nluku nakhuneliya iluusi iyo nuurika maasi wiira avahe mihuwo caya nuukhunela tho iluusi iyo.

⁴ Vano Yakopi ahaakohaca eeraka: Asunnnaka nnokhumaca yayi? Ni ale yahaakhulaca yiiraka: Ninkhuma uHarani. ⁵ Ni uyo aheerelaca: Nnanuwela Lapanu, mwana a Nahori? Nale yahaakhulaca yiiraka: Ninancuwela. ⁶ Ahaakohaca tho eeraka: Haawo nkumi? Ni ale yahomwaakhulaca: Haawo nkumi, ni mwanawe mwanthiyana neehaniya Rakeli phuula wiihile nnya ikhontwaa nnya. ⁷ Ule aheera tho: Nanlelo uthana, khunaphiya ukati wothukumaniha ikhontwaa nnyo. Nvahe maasi ciwurye ni nvira nliha. ⁸ Vano ale yaheeraca coo: Khaninoorya, mpaka cithukumanihyeke ikhontwaa cothene ni nluku nikhuneeliye iluusi iyo nitamihye wiira nivahe ratta maasi oowurya.

⁹ Nanlelo oolumacaka nale, ahowa Rakeli ni ikhontwaa ca athumwane kontha uyo aari nhakheli. ¹⁰ Ni waakhumelenle coo, Yakopi umoona wawe Rakeli mwana a Lapanu arokoraya anumwane, ni ikhontwaa ca Lapanu, Yakopi ahorwaa walusi ni ahotamiha nluku nakhuneleliye nuuvaha uwurya ikhontwaa ca Lapanu, mwanrokoraya anumwane. ¹¹ Vaavale Yakopi ahonsalameeha Rakeli, mpaka upacera wunla. ¹² Yakopi ahonhimerya Rakeli wiira ule mwamunnaya athumwane ni ari mwana a Repeka. Vano Rakeli ahokhuma atthawaka urwaa wahimyacera athumwane.

¹³ Ukati weewilyawe Lapanu ihapari ca Yakopi, mwana a mwanrokorawe, ahomwikamela nuunkapatta nuunsalameeha mpaka umpiia uwaanyawe, ni ule ahonttonkacera Lapanu cithu cothene caankhumelenle munkwahani mwawe. ¹⁴ Vano Lapanu ahomwiirela: Khweeli we uri nikhuva ni irutthu aka. Ni ahokhala ni ule mweeri mmoca.

Uthela wa Yakopi

¹⁵ Wahoolo Lapanu ahomwiirela Yakopi: Kamana we uri nhimaaka unaakivarela nteko wo mahala? Ukihimerye ihisapu yowuliva.

¹⁶ Lapanu ahaana asaana eeli asithiyana. Omuulupale uyo ncina nawe Leya ni omwankani uyo ncina nawe Rakeli. ¹⁷ Vano Leya arina miitho oolocwaca nanso Rakeli arina irutthu yooeera ni ikhove yomaana. ¹⁸ Ni Yakopi anancivela venci Rakeli ni aheera: Kinaawuwarela nteko myakha saapa nlattu wa Rakeli, mwanaa oomwankani. ¹⁹ Vano Lapanu ahaakhula eeraka: Wanaareera wuvaha we woohikhala wumvaha nlopwana nkina. Ukhale va ni mi. ²⁰ Yakopi ahovara nteko myakha saapa amphavelaka Rakeli, cenyo myakha nnyo oonne ukhala mahuku vakani kontha anancivela cineene.

²¹ Wahoolo Yakopi ahomwiirela Lapanu: Ukivahe amwaaraka, kontha kihomalihera mahuku aka ayo ni kimphavela waathela.

²² Vano Lapanu ahaathukumaniha alopwana othene o yoole nttethe ole ni ahopanka isikuhulu. ²³ Vaavale uhiyu, Lapanu ahonkusa Leya ni ahommwiirera Yakopi. Ni ahonthukumanana. ²⁴ Vano Lapanu ahokumiha ipottha awe yeehaniya Silipa ni ahonvaha mwanawe wiira arumeke. ²⁵ Nanso usa waya amoone Leya. Vano Yakopi ahomwiirela Lapanu: We ukipankile cani? Mi akivanre nteko kimphavelaka Rakeli? Nlattuni we ukithepyacaka?

²⁶ Lapanu ahaakhula: Uno khinakhalaka ilemalelo upacera utheliya mwana omwankani, omuulupale hinaya utheliya. ²⁷ Vano uhiye umala isumana ithenlyaa ila, ninaahala wuvaha tho omwankani uyo, nanso uvareke tho nteko myakha saapa.

²⁸ Vaavale Yakopi ahokupali. Yahovira isumana yanthenlyawe Leya ni Lapanu ahonvaha Rakeli ukhala amwaarawe. ²⁹ Lapanu ahonvaha Rakeli ipottha awe yeehaninya Piila wiira arumeke. ³⁰ Yakopi ahonthukumanana Rakeli. Yoole aancivenle wompwaha Leya ni ahonvarela nteko Lapanu myakha saapa.

Asaana a Yakopi yayanryawe ni Leya

³¹ Ukati woonnyawe Mwaneene Nluku wiira Leya anavyavyehiya, ahonvaha asaana, nanso Rakeli ari mwali eekupa.

³² Leya ahorupala irukulu, ni ahonnyara mwana ni ahonvaha ncina na Rupeni, kontha eera: Mwaneene Nluku hoona icuku caka. Vano, weekhweeli awannyaka anaahala ukifenta. ³³ Leya ahorupala tho irukulu, ni unnyara wawe mwana nkina aheera: Kontha Mwaneene Nluku heewa wiira kinavyavyehiya, hokivaha tho ula, ni yahonvaha ncina na Simeyoni. ³⁴ Ahorupala tho irukulu ikina ni wannyanryawe mwana, aheera: Paahi, awannyaka anaahala waatana ni mi, kontha kihaayarana asaana araru. Phimaana yahonvaha ncina na Levi. ³⁵ Ahorupala tho irukulu ni unnyara wawe mwana aheera: Ula nkwhaha ola kinamunnuwiha Mwaneene Nluku. Commo yahonvaha ncina na Yutta. Ni ahohiya uyara.

¹ Vano ukati woonnyawe Rakeli wiira khannyaranne asaana Yakopi, ahopacera unrama munnaawe ni ahomwiirela Yakopi: Ukiyarane asaana, atthuna phatari kikhwe. ² Yakopi ahorusiya ni Rakeli ni aheera: Kinokhala Nluku, watelihile uyara?

³ Vano ule ahaakhula: Haawo Piila ula, ipottha aka, unthukumananeke wiira aayare asaana toko waahalaka waayara mi, wiira nhina mwa yaayo kaakhalane asaana.

⁴ Phimaana ule ahonvaha Yakopi uthela ipottha awe yeehaninya Piila, ni ahonthukumanana. ⁵ Piila ahorupala irukulu ni ahonnyarana Yakopi mwana. ⁶ Vano Rakeli aheera: Nluku hooluma, heewa ncu naka ni hokivaha mwana. Phimaana ahonvaha ncina na Tani.

⁷ Piila, ipottha ya Rakeli, ahorupala tho irukulu ni ahonnyarana Yakopi mwana onayeeli. ⁸ Vaavale Rakeli aheera: Kaari ni ikhotto yuulupale ni munnaka ni kihothema. Phimaana ahonvaha ncina na Nafitalii.

⁹ Ukati woonnyawe Leya wiira hohiya uyara, ahonkusa Siilipa ipottha awe ni ahonvaha uthela Yakopi. ¹⁰ Siilipa, ipottha ya Leya, ahoyarana Yakopi mwana mmoca. ¹¹ Vano Leya aheera: Ila iparakha! Phimaana ahomwiihana Kaate.

¹² Wahoolo, Siilipa, ipottha ya Leya ahonnyarana tho Yakopi mwana onayeeli. ¹³ Vano Leya aheera: Kihotteeliya! Athiyana ayo ankokiirela kiri ootteeliya, ni aahonvaha ncina na Aseri.

Yakopi nawaayariha asaarawe asaana akina

¹⁴ Ukati woohephiya itiriku, Rupeni ahorwaa umattani ni ahophwanya mirette cooyariha ni ahaawiihera anumwane. Vano Rakeli ahomwiirela Leya: Ukivahe mirette cooyariha ca mwanaa nnyo. ¹⁵ Nanso ule ahomwaakhula: Khawutosile wakaakhilyaa alopwana ayo? Umphavela ukaakha tho mirette ciwiihilyawe mwanaka nnyo? Vano Rakeli ahaakhula: Ula uhiyu ula Yakopi naahala wuthukumanana. Naakakhanihaka ni mirette ciwiihilyawe mwanaa nnyo.

¹⁶ Ucoocilo, ukati waturuwilyawe Yakopi umattani, Leya ahomwiikamela numwiirela: Ileo we unaahala ukithukumanana, kontha kihowuthumani ni mirette ca mwanaka. Ni yoole uhiyu ule ahonthukumanana.

¹⁷ Nluku ahomwiwa Leya. Ule ahorupala irukulu ni ahonnyarana Yakopi mwana oneethanu. ¹⁸ Vano Leya aheera: Nluku hokiliva wammahilyaka ipottha aka waathukumanana awannyaka. Phimaana ahonvaha ncina na Isakari.

¹⁹ Leya ahorupala tho irukulu ni ahonnyarana Yakopi mwana onasiita. ²⁰ Leya aheera: Nluku hokitthuwa itthuwo yomaana. Ula nkwaaha ula awannyaka anakunkomana, kontha kihaayarana asaana siita. Phimaana ahonvaha ncina na Sepulomi.

²¹ Ukati vakani tho, ule ahonnyara mwana mwanthiyana ammahilyawe ncina na Tina.

²² Vano Nluku ahomuupuwela Rakeli. Nluku aheewa ukhuwela wawe ni ahompanka mayooyara. ²³ Ule ahorupala irukulu nuunnyara mwana ni aheera: Nluku hotamiha ihaaya caka nnyo. ²⁴ Ahonvaha ncina na Yusufu ni aheera: Mwaneene Nluku akivahe tho mwana nkina.

Unyakulihaninya Yakopi ni Lapanu

²⁵ Rakeli nannyanreene Yusufu, Yakopi ahomwiirela Lapanu: Ukihiye kituruwela uwaani, ilapo aka. ²⁶ Ukivahe asaaraka ayo yuvarenlyaka nteko, na asaanaka ayo, kontha ni kimphavela urwaa uwaani. We uhocuwela ciinryaka wowuwarela nteko.

²⁷ Nanso Lapanu ahomwiirela: Wakhala wiira kihophwanya iparakha wa miithoni waa kinawulepela wiira ukhale ni mi. Kihoono wiira Mwaneene Nluku hokivaha iparakha nlatu wawaa we. ²⁸ Ni ahopwahera eeraka: Ukihimerye ihisapu yowuuliva; mi kinaahala wuuliva. ²⁹ Yakopi ahomwaakhula: We uhocuwela cuvarenlyaka nteko, ni mihuwo caa cihoncererya nlatu woweawe mi. ³⁰ Ni citthu vakani caarinaa kihinawa, cihoncererya venci, kontha Mwaneene Nluku hovaha iparakha ukati uwilyaka uno. Vano mi kinhala upanka yakhani itthu yowakavihera alokwaka?

³¹ Vano Lapanu ahonkoha: Untthuna kuuvaheke isiyani? Yakopi ahaakhula eeraka: Ukihiye itthu. Kinaahokolela uwacawaca nuuhakhela mihuwo cinyu wakhala wiira nnakupali imphavelaka. ³² Ileo kinaahala uvira mwinuwoni mwinyu ni kimmothana ikhontwaa co manepa ni co mitthottwe, ni asikhontwaa othene ooripa, ni ipuri co manepa ni co mitthottwe, cole phinhalaka ukhala mpokerero aka. ³³ Ni isariya aka inkowuvaha uhoole usaahiti, ukati unhalaa uwehawehe mapokerero aka. Yakhalaka mmatatani mwaka ipuri yohimanepa ni yohimithottwe, ikhontwaa cohiripa, pooti wiira cowiinyina.

³⁴ Lapanu aheera: Nihotthukelana, weerannyeeko toki cihimilyaa. ³⁵ Nanso, nenno nihuku nno Lapanu ahaakawaniha apeperu o mitthottwe ni o manepa ni ipuri cothene co mitthottwe ni co manepa cothene cari cotteelatteela ni asikhontwaa othene ooripa ni

ahohiya mmatatani mwa asaanawe. ³⁶ Vano Yakopi ahokhuma nipuro nne arwaka ncolo woweettiya mahuku mararu. Wahoolo Yakopi ahopwaherera uliha mihuwo ca Lapanu.

³⁷ Vaavale Yakopi ahokusa miri cikithi co mphari, ntholo ni rokoci ni ahokhava apankaka mitthottwe. ³⁸ Wakhavaawe, aheesa uhooolo waya mihuwo, mmakuwani, mawureryoni ni mapuro yarupaya ni canapepheryana ukati wawaya uwurya. ³⁹ Ni campepheryana uhooolo waya miritta, cantotholiya co marephurephu, co manepa ni co mitthottwe.

⁴⁰ Vano Yakopi anawawayaniha cikani nnyo, ni aanapanka wiira cennyo cikhale wamoca ni inama co marephurephu ni cooripa ca Lapanu. Commo antthonkomaniha mihuwo cawe woohitakanihera ca Lapanu. ⁴¹ Ukati warupalaya ikhontwaa coonenevaca nnye, Yakopi anaweesa uhooolo waya nwo miritta, cineemelacilene mmasepani, wiira citotholele mmirittani mmo. ⁴² Nanso kheesa miritta nnye uhooolo waya inama cokenkenya, kontha cokenkenya nnyo caakhala ca Lapanu ni cooneneva nnyo cakhala ca Yakopi.

⁴³ Phimaana Yakopi ahothaciri venci mpaka ahaana mihuwo cinci, ipottha cithiyana ni cilopwana, inkamira ni apuuru.

31

Yakopi naathama wa Lapanu

¹ Yakopi aheewa wiira, asaana a Lapanu yanawuulumaca yiiraka: Yakopi howyaa citthu ni mihakhu cothene carinaya apaapa ehu, phimaana athaciriki. ² Yakopi ahoona wiira makhalalo a Lapanu ni uyo khayari toko khalayi.

³ Vano Mwaneene Nluku ahomwiirela Yakopi: Uturuwele ilapo yo mayathumwanaa ni wamucyaa. Mi kinkokhala ni we. ⁴ Vaavale Yakopi ahoruma wiihaninya Rakeli ni Leya wiira arwace utakhwani yoone mihuwo cawe. ⁵ Uwaca waya aheerelaca coo: Kinawoona makhalalo athumwaninyu ayo ni miyano khaanakhala toko khalayi. Nanso Nluku Apaapa ari ni mi. ⁶ Nyu nnaacuwela wiira kihaavarela ratta nteko athumwaninyu, ⁷ nanso ayo ankipanka mi ntirikhi, avirikanihacaca mpokerero aka imaara khumi. Nanso Nluku khaathunihenre wiira akipanke yoonanara. ⁸ Yakiirelaka wiira inama co manepa nnyo cikhaleke cawaa, phuupokera waa; vano mihuwo cothene cakhala co manepa. Ni yakiirelaka coorephuwaca nnyo cothene cikhaleke cawaa, wonwo phuupokera waa, vano mihuwo cothene caatothala asaana oorephuwaca. ⁹ Nluku ala mananna ala phipankilyawe wowaakha mihuwo athumwaninyu akivahaka mi.

¹⁰ Weeracele coo: Ukati warupalaya mihuwo nnyo, mi kahoweha ni kahoona munttorani mmo anapinkula athukumananaka ikhontwaa cithiyana nnyo cari co manepa, co marephurephu ni co mitthottwe. ¹¹ Vano ncelo a Nluku ahokiirela munttorani: Yakopi, mi kahomwaakhula kiiraka: Kiri va. ¹² Ni ule ahomwiirela tho: Uwuse miitho aa ayo, ni unawoona anapinkula othene anthukumanana ikhontwaa cithiyana nnyo, ari o manepa, o marephurephu ni o mitthottwe, kontha kihoona cothene cuupankilyawe Lapanu. ¹³ Mi phi mi Nluku o Peeteli wonwe wemeesilyaa nluku uttikithelaka makhura ni ukoopelaka natiri. Wunwe nna va, ukhume ila ilapo ela ni uturuwele ilapo ya alokwaa.

¹⁴ Vano Rakeli ni Leya yahonkoha Yakopi yiiraka: Wapaapa nwo uhaawo mphantte wonhakhu unnaaca? ¹⁵ Khannalikelela ukhala amalaponi? Maana ahonitumiha ni aholya ncurukhu uyo. ¹⁶ Kontha nhakhu wotheene Nluku ukumihilyawe wathumwanihu uri wawihu ni wa asaanehu. Nna vaa upanke cothene cinoohimeryawe Nluku.

¹⁷ Vano Yakopi ahaaweliha asaarawe na asaanawe ayo mmankamirani. ¹⁸ Ahokusa mihuwo cawe cothene ni mihakhu caphwanyilyawe uPatan-Arami, wiira arwee ilapo ya Kanaa, uri Isaki athumwane. ¹⁹ Ukati Lapanu warwelyawe uthikila mapururu okhontwaa, Rakeli aheennya anantuntta a athumwane. ²⁰ Ni Yakopi ahomwiita Lapanu nramewu wohinhimerya itthu kontha anathawa.

Nluku naamwakiha Yakopi

²¹ Ahonwa nuutthawana cothene carinawe ni aholapuwa mooloko awehaka muru mwaako wo Kiliyati. ²² Nihuku noneeraru Lapanu ahohimerya wiira Yakopi hotthawa. ²³ Vano ahaakusa asunnawe ni ahonthimakela mahuku saapa eettaka ni ahomphwanyana nari mwaako wo Kiliyati. ²⁴ Vano Lapanu Nramewu ahophwanyinyu ni Nluku, uhiyu munttorani phimwiirelaka: Wiisunke, uhuulume itthu ni Yakopi, hata ikhale itthu yooreera athuna yoonanara. ²⁵ Lapanu ahomphwanyana Yakopi naakhurutunle aheema awe umyakoni co Kiliyati. Ciicammo Lapanu na asunnawe ahaakhurutula aheema awe umwaakoni.

²⁶ Vano Lapanu ahonkoha Yakopi eeraka: Ukipankile cani? Yokiita iyo wakusaka asaana ayo toko ipottha coovariya ukhottoni? ²⁷ Nlattuni ukithawaka womwiitho ni ukisempaka, wohikihimyacera itthu? Hapo mi kanawuveleliha wootteeliya ni icipo,

ikoma ni cece. ²⁸ Ciicammo khukihile kavahaka alaahuma asaanaka nu ucuulu aka wiira kaaleehe. Uheetta wootirikhi. ²⁹ Kahaana ikuru cooreera wuuttarusa, nanso Nluku athumwaninyu, hokuulumana ncana uhiyu eeraka: Wiisunke uhimuulumele itthu hata ikhale yooreera atthuna yoonanara. ³⁰ Vano we wapheela urwaa, kontha wahooukhela uturuwela waathumwanaa, kahiki wennyerani anluku aka ayo?

³¹ Yakopi ahomwaakhula Lapanu eeraka: Kanawoova. Kontha kooniha wiira unakaakha asaanaa ayo. ³² Ule nohalaa umphwanyana anluku aa ayo umwiive. Unikukhuryace mi na asunnaka ayo waphwanya itthu yawaa ukuse. Kontha Yakopi khaacuwela wiira Rakeli pheennyile anluku ayo.

³³ Vano ahokela Lapanu nheemani mwa Yakopi, nheemani mwa Leya, nheemani mwa ipottha cithiyana piili nanso wohaphwanya anluku ayo. Ni ukhuma wawe nheemani mwa Leya, ahokela nheemani mwa Rakeli. ³⁴ Nanso Rakeli ahaakusa ananttunta ayo ni watumkhunyera munhukhoni yonkamira ni ahonkomela. Vano Lapanu ahaakukhurya nheemani mothene, ni khaaphwanyile. ³⁵ Rakeli aheerela athumwane: Paapa, nhikiviruwele akinlamuliya wunwa kontha kiri ni nteko wathiyana. Lapanu ahaawehaweha ananttunta ayo, nanso khaaphwanyile.

³⁶ Vaavale Yakopi ahorusiya nunviruwela Lapanu amwiirelaka: Kithekileni? Kukosenre isiyani yooreera we uviruwa ni ukoomolanihaca? ³⁷ We uhokukhuryaca mirintti caka cothene wakhala wiira uhophwanya itthu yawaa, uwiie va yoonaka alokwaa ayo ni alokwaka wiira anihukumu. ³⁸ Myakha sirini kihoovarela nteko. Ikhontwaa ni ipuri cinyu akinarihakaciha ni akinakhura inama yo nhuwo enyu. ³⁹ Kakinowiiherani inama yoorakalaca. Nkilivihaka inama cothene cenyinya uhiyu atthuna uthana. ⁴⁰ Uthana kaakhwa nttukuttha ni uhiyu kaakhwa uriirya ni nkaarupa. ⁴¹ Kihokhala myakha sirini, kuuvarelakani nteko. Myakha khumi na micese kihovarelani nteko wiira kaathele asaanaa eeli, ni myakha siita kihovarelani nteko nkipokerihaka inama, nanso nyu nhorukunusaca mapokerero aka imaara khumi. ⁴² Ahaari Nluku a apaapa, Nluku a Aparahamu, Nluku ri ihisima ya Isaki, khweeli nyu mwankoomola wohiitthu. Nluku heewa icuku caka ni hoona nteko uvanryaka, phimaana hookuphulani uhiyu wo ncana.

⁴³ Vaavale Lapanu ahomwaakhula Yakopi eeraka: Ala asithiyana ala asaanaka ni asilopwana ayo ucuulu aka, nnya mihuwo caka ni cothene cinoonaa nnyo ciri cawaka. Ilelo kinhala weeriha cani asaanaka ala ni asaana yayanryaya ayo? ⁴⁴ Nna va nileehane wiira ukhale usaahiti we ni mi.

⁴⁵ Vano Yakopi ahokusa nluku ni aheemesa upanka nivatta. ⁴⁶ Ni Yakopi aheerela asunnawe: Mpanke nikuttha no maluku.

Ni ale yahopankaca nikuttha no maluku ni othene yaholelyaca wanikutthani vale. ⁴⁷ Lapanu aheehana nipuro nno Yekar-Saatuta, nanso Yakopi eehane Kaleeti. ⁴⁸ Vano Lapanu aheera: Nna nikuttha nna nikhale saahiti ehu we ni mi. Phimaana wiihaninyaka uKaleeti ⁴⁹ ni Misipa, kontha heera: Mwaneene Nluku nniwehawehe we ni mi ni anihukumu hata nimwalane ntthu ni nkhwawe. ⁵⁰ Waahuvihaka asaana ala, waathelaka athiyana akina mi hata kihikhale, ucuwele wiira Nluku nawoona.

⁵¹ Lapanu ahomwiirela tho Yakopi: Nikuttha phi nna, ni nivatta neemesilyaka iriyari yo we ni mi phi nna. ⁵² Nikuttha nna nikhale saahiti. Ciicammo nivatta nna nikhale saahiti wiira yakhala yoonanara kihitupihe nikuttha nna kiwanaka nwo, ni we yakhala yoonanara uhituphane nikuttha nna ni nivatta nna uwaka uno. ⁵³ Nluku a Aparahamu, Nluku a Nahori, Nluku o mayathumwanaya anihukumu.

Ni Yakopi, mwanlattu wo ihisima ya Isaki athumwane, aholupela. ⁵⁴ Yakopi ahopanka isataka umwaakoni, ni aheehana asilokwawe yaari wonwo wiira alye. Yaholyaca ni yaru-pacile umwaakoni wonwo. ⁵⁵ Lapanu ahonwa wicisuru ahaavaha alaahuma asaanaawe asilopwana na asithiyana, ahaareeriha ni ahoturuwela uwaani.

32

Yakopi natthonkomania ikwaha yonkumaanana Isawu

¹ Wahoolo Yakopi ahokhuma ni ahaakumanana ancelo a Nluku. ² Vano woona wawe, Yakopi aheera: Ala anakhotto a Nluku! Ni ahovaha nipuro nno ncina na Manayimu.

³ Vaavale, Yakopi ahaaveleliha mayanhupi awe wa Isawu munnaawe, akhala uSeyiri ilapo yo Eetomu. ⁴ Ni aheerela mwanhimerye nkunyaka Isawu wiira: Mi karumeya enyu Yakopi kari wamoca ni Lapanu, kihaawo mpaka ilelo. ⁵ Kihaana imope na apuuru, ikhontwaa, ipuri, ipottha cithiyana ni cilopwana. Nkunya, kinovelelihera ula nhupi ula, wiira ukakhelele wosalaama.

⁶ Vano mayanhupi yahoturuwela wa Yakopi phimwiirelaka: Nihomphwanya munna Isawu ni uyo nowa wonwo, nawuphavela, ni haana alopwana iminya cese.

⁷ Vano Yakopi ahoova venci ni ahocukula. Phimaana ahaakawaniha athu ayo miphwinko miili, ciicammo ahokawaniha ikhontwaa, ipuri, imope ni inkamira miphwinko miili, ⁸ kontha oopuwela coo: Isawu awaaka na anakhotto awe aatuphelaka mphwinko mmoca nkina uyo unkohala. ⁹ Vano Yakopi ahoswali eeraka: Nluku a paapa Aparahamu, Nluku a paapa Isaki, we Mwaneene Nluku ukireenle wiira: Uturuwele uwanyaa waalokwaa kinawupanka yooreera. ¹⁰ Mi kinacuwela wiira khaninkiphwanela nifento neekhweeli ninkipankaa mi karumeyaa. Kilapuwile mooloko Yortani ni ntntonto aka paahi, nanso nna va kihaana miphwinko miili. ¹¹ Sontte ukoopole mmatatani mwa munnaka Isawu, kontha mi kinamoova, wiira hiiwe ukiiva mi, asaana wamoca na anumwanaya. ¹² Kontha we uheera: Kinaweetiha ratta. Kinawuvaha ucuulu mwinci toko nhava wo mpharyaa ni miphwinko wa athu wohaalikelyaa.*

¹³ Yoole uhiyu ule Yakopi ahorupa nenne nipuro nne ni ahothanla mihuwo commaha munnaawe Isawu: ¹⁴ ipuri cithiyana iminya piili ni anapinkula sirini, ikhontwaa cithiyana iminya piili ni anapinkula sirini okhontwaa, ¹⁵ inkamira talathini cithiyana co wamwinya na asaana aya, imope cithiyana arupayini ni imope khumi cilopwana, apuuru onthiyana sirini ni apuuru onlopwana khumi. ¹⁶ Ahaakawela mihuwo nnyo ipottha cawe wiira awacawace, ni wo khula nhuwo wari mphantte aya, ni aheera: Nhoolelaceke ni nhiye ikhato nhuwo ni nhuwo nkhwaya. ¹⁷ Ahonlamulela oopacera ole: Munnaka Isawu oophwanyaka, ni ookohaka wiira: We uri naani, unrwa vayi ni nhuwo urinaa ula wawani? ¹⁸ Vano umwakhuleke wiira ca karumeya enyu Yakopi. Ciri itthuvo cinonveleliherawe nkunya awe Isawu ni uyo neera awaka uttuli wihu. ¹⁹ Ciicammo ahonlamulela onyeeeli, oneeraru nale othene yawa uttuli mihuwo eeraka: Uphwanyakani Isawu othene munhimiycere nuulumo nimoca nenna. ²⁰ Munhimerye tho wiira: Karumeya aa Yakopi nawa uttuli uno. Kontha Yakopi hoopuwela coo: Kahoolihaka itthuvo caka nnyo, kinattipihya urusiyu wawe nwo, vano nakumanacaka ni mi uyo, athunaka nakakhelela wooreera. ²¹ Phimaana inama cotthuvo nnye cahoolihya, nanso ule ahohala veekhawe nipuro nomakiya nne ni ahorupa uhiyu wothene.

Nkhitto wa Yakopi uPenuweli

²² Yoole uhiyu ule ahonwa ni ahaakusa asaarawe eeli, na asaarawe eeli oohitteeliheraninya, wamoca na asaanawe khumi na mmoca, ni yaholapuwaca nsepa no Yappoko. ²³ Ahaalapusaca nsepa nno asaarawe ayo ni citthu cothene carinawe. ²⁴ Vano Yakopi ahohala veekhawe ni ahomwanana nlopwana mmoca uhiyu wothene mpaka usa. ²⁵ Nlopwana ule, woona wawe wiira khamoorya unthema, ahomwaatta wakumanacile makhuva oonatara, ni Yakopi ahorepenyuwa wakumanacile makhuva ni amwananaka ono.

²⁶ Nlopwana ule aheera ukihiye kirwee kontha uhosa. Nanso Yakopi ahomwaakhula eeraka: Akinoohiya urwaka wahikireeriheke. ²⁷ Ni ahonkoha: Ncina naa tipani? Ule ahomwaakhula: Mi kineehaninya Yakopi. ²⁸ Vano nlopwana ule aheera: Ncina naa khaninhala wihhaninya tho Yakopi, nanso Israyeli, kontha we uhomwaanana Nluku na athu ni uhotthema.

²⁹ Ni Yakopi ahonkoha eeraka: Kinapheela ucuwela ncina naa. Ule aheera: Unkikoherani ncina? Vaavale ahonreeriha.

³⁰ Vano Yakopi ahovaha ncina na Peniyeli nenno nipuro nno, eeraka: Kontha kihomoono Nluku ni miitho aka ala ni mi kinkumi.

³¹ Aakhumile uPeniyeli, ukati wakhumaya ncuwa ni Yakopi anattumpela. ³² Phimaana mpaka nihuku noleelo annasirayeli khankhuraca ntinka unluttaniha natara ni iyuunu, kontha Yakopi ahaattiya wantinkani ukumanihile natara ni iyuunu.

33

Ukumana wa Yakopi ni Isawu

¹ Yoole ukati ule, Yakopi ahowehe ni phamoonawe Isawu awaaka, nari na alopwana iminya cese. Vano ahaakawa asaanawe ayo anvahaka Leya, Rakeli na asaarawe eeli oohitteeliheraninya. ² Vano ahaaholiha asaarawe eeli oohitteeliheraninya na asaanaya ayo, ahomweesa Leya na asaanawe ayo uttuli waasaarawe oohitteeliheraninya Rakeli ni Yusufu phaari oomalihera. ³ Wahoolo Yakopi ahaapwahaca nukhala uhoolo, ni ahomelala vathi imaara saapa mpaka waphilyawe wamunnawe.

* 32:12 Mphattuwelo 22.17

⁴ Vaavale Isawu ahontthimakela, ahonkapatta nuunvaha alaahuma nuunsalameeha, ni othene yahonlaca. ⁵ Wahoolo ahoweha ni ahoona athiyana na amirawo ni ahokoha eeraka: Ala phaasipani arinaa ala? Ule ahaakhula eeraka: Ala pha asaana anvahilyawe Nluku wotthuna wawe karumeya aa. ⁶ Vano yahophiyaca asaarawe eeli oohittelheraniya wamoca na asaanaya ayo ni yahoroma. ⁷ Ciicammo ahophiya Leya wamoca na asaanawe, ni ahoroma. Wiimaliheroni ahophiya Yusufu ni Rakeli, na ayo yahoromaca.

⁸ Nanlelo Isawu anakoha: Unhala wiirihani mihuwo cothene ciphwanyilyaka niphiri nnyo? Yakopi ahomwaakhula: Keera kiphwanye nnema wamiithoni wankunya aka. ⁹ Nanso Isawu ahomwiirela: Mwanhimaka, mi kihaana mihuwo cinci. Cirinaa nnyo uhalaneke. ¹⁰ Vano Yakopi ahomwaakhula: Mena, wakhala wiira uhaana nnema ni mi ukuse itthuvo yuvahilyaka ela, phimaana koonaka ikhove aa, toko wiira koonne ikhove ya Nluku, kontha we uhokaakhelela. ¹¹ Kinawulepela ukuse iparakhaka iwaneliyaa kontha Nluku wo nnema hokivaha, ni kihaana ciinci. Ni ahonkhanyereriha mpaka Isawu waakhelela.

¹² Isawu aheera: Nrwee neette. Mi kinahoola. ¹³ Nanso Yakopi aheera: Nkunya, kinawoona asaanaka ayo ukenkenyaca ni kihaana ikhontwaa ni imope cotothola naanano kaakuvihacaka, wonihuku nimoca kinawoova ukikhwacera cothene. ¹⁴ Fatari uhooleke nkunya, mi kinawa uttuli nwo keettaka vakani vakani. Kintthariha malonce onama ciri uhoolo nnya ni amirawo arinaka ala. Kinawuphwanya uSeyiri.

¹⁵ Vano, Isawu aheera: Kinawuhiyera atthu arinaka ala. Ule ahonkoha: Nlattuni? Wanaatosi mi kaphwanyaru nnema ni nkunya aka. ¹⁶ Phimaana Isawu ahoturuwela iphiri yaweenlyawe ahokoleelaka uSeyiri. ¹⁷ Nanso Yakopi ahopwahera arwaka uSukoti. Uphiya wawe ahoteka inupa ni macici onama cawe. Phimaana wiihaninyaka nenno nipuro nno uSukoti.

¹⁸ Paahi Yakopi ahophiya nari nkumi iparasa yo uSikeni ni ilapo yo Kanaa, akhumaka uPatan-Arami; ni ahomaka vakhiviru nuparasa. ¹⁹ Ni ahothuma nthala nankhuru-tunlyawe heema munthalani na asaanu a Hemori, athumwane Sikeni ni nsurukhu iminya imoca. ²⁰ Vaavale ahoteka ikhilompi ni ahovaha ncina na Nluku, Nluku o Isirayeli.

34

Nkhitto wa atthu o Sikeni ni nrukulu na Yakopi

¹ Nkwaha mmoca, Tina, mwana a Leya ayanryawe ni Yakopi, ahokhuma wiira aacuwelane athiyana oyeele ilapo ele. ² Sikeni, mwanawe Hamori, nHevewu, mwene o yooletttethe ule, ahomoona ni ahontuphela. ³ Nanso nrima awe wahonphelyaa nlatu wa Tina, mwana a Yakopi, ni ule ahoncivela mwanthiyana ole ni ahomuulumana wonifento. ⁴ Phimaana Sikeni ahorwaa waahimerya athumwane eerelaka: Nkuulumele ule nthiyana ole wiira akhale mwaaraka. ⁵ Yakopi wacuwenlyawe wiira mwamwanawe Tina ahotankanyinya iharusi, asaanawe anari utakhwani walihaaya mihuwo; ahomaala awehereryaka uturuwaca. ⁶ Vano Hamori, athumwane Sikeni yahorwaa woopa mwaha ni Yakopi. ⁷ Ukati waturuwacilyaya utakhwani asaana a Yakopi yahocuwelaca cothene ni yahocukulaca nuurusiya venci cinenne kontha Sikeni ahopanka itthu yowuulihaca muru uIsirayeli, wanrupanyawe mwana a Yakopi; itthu ihimpankiya. ⁸ Nanso Hamori aheerelaca: Mwanaka Sikeni hociveliya ni mwaninyu. Kinawuvekelani wiira munvahe akhale mwaarawe. ⁹ Ni niyaranace nyu ni hi, nnivahaka asaanenyu asithiyana ayo ni hi ninawuvahani awihu ayo, ¹⁰ ni nkhalane wamoca ni hi. Ilapo inoonenyu ila nkhalane wohitwana. Mpanke marontta enyu ni nkhalane mathala. ¹¹ Vano Sikeni aheerela athumwane ni asunnawe mwanthiyana ole: Nkikupali. Nkivahe mwanthiyana oyo. Mi kinawuulivani ihisapu yothehe inhalenyu ukilamula. ¹² Mwatthuna mmwelihe ihisapu yotheha ni conthuva mwali uyo. Mi kinakumiha cothene cinhalenyu uhimya, nanso nkivahe mwali uyo kinthele.

¹³ Vaavale, asaana a Yakopi yahonthepyaica Sikeni ni athumwane yeehaninya Hamori nlatu wootankanyaa iharusi ya Tina, mwanrokora. ¹⁴ Ni yahomwiirelaca: Khaninlamuliya upanka commo, unvaha mwanrokorihu nlopwana oohuula icantto kontha iri itthu yowuuliha muru. ¹⁵ Phimaana ninhala wutthunani nyu mwakhalaka toko hi. Mooliheke alopwana othene toko hi. ¹⁶ Vano ninawuvahani asaaneyu ayo wiira mwaatheleke, ni hi, asaanenyu ayo ninawathela. Ni ninhala ukhala wamoca ni amocuru ni nyu. ¹⁷ Nanso mwahiniweke ni mwahuleke icantto, ninankusa mwanihu uyo nuuthama.

¹⁸ Yaayo moolumo ayo yahoncivela Hamori ni mwanawe Sikeni. ¹⁹ Sikeni khapicile nuupanka yeereliyawe iyo kontha ahoncivela venci mwana a Yakopi. Ni Sikeni phaari oofentiya venci wowapwaha atthu othene yaariwo nntthoko na athumwane. ²⁰ Phimaana ahorwaa Hamori ni Sikeni wathukumaniha alopwana othene oparasa ni wahimerya

eeraka: ²¹ Ale atthu ale ari osalaama ni hi, phimaana naahiye akhale ilapo ehu ila ni apanke marontta aya. Kinawoona ilapo ihu iyo iri yinci. Ananivaha waathela asaanaya ayo ni hi ninawavaha asaanehu ayo. ²² Nanso ayo atthu ayo anhala ukupali ukhala ni hi ni ukhala amocar. Hi alopwana va othene nolaka icantto, toko ayo cunlyaya. ²³ Nnoona cani, imope caya nyo, ni nhakhu aya uyo, ni mihuwo caya nyo, khacinhala ukhala cawihu? Neewanane paahi ni anaahala ukhala wamoca ni hi. ²⁴ Vaavale atthu othene yavira nkhora wo oparasa, yahomwiwelela Hamori ni mwanawe Siken, ni alopwana othene yaavira wa nkhora woparasa, yahoolihiya icantto.

²⁵ Waphilyaya nihuku noneeraru, ukati waryaya muhuvani ni yaweryaka venci makhwatta ayo, asaana eeli a Yakopi, Simeyoni ni Levi, asirokorawe Tina, yahokusaca khula ntthu ikatana awe, yahokelaca mparasa mmwe ni yaheevakaca alopwana othene. ²⁶ Ciicammo yahomwiivaca ni ikatana Hamori ni mwanawe ni yahonkusaca Tina aari inupa ya Siken ni yahokhumaca. ²⁷ Asaanawe Yakopi yahophiyaca wa atthu ookhwa ni yahohukhaca mparasa mmo mothene kontha yanootankanyinya iharusi ya mwanrokoraya Tina. ²⁸ Yahokusaca ikhontwaa, imope, apuuru caari mparasa ni cothene caari mmattani. ²⁹ Yahokusaca mihakhu ni yahavarakaca asaana na athiyana urwaa wapanka ipottha, ni yahohukhaca mmpaani mothene. ³⁰ Phimaana Yakopi ahomwiirela Simeyoni ni Levi: Mokiveliveleliha, nhokiputaniha na atthu ankhala ilapo ela, ni makanani ni maperesewu ncuwelaka wiira hi niri vakani, anaahala ulattulana nuuhonona ntthoko ehu. ³¹ Vano ale yahaakhulaca: Mpaka uyo umpanka mwanrokorihu toko puuta?

35

Yakopi nawuulumaninya tho ni Nluku o Peteli

¹ Nluku ahonlamulela Yakopi: Wunwe, urwee uPeteli ni wakhale wonwo ni wampankele ikhilompi Nluku ookhumelenle ukati wantthawa munnaa Isawu. ² Vano Yakopi ahohimerya ntthoko nawe na atthu othene yarinawe eeraka: Mwakumihe anluku a malaponi othene wariyari winyu mwiirapihe ni mmware ikuwo cikina. ³ Vano nunwe nirwe uPeteli wonwo kinkontekela ikhilompi Nluku akaakhumle nihuku narinaka masukuli ni hokivelelela mmaphironi mothene mweettaka. ⁴ Vaavale Yakopi ahovahiya anluku othene oohimaana yari mmattatani ni ipirinku caari mmanyaruni ni Yakopi ahothipela vathi mooko uri wamoca nuSiken. ⁵ Vano yahokhumaca, na atthu yakhala yeeyo ilapo eyo Nluku ahaacariha woova mpaka woolwana wattharathara asaana a Yakopi. ⁶ Commo, Yakopi na atthu othene yarinawe yahophiyaca o Lusu uneehaniya uPeteli uri ilapo yo Kanaa. ⁷ Vaavale ahoteka ikhilompi ni nenno nipuro nno ahovaha ncina no El-Peteli, kontha Nluku ahonkhumelela ukati wantthawawe munnaawe.

⁸ Ahokhwa Teepora, karumeya a Repeka, ni ahovithiya vakhviru nuPeteli vathi waya mooko ni ahovaha ncina na Alompakuti.

⁹ Wahoolo Nluku ahonkhumelela tho Yakopi, akhumaka uPatan-Arami ni ahonreeraha. ¹⁰ Vano Nluku ahomwiirela: We ncina naa Yakopi. Ukhuma ilelo ncina naa khaninhala wiihanaya tho Yakopi nanso ncina naa ninhala wiihanaya Isirayeli. Ni aheehaniya ncina na Isirayeli. ¹¹ Nluku ahomwiirela tho: Mi phi mi Nluku okuru cothene. Uyarace ni ukhalane ucuulu mwinci. Mwiirutthuni mwa we, inaakhumelela ilapo cinci na atthu enci, ni ammokhumelela mamwene menci. ¹² Mi kimmowuvaha we ilapo invahilyaka Aparahamu ni Isaki. Wahoolo ilapo eyo kinavaha ucuulu aa. ¹³ Vaavale, wuulumaca wawe Yakopi, Nluku ahowela. ¹⁴ Vano aheesa nivatta no nluku nipuro noolumaninyawe ni Nluku, ni aheethela yoowuriya ni makhura waculu waya nivatta. ¹⁵ Phimaana Yakopi ahovaha ncina no Peteli nipuro namuulumanyawe Nluku.*

Uyariyaa wa Pencamii, ukhwa wa Rakeli ni Isaki

¹⁶ Wakhumilyaya uPeteli, unahanle ncoko vakani wiira apihiye ilapo yo Efarata, Rakeli ahonnyara mwana, nanso uyara wawe waari wookukuryaca. ¹⁷ Nari mmekho, mayoyariha ahomwiirela: Uhoove, kontha uhaana tho mwana mwanlopwana. ¹⁸ Vano wakhumaya nnepa awe, kontha hokhwa, ahonvaha mwana ule ncina na Penoni*, nanso athumwane yahonvaha ncina na Pencamii*. ¹⁹ Ni ala mananna ala pheeracilyawe wookhwa Rakeli ni ahovithiya ni iphiro yorwaa o Farata uneehaniya uPetelehemu. ²⁰ Waculu waya mahiye, Yakopi aheemesa nivatta no nluku. Mpaka nihuku noleelo, nenne nivatta nne ninathonyera mahiye a Rakeli. ²¹ Vano Isirayeli ahokhuma arwaka unkhurutula heema awe withela Miktal-Eteri. ²² Anowiira Isirayeli athamelaka yeeyo ilapo

* 35:15 Mphattuwelo 28.18-19

* 35:18 manaaya wiira: Mwanawe Ucuukula

* 35:18 manaaya wiira: Mwanawe

eyo, Rupeni ahorwaa unthukumanana Piila, amwaara athumwane oohitteeliheraninya, ni Isirayeli ahocuwela.

Yakopi ahaana asaana khumi nuuwa eeli: ²³ Rupeni, ntthara na Yakopi, Simeyoni, Levi, Yutta, Isakari ni Sepuloni, ala yari asaana a Leya; ²⁴ Yusufu ni Pencamii asaana a Rakeli; ²⁵ Taani ni Nafitali asaana a Piila, ipottha ya Rakeli; ²⁶ Kaate ni Aseri yaari asaana a Silipa ipottha ya Leya. Ala phaasaana yayarelyawe o Patan-Arami.

²⁷ Yakopi ahorwaa unthotola Isaki, athumwane, o Manree yo Kiriyate-Arapa o Heporoni wakhalawe Aparahamu ni Isaki. ²⁸ Mahuku ookumi a Isaki yari myakha iminya imoca ni myakha nuwa thamanini (180) ceyarelo. ²⁹ Isaki ahomumula nuukhwa nooluvanle ni ahaathara mayathumwane. Isawu ni Yakopi, asaanawe, yahonvitha.

36

Ucuulu wa Isawu

¹ Ula phu ucuulu wa Isawu, neehaniya Etomi. ² Isawu ahaathela athiyana iriyari ya asaana uKanaa: Ata mwana a Eloni, nHitita; Oholipama mwana a Anaa, mwana a Sipeyone nHivita; ³ ni Pasimati mwana a Sumayili, mwanrokorawe Nepayote.

⁴ Isawu ahonnyarana Ata, Elifasi, ni Pasimati ahonnyarana Reweli. ⁵ Oholipama ahonnyara Yewusi, Yalawu ni Korani.

Ala pha asaana a Isawu yayarenlawe ilapo yo Kanaa.

⁶ Vaavale Isawu ahaakusa asaarawe othene, asaanawe asilopwana na asithiyana na atthu othene ovatthokoni wawe; ni ahokusa mihuwo cawe, imope, mihakhu cawe ni cithu cothene caphwanyilyawe ilapo yo Kanaa, ni amwalanaka ni nhimaawe Yakopi ahothamela ilapo ikina. ⁷ Kontha mihakhu caya nnyo cari cinci, ni khacareerana ukhalakhala nipuro nimoca, ni ilapo yakhalakhalaya eyo khayarina coolya cootosa mwanlattu wonama carinaya nnyo. ⁸ Phimaana Isawu, neehaniya Etomi, ahorwaa ukhala mwako wo Seyiri.

⁹ Ula phu ucuulu wa Isawu athumwanaya annaEtomi, yakhalaca mwako wo Seyiri. ¹⁰ Ala phi macina asaanawe Isawu: Elifasi mwana a Ata, mwaarawe Isawu; Ruweli mwanawe Pisamate, mwaarawe Isawu. ¹¹ Asaana a Elifasi: Teemani, Umari, Seefu, Kaayita ni Keenasi. ¹² Timina ari mwaarawe oohitteeliheraninya a Elifasi, mwana a Isawu, ni ahonnyarana Elifasi Maalike; ala pha asaana Ata amwaara a Isawu.

¹³ Ala pha asaana a Ruweli: Naate, Seraa, Samaa ni Miisa; ala yari asaana a Pasimati, amwaarawe Isawu.

¹⁴ Ala pha asaana a Oholipama, mwanawe Anaa, mwanawe Sipeyone, athiyana oneeraru a Isawu; ni ahayaranana Isawu: Yewusi, Yalawu ni Koraa.

¹⁵ Vano ala phi mamwene asaana a Isawu, asaana a Elifasi, ntthara na Isawu: Mwene Temaani, mwene Umari, mwene Seefu, mwene Keenasi. ¹⁶ mwene Koraa, mwene Kayeta, mwene Maliki; ala phi mamwene yayanryawe Elifasi ilapo yo Etomi; asaana a Ata athiyana oolupale a Isawu.

¹⁷ Ala pha asaana a Ruweli mwana a Isawu: Mwene Naate, mwene Seraa, mwene Samaa, mwene Misaa; ala phi mamwene yayanryawe Ruweli ilapo yo Etomi, asaana a Pasimati mwaara a Isawu.

¹⁸ Ala pha asaana a Oholipama mwaara a Isawu: Mwene Yewusi, mwene Yalamu, mwene Koraa; ala phi mamwene akhumakhumile ni Oholipama, mwana a Anaa, mwaara a Isawu.

¹⁹ Ala pha asaana a Isawu ni mamwene aya; ule neehaniya Etomi.

²⁰ Ala pha asaana a Seyiri nHorewu, yakhalakhalala ilapo eyo: Lotanimu, Sopalimu, Sipeyonemu ni Anaamu, ²¹ Tiisomimu, Eserimu ni Tisaamu. Ala phi mamwene o mahorewu, asaana a Seyiiri ilapo yo Etomi. ²² Ala pha asaana a Lotani: Hoti ni Homa. Mwanrokorawe Lotani eehaninya Timina. ²³ Ala pha asaana a Soopali: Alvani, Manaate, Epali, Seefo ni Oona. ²⁴ Ala pha asaana a Sipeyone: Ayaa ni Anaa; naaciya Anaa onenenle iluusi co maasi oohiwelela ntakhwani, waahakhelawe apuuru a Sipeyone, athumwane.

²⁵ Ala pha asaana a Anaa: Tisomi ni Oholipama, mwana mwanthiyana a Anaa. ²⁶ Ala pha asaana a Tisomi: Hentta, Eesipa, Itera ni Kerani.

²⁷ Ala pha asaana a Eseri: Piila, Saava ni Akaa. ²⁸ Ala pha asaana a Tisomi: Usii ni Araa.

²⁹ Ala phi mamwene o mahorewu: mwene Lotamu, mwene Soopelamu, mwene Sipeyamu, mwene Anamu. ³⁰ mwene Tisomu, mwene Eserimu, mwene Tisomu; ala phi mamwene o mahorewu, toko caaryaya mamwene aya ilapo yo Seyiri.

³¹ Ala phi mamwene yathawaanle ilapo yo Etomi hinapaca ukhala mwene mwasaana o wIsirayeli. ³² O Etomi aholamula Peelamu, mwana a Peyori, ni ncina noparasa awe naari Tinapa. ³³ Ahokhwa Peela, ni nipuru nawe, ahothawala Yopapimu, mwana a Seraa, o

Posira. ³⁴ Ahokhwa Yopapi, ni nipuro nawe, aholamulula Husamu, olapo yo Matanamita. ³⁵ Ahokhwa Husamu, ni nipuro nawe, aholamula Hatatemu, mwana a Peetati, aarakalihile a Miitiya ncoko wo Mwape; ncina noparasa awe nari Avite. ³⁶ Ahokhwa Hatatemu, ni nipuro nawe, aholamula Samulamu, o Masireka. ³⁷ Ahokhwa Samulamu, ni nipuro nawe, aholamula Sawulumu, o Reyopoti, wamoca ni mooloko Ufarati. ³⁸ Ahokhwa Sawulumu, ni nipuro nawe, aholamula Paali-Hanamu, mwana a Akipori. ³⁹ Ahokhwa Paali-Hanamu, mwana a Akipori, ni nipuro nawe, aholamula Hatarimu; ncina noparasa awe nari Pawu; ni na amwaarawe nari Meetapeli, mwana a Materete, mwana Min-saape.

⁴⁰ Ala phi macina o mamwene a Isawu, toko caryaya malokwawe, mapuro aya ni macina aya: Mwene Timinamu, mwene Aluvamu, mwene Yetetemu, ⁴¹ mwene Oholipamu, mwene Elaamu, mwene Pinomu, ⁴² mwene Kinasimu, mwene Temamu, mwene Mipisarimu, ⁴³ mwene Makitiyelimu ni mwene Iramu.

Ala phi mamwene o Etomi, toko caakhaliyaya ilapo aya. Ula phi Isawu, athumwane o annaEtomi.

37

Yusufu

¹ Yakopi ahokhala ilapo yo Kanaa wonwo athumwane warwelyaya weettakaca. ² Ila phi yookhumelela ya nloko na Yakopi.

Yusufu warinawe myakha khumi na saapa aahakhela inama na asunnawe. Anawaakav-ihera asaana a Pila na asaana a Silpa asaara athumwane ni anawaahimerya athumwane coonanara caapanakaya asunnawe.

³ Vano, Israel aananfenta venci Yusufu woopwaha asaana akina ayo kontha aya-reele athumwane anooluvanle, phimaana yahonttotthihera ihancu yoorekama. ⁴ Ni wacuwenlyaya asunnawe wiira phinfentiya venci na athumwane woopwaha mwana phi mwana, yahonramaca ni khayamulumana wo nnema.

⁵ Vano aaholoha Yusufu nttora ni wahimenryawe asunnawe ale yahanca onrama wootepe. ⁶ Ni aheerela: Nviriyane nttora olohilyaka: ⁷ Natthukaca ihayi co tiriku omattani. Vano ihayi aka yahonwa ni weemela ni ihayi cinyu nnyo cahorukurerya ni wooromela ihayi aka.

⁸ Ni asunnawe yahomwiirelaca: Vano, weva onona wiira unaahala unilamula? Ni yahonrama tho woopwaha nlattu wo nttora ni itthu yahimilyawe.

⁹ Wahoolo aaholoha tho nttora ni wahimerya asunnawe eeraka: Kiholoha tho nttora nkina. Ila ikwaha ila ncuwa, mweri ni itthoottwa khumi ni imoca cahokikhromela. ¹⁰ Wahimenryawe athumwane na asunnawe, athumwane ayo yahoncaceraca yiiraka: Nttorani yooyo olohilyaa uyo? Maanaya wiira mi, anumwana na asunnaa ninwoworomela weva mpaka vathi? ¹¹ Phimaana asunnawe othene Yanaanramaca. Nanso athumwane yeera yuupuwelaka itthu iyo.

Yusufu nathumihya na asunnawe

¹² Asunnawe Yusufu yahorwaa uhakhela inama ca athumwanaya vakhiviru nuuSikeni, ¹³ ni Isirayeli ahomwiirela Yusufu: Toko cincuwelaa asunnaa anhakela inama vakhiviru ni nuuSikeni. Kimphela wuruma urwee wonwo. Yusufu ahaakhula eeraka: Aye. Kiheewa. ¹⁴ Athumwane yahomwiirela: Urwee wonwo woone unari ukhaliyaka ratta, ukhuma asunnaa ni inama ciyo ni ukiwiihere ihapari. Yakopi anrumile nari nikuwa no Heporoni, ni Yusufu ahophiya uSikeni. ¹⁵ Vano nlopwana mmoca ahomphwanya akomankomacaka muthakoni ni ahonkoha eeraka: We, unaavyani? ¹⁶ Yusufu ahaakhula: Kinaavya asunnaka. Nkihimerye nipuro ninhakhelaya inama nnyo. ¹⁷ Nlopwana ule ahaakhula: Ayo ahokhumaca va. Mi kiheewa yiiracaca nrwee uTotaani.

Vano Yusufu ahaathara asunnawe. Ni ahaaphwanya anari vakhiviru ni uTotaani. ¹⁸ Nanso ale yahomoonaca nttayi nttayi, ni hinaphiya Yusufu, yahovanela umwiiva. ¹⁹ Ni yahohimeryana yiiraka: Hophiya nanttoro uyo. ²⁰ Vano nrwee ninwiive nunrihela nluusi, ni neereke hokhuriya ni nsene noone vano cinhalaya wiira ittora cawe nnyo.

²¹ Vano, wiiva wawe Rupeni ahomananiha umwaakiha eeraka: Nihimwiive! ²² Ni aheera tho: Nhivuvihe iphome. Munrihele nluusi iri muthakoni mu, yooyo uyo nhinvar-avare. Rupeni olumacentre coommo aavyaka mananna omwaakiha ni wiira anturusele wathumwane.

²³ Uphiya wawe Yusufu, asunnawe yahonrulaca ihancu awe, yoorekama eyo, ²⁴ nunvaraca nunrihela nluusi moohimasi.

²⁵ Wookomacilyaya wiira alye yahoona nttayi nttayi mphwinko wa Annasumayili wakhuma uKiliyati. Ikamelo caya capakhinre ikaruma coonukhela, makhura o nrette ni makhura oonukhela caarwanaya Wiciipitu. ²⁶ Yutta aheerela asunnawe: Ninhala

uphwanyani namwiivaka nhimeehu uyo, nimaalanaka ukhwa wawe nwo. ²⁷ Nrwee naathumihere Annasumayili. Nihinhasare ula nhimeehu iphula ni niitho. Ni asunnawe Yutta yahokupali.

²⁸ Wattamenryaya anamarontta Annasumayili o Mitiyani, asunnawe Yusufu yahonkumiha Yusufu nluusi ni yahathumihera Annasumayili ni ncurukhu siriini nunkusa Wiciipitu.

²⁹ Rupeni warwelyawe unweha nluusi mmo, khaamphwanyile. Woono wawe wiira Yusufu khaawo ahaahula coowara cawe, ³⁰ aturuwelaka waasunnawe ni aheera: Mmi-rawo uyo mmwe khaawo! Kinhala wiira cani?

³¹ Vano yahomwiivaca napinkula nuruwyaa mphomeni ihancu ya Yusufu. ³² Ni yorhorwaca waathonyera athumwanaya yiiracaka: Nihottotta ihancu ila kahiki khinakhala ihancu ya mwaninyu Yusufu? ³³ Ni Yakopi ahoona wiira phi yeeyo ni aheera: Ila ihancu ila ya mwanaka! Nsene nihonhasara. Yusufu hokhuriya!

³⁴ Vano Yakopi ahaahula coowara cawe nuwara icakho ni ahomunlela mwanawe mahuku menci. ³⁵ Asaanawe othene, asilopwana na asithiyana yanawa ummaaliha, nanso aanakhotta umaalihiya nwo eeraka: Mena! Kinaahala wunla mpaka mmahiye nryawe mwanaka. Ni ahopwaherera umunlela. ³⁶ Yooyo ukati uyo uWiciipitu, Annamitiyani yahontumiha Yusufu waPutifari, nhooleli a mayoorontta inupa ya Farawoo, mwene o Wiciipitu.

38

Yutta ni Tamari

¹ Yooyo ukati uyo, Yutta ahaahiya asunnawe ni ahorwaa ukhala inupa ya nlopwana mmoca ehaninya Hiira, ilapo yo Atulami. ² Vano Yutta ahomoono mwanthiyana mmoca nKanaa ehaninya Suuwa. Ule ahonkusa nuunthela. ³ Ni mwanthiyana ole ahorupala ni onyara mwana nuummaha ncina na Eeri. ⁴ Ahorupala tho irukulu, ahonnyara mwana nlopwana nuunvaha ncina na Onani. ⁵ Ahaakulela tho nuunyara mwana ni ahonvaha ncina na Seela. Yooyo annyanre nari uKisipi. ⁶ Vano Yutta ahomwaverya Eeri, mwanawe oonthaara, nthiyana ehaninya Tamari wiira anthele. ⁷ Nanso Eeri, mwana oonthaara a Yutta, aari oohiloka wamiithoni wa Mwaneene Nluku, phimaana Mwaneene Nluku ahomwiiva. ⁸ Vano Yutta ahomwiirela Onani: Ukhale nkelanupa a munnaa, wiira munnaa akhalane ipyo. ⁹ Nanso Onani wacuwenlyawe wiira asaana ayo khalhala ukhala awawe, ukati wathukumananawe amwaara a munnaawe, aarihakacela vathi wiira hinyarele asaana munnaawe. ¹⁰ Ni yaapankawe ile yaari yoonanara wamiithoni wa Apwiya, phimaana nuuyo yahomwiiva. ¹¹ Vano Yutta ahomwiirela Tamari: Weenaneleke unankhwelyaa uyo wapuwanu ya athumwana mpaka wanhalawe wunnuwa mwanaka Seela. Kinawuvaha wiira unthele, kontha Yutta oolumacene commo aaceraka wiira Seela ni uyo hikhwe toko cikhwilyaya asunnawe. Phimaana Tamari ahorwaa waathumwane.

¹² Anavinrene mahuku menci, yahokhwa amwaara a Yutta, yaari mwana a Suuwa. Wahoolo Yutta aheepisiha nrma ni ahorwaa ni mpwanawe Hiira, Nnatulami, waweha ahakheli awe okhontwaa oTimina. ¹³ Vano ahohimerya Tamari wiira atiithyaa anrwaa oTimina uthikila mapururu okhontwaa. ¹⁴ Tamari ahorula ikuwo coonankhwele ni aheettiyelela wiitho nwo ni nleso wiira hicutweliye, ni ahonkoma wankhora wo Nayimi, uri iphiro yo Timina, kontha ahoona wiira Seela honnuwa ni khanvahiya tho wiira akhale awannyawe. ¹⁵ Vaavale Yutta umoona wawe Tamari amoonihile toko putta, kontha anookhuneela ikhove awe iyo. ¹⁶ Yutta ahorwaa waryawe Tamari nuumwiirela: Nkawe, kinawuvekela kuuthukumanane. Kontha khacuwela wiira amwaara-mwanaka. Ni ule ahonkoha: Unhala ukivahani wowiira ukithukumanane? ¹⁷ Ule ahaakhula eeraka: Kinawuvelelihera ipuri yo muncicini mwaka. Ni Tamari aheera: Mwemesere ithu mpaka wanhalenyu uwiiha. ¹⁸ Vano ule ahonkoha eeraka: Kemesereke isiyani? Ule ahomwaakhula: Ikanyero eyo, ni nleso naa nno ni ntontotto uri mmatatani mwa uyo. Yutta ahonvaha calepenlyawe, nuunrupana mpaka unrupaliha. ¹⁹ Wahoolo Tamari ahonwa nuurula nleso nawanryawe, ni ahowara ikuwo coonankhwele cawe.

²⁰ Yutta ahonvaherera mpwanawe Nnatulami wiira oopole citthu cemesenryawe mmatatani mwa nthiyana ole, nanso khaamphwanyile. ²¹ Hiira ahaakoha alopwana o yoole ntetthe ole eeraka: Ri vayi namararuwa nonkomesa vakhiviru waya iluusi piili ciru ni iphiro yo Nayimi? Ayo yahomwaakhulaca: Mu mmwani mu khanirina namararuwa. ²² Vano uyo ahokoleela wa Yutta ni ahomwiirela: Akimphwanyile. Uhiya commo, athu o yoole ntetthe ule yinne nwo khaawo nthiyana namararuwa. ²³ Yutta aheera: Mweeco, ahalaneke cennyo cinhiyenryaka nyo. Akinthuna wiira nitarawyaace. Maana ni kahoovaherera ila ipuri ila wiira wanvahe, nanso we khumphwanyile.

²⁴ Cinavrinre myeeri miraru, Yutta ahohimerya wiira: Tamari aheetta uluva ni horupala irukulu. Vano Yutta aheera: Akumiheriye vate ni apahiye. ²⁵ Ukati wakumiheriya awe vate wiira apahiye, Tamari aholeehera nhupi wa amaathi awe eeraka: Kirupalihile phi mwaneene nnya citthu nnya. Ni ahopwaherera eeraka: Nkoonani nnya, ni mmwaavye mwaneene ile ikanyero ila, nna nleso nna ni ula ntntonto ola. ²⁶ Vano Yutta ahocuwela citthu nnyo ni aheera: Amwaara-mwanaka ayo ahaana isariya yookivikana mi kontha kinoohavaha mwanaka Seela. Ni khaathukumananne tho.

²⁷ Vano waphiilyaya ukati wooyara, wahoonnyaa wiira haana mavatta mmirimani mmo. ²⁸ Wayaraawe va, mmoca uyo ahokumihera ntata nawe vate ni nthiyana mayoyariha ahonvara moonoo uyo nuuntthuka nluuci nookhwiila, eeraka: Ula phi oopacera. ²⁹ Ukati waturusa awe mwana ule ntata nawe nno, nhimaawe ule phaphovawe nuupacera uyaryaa, ni nthiyana mayoyariha aheera: Uphwanyile cani ikhato yooaira? Ni ahovahiya ncina na Peresi manaaya wiira ikhato. ³⁰ Wahoolo ahoyarya munnaawe, natthukiye mmoononi nluuci nookhwiila, ni ahovahiya ncina na Seera.

39

Yusufu uwannyawe Putifari

¹ Yusufu ahorwaaninya Wiciipitu. Wonwo Putifari wanthumilyawe Yusufu mmatatani mwAnnasumayili. Putifari ari nhooleli a mayoorontta inupa ya Farawoomu, mwene o Wiciipitu, ahonthuma mmatatani mwAnnasumayili yammwiihile. ² Mwaneene Nluku ari ni Yusufu, ni uyo anareeriya venci, nuupwaherera ni aakhala wapuwani wa nkunya awe munnaciipitu. ³ Putifari ucuwela wawe wiira Mwaneene Nluku ari ni Yusufu ni yaammunnuwiha nuureeriha miteko cothene cavarawe, ⁴ ni ahoncivela Yusufu mpaka onvaha ukhala nlamuli o wapuwani wawe wothene. Putifari ahonhiyera Yusufu ulamula wapuwani wawe wothene ni citthu cothene caarinawe. ⁵ Ukhuma ukati wanhiyenryawe ulamula wapuwani wothene ni citthu cothene, Mwaneene Nluku ahovaha iparackha inupa ya munnaciipitu, mwanlattu wa Yusufu. Iparackha ca Mwaneene Nluku cahomwareela mwa citthu cothene carinawe Putifari, ukhuma wapuwani mpaka umattani. ⁶ Vano, ahohiya citthu cothene carinawe, mmatatani mwa Yusufu, ni khaarina isukuli weetthu phi itthu, aawehererya ulya paahi. Yusufu aari ooreera ni aancivela na athu.

⁷ Wakhanlyawe ukati vakani, amwaara a nkunya awe yahanca unthokoca numwiihana yiiraka: Uwe wakirupane! ⁸ Nanso ule ahokhotta ni aheera: Nkunya aka khana-sukuli weetthu phi itthu ciri wapuwani ni cothene cirinawe hiile mmatatani mwaka. ⁹ Khaawo wapuwani wa ookipwaha mi, ni khiiwo ikateelihilyawe, nanso nyu paahi, kontha amwaarawe. Kaahala upankelani itthu yoonanara toko ila, nuunkosera Nluku? ¹⁰ Toko coo, ale yaanankhanyereriha Yusufu khula nihuku, nanso uyo anawakhotta ni khaatthuna waattamanana. ¹¹ Nihuku nimoca ahokela mpani wiira avare miteko cawe ni yooyo ukati uyo, khaariwo nthu hata mmoca. ¹² Vano ale yahovara ikuwo awe ni yahomwiirela tho: Nrwee, ukirupane! Nanso uyo ahokhuma mpani mmo ni waahiyera ikuwo eyo mmatatani mwaya. ¹³ Waatthawawe va, yahoona wiira hohiya ikuwo awe mmatatani mwaya, ¹⁴ ni yaheehana akarumeya ni weerelaca: Nkoonani! Ula Nheperewu ula niwiiheriyehu ula uwa uniruwana! Ule hokela mu ni aphavela ukirupana, nanso ni kihokhuwela. ¹⁵ Wakiwiilyawe kikhuwaka, hokihiyera ikuwo awe nuukhuma mpani mmo. ¹⁶ Vano ale yahosunka ikuwo eyo mpaka wawilyawe nkunya uwaani. ¹⁷ Vano yahaakulela uttonka itthu yakhumile yiiraka: Ile ipotha yo uHeperewu ile iniwiihenryaa eyo, yahokiwela mi ukiruwana. ¹⁸ Nanso wakhuwenlyaka wiira kaakuvelyiye, uyo hokihiyera ikuwo eyo nutthawa. ¹⁹ Wewilyawe nkunya awe ithu yattonkaya amwaarawe yiiraka: Coo phikipankilyaya ipotha iyo. Ahorusiya. ²⁰ Ahoruma wiira arweeliye Yusufu ni ahovonyeriya nkalaposo mwatthukeliyaya ananthukiya a amwene. Yusufu ahokhala nkalaposo, ²¹ nanso Mwaneene Nluku ari nuule, yahomweettiha nrema, mpaka wiiwanana ni nhooleli onkalaposo. ²² Phimaana nhooleli onkalaposo ahomvaha Yusufu iyuulupale ya ananthukiya, ni yooyo phakhulela citthu cothene cakhumelela nkalaposo mmo. ²³ Nhooleli khaarina masukuli ni Yusufu, kontha Mwaneene Nluku ari ni Yusufu ni yahonvaha iparackha wo miteko cothene cavarawe.

40

Yusufu naataphulela ittora nkalaposo

¹ Unavrinre ukati vakani, hutumu ni mayamikatthe o wamwene o Wiciipitu, yahonkosera nkunya aya, mwene o Wiciipitu. ² Farawoo ahorusiya na ahooledi awe ale, nhooleli o mahutumumu ni nhooleli o mayamikatthe, ³ ni aholamula utthukelaciya uwanryawe nhooleli o mayoorontta, nkalaposo mwaryawe Yusufu. ⁴ Nhooleli o mayoorontta

ahiile anantthukiya mmatatani mwa Yusufu ni eera aawehawehaka, ni yahokhala ukati vakani nkalaposo. ⁵ Vano yaholohaca hutumu ni mayamikatthe a mwene o Wiciipitu, yatthukeliye nkalaposo. Khula ntthu aholoha nttora nawe, oyeeli uhiyu mmoca yooyo ni khula nttora wahaana mataphuleleliyo aya. ⁶ Yusufu warwawe waweha wicisu, ahoona wiira yanacukulaca. ⁷ Phimaana ahaakoha akhuulupale a Farawoo, ni ale yaatthukiye wawaanyawe nkunya aya, eeraka: Nlattuni nyu ilelo nkhalaka oohitta? ⁸ Ale yahaakhulaca yiiraka: Nihaana nttora ehu ni khaawo oonitaphulela. Yusufu aheerelaca: Utaphulela nwo khunakhala wa Nluku? Nkihimerye mittora nnyo.

⁹ Vano hutumu ahonttonkela Yusufu nttora awe uyo: Munttorani mwaka kihoona mwiri unari vakhiviru ni mi, ¹⁰ ni mwiri uyo wahaana miritta miraru. Ni uyo wahopuwa, mpaka ukhalana ithutu ni wiima ni uttokottha mavareene. ¹¹ Ikoomisi ya Farawoo yaari mmatatani mwaka. Kahokusa cowiima nnye ni waamela nkoomisini mwa Farawoo nu-umvaha mmatatani mwawe. ¹² Yusufu ahomwiirela: Mataphuleleliyo aya pha ala: Miritta miraru nnyo phi mahuku mararu. ¹³ Nhina wo mahuku mararu, Farawoo nowowwusa muru aa, ni nowowutaphula ni wuhokolosera nteko aa ni we ummomvaha ikoomisi mmatatani mwawe toko caalemalenlyaa umpanka waarya hutumu awe. ¹⁴ Ukiviriyane cothene caweetelaka ratta ukuupuweleleke mi, wakihimye wooreera wa Farawoo nwo, wiira kikhume nkalaposo mu. ¹⁵ Maana kiwiihiye utthuna nuuhitthuna, ukhuma ilapo yo maheperewu, ni ciicammo, uno khiiwo ipankilyaka yooreerela utthukeliya nkalaposo mu.

¹⁶ Weewilyawe muulupale omayamikatthe mataphuleleliyo omaana ale, ahomwiirela Yusufu: Ni mi ciicammo kihaana nttora aka: Wamuru waka cahaawo ithuttu tthaaru co mikatthe cooteela. ¹⁷ Itthuttu yoovalu iyo cahaawo mikatthe co khula nnana ni cooviyoala cikina caancivela Farawoo, nanso asaanuni yaanaawa ulya ntthuttuni yari-naaka wamuru iyo. ¹⁸ Ni Yusufu aheera: Ala phi mataphuleleliyo aya: Itthuttu tthaaru nnyo, phi mahuku mararu. ¹⁹ Nhina wo mahuku mararu, Farawoo nowowutthukacera ni wuuthomya mmwirini, ni asaanuni ammoolya irutthu aa.

²⁰ Waphilyaya nihuku noneeraru, naari nihuku napiherawe Farawoo myakha ceyarelo ni ahaalattula mayoonlaka othene ni waavaha yoolya. Wamiithoni waya atthu ale ahaawusaca myuru nhooleli o mahutumu ni nhooleli o mayamikatthe. ²¹ Ahonhokolosera nteko awe hutumu, mpaka wakhanlyawe tho yoole mayonvaha ikoomisi Farawoo. ²² Nanso, ahoruma wiiviya wootthukaceriya nhooleli o mayamikatthe toko Yusufu caahimenryawe muutaphulelani nttora. ²³ Paahi, nhooleli o mahutumu ule khamuupuwente tho Yusufu, mpaka ahonliyala.

41

Yusufu naataphulela ittora ca Farawoo

¹ Wumaleloni wo myakha miili, Farawoo ahaana nttora awe. Ule anoweemela nceresere mooloko Niilu. ² Vano cahokhumaca mmoolokoni mmo imope saapa cooreera ni cooneneva, caalya nceresere mooloko. ³ Wahoolo cahokhuma mmoolokoni mmo imope tho saapa, coonanaraca ni cowoottaca, carweele utakaneela ni cikhananaya nnye nceresere mooloko. ⁴ Vano imope coonanaraca nnyo ni cowoottaca nnyo cahokhura imope cooreeraca nnyo ni cooneneva nnyo. Vano Farawoo ahonwa. ⁵ Ahohokoleela tho urupa ni aholoha tho nttora nikina. Miphapa saapa, cuulupale ni comaana, coocara ni cooreera, cahothapuruwa ntathi mmoca. ⁶ Vano cahophuwela tho miphapa cikina saapa, cooyeevaca ni coowuuma mu ncasini mmo, caapahiye ni iphyoo yaakhuma wuuthakoni. ⁷ Miphapa cooyeevaca nnyo cahomirya miphapa saapa coocara ni comaana nnyo. Vano Farawoo ahonwa, ni ahoona wiira aari nttora. ⁸ Wicisuru, cinancanre cowuupuwela coonkukuryeeha, ahoruma wiihanaciya mayaahako ni mayoocuwelaca o Wiciipitu ni ahaattonkela mittora nnyo, nanso khaawo oonrye utaphulela.

⁹ Vano nhooleli o mahutumu ahomwiirela Farawoo: Ileo phinoopuwelaka caaliyanlyaka. ¹⁰ Ikwaha imoca Farawoo wahorusiya na arumeyi aa eeli ni waholamula otthukiya mi ni nhooleli omayamikatthe owannyawe nhooleli omayoorontta. ¹¹ Uhiyu mmoca, khula ntthu wa hi, aholoha nttora ni khula nttora wahaana mataphuleleliyo aya.

¹² Wahoreera! Ahaawo ni hi mommo mmirawo mmoca Nheperewu, karumeya a nhooleli omayoorontta. Nahonttonkela cennye mittora cihu nnye ni ule ahotaphulela, anihimeryaka wo khula ntthu manaaya nttora awe. ¹³ Ni cothene cahokhumelela toko canihimenryawe. Mi kihoturuseleya nteko aka ni nkina uyo heeviya wootthukeliya.

¹⁴ Farawoo ahoruma wiihaninya Yusufu eeraka: Awiihiye wowakuvyaa akhumihiyaka ukalapooso. Namethhileene irori nuuwara ikuwo cikina aheethoonrya wa Farawoo. ¹⁵ Farawoo ahomwiirela Yusufu: Kahaana nttora nimoca ni khaawo noorya

utaphulela. Nanso kiheewa wiira we, weewaka nttora unawoorya utaphulela. ¹⁶ Yusufu ahomwaakhula: Iyo khinkhuma ni mi, nanso Nluku nawuvahani nyu taphulelo no nnema. ¹⁷ Vano Farawoo ahonttonkela nttora ule Yusufu: Kiholoha kineemenle nceresere mooloko Niilu. ¹⁸ Cahokhuma mmoolokoni mmo imope saapa cooreera ni cooneneva, caalya ni mooloko uyo. ¹⁹ Wahoolo cahokhuma cikina tho saapa coonanara ni cowootta. Akinoona imope coonanara mwiilaponi mothene. ²⁰ Imope coonanara ni cowootta nnyo cahokhura imope saapa cooneneva nnyo cakhumelenle woopacera nnyo. ²¹ Hata cinakhuunreene, khacacuwannya wiira ciholya canvira cikhalaka yooyo nkhalalo uyo. Vano kahonwa. ²² Wahoolo kaholoha tho nttora nkina. Kahoono miphapa saapa, coocara ni cooreera, cathapuruwa ntathi mmoca. ²³ Vano cahophuwela tho saapa coonyaala ni cooyevaca, cowumihinya ni iphyoo yooviha yakhuma muuthakoni. ²⁴ Miphapa cooyevaca nnyo cahomirya miphapa saapa comaana nnyo. Kihaattonkela iyo acuweli, nanso khaawo oonrye utaphulela.

²⁵ Farawoo, mwarina nttora mmoca, eera phi Yusufu. Nluku hoohimeryani Farawoo, itthu imphavelawe upanka. ²⁶ Imope saapa cooreera nnyo, ciri myakha saapa ni miphapa saapa comaana nnyo, ciicammo ciri myakha saapa, va uri nttora mmocar. ²⁷ Imope saapa cowootta ni coonanara nnyo cakhumelenle uttuli waya cikina nnyo, ni miphapa saapa cohicari ni coomihye ni iphyoo yooviha yakhuma muthakoni, ciri myakha saapa. Cinhala ukhala myakha saapa cotala. ²⁸ Phi ciicammo toko cuuhimenryaka Farawoo, Nluku hoothoonyera itthu inhalawe upanka. ²⁹ Myaakha saapa cooruweriya cihanle vakani uwa ilapo yo Wiciipitu. ³⁰ Wahoolo cimmowa myakha saapa cotala. Vano ukati wothene wooruweriya ummooliyaliya, kontha itala eyo immohasara ilapo yothene. ³¹ Itala inhala uwa immokhala yootepa, woovikana ukati waruweriye khunhala wupuweleliya tho mwiilaponi. ³² Nttora uhowela imaara piili Farawoo, kontha itthu ila iholakeliya ni Nluku ni immwa yakuvyaka. ³³ We Farawoo umphavele nlopwana oocuwelaca ni unhele ulamulela ilapo yo Wiciipitu. ³⁴ Farawoo waahele atthu oowehaweha, anhala utotokaniha mphantte wonethanu wo coolya co Wiciipitu nhina wo myakha saapa cooruweriya nnyo. ³⁵ Ayo anlumuliya utotokaniha yoolya yootosa inhalaya wooryaniha ukati wooruweriya uyo, nuusunka itiriku, ni we Farawoo unlamuliya uwehawehaka ni usunkihia mmakhupini ummasittatti. ³⁶ Yeeyo yoolya iyo inhala usunkiya eyo, phinhala ulaminy myakha cotala cinhala uwa mWiciipitu mu, wiira ilapo ihiasaryee ni itala.

Yusufu mwaakhula a Farawoo.

³⁷ Ala moopuwelo ala yahoncivela Farawoo na anamiruku awe othene. ³⁸ Phimaana Farawoo ahaakoha: Nanso ninaahala umphwanya ntthu toko ula ookhalana Nnepa wa Nluku? ³⁹ Farawoo ahomwiirela Yusufu: Toko ciinryawe wowuthonyera Nluku citthu nnya cothene, khaawo ntthu annkhili nuucuwelaca toko we. ⁴⁰ We thi we unhala ulamulela inupa aka, ni uneethi aka wothene unhala wiiwelela nlamulo naa, nanso wahiceni, thi mi muulupale wowuupwaha we. ⁴¹ Ni Farawoo ahopwaherera: Kinawuuvaha nenna vaa ulamulela ilapo yo Wiciipitu yothene. ⁴² Wahoolo, Farawoo ahonrula nnikokhoni nneela antthittelawe nuummwariha Yusufu nnikokhoni mwawe. Aholamula uwarilihiya ihaancu yoovevyaala, ni ahommwariha nkuhu wowooru nsiko. ⁴³ Ni ahommwarihiya ikaaro awe yonayeeli yo omwene ni uhoole wawe yahaawo anamakhuwela yeera: Nhule iphiro. Yusufu heesiya ulamulela ilapo yothene yo Wiciipitu. ⁴⁴ Farawoo ahomwiirela tho Yusufu: Mi Farawoo, nanso wohinuulumo naa, khaawo nolamuliya upanka itthu phi itthu mWiciipitu mothene. ⁴⁵ Farawoo ahommaha Yusufu ncina na Safenate-Paneya ni ahommaha nthiyana wiira akhale mwarawe, Asenate, mwana a Potifera, nhooleli osataka yo Oni. Wahoolo Yusufu ahorwaa wonoona ilapo yothene yo Wiciipitu.

⁴⁶ Yusufu aarina myakha talathini ceyarelo wapacenryawe unvarela nteko Farawoo, mwene o Wiciipitu. Uyo ahonhiya Farawoo ni ahorwaa woonoona ilapo yothene yo Wiciipitu. ⁴⁷ Ukati wo myakha saapa cooruweriya, ilapo yothene yahaana yoolya yinci. ⁴⁸ Yusufu ahototokaniha yoolya yalikeleliye usunkiya, yo myakha saapa cooruweriya Wiciipitu ni ahosunka mmakhupini ummparasa khula iparasa ahototokanihi itiriku yo mmattani. ⁴⁹ Commo, Yusufu ahosunka itiriku yinci, toko nhaava wompharyaa. Uyo ahohiya waalikela yoolya iyo kontha khaawo tho oorya uphima mwanlattu wowinciva.

⁵⁰ Cihinaya uphiya myakha cotala, Asenate, mwana a Potifera, nhooleli osataka yo Oni, ahonnyarana Yusufu asaana eeli. ⁵¹ Oopacera uyo, Yusufu ahommaha ncina na Manasesi, eeraka: Nluku hokiliyalaha mahuviho aka othene ni inupa yothene ya apaapa. ⁵² Mwana onayeeli ahommaha ncina no Farayimi, eeraka: Nluku hokipanka ocayra ilapo yahuvaka.

⁵³ Commo, cahophiya ummaleloni myakha cooruweriya Wiciipitu, ⁵⁴ ni cahopacera myakha saapa cotala, toko Yusufu wahoolelihenryawe uhimya. Yahaawo itala ilapo cothene, nanso ilapo yo Wiciipitu yahaawo yoolya. ⁵⁵ Wancenryaya uvola itala ilapo

yothehe yo Wiciipitu, uneethi wahanca unlepela Farawoo yoolya. Uyo ahaakhula atthu o Wiciipitu, eeraka: Nrwee wa Yusufu ni mpanke inhalaawe wuuhimeryani. ⁵⁶ Wamwaryenyayaya itala ilapo cothene, Yusufu aholamula uhuliya makhupi ni ahopacera utumiha itiriku, aatumihiraka atthu o Wiciipitu, maana itala yahotepa. ⁵⁷ Ni atthu ookhuma ilapo cothene, yammwa Wiciipitu wiira yathume itiriku wa Yusufu, kontha itala yaanvira itepaka ilapo cothene.

42

Asunnawe Yusufu anarwaa Wiciipitu

¹ Yakopi Wacuwenyawe wiira ihawo itiriku Wiciipitu, aheerela asaanawe: Isiyani umakelaka uwehanenca paahi? ² Aheera tho: Kiheewa yiiriyaka ihaawo itiriku Wiciipitu. Nrwee wonwo mwanithumele itiriku wiira nipwaherere ukumi ni nihikhwe itala. ³ Toko coo, asunnawe khumi a Yusufu yahorwaaca Wiciipitu uthuma itiriku. ⁴ Yakopi khant-hunihile Pencami, nhimaawe Yusufu, wiira aatthukane ikwaha, kontha aanawoova unkhumelela itthu yoonanara. ⁵ Asaana a Isirayeli yaari na atthu akina yarwaca uthuma itiriku, nlatu wotala yavonnle uKanaa.

⁶ Yusufu aari nlamuli olapo yo Wiciipitu ni yooyo phaatumihera itiriku atthu othene. Phimaana uphiya waya asunnawe Yusufu yahomuramela mpaka uphiya vathi. ⁷ Woona wawe, Yusufu ahaacuwelela asunnawe, nanso aakhanle toko khaacuwelene ni ahoopopiha eeraka: Nyu nnokhumakhuma vayi? Yahaakhulaca: Ninkhuma ilapo yo Kanaa naawile uthuma yoolya. ⁸ Yusufu ahaacuwela asunnawe, nanso ayo khayancuwelacile. ⁹ Vano ahoopuwela ittora calohilyawe nari na asunnawe ni aheerela: Nyu nri mayoohottela! Mwawile uhottelaca ilapo ehu ila wiira ncuwele nipuro nookhwyaa. ¹⁰ Ale yahaakhulaca: Mena, nkunya. Asaanenyu yawile uthuma yoolya. ¹¹ Hi othene, athumwanihu ari amoca. Asaana ari atthu omaana, khaanakhala oohottela. ¹² Nanso Yusufu ahaakhanyererihira eeraka: Mena! Nyu mwile uhottela wiira moonenele nipuro nookhwyaa ilapo ehu ila. ¹³ Ni ale yaheeraca: Asaana yaari khumi neeli, othene athumwanaya ari amoca ilapo yo Kanaa. Itthyaako eyo ihanle uwaani na athumwanaya ni nkina uyo hokhwa. ¹⁴ Yusufu ahaakulela eeraka: Phi vaava kihimilyaaka va. Nyu nri mayoohottela. ¹⁵ Nyu nnaahala ulawihya. Kinalupela mwancina na Farawoo, nyu mu khannokhuma, mwahimmwaneke uno mwanhimenyu eethyako uyo. ¹⁶ Munrume mmoca anrweele mwanhimenyu uyo vano akina vaa nthothukiya. Commo phinhaleehu ucuwela wiira cinhimenyu nnyo ciri citthu ceekhweeli atthuna cowoothiya. Cahikhaleke ceekhweeli, kinalupela mwancina na Farawoo wiira wanaahala ucuwanyaa wiira nyu khweeli nri atthu oohottela! ¹⁷ Ni ahaatthukela nkalapooso mahuku mararu.

¹⁸ Nihuku noneeraru Yusufu aheerelaca: Mi kinamoova Nluku. Mwapheela woopwaa, mpanke coo: ¹⁹ Mwakhala wiira nyu atthu omaana, munhiye munniinyu mmoca nkalapooso mu. Vano akina vaa nturuwaceke nuukusaka itiriku wiira mwalye uwaani. ²⁰ Nkiwiihere vaa nhimeenyu eethyako uyo wiira acuwanyee moolomo enyu yakhala wiira eekhweeli ni nyu phinhaleenyu uhikhwa. ²¹ Ayo yahotthuna upanka yahiminye eyo ni yaheerelana: Khweeli va ninattarusiya mwanlatu weetthu impankileehu nhimeehu uyo. Naammoonaka caacukula awe, ni waanisonntelawe vaa, wiira ninhiye nkumi, nanso khanaanthunenle. Phimaana uniphwanyaka uno utapana uno. ²² Ruupeni ahaakhula: Akoohimenryeni wiira nhinhuvihe mmirawo uyo, nanso nyu khamwatthunne ukiwa! Vano ninlamuliya waakhulela iphome awe eyo. ²³ Nanso ale khayaacuwela wiira Yusufu naweewa, kontha oolumana ni ntthu aataphulela ni nuulumo naya. ²⁴ Vaavale Yusufu ahothama ni wunla. Vano ahohokoleela tho ni ahoolumaca wiira atthukiye Simeyoni, othene amoonacaka.

Asunnawe Yusufu anaturuwa uKanaa

²⁵ Wahoolo Yusufu aholamula wiira icarihiye itiriku mmirupani mwaya mmo ni ituruseliye ipheeta yo khula ntthu munrupani mwawe, ni avahiye iphika coovira alyaka. Ni commo wahopankiya. ²⁶ Ale yahopakhira mirintti caya co tiriku mwa apuuru aya nuukhumaca. ²⁷ Nipuro naamakilyaya nlatu wo wiileliya, mmoca uyo ahotthukula nrupa awe wiira ankumihe nankanka oonliha puuru awe, ni ahoona ipheeta umalakuni wonrupa awe. ²⁸ Ni aheerela asunnawe: Kihoturuseliya ipheeta aka eyo. Ila mu munrupani mwaka mu. Yoovaka wanrimani waya ni attettemelaka yaheerelana: Isiyani ila Nluku inipankilyawe ela?

²⁹ Waaphilyaya wathumwanaya, ilapo yo Kanaa, yahohimyaca cothene caakhumelenle, yiiraka: ³⁰ Nlopwana mwaneene ilapo eyo honuulumacera ni honihela ukhala hi atthu oohottela. ³¹ Nanso hi nihonroromeliha wiira khanihiwena atthu oohottela niri atthu eekhweeli. ³² Niheera tho wiira naari asaana khuumi neeli athumwanihu ari amoca

ni mwana mmoca uyo hokhwa, ni eethyako uyo ri na athumwanihu uKanaa. ³³ Vano nlopwana mwaneene ilapo eyo honiirela: Nrwee noone mwakhala atthu eekhweeli: Nhimeenyu mmoca nolamuliya uhala vaava ni mi. Akina ayo aturuweke ni akuseke yoolya yalyeke uwaani na akhwaya. ³⁴ Nanso mwakiwiihere nhimenu eethyako uyo phinhalaaka ukupali mi wiira nyu atthu omaana ni khannakhala mayoohottela. Vano phinhalaaka wuhokoloserani munninyu uyo ni wutthuniherani upanka marontta ila ilapo ela. ³⁵ Weetthiyaaya mirintti nnyo, wo khula nrintti wahophwanyinya nhukho woocara ipheeta. Yakopi na asaanawe woonnyaya mihukho nnye, yahoovaca. ³⁶ Ni Yakopi aheerelaca: Nyu nnakimalihera asaanaka ayo! Kihanle wohi Yusufu, nnavaa kiri wohi Simeyoni, ninlelo nna nnopheela unkusa Pencamii? Cothene cinkikhuma mi! ³⁷ Vano Rupeni aheerela athumwane: Kahinturuwaneke Pencamii uyo, mweevakace asaanaka oyeeli khaweetthu. Nkiihyere Pencamii uyo, thi mi kinhala unwacawaca. ³⁸ Nanso athumwane yahaakhula: Mwanaka uyo khannonkusa. Munnawe hokhwa. Uyo nna phihanle. Itthu phi itthu yoonanara inhala unkhumelela uyo munkwahani mmo, vano phinhalenyu uvitha ipwi caka nnyo mmahiye kinari ni icuku.

43

Asunnawe Yusufu anaturuwela tho Wiciipitu

¹ Itala yaanatepa mwiilaponi mmo. ² Vano wamanlyaya itiriku yothehe yawiihilyaya asaana a Yakopi akhumanaka Wiciipitu, athumwanaya yaheerelaca: Nhokoleelace ni mwathume tho yoolya. ³ Nanso Yutta aheerela: Nlopwana uyo ahonileehera venci eeraka: Nhihokoleelace waryaaka wohimmwiuha nhimenu uyo. ⁴ Mwanivahaka nhimehu uyo ninrwaanaka, ninaarwa, ninkoothuma ni wuthumelani yoolya. ⁵ Nanso mwahinivahake ninrwanaka, khaninrwa, kontha nlopwana uyo hoolumacile coo: Nhihokoleelace waryaaka kahiki mwammwiihaka nhimenu uyo.

⁶ Isirayeli ahokoha: Nkipankenleni yoonanara toko ila, munhimeryaka nlopwana uyo wiira nhaanaca nhimenu nkina? ⁷ Ni ale yahomwaakhulaca: Uyo honikohakoha hi na amucihu. Ni honikoha tho eeraka: Athumwaninyu nanlelo ahaawo akumi? Nyu nhaana nhimenu nkina? Hi nimwaakhunle paahi itthu yanikohawe. Nahala ucuwela cani wiira nohala uniirela mummwiihe nhimenu.

⁸ Vano Yutta ahomwiirela Isirayeli athumwane: Munhiye mmirawo uyo kinrwaanace, ninarwaca, wiira nyu ni hi na asaanehu nikhale akumi ni nihikhwe. ⁹ Ni kinawiiulacelela veehkaka unvarelela uyo. Nkiheleke mi ukhala mayonvarelela mwana uyo. Kahinturuwaneke mpaka wuthonyerani wamiithoni winyu, phi mi cinhala ukikhalela ikhirini nnyo wamiithoni winyu ukati wothene. ¹⁰ Toko cinoonenyu, yiiriyaka khanapicile cono ninarwele ni ninaturuwile imaara piili.

¹¹ Vano Isirayeli, athumwane Yutta, yahomwiirela: Wakhala wiira phinhalaya wiiranyaa, haya wakhale ciicammo. Nhele munrupani mwinyu mmo coolya comaana co mwiilaponi mwihu mu ni munkusere yooyo nlopwana uyo; makhura onrette vakani, urawo vakani, citthu coonukhela cikina ni miira, cowiima ni amentowa: ¹² Nkuse ipheeta yoopitaanihinya, imaara piili piili ni nhokolose ipheeta yahelye munrupani mwinyu waturuwenyu wa malakuni wo nrupa enyu. Kahiki itthu iyo ikhumelenle nlatu woovonyanihinya. ¹³ Munkuseke nhimenu uyo ni nhokolelele wa nlopwana uyo. ¹⁴ Nluku Okuru-Cothene awooneleni ikiriri iriyari ya nlopwana uyo wiira ootthunihereni onturuwana nhimeenyu Pencamii ni nhimeenyu nkina uyo. Mi, kakhalaka woohasaana, kinakhalaka.

¹⁵ Vano asilopwana ale yahorwaa ni yahokhuruwela Wiciipitu anakusileene coovaha, ipheeta yoopitaanihinya piili piili ni Pencamii, ni yahorwaa wa Yusufu. ¹⁶ Yusufu, wamoonnyawe Pencamii na asunnawe, ahomwiirela nhooleli owapuwani wawe: Waakuse alopwana ala owaanyaka, wamwiive mwanama ni onlokihace, kontha ayo yoolya yoothana anhala ulya ni mi. ¹⁷ Ni ule ahopanka yahimeriyawe ni ahaakusaca mpaka inupa ya Yusufu. ¹⁸ Ayo yahoovaca wakusiyaya arwaaninyaka owaanyawe Yusufu ni yahoopuwela yiiraka: Niwiiheriye va nlatu wopheeta ihokoloseriye murrintini mwihu ikwaha yoopacera: Uyo nophavela onittarusa, onihuviha, onipanka ipottha nuukusa inama cihu nnyo. ¹⁹ Phimaana, yahorwaa wa nhooleli onupa ya Yusufu ni yahomwiirela wakelaya wankhora. ²⁰ Uviriyane, yoowe nkunya! Ikwaha yoopacera yawilehu va khweeli nawile othuma yoolya. ²¹ Nanso nipuro neemenlehu wiira nimake, nahotthukula mirintti cihu ni utthukula woono khula ntthu wakhalacenehu ahophwanya ipheeta yawiihilyawe uwaani yoolikaneene. Phimaana nihohokolosa, ²² nuwiiha ipheeta ikina wiira nithume yoolya. Khanincuwenle ntthu nihelenle ipheeta mmirintini mwihu mmo. ²³ Vano nhooleli ule aheera: Nkhalane nnema. Nluku inyu,

phi Nluku a athumwaninyu, phuvahileni nhakhu munrinttini mwinyu mmo, kontha ipheeta enyu kahaakhela. Vano ahontthukula Simiyoni nunrweha waryaya asunnawe. ²⁴ Wahoolo, ahaarwana inupa ya Yusufu, ni ahaavaha maasi, uwiwululacera inyaa ni inama caya nnyo ahovaha yoolya. ²⁵ Vano ayo yahototokaniha coovaha caya cahalaya unvaha Yusufu uthana, kontha yahocuwela wiira phahalaya unlyana.

²⁶ Waphilyawe Yusufu yahonvaha cammwiihenryaya ni yahonlapela yooromaka mpaka vathi. ²⁷ Vano uyo ahaakohaca isalaama ni aheerela tho: Ari eehalini athumwaninyu, nlopwana oowuluvala kihimenryenyu uyo? Nanlelo haawo nkumi? ²⁸ Ayo yahaakhulaca: Nrumeyaa, athumwanihu, nanlelo akumi, ahaawo salaama, ni othene yahonlapela.

²⁹ Awehaka nceresere ni amoonaka nhimaawe Pencamii, mwana aanumwane, Yusufu ahokoha: Ula phi yooyo nhimenyu etthyako kihimenryenyu uyo? Ni ahopwaherera tho eeraka: Nluku oovahe nnema, mwanaka, ³⁰ nlatu wootteeliya woomoona nhimaawe, Yusufu ahokhuma akuvyacaka wiira aphavele nipuro nowunla, ni akelaka mpaani, ahoonla. ³¹ Wakhucilyawe, ahokhuma ni eewehawehaka, aheera: Aliyeke yoolya eyo. ³² Ahomeeliya yoolya veekhawe Yusufu, woohatakanelana asunnawe ale, ni annaciipitu yalyanawe na ayo yahomeeliya veekha, kontha annaciipitu khayalamuliya walyana annaperewu. Uyo waari mwiihko aya. ³³ Asunnawe yaheesiya wameca, atharanihiyaka mookomelo ayo, maciso eeyareelo, ukhuma omuulupale mpaka omwankani ni yammwehanaca atikhinacaka. ³⁴ Vano yahomeeliya yoolya ya Yusufu wa meeca. Ni mencivelo o yoolya ya Pencamii yari yoopwaha imaara thanu menciviheriyo o yoolya ya asunnawe, ni yahoolyaca venci nuuwurya cathunaya.

44

Yusufu nawalawiha asunnawe

¹ Yusufu ahonvaha nhooleli owapuwni wawe, nna nlamulo nna: Ncarihe mmirinttini mwaya ala athu ala yoolya yo khula nkwaratati mpaka cinhalaya woorya ukusa ni nhele ipheeta iwannyawe khula ntthu omalakuni womirinttini cawe. ² Wahoolo nhele ikoomisi aka, yopheeta, munrinttini mwa mwana eetthyako uyo, ni wamoca ni ipheeta inthumenlyawe tiriku. Ni uyo ahopanka cothene toko cahimeriyawe ni Yusufu. ³ Wasilyaya, yaholehaca athu ale ni inama caya. ⁴ Yaari ahinayaca upwaha iparasa eyo, phu ukati Yusufu wamwiirenyawe nhooleli owapuwni wawe: Wunwe ni wathimakele athu ale ni waaphwanyaka weerele: Nnakakhaniherani itthu yooreera ni yoonanara. ⁵ Khinakhala ila ikoomisi immureryawe nkunya aka ni immwaserera awe ihako? Nyu nhopanka yoonanara.

⁶ Waaphwanyilyawe ahaakuleliha ala moolumo ala. ⁷ Nanso ayo yahomwiirelaca: Nlattuni nkunya wuulumacaka commo? Uttayi ni yeeyo itthu iyo mpankaca arumeyaa. ⁸ Wooneke nsurukhu ula, uphwanyileehu umalakuni wo mirupa cihu, nihooturuselani nikhumaka ilapo yo uKanaa, naahala winnyacerani inupa ya nkunyaa ipheeta ni iwooru. ⁹ Akhalaka wiira mmoca wa arumeyi aa naphwanyaninya, eeviye, ni hi akina va ninakhala ipottha ca nkunya eh.

¹⁰ Uyo aheera: Kihokupali. Yooyo nohala uphwanyaninya uyo, phinhala ukhala ipottha aka, akina ayo anawoopwaa. ¹¹ Khula ntthu ahokurusa mirinti cawe wowakuvyaa ni wanca utaphula. ¹² Nhooleli uyo ahanca uphavelaca wo khula nrintti, apaceraka wa muulupale mpaka umalihera wa mwana eethyako uyo. Ni ikoomisi iyo yahophwanyinya munrinttini wa Pencamii. ¹³ Wakhumelenlyaya commo, ayo yahaahulaca coowara caya. Wahoolo, othene yahopakhiraca mirinti caya nuuturuwela arwaaka uparasa.

¹⁴ Yutta na asunnawe waphiyacilyaya inupa ya Yusufu, ni ule ari wonwo. Vano ale yahoromaca wamiithoni waawe ula, mpaka uphiya vathi. ¹⁵ Yusufu ahaakohaca: Ikipankacilenyu iyo isiyani? Nyu khannocuwelaca wiira ntthu toko mi kinawoorya uwasera ihako?

¹⁶ Vano Yutta aheera: Ninhala uwaakhulani nkunya? Ninhala uhimyani? Ninhala upanka cani mwaavi wiira niphwanye isariya? Nluku hokumihera wonene unyali ihu. Nkunya hi nna va ipottha caa. Wamoca ni uyo phwanyaninye ikoomisi iyo.

¹⁷ Vano aheera Yusufu: Akimpanka mi commo. Yooyo ntthu mphwanyaninye ikoomisi iyo phinhala ukhala ipottha aka. Wiireke nyu akina vaa, nturuweleke ni nnema waathumwaninyu.

¹⁸ Vano Yutta ahonciserera yoole, ni aheera: Sontte nkunya ukihiye, kinawulepela, kihaana nuulumo noophela wuulumaca wamiithoni waa, nkunya aka, ni nhikiviruwele, kontha nyu nri toko Farawoo. ¹⁹ Nkunya aka uhaakoha arumeyi aa wiiraka: Nhaanaca athumwaninyu athuna nhimenyu? ²⁰ Hi nihoochimyacera nkunya niiraka: Nihaana

athumwanihu uowuluvala ni mmirawo mmoca nnyanryaya anooluvanle, nhimehu. Ahaawo munnaawe yooyo ooyaraninya nrukulu nimoca hookhwa. Anumwana ayo anhalanne yooyo, ni athumwane ananfenta venci. ²¹ Vano we nkunya uhonireela: Nkiwiihere komoone mmiithoni mwaka. ²² Ni hi nihowiirela: Nkunya, mmirawo uyo kxanhala waahiya athumwane, kontha arimelaru uyo apapehu anaakhwa. ²³ Vano nyu nheerela karumeya enyu: Mwahinmwanceke mwanhimenyu uyo, khannohala woonaca ikhove aka. ²⁴ Weeraka coo: Hi karumeya aa, nihorwaa waathumwanihu nihattontkela moolumo yoolumacilyaa nkunya.

²⁵ Athumwanihu wanirenyaya tho wiira nturuwele mwathume yoolya. ²⁶ Hi ni-heerela: Khanintthuna urwaa nwo veekhehu. Ninhala uturuwela tho nwo mwanhimehu eetthyako uyo nanrwaanaka, kontha khaninkela namoonaka nkunya uyo ikhove awe mwanhimehu ahirweke ni hi. ²⁷ Vano honirela karumeya aa, athumwanihu, coo: Nyu nhocuwelaca wiira amwaaraka yayanre asaana eeli. ²⁸ Mmoco uyo heetta ni mi kiinre, khweeli yooyo hokhuriya, ni akimmoona tho mpaka nna. ²⁹ Vano mwankusaka ula waamiithoni waka, ni imwiirannyaka itthu phi itthu iyo, nnaahala uvitha irutthu aka mmahiye ni icuku.

³⁰ Nna va mi karwaka waathumwanihu, karumeya aa, woohinrwana mmirawo uyo, athumwanihu cinryaaya wonvarecesa. ³¹ Anaahala ukhwa ucukula yakela yanoonaka uturuwa veekha wohi mmirawo ula. Ni hi ninaahala wavitha apaapehu ayo ni masukuli.

³² Phimaana mi kiceemesaka wamiithoni waa unsunka mmirawo uyo ni kiheerela: Aahituruwele tho uno ikikhalele mi ikhirini iyo mahuku othene.

³³ Vano nna mi kikhale ipottha ya nkunya aka nipuro nahalawe ukhala mmirawo uyo. Vano uyo arweeke uwaani na asunnawe ayo. ³⁴ Kinkohimya isiyani mi karwaka waathumwane wohinkusa mmirawo uyo? Akinntthuna wona mi yoonanara inhala wakhuma apaapa ayo.

45

Yusufu nawiicuweliha na asunnawe

¹ Yooyo ukati uyo Yusufu anawoolwana wiivithavitha nwo wamiithoni wa atthu othene, phimaana ahokhuwa eeraka: Mwakumihe ananrumeya ayo othene va. Co khaawo ahanle nenno nipuro nno, ukati ule Yusufu weecuwanehilyawe na asunnawe.

² Vaavale ule ahanca wunla venci mpaka Annaciipitu wiiwa ni ihapari iyo yahophiya waFarawoo.

³ Vano aheerela Yusufu asunnawe ale: Mi Yusufu. Apaapa nannelo ahaawo akumi? Nanso asunnawe ale yahosankaca venci, mpaka woolwana umwaakhula. ⁴ Ni aheerelaca Yusufu asunnawe ale: Nciserace woono. Umwattameryaca waya, aheerelaca: Mi nhimeenyu Yusufu, yoole nyu munthumihileenyu arwaninyaka Wiciipitu. ⁵ Vano va nhicukulace ni nhiiiryelele mwanlattu nyu wookithumiha kiwaaninyaka uno, kontha Nluku aacentre wiira woopwe ukumi watthu enci, phimaana akiholiha uno. ⁶ Nna nhina woomyakha miili niri nhina ntalani ilapo yothene, ni cinaahala myakha mithanu khacinhalaa waaliya ni hata wuruliya. ⁷ Nanso Nluku hokihooliha uno wiira kikhale ipyo yoomuci mwiilaponi mu ni kiwoopoleni ni wuukhikicerani venci. ⁸ Khannakhala thi nyu nkiwanne uno, nanso Nluku, ni hokipanka ukhala namanantthu a Farawoo ni nlamuli o uhano ni nlamuli o Wiciipitu wothene.

⁹ Nturuwele wowakuvyaa waapaapa ni mwaahimerye: Nohimya co mwaninyu Yusufu: Nluku mi hokipanka mwaneene ilapo yothene yo Wiciipitu. Mmwe woono, woohipica.

¹⁰ Nyu nnowokhala ntetthe wo Koseni, vakhiviru ni mi. Ukhuma nyu, asaanenyu ayo, ucuulu inyu uyo, ikhontwaa cinyu nnyo, imope cinyu nnyo ni ikaruma cinyu nnyo cothene mmwane. ¹¹ Mi kinnowulihani kontha cinaahala tho va myakha mithano cotala. Mwahitthuneke nyu na amucinyu othene ni mihuwo cinyu cothene nnaahala uhava.

¹² Cothene nnaawoona ni miitho enyu, ni nhimaka Pencamii phi saahiti. Nawoona wiira khweeli thi mi kinoolumaca nnya citthu nnya. ¹³ Mwahimerye apaapa waneerihyaka woolemelihya mi Wiciipitu ni citthu cothene cinoonenyu. Ni mwaawihe apaapa woono wowaakuvyaa. ¹⁴ Vano ule ahonkapatta Pencamii nhimaawe oonlaka uno, ni Pencamii cicamno ahonvara mmakhatani mmo ni uyo oonlaka uno. ¹⁵ Wahoolo ahaavaha alaaahuma asunnawe ni othene yahoonlaca. Waculuru asunnawe ayo phoonryaya umuulumana.

¹⁶ Vano weewiiyaya uhano wiira asunnawe Yusufu ahowaca, Farawoo ni mahumu awe othene yahotteeliya. ¹⁷ Vano Farawoo ahomwiirela Yusufu: Waahimerye asunnaayo yapakhirihe mirintti nnyo asinama ayo, aturuwele ilapo yo Kanaa. ¹⁸ Ni yaturuwele woono, yaawihe athumwana na alokwaa othene. Mi kinnowavaha itthaya yomaana mWiciipitu mu ni nyu nnaahala ulawa nhaku weelapo ila. ¹⁹ Waarume yakuse ampakhira o

Wiciipitu wiira yaawiihe asaaraya, asaanaya na athumwaninyu. ²⁰ Cihukukureheni citthu cinyu, kontha mapuro ooreera o Wiciipitu anhala ukhala awinyu.

²¹ Commo yahopanka asaana a Isirayeli. Yusufu ahaavaha asunnawe ampakhira ni iphika toko Farawoo calamunlyawe. ²² Wo khula ntthu ahonvaha nrintti wokuwo conaanano, nanso ni Pencamii ahomvaha makoopiri opeeta iminya ttharu ni mirintti mithanu cokuwo conaanano. ²³ Athumwane ahaavelelihera inama coopakhira khumi, cinapakhinre citthu cootepa ooreera co Wiciipitu, ni inama khumi coopakhira cinakusile itiriku, mikatthe ni iphika cikina co munkwahani.

²⁴ Wahoolo aholeehana na asunnawe, ni wakhumaya aheerelaca: Nhinyakulihane ni iphiro! ²⁵ Yahohokolya Wiciipitu aturuwelaka wathumwanaya aneehaninya Yakooipi ilapo yo Kanaa, ²⁶ ni yahottonkaca ihapari yiiraka: Yusufu ninlelo haawo nkumi! Khweeli yooyo phi nlamuli olapo yothene yo Wiciipitu. Vaavale nrima wa Yakopi wahomwattakyya ni ahovittikhuwa. Ni khaalamuliya waakupali asaanawe ayo. ²⁷ Nanso wahimeriyawe cothene calehenryawe Yusufu, ni Yakopi oonaka ampakhira yaveleli-hilyawe Yusufu wiira arweliye, nnepa awe wahokhala mmapuroni. ²⁸ Isirayeli aheera: Paahi! Mwanaka Yusufu ninlelo haawo nkumi. Kinkomoona kihinakhwa.

46

Yakopi arwaka Wiciipitu

¹ Isirayeli ahokhuma ni citthu cothene carinawe. Uphiya wawe uPeresepa, ahovaha citthu anlapelaka Nluku a Isaki, athumwane. ² Ni Nluku ahomuulumana Isirayeli uhiyu nnyoonini eeraka: Yakopi, Yakopi! Uyo ahaakhula eeraka: Kiri va. ³ Nluku aheera: Mi kiri Nluku, Nluku a athumwana. Uhoove urwaa Wiciipitu, kontha wonwo kinkowupanka nloko nuulupale. ⁴ Mi kinaahala urwaa Wiciipitu wamoca ni we, ni khweeli kinaahala wuuhokolosa. Ni ntata na Yusufu ninaahala uputthaputtha miitho aa. ⁵ Vaavale Yakopi ahokhuma uPeresepa. Asaana a Isirayeli yahaakusaca athumwanaya, asaanaya ni asaaraya mwampakhira yakumihilyawe Farawoo. ⁶ Ciicammo yakokusa inama caya ni mihakhu cothene caphwannilyaya uKanaa. Commo Yakopi ahorwaa Wiciipitu ni ucuulu awe wothene. ⁷ Ahaakusa Wiciipitu asaanawe, ucuulu awe, asaanawe asithiyana na asiculawe asithiyana, manaaya wiira, nloko nawe nothene.

⁸ Ala phi macina a atthu o nloko na Yakopi yarwele Wiciipitu: Rupeni, ntthaara na Yakopi. ⁹ Ala phaari assana a Rupeni: Enoki, Palu, Esiroomi ni Karimu. ¹⁰ Ala pha asaana a Simeyoni: Yemuweli, Yamini, Owati, Yakimi, Sowari ni Sawulu, mwana a nthiyana nKanaa. ¹¹ Ala phaari asaana a Levi: Kerisoni, Kowate ni Merari. ¹² Ala phaari asaana a Yutta: Eri, Onani, Selaa, Peresi ni Seraa. Eri ni Onani yakhwile ilapo yo Kanaa. Ala phaari asaana a Peresi: Esiroomi ni Hamuli. ¹³ Ala phaari asaana a Isakaari: Tolaa, Puwaa, Yaasupe ni Sinromi. ¹⁴ Ala phaari asaana a Sepuloni: Serete, Eloni ni Yaleeli. ¹⁵ Ala phaari asaana yayanryawe Leya ni Yakopi uPatani-Aramu, unhiya mwanawe Tina. Ucuulu awe wothene waari talathini na araru (33). ¹⁶ Ala phaari asaana a Kaate: Sefomi, Haaci, Suuni, Esipomi, Eri, Aroti ni Areli. ¹⁷ Ala phaari asaana a Aseri: Imina, Isivaa, Isivii ni Periyasi, ni mwanrokoraya Sera. Ala phaari asaana a Periya: Heperi ni Malekiyeli. ¹⁸ Ala pha asaana kuumi na siita yayanryawe Yakopi ni Siilipa, ipoththa ya Lapanu, anvahaka mwanawe Leeya. ¹⁹ Ala phaari asaana a Rakeli, amwaara a Yakopi: Yusufu ni Pencamii. ²⁰ Asenate, mwana a Potifera, nhooleli osataka yo Oni, ahommaha asaana eeli Yusufu Wiciipitu: Manasesi ni Farayimi. ²¹ Ala phaari asaana a Pencamii: Pelaa, Peki, Asipeli, Sera, Namani, Eyi, Rosi, Mupimi, Hupimi ni Aarite. ²² Ala phaari asaana a Rakeli ayanryawe ni Yakopi othene yaari khumi na cese. ²³ Mwana a Tani aari Husimi. ²⁴ Ala phaari asaana a Naftali: Yaseeli, Kuni, Yeseri ni Silemi. ²⁵ Ala phaari atthu saapa onrukulu na Piila, ipoththa ya Lapanu aamahilyawe mwanawe Rakeli, ayanryawe ni Yakopi ahomwiihana Yakopi. ²⁶ Othene yarwele Wiciipitu ni Yakopi, ucuulu awe wothene woohalikelela asaara asaanawe, yaari sitiini na siita atthwene. ²⁷ Woncerera asaana eeli a Yusufu yayanryawe Wiciipitu, nloko na Yakopi naarwele Wiciipitu nahophiya Sapiini (70).

²⁸ Vano, Yakopi ahonhooliha Yutta wa Yusufu, wiira acuwele maphiyero o Koseni. Uphiya waya nwo, ²⁹ Yusufu, na ampakhira awe oolikana, ahorwaa uKoseni wiira aakumanane athumwane. Vano woona wawe, aheekamela ni waakapatta, vano nakapattilene, ahoonla ukati mwinci.

³⁰ Isirayeli ahomwiirela Yusufu: Nna miva pooti ukhwa, kontha kihoona ikhove aa ni kihocuwela wiira ninlelo we uri nkumi. ³¹ Vano Yusufu aheerela asunnawe na amuci aya othene athumwane: Kinarwa unhimerya Farawoo wiira asunnaka na amuci aya apaapa yakhala uKanaa ahowa woona. ³² Kinkowiira, alopwana ayo ahakheli, anhakhela inama ni ahowana ikhontwaa caya, imope caya ni cothene ciri cawaya. ³³ Farawoo awiihanakani ookohakani wiira: Nnovarani va? ³⁴ Mmwaakhuleke coo: Arumeyi aa anhuwa inama

ikhumelo ni nari acikani, toko capankaya amuci ihu okhalayi. Commo phinhalenyu utthuniheriya ukhala ntetthe wo Koseni, kontha ahakheli othene anathanyiya na annaciipitu.

47

Yakopi nawakheleliya ni Farawoo

¹ Yusufu ahorwaa wa Farawoo unvaha ihapari eeraka: Apaapa na asunnaka ahowa. Ankhuma uKanaa ni ikhontwaa caya, imope caya ni mihakhu cothene cirinaya. Nna ari uKoseni. ² Wahoolo ahaathanla asunnawe athanu ni ahonthoonyihera Farawoo.

³ Farawoo ahaakoha: Nnovara ntekoni? Ayo yahomwaakhulaca: Karumeya aa ari ahakheli onama toko amuci ihu okhalayi. ⁴ Yahomwiirelaca tho: Naawile ukhala mu ukati vakani kontha itala uKanaa nwo inaatepa, ni inama ca karumeya aa khacinoona yoolya. Sontte, watthunihere karumeya aa ukhala uKoseni.

⁵ Vano Farawoo ahomwiirela Yusufu: Athumwana na asunnaa yowenle we ⁶ ni ilapo yo Wiciipitu iri ni we. Upanke mananna ooreera, wiira athumwanaa na asunnaa akhale mapuro omaana. Waahiye akhale uKoseni. Woono wiira akina ayo ari atthu ankhili, waavahe nteko woohakhela inama caka.

⁷ Vano Yusufu ahaakusa athumwane mpaka wa Farawoo, ni Yakopi ahonreeriha Farawoo. ⁸ Farawoo ahonkoha Yakopi eeraka: Urina myakha mikavi? ⁹ Yakopi ahomwaakhula Farawoo eeraka: Myaaka caka co weetakaca ciri iminya wo talathini (130). Ciri vakani ni coorika, ni khacimphiya toko cakhalaya mayapaapa. ¹⁰ Vano Yakopi ahonreeriha Farawoo ni ahorwaa.

¹¹ Yusufu aheesa ni waavaha athumwane ni asunnawe mapuro oocayira olapo yo Wiciipitu, ntetthe wo uRamacese, toko calamunlyawe Farawoo. ¹² Ahaavaha yoolya yo watoso, ukhuma athumwane, asunnawe ni amucyawe othene mpaka asaana yarinawe khula ntthu.

Ukati wootala Wiciipitu

¹³ Khayaariwo yoolya ilapo yothene kontha itala yanatepa, ukhuma Wiciipitu mpaka uKanaa wanaakhwiya nlatu wotala. ¹⁴ Yusufu ahototokaniha ncurukhu wothene waari Wiciipitu mpaka uKanaa wathumeliye itiriku ni ahorwana waFarawoo. ¹⁵ Waamanlyaya ncurukhu wothene Wiciipitu mpaka uKanaa, annaciipitu yahorwaa unlepela Yusufu yiiraka: Univahe yoolya! Uhinihiye nikhwaaka itala nlatu woomala ncurukhu ihu.

¹⁶ Yusufu aheerela, paahi mmwihe inama cinyu nnyo mwaakakhanihe ni itiriku, kamaana ncurukhu inyu uyo uhomala. ¹⁷ Yusufu ahowiiheriya inama nnyo ni ule ahaavaha itiriku akakhanihaka ni ikhavalu, ikhontwaa, imope ni apuuru. Mwakha wothene ahaaliha annaciipitu yakakhanihaka yoolya ni inama.

¹⁸ Mwakha oyo wahovira ni wawilyaya mwakha nkina, yahoturuwela tho wa Yusufu yiiraka: Khaninoona tho mananna oowiipitha we kontha ncurukhu ihu uyo uhomala ni inama cihu nnyo cihokhala cawaa, khiiwo tho inihalenle uvaha cihikhanle irutthu cihu ni imatta cihu. ¹⁹ Uhinihiye nikhwaaka ni ukhwelakhwela imatta cihu wa miithoni waa, unithume hi ni uthume imatta cihu nnyo wakakhanihaka ni itiriku, vano hi ni imatta cihu nnyo, ninakhala ipottha ca Farawoo. Univahe yoolya wiira nikhale akumi, nihikhwe itala ni ciicammo imatta cihu cihihononyee.

²⁰ Commo Yusufu ahothuma imatta cothene co Wiciipitu anthumelaka Farawoo. Annaciipitu yahothumiha imatta caya cothene kontha itala pheerihile commo. Phimaana ilapo yothene yahokhala ya Farawoo. ²¹ Ukhuma wariyari mpaka mmaceresere mothene molapo yo Wiciipitu, Yusufu ahaapanka ipottha atthu othene.

²² Cahanle coohithuminya caari paahi imatta ca ahooleli osataka kontha Farawoo aholamula uvahiya coolya, cennyu phaapisiha nrma phimaana ahithumihaka imatta caya.

²³ Vano Yusufu aheerela atthu ale: Nviriyane. Ilelo kihoothumani nyu ni imatta cihu nnyo, nna vaa nri a Farawoo, ipyo phi ila, nlimeke ni waala ittima nnyo. ²⁴ Nanso nhaana munvahaka Farawoo mphantte woneethanu wo coolya cinhalenyu wuurula. Mphantte woneecese uyo unhala ukhala wawinyu wiira mpanke ipyo ni yoolya yawinyu ni ya asaana enyu ni atthu othene ankhala uwaannyu nwo. ²⁵ Ale yahomwiirelaca: Nkunya, we uhoopola ukumi ihu kamana uhonipanka nnema ninakhala ipottha ca Farawoo.

²⁶ Toko coo, ithaya yothene yo Wiciipitu, Yusufu ahokumiha nlamulo niriwo mpaka ilelo. Mphantte wonethanu wo coolya unkhala wa Farawoo, nanso imatta ca ahooleli osataka khacinkhala ca Farawoo.

Uteeliya wowiiheriya wa Yakopi

²⁷ Annasirayeli yahokhala Wiciipitu, ncoko wo uKoseni. Wonwo yahophwanya imatta cinci ni yahoyaranaca ni wuncereranyaa venci. ²⁸ Yakopi ahokhala myakha khumi

na saapa Wiciipitu ni myakha cookumi awe cari iminya wa arupayini na saapa (147).²⁹ Wonnyawe wiira uhaattamerya ukati wookhwa, Isirayeli ahomwiirana mwamwanawe ni ahomwiirela: Wakhala wiira unakifenta, ukivare mweetto ni ulupele wiira unaahala ukhala eekhweli ni mi. Vano kinwiirela uhikivithe mWiciipitu mu.³⁰ Kakhwaka vale, uhikivithe mWiciipitu mu nanso ukirwaane mahiye avithiye mayapaapa uKanaa. Yusufu ahaakhula: Kinkopanka toko cinkilepenyu.³¹ Vano Isirayeli ahonkhanereriha eeraka: Ulupele. Yusufu aholupela ni Isirayeli aheecatalela wankorini.

48

Yakopi nawareeriha asaana a Yusufu

¹ Unavinre ukati vakani, Yusufu ahohimerya wiira: Athumwanaa anawerennya ni ule ahorwaa waathotola, warwaawe vaa ahaakusa asaana awe eeli, Manasesi ni Farayimi. ² Yakopi ahohimerya wiira: Mwamwanaa Yusufu howa wuuthotola. Isirayeli aheemananiha wunwa mpaka woorya wunkoma wankorini. ³ Ni ahomwiirela Yusufu: Nluku Okuru-Cothene hokiphwanya uPeteeli, ilapo yo uKanaa ni hokireeriha, ⁴ eeraka: Nloko naa nno ninahala uyaraca ni winciva ni mommo, cinkokhumelela ilapo cinci ca athu ni kinkowuvahani ilapo ela ukhala yawinyu ukati wothene. ⁵ Vano, asaana eeli, Farayimi ni Manasesi waayarenlyaa Wiciipitu mi kihinaya uwa uno, ari awaka; toko ciryawe Rupeni ni Simiyoni. ⁶ Vano asaana anhalaa waayara ayo awaa, nanso mwanlattu wookhala nrukulu nimoca na Manasesi ni Farayimi ni ayo anaahala waakhela mphante wohiyeriya unaaca asunnaya. ⁷ Mi kikhumaka uPatani, keettaka ni iphiro kihocukula nlatu wokikhwela Rakeli ilapo yo uKanaa unahanle vakani uphiya uFarata. Kihonvitha ni iphiro yoorwaa uFarata, uneehaninya uPetelehemu.

⁸ Wonnyawe Isirayeli asaana a Yusufu, ahokoha eeraka: Ala tasipani? ⁹ Ala pha asaana Nluku akivahilyawe. Vano Isirayeli aheera: Waawane woono kawareerihe. ¹⁰ Miiitho a Isirayeli yahoririyaca mwanlattu wo wuuluvala ni ule khoonaca ratta. Phimaana Yusufu ahaakusa asaanaawe ayo ni weemesa vakhiviru waya athumwane. Vano Isirayeli ahaavaha alaahuma ni waakapatta, ¹¹ ni ahomwiirela Yusufu: Akaacuwela wiira kina-woona tho ikhovyaa, nna vaa Nluku hokitthunihera woono asaanaa.

¹² Vano Yusufu ahaatamiha wamweettoni wa athumwane ni ahooroma mpaka iyuuci awe uphiya vathi. ¹³ Vano Yusufu ahaakusa oyeeli, Farayimi ahomweesa moonoo nlopwana vakhiviru waya moonoo nthiyana wa Isirayeli, ni Manasesi ahomweesa moonoo nthiyana vakhiviru waya moonoo nlopwana wa Isirayeli ni oyeeli ahaaciserihaca wa Isirayeli. ¹⁴ Vaavale Isirayeli ahotaphula ntata no moonoo nlopwana nuuthatela wa muru wa Farayimi mwana omwankani, ni avirikanihaka myoono nnyo, ahokusa ntata no moonoo nthiyana nuuthatela wa muru wa Manasesi mwana omuulupale. ¹⁵ Vano ahonreeriha Yusufu eeraka:

Nluku amweettelaya mayaapaapa

Aparahamu ni Isaki,

Nluku kihaakhenle meettelo aka

mpaka nihuku noleelo.

¹⁶ Ncelo kooonle coonanara cothene,

waareerihe ala amirawo ala.

Yihaneliye ncina naka ni macina o mayapaapa

Aprahamu ni Isaki,

ni wincive uneethi aya vathiva.

¹⁷ Woonnyawe Yusufu athumwane yeesaka ntata no moonoo nlopwana wa muru wa Farayimi, khawancivenle. Phimaana ahovara ntata na athumwane apheelaka waakakhaniha naari wa muru wa Manasesi weesa wa Farayimi ni naari wa muru wa Farayimi weesa wa muru wa Manasesi. ¹⁸ Ni aheerela: Nhipanke commo paapa. Ula phi omuulupale, mweeseke ntata ninyu no moonoo nlopwana wa muru wawe vaa. ¹⁹ Nanso athumwane yahokhotta ni yahomwiirela coo: Mi kinacuwela, mwanaka, mi kinacuwela. Ni uyo naahala ukhalana uneethi mwinci ni naahala ukhala nkhuulupale. Nanso unokhalaru ciicammo, nhimaawe uyo phinhala utepa ukhala muulupale wompwaha munnaawe uyo ni uneethi awe unaahala ukhala mwinci.

²⁰ Commo Yakopi ahaareerihaca wowaaareeriha nenno nihuku nno eeraka:

Uneethi wo Isirayeli wapheelaka ureerihana unahala uromola macina enyu wiiraka coo:

Nluku opanke we toko campankilyawe Farayimi ni Manasesi.

Ni ahomweesa Farayimi uhooolo wa Manasesi.

²¹ Wahooo Isirayeli ahomwiirela Yusufu: Kihanle vakani ukhwa, nanso Nluku nohala ukhala ni nyu ni naahala wuuturuselani ilapo ya amuci inyu okhalayi. ²² Vano we ukhala wiira uhaana iyuulupale yo wapwaha asunna ayo, kinawuvaha nttetthe uri myako wakhilyaka Amorewu ni ikatana ni myura caka.

49

Ureeraha wa Yakopi

¹ Vano Yakopi aheehana asaanawe ni weerelaca: Mmwaace woono wiira kuuhimeryeni citthu cinhala wuukhumelelani uhoolo.

² Nthukumanace va wiira mwiiwe nyu asaana a Yakopi,
mwiiwe inhimyawe Isirayeli, athumwaninyu.

³ Rupeni, we uri ntthaara naka,
ikuru caka, nhokorokho woopacera wo mwiirutthuni mwaka,
ootepa uttitthimihinya ni ootepa ikuru.

⁴ Unaviluwa toko maasi. Khunkhalana tho iyuulupale
kontha we uhowela ikori ya athumwana;
uhaawela amweetyaka ni uhaaveeha.

⁵ Simiyoni ni Levi ari ntthu ni munnaawe,
ikatana caya nnyo ciri ikaruma cookhwiri.

⁶ Akinthuna upanka mphantte miruku caya nnyo,
akinthuna ukhala mmikuttanoni mwaya mmo
kontha waviruwacilyaya aheeva atthu enci,
nuusama waya nwo ahokwanyulaca ni uthikilaca mitinka imope.

⁷ Uhotakhaliya urusiya waya nwo wowoopiha,
uhotakhaliya uviruwa waya nwo wookhwiri.

Mi kinawaakawanihaca ilapo ya Yakopi
ni kinawaamwarusela ilapo yo Isirayeli.

⁸ Yutta, asunnaa anaahala wulemeliha,
ntata naa ninaahala wavara nsiko eenani aa,
asaana a Yakopi anaahala umoromela Yutta wiitho wawe.

⁹ Yutta ri toko mwaakharamu,
we, mwamwanaka, uneetta toko kharamu oovara.

Unonkoma toko kharamu nlopwana ni unrupa
toko kharamu nthiyana,
tipani nohala woorya wuuwusa?

¹⁰ Nttontto wo omwene khunhala unkhuma Yutta,
hata ikopo yo nlamulo khinhala unkhuma mmatatani mwa,
mpaka ukati unhalawe uwa mwaneene
ni uyo naahala ulemelihiya ni ilapo cothene.

¹¹ Yooyo naahala unthukelela puuru awe wanrittani woolipa;
ikuwo cawe naahala ukattha ni ivinyu,
iphome yo uva inamwareela nkuwoni mwawe.

¹² Miitho awe ankootepa uriipa woopwaha ivinyu.
Miino awe utepa utteela woopwaha iphepa.

¹³ Sepulooni nokokhala nceresere ipharyaa
nipuro ninkelaya weemela apaketi,
mipika cawe cinaphiya mpaka oSitoni.

¹⁴ Isakaari uri puuru oolipa
rupile iriyari mirintti cawe.

¹⁵ Oonaka wiira nipuro nimmumulawe nno niri nooreera
ni itthaya eyo iri yoocivela,
makhata ayo ahokusa mirintti
nuuvara miteko co makokoromwa.

¹⁶ Tani naahala waakihera citthu cikhanle coneethi awe
toko nihimo phi nihimo no Isirayeli.

¹⁷ Tani nokokhala toko mwiikhomya unceresere iparapara,
ivili inari nceresere iphiro,
inluma ikottokottho yo khavalu
ni inammulusa ntthu nowela uyo.

¹⁸ Nyenyu Mwaneene Nluku,
mi kinawehererya woopola winyu!

- ¹⁹ Kaate naahala wananiinya ikhotto ni miphwinko,
nanso uyo phinhala waatthema ni woomolanihaca.
- ²⁰ Meece a Aseri anhala ucara coolya;
Yooyo phinhala uvaha coolya co mamwene.
- ²¹ Nafitali ri toko naahe ookwattula munthapweni,
phimaana napanka isukuhuulu.
- ²² Yusufu uri mwiri wo mihokorokho,
woomela nceresere iluusi,
miritta caya nnyo cinavira waculu waya isiri.
- ²³ Nuuviruwa wa anamyuupa uhomwaattakanana
anvonyeraka myuupa caya nnyo wo ncece.
- ²⁴ Nanso muura awe uyo khattinkihile,
myoono cawe ciri cokuru ni cowoorya uvonya myuupa,
mwanlattu wo ntata na muulupale a Yakopi
mwancina na nhakheli, mwala wo Isirayeli.
- ²⁵ Mwancina na Nluku a athumwane, ookavihere we,
Mwancina na Nluku Okuru Cothene
oovahe cinenne iparakha co wirimu,
iparakha cowiiserya cinenne,
iparakha cocaayira ni cootosa.
- ²⁶ Iparakha ca athumwane
cinapwaha iparakha co myako cookhalayi.
Makhalelo o myako coohimale
cenny iparakha nnya cothene cirwee mwiirutthuni mwa Yusufu.
Cirwee uhoolo wawe ule aakhanle oomwalanihinya na asunnawe.
- ²⁷ Pencamii ri toko mwiici wooluwa
wicisuru unakhura inama,
ni ucoocilo unakawaniha yahanle.
- ²⁸ Ari phi yaala ala apankile mahimo khumi na meeli o Israyeli. Ciicammo athumwanaya
phaahimenryaya wowavahaca iparakha, avahiyaka khula ntthu iparakha camwaacile.

Ukhwa ni uvithiya wa Yakopi

²⁹ Wahoolo Yakopi ahaattonkela asaanawe eerelaka: Kihanle vakani urwaa wa amuci aka akhwile khalayi. Mwakivithe wamoca ni miyapaapa nnikhukuni niri imatta ya Foromi nHititi. ³⁰ Nikhuku niri imatta yo Makipela, vakhiviru ni uManree, uKanaa, imatta Aparhamu inthumanannyawe Foromi, nhitiita, aaceraka wiira akhale mahiye a amuci awe othene. ³¹ Wonwo hovithiya Aparhamu na amwaarawe, Isaki na amwaarawe. Ciicammo wonwo kihonvitha Leya. ³² Ukhuma imatta eyo ni nikhuku niri mmattani mmo cothene aathumananinye ahitiita. ³³ Aanowiira amalihakha wattonkela asaana awe nnya citthu nnya, Yakopi aheecatalela nuukhwa. Vano aahovithiya wamoca na amuci awe.

50

¹ Yusufu ahaawuluwela athumwane, ahonlela ni waakapatta. ² Wahoolo ahaavaha nlamulo akulukhano yaavara nteko nenno nipuro nno wiira yattikitthele nrette wohunttiha irutthu ya athumwane, ni ale yahaattikitthela. ³ Yahovira mahuku arupayini oolikana, kontha yooyo phaari ukati waalamunliyaya uttikitheliya makhura nrutthu na annaciipitu yahonla mahuku miloko mithanu na miili.

⁴ Wavinryaya mahuku onokhwa ayo, Yusufu ahoolumaca ni mahumu a Farawoo eeraka: Wakhala wiira nyu nnakifenta mwamuulumane Farawoo mwancina naka mi. ⁵ Apaapa ahokilupeliha yiiraka: Kihanle vakani ukhwa. Mwakivithe mahiye yitthenkacenryaka ilapo yo Kanaa. Vano va, mwanvekele wiira akithunihere urwaa waavitha apaapa akinkela kaapicaka kinawa naanano. ⁶ Ahaakhula Farawoo eeraka: Urwee wavithe athumwana ayo toko aneene cuulupelihilyaya. ⁷ Vaavale Yusufu ahorwaa waavitha athumwane. Ule ahaatthukana ikwaha malaka kano othene a Farawoo, alamuli yavarana nteko wamoca na alamuli othene o Wiciipitu. ⁸ Vano wahiya alamuli ayo, yahorwaa ciicammo amuci o ntthoko na Yusufu asunnawe na atthu othene yaari mmatatani mwa Yakopi. Yahinnye uKoseni nwo yaari paahi asaana, imope ni ikhontwaa. ⁹ Ciicammo yahavelela atthu uwela ikhavalu naampakhira omope. Ikwaha iyo yaari ya atthu enci. ¹⁰ Uphinnya waya ipuwa ya Atate, vakhiviru ni mooloko Yortani yahocukula ni wunla venci; mpaka Yusufu ahokhala mahuku saapa onlelaka athumwane. ¹¹ Atthu o Kanaa yakhalakhala yaayo mapuro ayo woona waya wunliya venci wapuwani ya Atate yaheeraca: Annaciipitu ampanka matthanka, phimaana nne nipuro nne nattamanne

mooloko Yortani nihaninyaka Apeli-Misirayimi. ¹² Commo asaana a Yakopi yahopanka toko caahimeeriyaya na athumwanaya. ¹³ Yahaakusaca athumwanaya mpaka ilapo yo uKanaa ni yahaavithaca nikhuku niri imatta yo Makipela vakhiviru ni uManree, imatta ile yathumiheryawe Aparahamu ni Foromi Nhitita wiira ikhale ikhapuri coohala uvithana alokwawe Aparahamu. ¹⁴ Naavithileene athumwane ale Yusufu ahoturuwela Wiciipitu na asunnawe na athu othene yanvelende.

Nnema na Yusufu

¹⁵ Asunnawe Yusufu woona waya wiira athumwanaya ahokhwa yaheeraca: Wakhala wiira Yusufu haana itwaana ni hi, ni aphavelaka onivihera ikuhukuhu mwanlattu wa yoonanara yampankilehu, niireke cani? ¹⁶ Phimaana yaholeeheraca nhupi woonhimerya Yusufu wiira: Athumwana ahinaya ukhwa yahoniruma ¹⁷ wiira munhimyacere coo: Kinawuuvekela waalevelele coonanara ni itaampi cuupankilyaya. Nnna vaa ulevelele itaampi ca karumeya a Nluku a athumwanaa. Vano Yusufu wakhela wawe nhupi ule, aahoonla. ¹⁸ Wahoolo yahowaca asunnawe Yusufu ni yahonkhoromela wiitho weene ni yaheeraca: Hi nihowa va, wiira nikhale ipottha caa. ¹⁹ Vano Yusufu aheerelaca coo: Nhoovace, mi kinalamuliya ukhala nipuro na Nluku? ²⁰ Nyu nhokipankaca mi ithu yoonanara, nanso Nluku hopanka yeeyo ithu iyo ukhala yoooreera, wiira mi ilelo kisunke ukumi wa athu enci. ²¹ Phimaana nhoovace, mi kinaahala wuuvahani nyu yoolya wamoca na asaanenyu ayo. Commo phenryawe Yusufu wowamaaliha asunnawe ni ahoolumacera wo nifento.

Ukhwa wa Yusufu

²² Vano Yusufu ahokhala Wiciipitu myakha iminya nuuwa khumi, nari wamoca na amuci awe othene na athumwane, ²³ mpaka ahoona ucuulu woneeraru wa asaana a Farayimi. Ni ahaakhelela asaana a Makhiri, mwana a Manasesi ukhala awawe. ²⁴ Vano Yusufu hinaya ukhwa aheerela asunnawe ayo coo: Kihanle vakani ukhwa, nanso khweeli Nluku naahala wuukaviherani nyu, mpaka naahala wuukumihani ila ilapo ela, oorwehakani ilapo yilupelenyawe Nluku unvaha Aparahamu, Isaki ni Yakopi. ²⁵ Vaavale Yusufu aheerelaca asaana a Isirayeli wiira nnolamuliya ulupela, eeraka coo: Nluku ookavihereni nyu, nhala nkumihaca makhuva aka ayo mu. ²⁶ Phimaana Yusufu aakhwile narina myakha iminya nuuwa khumi (110) ceyarelo. Nrutthu wa Yusufu wahottikittheliya makhura oohunttiha irutthu, nuuheliya ncaneesani ni yahosunkiya Wiciipitu.

Yona

Yona Antthawaka Nluku

¹ Vano nihuku nimoca nuulumo na Mwaneene Nluku nahowa waYona mwana a Amitayi niiraka: ² Wunweke ni urweke isitati yuulupale yo Ninive waahimyacereke moolumo aka kontha coonanara caya cowela mpaka waryaka. ³ Nanso Yona ahonwa atthawaka wamiithoni waMwaneene Nluku arwaka uTarisi, ahokhuruwela uYopa, waaphwanyalyawe ikalawa yarwaa uTarisi, aholivela ikwaha ni ahokela, wiira aatthukane nloko anakalawa yarwaa uTarisi, apheelaka waatthawela uttayi Mwaneene Nluku. ⁴ Vano Mwaneene Nluku ahoruma iphyoo yuulupale mpaharini ni ahopanka nk haya mpaka ikalawa yahandle vakani uphwyaa. ⁵ Vaavale anakalawa yahoovaca venci, ni khula ntthu ananlepela nluku awe, ni yahorihela mpaharini mirintti carinaya nkalawani, wiira awukule ulemeliya nwo. Vaavale Yona ahokhuruwela nhina ikalawa weecatalenlyawe arupaka ikhove. ⁶ Nhooleli okalawa ahorwaa waYona ni ahonkoha wiira unrupani? Wunwe ni unlepele nluku aa, noone toko nanoonela ikiriri wiira nihikhwe. ⁷ Wahoolo yaheerelana nrwee nipanek mwavi wiira ninuwele tipani uniwiihenre nenna nihusinna. Ni yahopanka mwavi ni wahomorela waYona. ⁸ Vano yahomwiirela: Unihimerye nenna va, uniwiiherenreni nenna nihusinna. Nteko aa phuvi? Unkhuma vayi? Ilapo aa phivi ni ikhapilani? ⁹ Yona ahaakhula: mi Heperewu, ni kinawoova Mwaneene Nluku, Nluku o wirimu, apattusile ipahari ni ithaya. ¹⁰ Vaavale atthu ale yahanca woova venci ni yahomwiirela: Isiyani yeela ipankile ela? Kontha atthu ale yahocuwela wiira atthawile wamiithoni waMwaneene Nluku, maana ahaahimyacera.

¹¹ Yahomwiirelaca: Nuupankeke isiyani wiira ipahari imaale? Kontha nk haya natepaca mpaharini. ¹² Yona ahaakhula: Nkikuse ni nkivonyere mpaharini; ipahari inaahala umaala. Ni kinacuwela wiira nk haya ula wile mwanlattu wa waka. ¹³ Vaavale anakalawa yaanvira yeettihaka ni ikuru caya apheelaka uphiya ukhopela. Nanso khayoonrye, kontha mpaharini nk haya aantepa. ¹⁴ Vano yahaalepela Mwaneene Nluku a Yona, yiiraka: Conte Mwaneene Nluku, nhinihiye nikhwaka nlattu wa coonanara ca Yona, nhinootherye hi va ukhwa wawe kontha nyu Mwaneene Nluku nhopanka wootthuna winyu. ¹⁵ Vaavale yahonteesa Yona ni yahonvonyera mpaharini, ni nk haya ahomaala ucaca. ¹⁶ Vano atthu ale yahoovaca venci Mwaneene Nluku, ni yahaavahaca itthuvo Mwaneene Nluku ciicammo yahuluvelihaka waatthara.

Iswali ya Yona nari mmirimani mohopa

¹⁷ Mwaneene Nluku ahoruma ihopa yuulupale wiira immiry Yona. Ni Yona ahokhala mmirimani mohopa mahuku mararu uthana ni uhiyu.

2

¹ Vano Yona nari mmirimani mohopa ahoswali aasukuruku Mwaneene Nluku ² eeraka: Mmahuvihoni kihokhuwelela Mwaneene Nluku

ni ahokaakhula.

Mmirimani mahiye kihokhuwa,

ni nyu nheewa ncu naka.

³ Nhokirihela mpaharini mapuro oowiisya cinenne

ni kihokhala oorukureriya ni maasi

ni mawimpi moolupale othene yaavira waculu waka.

⁴ Kihooa toko kihomwalaanihiya ni nyu.

Akaacuwela wiira kaanhala woona tho inupa enyu ittakattifu.

⁵ Maasi othene yahokikhuneela mpaka ukittiya iphumu;

ni ipahari yahokimiriya

ni makukhu o mpaharini yahokivilikelela mmuru.

⁶ Kihokhuruwela mpaka vathi waya myaako,

mpaka ilapo ya atthu ookhwa

ni mikhora caya cahokitthukela mommo.

Nanso nyu nhokikumihya mapuro oowiisa,

nuukivaha ukumi;

Mwaneene Nluku; Nluku aka!

⁷ Upheelaka nnepa aka urimela

ni kihowuupuwelelani nyu, Mwaneene Nluku,

ni iswali caka cowela warinyu,

mpaani mwinyu moottakattifihiya.

⁸ Ale anaswalela anluku oohimaana ahiyaka ikiriri ca Nluku.

⁹ Nanso mi kinaahala uwiipelani macipo oowunnuwihani ni wuuvahani itthuvo.

Kinkopanka ile yookhuluvelihilyakani.

Woopwa ukhuma wa Mwaneene Nluku.

¹⁰ Vano Mwaneene Nluku ahoolumana ihopa wiira inraphye Yona, ni Yona ahoraphenya ucenkweni.

3

Urukunusa nrima wa atthu o Ninive

¹ Imaara yonayeeli nuulumo na Mwaneene Nluku nahowa waYona niiraka: ² Wunwe ni urwee isitati yuulupale cinenne yo Ninive waahimyacere atthu o Ninive moolumo yuuhimyacenyaka. ³ Yona aheethenkaca, ahonwa toko cakhanlyawe oohimeriya na Mwaneene Nluku. Ahorwaa uNinive. Ninive yaari isitati yuulupale cinenne yeettiya mahuku mararu uttupulaniha iriyariru. ⁴ Yona ahophiya uNinive. Aheetta nihuku nimoca akhalaka uwaahimyaca eeraka: Anhala mahuku arupayini Ninive ukwanyulaciya.

⁵ Vano atthu othene uNinive yahonkupali Nluku ni yahorukunusa mirima, ciicammo yaholeehana untthuka ramatani ukhuma atthu oolupale, mpaka acikani, othene yahommwaraca nakotto athoonyiheraka wiira ahorukunusa mirima caya. ⁶ Mwene o Ninive weewilyawe ni uyo ahonwa wahiceni wawe phurulaka ikuwo cawe cothene nuummwara nakotto phunkomaka wattuurani. ⁷ Ciicammo Mwene na ahooleli awe yahokumiha nlamulo nowahimyacera atthu othene unsitati wiira: Hikhale nahala ulya hata uwurya ukhuma atthu, inama coohwiya, toko imope ni ikhontwaa, cihivahiye coolya ni maasi wala cihihuleliye cirwaka ulawiha coolya. ⁸ Atthu othene (ni inama cothene) amware nakotto anlapele Nluku ni ikuru, arukunuse mirima caya ni uhiya coopanka caya coonanara cothene. ⁹ Athhuna commo Nluku nahala unoonela ikiriri, ni urusiya wawe unahala uvira ni kxaninhala ukhwa.

¹⁰ Nluku ahoona mananna cakhanlyaya oorukunusa mirima caya akhalaka ooohiya coonanara caya ni Nluku khaahuvihile tho atthu ayo.

4

Urusiya wa Yona ni Ikiriri ca Apwiya

¹ Nanso vaavale, Yona ahorusiya ni ahocaca. ² Vano ahoswali akohaka Mwaneene Nluku toko co: We Mwaneene Nluku, mi akeenre kihinaaya ukhuma ilapo aka wiira phi yeeyo yahalaa upanka? Phimaana kipankaka mananna ootthawela uTarisi! Mi kahocuwela wiira we uri Nluku ookiriri ni oothunku, wiira we uri Nluku oopica ucaca, eemaani ni ooreera, ciicammo ukati wothene uri oolevelela. ³ Pahi, nyu Mwaneene Nluku, nkiive, kontha fatari kikhwe kihikhale nkumi. ⁴ Mwaneene Nluku ahaakhula: We Yona wookupali wiira uhaana isariya yoorusiya toko co? ⁵ Vaavale Yona ahokhuma uNinive, phurwaaka mphante unkhuma ncuwa ni ahonkoma. Vano ahoteka nrapattha ni ahonkoma wanthuucini waya, awehereryaka woona itthu yahala wiiranyaa nsitati mmo.

⁶ Vano Mwaneene Nluku ahomeliha mwamwiri woothavelaca wiira Yona amumule wanthuucini ni atteeliye. Vaavale Yona ahotteeliya venci. ⁷ Nanso usa waya, ncuwa nipheelaka ukhuma, Nluku ahonruma mwaamunku wiira eeve mwamwiri uyo ni wahokhwa. ⁸ Wakhumilyaya ncuwa, Nluku ahowiha iphyoo yooviha cinenne ikhumaka unkela ncuwa. Yona ahociriphuwa nlattu wo nttukuttha ni ncuwa nampaha mmuruni mwawe. Vano ahopheela ukhwa ni aheera: Fatari kikhwe kihikhale nkumi. ⁹ Nluku ahonkoha Yona eeraka: Uhaamini urusiya nlattu wo yoola mwamwiri ula? Yona ahaakhula: Khweeli kihaana isariya yoorusiya toko co mpaka ukhwa. ¹⁰ Vano Mwaneene Nluku aheera: Ula mwamwiri ula wunnuwile uhiyu, ni uhiyu nkhwawe uyo wahokhwa. We khiiwo ipankenlyaa ula mwamwiri ula ni khawunnuwihile, vano unawoonela uthunku. ¹¹ Mi ni isariya caka cothene akinlamuliya woonela ikiriri isitati yo Ninive, uryaya atthu enci ooohicuwela itthu yooreera ni yoonanara woopwaha elufu iminya wosirini (120.000) ni inama cinci ciriwu?

Nhupi Wooreera wa Yesu Kristu Wantikhiye ni Marku

Yohani Mpatisa nalalyaa

Mt 3.1-6; Lk 3.1-6

¹ Wiipaceroni wa Nhupi Wooreera wa Yesu Kristu, Mwanawe Nluku. ² Ohaantikhiya ni nnapiyu Isaya:

Kimmonrumiha uhooolo wa mayanhupi aka,

nohala wulokiherani iphiro.*

³ Ncu ninkhuwa ntakhwani,

Nlokihe iphiro ya Apwiya, mookole mittala.*

⁴ Ciicale, Yohani Mpatisa phooneliye ntakhwani wiira eetthuchiye opatiso wo urukunusa nrima wiira itaampi cileveleliye. ⁵ Yaanamwikamela atthu othene olapo ya Yutteya, na atthu ankhalu uYerusalemu, ni yaanapatisiya ni ule umooloko Yorttani, alaphaka itaampi caya. ⁶ Yohani awara ikuwo yo mapururu onkamira, eethukelaka nyununi mo nrapala, yoolya awe yari mattettente ni urawo wo ntakhwani. ⁷ Ni wowaalaka anaahimya coo: Uttuli waka mi nawa nkinaku rina ikuru impwaha yawaka, ni mi akimphwanela wooroma wiira kitthukule miripipe cokwakwatta cawe. ⁸ Mi kinawuupatisani ni maasi, nanso Ule naahala wuupatisani muNnepa Nttakattifu.

Yesu napatisiya ni nathokociya

Mt 3.13-17; 4.1-11; Lk 3.21-22; 4.1-13; Yohani 1.32-34

⁹ Waheranyaa, mahuku ale, Yesu awaaka ukhuma uNasaree yo Kalileya, mpaka upatisiya ni Yohani umooloko Yorttani. ¹⁰ Wakhumawe mmaasini mmo, ahoona irimu ihulyaka, ni Nnepa, woonnya toko ikhunnta inkhuruwelaka. ¹¹ Ni ukhuma wirimu nineewiya ncu nnohimya: We uri Mwanaka oofentiya, nokiphela nrima. ¹² Wahoolo Nnepa Nttakattifu wahoonrweha utakhwani, ni ¹³ ahokhalu wonwo mahuku arupayini, ni ahothokociya ni Sotwani; ni cahawo wonwo inama cowoopiha, ni ancelo yahonkavihera.

Owiitthuca oopacera a Yesu

Mt 4.12-22; Lk 4.14-15; Lk 5.1-11

¹⁴ Utthukiya wawe Yohani, Yesu akenle uKalileya, wahimerya atthu Nhupi Wooreera wa Nluku, eeraka: ¹⁵ Ukati uhophiya ni ciicammo Omwene wa Nluku uhophiya. Nrukunuseke nrima, nkupalelaka Nhupi Wooreera. ¹⁶ Aviraka nceresere ntthiya no Kalileya, ahomoona Simoni ni nhimaawe Anteree avonyeraka matthavi aya mpaharini mmo, nllatu yaari mayototha ihopa. ¹⁷ Yesu aheerela: Nkitthare Mi, ni Mi kimmowupankani mayowatotha atthu. ¹⁸ Ahiyaka nanaanoru matthavi aya, yahonthara Yesu. ¹⁹ Napwahile vakani, ahomoona Yakopu, mwana a Sepeteu ni nhimaawe Yohani, alokihaka nkalawani matthavi aya pweehanaka nananoru. ²⁰ Ni ale yahonhiya Sepeteu athumwanaya ni mayanteko aya, yahonthara.

Nlopwana o nnepa woonanara

Lk 4.31-37

²¹ Yaanarwa uKafarnaum. Nihuku no Ntivala ahokela nnsinakokani, ni aheetthuchiha atthu. ²² Na atthu othene yaanawumiya mwaano ni miitthuchiho cawe, nllatu aheetthuchiha toko ntthu nolamula ni khari toko mayowantikha. ²³ Ahaawo nnsinakokani mmo ntthu arina nnepa woonanara, apacile ukhuwa: ²⁴ We urinani ni hi, Yesu o Nasaree? Wawenle unikwanyulaca? Mi kihocuwela wiira uri Nttakattifu a Nluku. ²⁵ Yesu ahonkuphula, eeraka: Omaale we, ni ukhume wantthu ula. ²⁶ Vano, nnepa woonanara, unantathile ni ikuru, ukhuwacaka, wahokhuma wantthu ule. ²⁷ Othene yahotikhinaca, mpaka ukohana ayayoru: Isiyani ila? Moone meetthuchiho oonaanano, uromoliya ni nlamulo mpaka ulamulela minepa coonanara ni nnya cinamwiiwelela. ²⁸ Ni ncina nawe nahorumannya nttette wothehe, ilapo yo Kalileya.

Yesu nawavoniha aretta enci

Mt 8.14-17; Lk 4.38-41

²⁹ Akhumaka unsinakoka ahokela mpani mwa Simoni ni Anteree, wamoca ni Yakopu ni Yohani. ³⁰ Amaathyawe Simoni yaanawerenya wakorini, awerenyaka irutthu yothene, ni nananoru yahonhimerya ca iretta ila. ³¹ Attameryaka, Yesu ahaavarela ntata mpaka

* 1:2 Malakiya 3.1 * 1:3 Isaya 40.3

waawusa. Iretta yahaahiya, na ale yahopacera wakaavihera. ³² Ucoocilo, ncuwa ni-nakwattuwile, yahomwiihera aretta na ale yahoosiya ni nnepa woonanara, ³³ na atthu othene owatthokoni yahothukumana wankhora. ³⁴ Ahaavoniha aretta enci, yahoosiye ni coowerya, ni ahoomola minepa coonanara cinci; nanso khahiya wuulumaca minepa nlatu yaanancuwela.

Yesu nahimyaca Nhupi Wooreera

Lk 4.42-44

³⁵ Wicisuru, uhinasa ahoonwa ni ahokhuma; phurwaka ntakhwani wiira aswali. ³⁶ Simoni, na ale yaari ni Yesu yahonthara. ³⁷ Umphwanya waya, yahomwiirela: Atthu othene anawuphavelani. ³⁸ Nanso ahaakhula: Nirwe ncoko nkina, itthoko co vakhiviru, neethuchihe wonwo, nlatu wo yela phikumenlyaka. ³⁹ Ni ahorwaa ilapo yothene yo Kalileya, eethuchihaka mmasinakokani, ni oomolaka minepa coonanara.

Yesu ahonvoniha ntthu o makuttula

Mt 8.1-4; Lk 5.12-16

⁴⁰ Ntthu o makuttula ahonrwela Yesu ni ankhoremelaka ahonlepela: Watthunaka vale unawoorya ukivoniha. ⁴¹ Amoonelaka ikiriri, Yesu ahonthatela ntata mpaka unkwanya, eeraka: Kinatthuna, uvone. ⁴² Nananoru, makuttula yahonhiya, ni irutthu yahokhala toko khalayi. ⁴³ Ni Yesu ahonleeha phunlakaka, ni moolumo ala: ⁴⁴ Ukiwe ahinhimerye ntthu itthu ila. Nanso upacera urwaa wamayasataka ni uvelelihe itthu ilamuliye ni Musa; nlatu wa atthu anhapihya makuttula, wiira akhale saahiti aa. ⁴⁵ Ule, mweeco, urwaa wawe ahopacera ulattula ni uhinya itthu yeeranele, mpaka Yesu uhoorya ukela ooniyaka mmawaani phukhalaka ntakhwani; na atthu olapo ile yaanarwela.

2

Yesu ahonvoniha ntthu oowuntakyya

Mt 9.1-8; Lk 5.17-26

¹ Anavire mahuku vakani, ni Yesu naturuwile uKafarnaum wahorumanyaa wiira ri uwaani. ² Yahothukumana atthu enci, mpaka uphunyana wankhora, ni Yesu aheethuchiha moolumo. ³ Vano yahomwiihera ntthu oowuntakyya, akusiye na atthu ace. ⁴ Ukhala wiira khayooriya unkusa mpaka waryawe, nlatu wo mphwinko, yahokhunula nivatho nipuro naryawe Yesu, ni ciicale, anahunle iparo, yahokurusela nrepa naryawe ntthu oowuntakyya. ⁵ Wowoona ukupali waya atthu ale, Yesu ahomwiirela ntthu oowuntakyya: Mwanaka, itaampi caa ciholeveleliya. ⁶ Wonwo mweeco, yahoonkoma mayowantikha vakani yaakakaka munrimani mwaya: ⁷ Nlattuni, Ule uulumacaca co? Nakufuru. Noorya tipani uvelelela itaampi, hiri Nluku paahi? ⁸ Yesu, nanso acuwelaka moopuwelo aya mpaka ahaakoha: Nlattuni muupuwelaka ciicale munrimani mwinyu? ⁹ Itthu yootepa urika phivi, umwiirela oowuntakyya, Itaampi caa ciholeveleliya, atthuna umwiirela, Wunwe, ukuse nrepa naa ni weette? ¹⁰ Vano paahi; wiira ncuwele wiira Mwanawe Pinattamu haana ikuru vathiva yolevelela itaampi, ¹¹ kinawuulamula amwaacaca ntthu oowuntakyya ukuse nrepa naa ni urwee uwaanyaa. ¹² Ntthu ule ahoonwa, ahokusa nrepa nawe ni ahokhuma ooniyaka na atthu ale othene, mpaka othene wumiya mwaano, ni yaananttotopela Nluku yiiraka: Khaninoona itthu co nikhalakaru.

Yesu namwiihana Levi

Mt 9.9; Lk 5.27-28

¹³ Imaara ikina tho ahokhumela vate mphante wo ipharyaa; ni mphwinko wa atthu othene wahonthara, Ule eethuchihaka. ¹⁴ Nanso aviraka uyo ahomoona Levi, mwanawe Alfeu nonkomile inupa yowaakheleliya nsoko, ni ahomwiirela: We, ukithare Mi. Ni Levi ahonwa anttharaka Yesu. ¹⁵ Nari wamoca, itthoko ya Levi, mayoliviha nsoko enci na atthu ookosakosa yahoonkomaca wameeca wamoca ni Yesu ni uwiitthuca awe, nlatu khayaamala urunwa atthu yaantthara. ¹⁶ Mayowantikha yanrumelelihana ni mafarisi, amoonaka ulya na atthu ookosakosa ni mayoliviha nsoko, yaheerela uwiitthuca awe: Nlattuni, nalya na atthu ookosakosa? ¹⁷ Yesu eewaka cothene ahaakhula: Kahiweni akumi phimmwavya tothoro, nanso, aretta. Mi akiwenle weehana atthu aattakattifu, nanso atthu ookosakosa.

Mwaha wootthuka

Mt 9.14-17; Lk 5.33-39

¹⁸ Owiitthuca a Yohani ni mafarisi yaantthuka, yahowa unkoha Yesu: Owiitthuca a Yohani ni mafarisi anantthuka ni uwiitthuca aa ahitthukaka isiyani? ¹⁹ Yesu ahaakhula: Asimpwana awe mayothela anawoorya utthuka, mayothela nari na ale? Mahuku othene

ankhalaya wamoca ni mayothela khanoorya utthuka. ²⁰ Anaahala uphiya mahuku anhalaya waakhiya mayothela, vano phankelaya utthuka. ²¹ Khaawo neesera icaapha yonaanano ikuwoni yookhalayi, nlatu icaapha yonaanano inatepererihya mphantte wookhalayi, ni nikhwata ninatapa wunnuwa. ²² Ni khaawo nohela ivinyu yonaanano mmapiyani ookhalayi, ahelaka vale, ivinyu inaaahala upwesa mapika ookhalayi, ni ivinyu inarihakyya wamoca ni mapika. Nanso ivinyu yonaanano inheliya mmapiyani oonaanano.

Yesu ni ntivela

Mt 12.1-8; Lk 6.1-5

²³ Nihuku nimoca no ntivela Yesu anavira mmamattani na owiitthuca awe. Yeettaka mphironi, owiitthuca awe yahoonta ncesi. ²⁴ Mafarisi yahontthara, yiiraka: Nkoona, nlatuni ale apankaka ithu yowatelihiya upanka nihuku no ntivela? ²⁵ Ahaakhula: Khannasoma ithu yapankilyawe Taviti, wammoonlyawe itala, ule na athu yarinawe? ²⁶ Wakenlyawe inupa ya Nluku, ukati wa mayasataka muulupale Apiyatari, ni walilyawe mikatthe coottakattifihiya coolamuliya ulya mayasataka paahi, ni ahaavaha athu yarinawe? ²⁷ Ni ahopwahera: Ntivela nihopankeliya nthu, ni kahiwena nthu phipankeliya ntivela. ²⁸ Mwanawe Pinattamu phi mwaneene ntivela.

3

Yesu ahonvonihya nthu oonririya ntata.

Mt 12.9-14; Lk 6.6-11

¹ Yesu ahokela tho nsinakokani. Ahokhala wonwo nthu oonririya ntata. ² Vano ale yaananhottela wiira amoone ammoonihaka nihuku no ntivela wiira ankasari. ³ Yesu ahonhimerya nthu arina ntata noonririya: Wunwe ni uwe iriyari ila va. ⁴ Wahoolo ahaakoha: Inoleveliya, nihuku no Ntivela, upanka ithu yooreera athuna ithu yoonana, woopola ukumi athuna uhiya uharipwyaka? Ale yahomaalaca. ⁵ Vano, awehaka ni urusiya, ni ummweryaka nrima nlatu woturumala mirima caya, ahomwiirela nthu: Wookole ntata. Ahookola ntata ni nna nahovona. ⁶ Wakhumilyaya, mafarisi yahothukumana na aHerotiyano wiira avanele mamwiivelo.

Mphwinko muulupale unari nceresere ntthiya

⁷ Yesu ahorwaa unthiyani na owiitthuca awe, athariyaka ni mphwinko muulupale wakhuma uKalileya, ni Yutteya, ⁸ uYerusalemu, uTumeya, ukhopela Yorttani, ni nceresere Tiro ni Sittoniya. Ahophwanyinya ni mphwinko muulupale, wewiilyaya ithu yaapankawe. ⁹ Ahaahimerya owiitthuca awe, anlokihere ikalawa yaankani, wiira hiphunyerihiye ni mphwinko uyo. ¹⁰ Woona ahaavonihya athu enci, ni nlatu weethu ila, ale yanawaaninya ni ikwerere wiira ankwanye. ¹¹ Minepa coonanara, wamoonaya, caanankhoromela wamiithoni wawe ni caanakuwa: We uri Mwana a Nluku. ¹² Ule nanso anawaateliha wiira ahicuwelihe.

Yesu naweehana arumeyi khumi na eeli

Mt 10.1-4; Lk 6.12-16

¹³ Wahoolo ahowela mmwaaakoni, ni aheehana ale yatthunyawe, na ale yahomwaattamerya. ¹⁴ Ahaathanla khumi na eeli phwaavahaka ncina na amitthenka wiira yakhaleke ni Uyo, ni aarume, wiitthuciha, ¹⁵ ni yaphwanyeke ikuru yo woomola minepa coonanara. ¹⁶ Ahaathanla khumi na eeli ala: Simoni, ammahilyawe ncina na Peturu, ¹⁷ Yakopu, mwanawe Sepetteu, ni Yohani nhimaawe Yakopu, ammahilyawe ncina Powanerce, manaaaya asaana utari; ¹⁸ Anteree, Filipe, Partimeu, Mateu, Tomee, Yakopu mwanawe Alfeu, Tateu, Simoni Selote, ¹⁹ ni Yutta Iskariyoti, anthumihile Yesu.

Yesu ni Sotwani

Mt 12.22-32; Lk 11.14-23

²⁰ Waphilyaya uwaani, mphwinko wa athu wahothukumana tho, mpaka wahinoryaya ulya. ²¹ Ni amawaawe, wiiwawaya ithu ila, yahokhuma wiira ammare, nlatu yeeriya: Hoolociya. ²² Ni mayowantikha, yakhuruwenle o Yerusalemu yahohinya: Hovariya ni Peelsepu. Ni thocho. Nawoomola minepa coonanara ni ikuru ca mwene a minepa coonanara. ²³ Vano Yesu aheehana ni wahimerya mmalikianiheroni: Noorya cani, Sotwani umoomola Sotwani? ²⁴ Omwene wakawaniyaka, omwene ule khunoorya ukhala. ²⁵ ni inupa yakawanihiyaka, inupa ile khinoorya ukhala. ²⁶ Phimaana, akhalaka Sotwani eecanihaka ikhotto mwaneene eekawanihaka, ni khanoorya ukhala tho, homala. ²⁷ Khaawo noorya ukela inupa ya nthu ookhomaala ni unhuukhela mihakhu cawe woohipaca umara phooryaka unhuukhela wahoolo. ²⁸ Khweeli kinawuhimeryani: Itaampi cothene ni

* 2:26 1Sm 21.1-6

ikufuru cothene cinkhala coromoliya na athu, cothene cimmoleveleliya, ²⁹ nanso, ntthu nohala ukufuru Nnepa Nttakattifu khammwa uleveleliyaka akhalakaru; nowookhala ni itaampi awe mahuku othene. ³⁰ Ahaahimerya itthu ila nlattu yahimenrye: Ule navariya ni nnepa woonanara.

Alokwawe eekhweeli Yesu.

Mt 12.46-50; Lk 8.19-21

³¹ Vano yahophiya anumwane na asihimaawe, ni anemenle utaa, yahaaruma athu umwihana. ³² Mphwinko wa athu wahoonkoma ntotho wawe, athu yahonhimerya: Ahaawo vate anumwana na asihimaa, anawuphavela. ³³ Ahaakhula: Amanyi ni asihimaaka phapani? ³⁴ Ni athetulaka miitho mwaatthu ale yanrukurenrye, aheera: Ala pha manyi na asihimaaka. ³⁵ Ntthu nopanka utthuna wawe Nluku, ule phi nhimaaka, mwanrokoraka ni amanyi.

4

Nlikanihero no mayowaala

Mt 13.1-9; Lk 8.4-8

¹ Ahopacera tho wiitthuciha nceresere ntthiya. Mphwinko muulupale wahothonkoma mana ntotho wawe, phimaana ahowela nkalawani ni ahoonkoma mmwe, phukhalaka mphwinko woonene. ² Anaweethuciha citthu cinci mmalikaniheroni ni anawahimerya mmeethucihoni mwawe: ³ Mmiriyane. Mayowaala ahokhuma arwaka uwaalani. ⁴ Waalaawe, ipyo ikina yahomorela nceresere iphiro ni yahowaca asanuni, yaholya. ⁵ Ipyo ikina yahomorela wakotthoni, wonwo wahakhanle itthaya yinci, khipicile umela nlattu itthaya khayaakenle uttayi. ⁶ Nanso, ncuwa, ukhuma waya, yahopahiya, nlattu wohikhalana itthaya yinci mitithari cahooma. ⁷ Ikina yahomorela wamwiyani, ni miwa cahoonuwa, cahomirya ipyo ni khayeemile. ⁸ Ikina yahomorela itthaya yooreera ni yunuwaka, ni inarenre, yaheema, ni wuncereriya mpaka ukhala talathini, sitiini ni iminya khila ipyo. ⁹ Ni ahopwahera eeraka: Urina manyaru uwiwelela, eeweke.

Isariya yo nlikanihero

Mt 13.10-23; Lk 8.9-15

¹⁰ Nahanle veekha, athu yanrukureriya wamoca ni owiitthuca awe khumi na eeli yahonkoha manaaya nlikanihero nne. ¹¹ Ahaakhula: Nyu nhovahiya ucuwelaca ikano yo omwene wa Nluku, nanso, athu ari utaa citthu cothene anahimerya ni malikanihero, ¹² wiira yoonaka, yoone, ni ahicuwelele; yiwaka, yiwe, ni ahiiwehe wiira ahirukunuse mirima, aleveleliyaka itaampi caya.*

Yesu nataphulela nlikanihero no mayowaala

¹³ Ni ahopwahera: Khanneewehe manaaya nlikanihero nna? Nnohala mweeco, wiitthuca cani malikanihero makina ayo? ¹⁴ Mayowaala nawaala nuulumo, ¹⁵ ari nceresere iphiro, pha ale yahimerye nuulumo, aneewile nuulumo. Sotwani nawa waatamiha nuulumo naaliye. ¹⁶ Ciicammo, ale yaakhenle ipyo mapuro ookokootho, pha ale yinre aneewile nuulumo, woohipica anawaakhelela ni nrima wootteeliya, ¹⁷ nanso kharina mitithari mwaale, khankhala nthiti ni yawaaka mahuviho, athuna yomolanihacyaka nlattu wo nuulumo, wohipica anattittha. ¹⁸ Ahaawo akina, anaakhela nuulumo mapuro o miwa. Ala anawiiwa nuulumo, ¹⁹ nanso nlattu woramela itthu yo ntuniyani, wothokociya ni mihakhu ni citthu cikina cinonlelaya, cinakela munrimani mwaya anattittha nuulumo ni khaneema. ²⁰ Athu anakhela nuulumo itthaya yooreera pha ale aneewa nuulumo, anaakhelela, aneewa mpaka wiima ni wincereriya talathini, sitiini ni iminya khila ipyo.

Ntthu woomwaleela

Lk 8.16-18

²¹ Ahaahimerya tho: Pooti inaweesiya isamaninya nhina mwaya itthuttu athuna vathi waya nkori? Keera ineesiya waculu mmutto? ²² Nlattu khiiwo yovithiya ihinhala woneleliya, ni khiiwo yowipithya ihinhala ukhumela woonene. ²³ Ntthu akhalanaka manyaru oowiiwelela, eeweke! ²⁴ Ni ahopwahera: Mmiriyaneke ratta itthu ineewenyu. Nnowophimiya ni itthuttu inhalenyu uphimela, ni thothonnowowincereriya. ²⁵ Vano ntthu rina, nowowincereriya, ni ntthu hirina, nowowaakhiya, mpaka citthu cirinawe.

Nlikanihero no ipyo

²⁶ Ni anawiiira: Omwene wa Nluku uri toko ntthu avonyenre ipyo awe vathi. ²⁷ Arupe, unwe, uhiyu ni uthana, ipyo inamela ni inawunuwa, ule woohicuwela cani. ²⁸ Itthaya

* 4:12 Isaya 6.9-10

inavaha veekhaya, woopacera ntathi, wahoolo ncasi, ni umwiisoni ncasi nocara meele.
²⁹ Ni yowiiima yattokothaka, naahepha nlatu wahophiya ukati woohephiya.

Nlikanihero ni inuku yo nrale

Mt 13.31-32; Lk 13.18-19

³⁰ Vano aheera: Ninhala ulikanihera ni isiyani omwene wa Nluku? Atthuna nihalata utaphulela ni nlikaniheroni? ³¹ Uri toko inuku yo nrale, ineera nalyiye vathi, iri yootepa uyeve mweenuku cothene; ³² nanso, yaaliyakaru, inawunuwa, inathatuwa mwiri muulupale woopwaha miri co mmattani ni inamwarya miritta caya mpaka asanuni o wirimu woorya uteka ipuuru munthucini mwaya. ³³ Ni malikanihero menci toko ala Yesu anaweethuciha nuulumo, toko woonawe wiira anawiiweha. ³⁴ Khoolumacera woohkhala ni malikanihero; nanso uyo anawataphulela cothene owiitthuca awe anari veekhaya.

Yesu nammaaliha naphuvo.

Mt 8.23-27; Lk 8.22-25

³⁵ Nihuku nne, unaripenle, ahaahimerya: Nrwee nilapuwele ukhopela. ³⁶ Ahiyaka mphwinko, owiitthuca yahonkusa, toko caryawe nkalawani, ni cahommelela ikalawa cikina. ³⁷ Vano ahokhumelela naphuvo muulupale ophyoo ni mawiiimpi yanawicat-takanihaca ni ikalawa mpaka yahala vakani ucara maasi. ³⁸ Yesu, nari mphantte wot-tuli wokalawa, anarupa naphitenrye nsawu. ³⁹ Yahoommusa ni umwiirela: Mwalimu, khunoona wiira ninakumpwela? Unwaka, aholamulela iphyoo ni aheerela ipahari: Imaale, ihittinke! Iphyoo yahomaala, ni ipahari yothene yaheera riya-riya. ⁴⁰ Wahoolo ahaahimerya: Nlattuni nkhalaka atthu oowoova osilili? Nhikupaliki? ⁴¹ Yanawoova venci ni yaanahimeryana: Tipani Yoola? Hata iphyoo, ni ipahari cinamwiiwelela?

5

Yesu ahonvoniha ntthu ovariya ni minepa

Mt 8.28-33; Lk 8.26-34

¹ Yahophiya nikhopela nikhwaya ntthiya, ilapo yo Yeraseno. ² Yesu nalapuwile ahosiceriya ni ntthu aakhuma mahiye, avariye ni nnepa woonanara. ³ Akhala umahiye, ni khaawo oorya ummara, nana vakani untthuka ni unyolo, ⁴ nlatu imaara cinci ahotthukiya ni unyolo mpaka wuntakaca unyolo ni unyakataca ikatiyato; khaawo oorya ummonihaha. ⁵ Mahuku othene anaweetta, uthana ni uhiyu mmarekhano ni mmyaakoni, akhuwaka ni eerakalihaka ni maluku. ⁶ Amoonaka Yesu uttayi, ahotthimakaca ni ahonkhoromela ni ⁷ ahokhuwa ni ncu nowirunya: Nyu nrinani ni miyano, Yesu Mwana a Nluku Ooculu. Nhikoopopihe! ⁸ Ni khweeli, Yesu anamwiirela: Ukhume mwantthuni mu, nnepa woohiloka. ⁹ Wahoolo ahonkoha: Ncina naa tipani? Ahaakhula: Mphwinko phi ncina naka, nlatu niri enci. ¹⁰ Ni yahonlepela ankhanyererihaka wiira ahomoliye nttetthe ule. ¹¹ Caanalya vano ikuluwe nceresere mwaako, ¹² ni minepa coonanara cahonlepela Yesu: Nnilamulele nakele nkuluweni mmwe. ¹³ Yesu ahorumelela, ni nenna nna minepa coonanara cahokhuma wantthuni ni cahokela nkuluweni, ni nikhoto nne nari toko ikuluwe elufu piili (2000) naheevonyera munthiyani ni nahottittha. ¹⁴ Ahakheli yahotthawa ni yahovira alattulaka mmawaani; na atthu enci yahowa woona itthu yeeranele. ¹⁵ Waphiyaya nipuro naryawe Yesu, yahomoona ntthu avariye ni minepa coonanara noonkomile, nawanre ni nakhalanne ankhili, ni yahoova. ¹⁶ Asaahiti a ntthu oovariya ni minepa coonanara ni itthu yeranele ni ikuluwe yahottonka itthu yeranele. ¹⁷ Vano yahonlepela Yesu wiira athame ilapo aya. ¹⁸ Yesu ahoturuwela okalawani; ni ntthu avariye ni minepa ¹⁹ Yesu khandthunihenre, nanso ahomwiirela: Urwee uwaanyaa, wamawaa ni wattonkacere cithu cothene cupankenlyaya Apwiya, ni toko ciwoonenlyaya ikiriri. ²⁰ Ahokhuma wonwo, ni ahopacera uTekapoli itthu yampankenlyawe Yesu, na atthu othene yahotikhinaca.

Ulepela wa athumwane ntthu

Mt 9.18-19; Lk 8.40-42

²¹ Yesu nalapuwile ntthiya ni ikalawa, ni neemenle nceresere ntthiya wahothukumana mphwinko muulupale wa atthu. ²² Ahophiya vano muulupale o nsinakoka, eehaniya Cayro, ni umoona wawe Yesu, ahonkhoromela, ²³ ni ahonlepela ankhanyererihaka: Mwanaka mwanthiyana hanle vakani ukhwa; uwe unthatele matata akhale nkumi.

Uvonihiya wa nretta

Mt 9.20-22; Lk 8.43-48

²⁴ Yesu ahommelela phutthariyaka ni mphwinko muulupale wamphunyereriha.
²⁵ Vano, nthiyana mmoca awuva iphome iyakha khumi na piili, ²⁶ ni anaweetthiya venci

mamatani mwaya mayoovoniha enci, ni arihile mihakhu cawe cothene, nanso woohiphwanyana nafasi, hata iretta awe yaanavira etepacaka. ²⁷ Neewile ca Yesu, ahotakaneela ni mphwinko, ni awaaka uttuli wawe ahonkwanya nihancu nawe; ²⁸ aheecirela mweeco: Mena kakwanyaru cowara cawe, kimmovona. ²⁹ Nananoru iphome yaheemela, ni ahoona mwirutthuni mwawe wiira ikwerere awe ihovona. ³⁰ Nenna nna, Yesu, oonaka wiira ikuru awe yahokhuma mwirutthuni mwawe, ahorukunuwela mphwinko akohaka: Kikwanyile tipani? ³¹ Owiitthuca awe yahomwiirela: Unawoona wiira miphwinko cinawuphuny-ereriha miphandte cothene, ni unakoha: Akikwanyile tipani? ³² Nanso Yesu ahoweha nceresere aphavelaka umoona ntthu apankile itthu ile. ³³ Vano nthiyana ahocuwela ciheeranya mwirutthuni mwawe oovaka ni athukumelaka ahokhuma ahonkhoromela Yesu ni ahonhimerya citthu cothene. ³⁴ Ni ule ahomwiirela: Mwanaka, ukupali waa uhowoopola. Urwee ni nnema ni uvone ikwerere aa.

Wumwelelihiya wa mwanawe Cairo

Mt 9.23-26; Lk 8.49-56

³⁵ Yesu uulumacaka ninlelo yahowa atthu akina akhumaka inupa awe muulupale o nsinakoka phwiiraka: Mwana aa hokhwa. ³⁶ Yesu, nanso, neewile moolumo ale, ahomwiirela muulupale o nsinakoka: Uhituthuwe, ukupaliki paahi. ³⁷ Ahaateliha othene wiira: Hikivelele ntthu, hikhanle Peturu, Yakopu ni Yohani, nhimaawe Yakopu. ³⁸ Uphiya waya uwaanyawe muulupale o nsinakoka, Yesu aheewa ikutthu yuulupale ya atthu enci yunlaka mpani. ³⁹ Ni akelaka, ahaahimerya: Kutthu ila wunla nwe isiyani? Mwana uyo kakhwile, narupa paahi. ⁴⁰ Nanso atthu ale yaananyaa, Yesu ahaakumihera utaa atthu ale othene ni aakusaka athumwane na anumwane, na ale yammelenle, yahokela mpani mwataleliye mwanamwane. ⁴¹ Ni ammaraka ntata, aheera: Mwanaka kinawulamulela, wunwe. ⁴² Nananoru mwanamwane ahoonwa ni ahopacera weetta, ari mweeco, ni iyaakha khumi na piili. Othene yahooma mwaano. ⁴³ Yesu ahaalepela wiira itthu ile ihicuweliye ni ntthu, ni aholamula uvahiya yoolya mwanthiyana.

6

Yesu nakhottiya wakheleliya uNasaree

Mt 13.53-58; Lk 4.16-30

¹ Ukhuma wawe wenwe, ahorwaa wamoca ni owiitthuca awe. ² Nihuku no ntivela ahopacera wiitthucihana nsinakoka na atthu enci yamwiwa, wanawooma mwaano ni yaanahimya: Inonkhuma vayi itthu ila ni ucuwelani uno uvahiyaawe uno? Cinopankya cani cotikineeha nya ni ntata nawe? ³ Kahi nkarapintero, mwanawe Mariya, ni nhimaawe Yakopu, Yosefi, Yutta ni Simoni? Ni asiropacera khari ni hi? Yahoviruwaca. ⁴ Yesu aheerela: Namilohi notarawiya uwaanyawe paahi, waama wawe ni wapuwanani wawe. ⁵ Ni wonwo khoonrye upanka cotikineeha hata mena. Ahaavooniha aretta vakani paahi, athatelaka matata. ⁶ Ahotikhinaca uhukupali waatthu ale. Vano ahoviravira ithoko co wattamana eethucihaka wonwo.

Amitthenka anarumiya

Mt 10.5-15; Lk 9.1-6

⁷ Aheehana khumi na eeli, ni ahopacera waruma eeli eeli, ni ahaavaha ikuru yolamulela minepa coonanara. ⁸ Ahaalamulela wiira ahikuse itthu yoothumiri ni iphiro, wala nkatthe, wala nrupa, mena nsurukhu nyununi, akuse ikopo paahi. ⁹ Aware ikwakwatta ni ahiwye ihancu piili. ¹⁰ Ni ahaahimerya tho: Mwakelaka inupa, nkhole wonwo mpaka wunwa nipuro nno. ¹¹ Ni mwahaakheleliyeke nipuro nno, na atthu ale yahiweweki, woohama vale, nkukutthe ntthupi no manyaa enyu, wiira ikhale itthu inthoonyera mirima caya atthu ale. ¹² Amitthenka yahorwaca ni yahaalaka atthu ootharuwela itaampi. ¹³ Yahoomola minepa coonanara ciinci, yahaattikitthela ni makhura aretta enci mpaka waavoniha.

Ukhwa wawe Yohani Mpatisa

Mt 14.1-12; Lk 9.7-9

¹⁴ Mwene Heroti aheewa cuulumaceriyaka ca Yesu, nanruma ncina nawe ni anawiira: Ula phi Yohani Mpatisa onwelenle mwaatthu ookhwa, phimaana cinawithoonyera mwa ule ikuru coopanka cotikhineeha. ¹⁵ Akina yaanawiira: Phi Eliya. Akina yanalipihera: Ri nnapiyu toko anapiyu akina. ¹⁶ Heroti nanso, wowiwa itthu ila anahimya eeraka: Yohani unthikinlyaka isiko phunwelenle. ¹⁷ Khweeli, Heroti phalamunle utthukiya Yohani ni weesiya nkalaposo, nlattu wa Herotiyata, amwaarawe Filipe nhimaawe, anthenlyawe. ¹⁸ Nlattu Yohani anamwiirela Heroti: Khunleveliya ukhalana amwaarawe nhimaa. ¹⁹ Herotiyata hopophela nreca ni anathuna umwiiva, nanso khoorya, ²⁰ nlattu Heroti

anamooova Yohani ni, acuwelaka wiira ari nthu ooloka ni nttakattifu, anamwaakhiha; wamwiiwawe anasanka, nanso anammiriyana ni uciveliya. ²¹ Nanso nahophiya nihuku nooreera, Heroti wopuwelenyawe nihuku nayariyawe ahophavela yoolya yinci yowaavaha oolupale owahano, oolupale anakhotto, ni mamwene o Kalileya. ²² Nakenle wiina mwana nthiyana a Herotiyata wahoncivela Heroti na athu yaalattuliye. Mwene ahomwiirela mwali: Ukilepele ithu phi ithu intthunaa ni mi kimmowuvaha. ²³ Ni ahopwahera: Kimmowuvaha ithu yothene inhalaa ukilepela hata ukhalaka mwanusu omwene aka. ²⁴ Mwali ahokhuma waakoha anumwane wiira: Kilepele isiyani? Ala yaahaakhula: Muru wa Yohani Mpatisa. ²⁵ Mwali akelaka tho nenna nna, ahonlepela mwene, eeraka: Kintthuna uvahiya nananoru, unaheliye munttiisini muru wa Yohani Mpatisa. ²⁶ Mwene ahotuthuwa, nanso nlattu woolupela wawe ni, nlattu waatthu yaalattuliye, khathunne unthuwa. ²⁷ Nenna nna ahonlamulela mayorontta uwiha muru wa Yohani. Mayorontta ahorwaa nkalaposo ni ahothikila isiko ya Yohani, ²⁸ ni wahoolo ahowiha muru munttiisini mpaka ummaha mwali, ni ula ahaavaha anumwane. ²⁹ Ucuwela waya ithu ila owiitthuca a Yohani, yahokusa nrutthu ni yahothipela mmahiyeni.

Mikatthe cinawuceriya

Mt 14.13-21; Lk 9.10-17; Yohani 6.1-14

³⁰ Amitthenka yahothukumana wa Yesu ni yahonttonkacera citthu cothene capankilyaya ni cithu cihilyaya. ³¹ Ni Yesu ahaahimerya: Mmweeke, nirwe nipuro nowiipithyaa ni mmumule vakani, nlattu yaari enci jaarwa ni yaawa mpaka uhikhalana ukati woolya. ³² Vano yahorwaa ni ikalawa nipuro nowiipithyaa nahaariwo hata nthu. ³³ Yoonaka arwaka, enci yahocuwela ukithu unkelaya. Ni mmatthokoni mothene yahorwaa, yeetaka vathi, nipuro nne, ni yahophiya nraci. ³⁴ Wakhuruwawe nkalawani, Yesu ahoona mphwinko muulupale ni ahoonela ikiriri, nlattu yaari toko ikhontwaa cohikhalana nhaakheli. Vano ahopacera weethuciha ukati mwinci. ³⁵ Ncuwa wakelaya utthekuwa, owiitthuca awe yahomwattamerya nuunhimerya: Nipuro nna niri toko mwini, ni ncuwa notthekuwa. ³⁶ Walamulele urwaa mmawaani ni mmatthokoni cowattamana wiira yathume yoolya. ³⁷ Ahaakhula: Mwaavahe nyenyu wa yoolya. Na ale yahonhimerya: Wothuma mikatthe cowavaha athu ale othene, nimphavela ncurukhu iminya piili. ³⁸ Yesu ahopwahera: Nhaana mikatthe mikavi? Nrwee moone. Anakohile athu, yahaakhula: Mikatthe mithanu ni ihopa piili. ³⁹ Ahaalamulela wonkomiha athu vakani khila nipuro mmalasini makithi. ⁴⁰ Ni yaanawunkoma khila ipuwa athu iminya ni ipuwa ikhwawe athu hansini. ⁴¹ Vano ahokusa mikatthe mithanu ni ihopa piili ni, aweehaka wirimu, ahosukurela. Ahomyaniha mikatthe ni ahaavaha owiitthuca awe wiira yakawele athu. Ni ahaakwela ihopa piili, ⁴² na athu ale yaholya mpaka uvona. ⁴³ Ni ahocariha tho ithuttu khumi na piili ikalakatthela cahanle co mikatthe ni co ihopa. ⁴⁴ Vano yalilyayo mikatthe nye yaari athu elufu thanu.

Yesu naweetta waculu maasi

Mt 14.22-33; Yohani 6.16-21

⁴⁵ Nananoru ahaakhanyeriha owiitthuca awe ukela nkalawani nuulapuwela nikhopela nikhwawe no Petsayita; mwaneene alaseraka mphwinko. ⁴⁶ Analasenre mphwinko ule, ahowela umwakoni, uswali. ⁴⁷ Wiila waya, ikalawa yari iriyari ntthiya, ni Yesu aheemela nceresere veekhawe. ⁴⁸ Woono wawe wiira yahooocya weettiha ikalawa nlattu iphyoo yanavirikana, aheekamela weeraka mapikoosa, eettaka wamaasini mpaka utthuna uhapuwa. ⁴⁹ Nanso owiitthuca yamoonaka weetta wamaasini yahopuwela wiira nnepa, ni yahokhuwa. ⁵⁰ Othene mweeco yahomoono ni yahotuthuwa. Mwaneene nanso aholumacera, eeraka: Mpise nrima, phi mi, nhoove! ⁵¹ Wahoolo, ahokela nkalawani mwariyaya, ni iphyoo yahowukuwa. Othene yanawoova venci. ⁵² Khayeewehile ni nlelo ithu yeranele ni mikatthe nye nlattu woolipa mirima caya.

Yesu nawavonihia aretta uYenesare

Mt 14.34-36

⁵³ Analapuwenle ukhopela, ahophiya ilapo yo Yenesare ni ahovonyera vathi nankura. ⁵⁴ Anakhumile nkalawani, athu uwonwo yahoncuwela. ⁵⁵ Yahophiya athu enci olapo ile ni yahopacera wawiha aretta mmarepani ni aharweha nipuro nacuwenyaya wiira phiryawe. ⁵⁶ Mmatthokoni makani, ithoko cuulupale ni mmawaani, nipuro phi nipuro nakelawe yanaweesiya aretta mparaparani ni yahoonlepela wiira aleve mena ukwanyiya nlempe no nhancu awe. Na athu othene yankwanya yanavona.

7

*Coohiyerana co Mahumu**Mt 15.1-20*

¹ Mayowantikha ni mafarisi akina, akhumaka o Yerusalemu, yahothukumana ntotho wawe Yesu. ² Yahoona wiira owiitthuca awe akina yanalya nkatthe ni matata oohirya, manaaya woohinyawa. ³ Mafarisi ni Ayutta othene khanlya woohinyawa ratta ratta, toko calemalenlyaya atthu ookhalayi. ⁴ Waturuwaya uparasa, khayalya ihinaya unyawa; ni cihaawo tho citthu cinci cikina cimpanya attharaka citthu cookhalayi, toko urapiha ikahi, myaapu, ni myaapu co ncukhuma ni mikori. ⁵ Yohonkoha vano, mafarisi ni mayowantikha: Owiitthuca aa ahiwelelaka citthu cookhalayi, alyaka ahinyawile, isiyani? ⁶ Yesu ahaakhula: Hohimya ratta nnapiyu Isayiya, awacakani nyu, atthu o mirima miili, toko cantikhiyaya:

Mphwinko ula unakittithimiha ni mattere,

nanso nrima aya unkhala uttayi waka.

⁷ Anakilapela vathiru,

ni yeethucihaka malamulo a atthu paahi.*

⁸ Ahiyaka nlamulo na Nluku, phuttharaka coohiyerana ca atthu, toko urapiha myaapu ni ikahi ni citthu cinci colikana nnya. ⁹ Ni aheerela: Nnahiya ntteeliyaka nlamulo na Nluku wiira nthareke coohiyerana cinyu. ¹⁰ Musa, mweeco, heera:

Wattittimihe athumwanaa na anumwanaa;*

ni

Ntthu nohala walapha athumwane na anumwane attarusiye ni eeviyee.*

¹¹ Nyu nanso nneera: Ntthu nohala wahimerya athumwane atthuna anumwane: Itthu yahalaka wuvahani nyuva phi ila 'korpan' manaaya, itthu yoovahiya Apwiya. ¹² Ciicammo khanonhiyera ntthu itthu yowapankela athumwane atthuna anumwane, ¹³ mmalihaka ciicammo nuulumo na Nluku nlattu wo coohiyerana cookhalayi cinvahenyu. Ni napanka citthu cinci toko nnya.

Cinapankiha atthu ukhala aharamu

¹⁴ Eehanaka tho mphwinko, Yesu anawahimerya: Nkiviriyaane othene, ni mwavye wiiweha. ¹⁵ Khiiwo iri utaa wawe ntthu, ineera inakenle nhina mwawe, phoorya untatusa iharamu; nanso inkhuma muntthuni, ila phinoorya untatusa iharamu. ¹⁶ Ntthu urina manyaru uwiwelela, eewe! ¹⁷ Wakenlyawe mpaani, nahile mphwinko, owiitthuca awe yohonkoha manaaya nlikanihero nna. ¹⁸ Ahaakhula: Nyu ciicammo khaneeweha? Khannocuwela wiira, citthu cothene co utaa cinkela muntthuni, khacinoorya untatusa iharamu, ¹⁹ nlattu khinkela munrimani, nanso nnapwiiwini mwawe, ni wahoolo inkhumela wanipuroni waya? Ciicale anahimya wiira coolya cothene cooreera. ²⁰ Ni ahohimya tho: Itthu inkhuma muntthuni, yeeyo phinontatusa iharamu. ²¹ Nlattu nhina nrima wantthu phinkhumaya moopuwelo oonanara: ulavalava, wiinya, wiiva, ²² uraruwa, isoyo, wunlela coonanara, uthepya, uhilemeliha irutthu, urama, ukufuru, wiicono, uhiwacera ithu yomaana. ²³ Citthu nnye cothene coonanara cinkhuma nhina, ni cinantatusa ntthu nharamu.

*Nthiyana Nkananeya**Mt 15.21-28*

²⁴ Akhoolaka nipuro nne, ahorwaa nttettehe wo Tiro ni wo Sittoniya. Ahokela mpani ni khatthuna wiira acuweliye ni ntthu, nanso khoonrye wiipitha. ²⁵ Vano wohipica nthiyana arina mwanawe mwanthiyana avariye ni nnepa woonanara weewilyawe wuulumaciya ca Yesu, ahowa unkhoremela wamettoni wawe. ²⁶ Ari nthiyana nsenci, olapo yo Siriya-Fenisiya, ni ananlepela wiira oomole ncini wa mwanawe. ²⁷ Ahaakhula: Wareerihe, toko, avone oopacera asaana; woona khavanreera ukusa nkatthe wa asaana ni warihela asilapwa! ²⁸ Ale mweeco, yahomwakhula: Khweeli, Pwiya, nanso hata asilapwa analya vathivaya meeca coolya ca asaana cimmora-mora. ²⁹ Yesu ahomwiirela: Nlattu wo nuulumo nna, urweke, ncini nookhuma mwa mwanaa. ³⁰ Ahoturuwela uwaani ni ahomphwanya mwamhima nonkomile wakorini. Ncini nahonhiya.

Ntthu oohiwa ni oohuulumaca navonhiya

³¹ Nakhumile tho nttettehe wo Tiro, ahowela o Sittoniya, mpaka nthiya no Kalileya, aphulanihaka nttettehe wo Kapole. ³² Yahomwiihera ntthu oohiwa, ni wanrikarikela wuulumaca, ni yahonlepela wiira anthatele ntata. ³³ Yesu antamihaka waatthuni ahonhela makokho mmanyaruni ahonsuwela ni ukwanya nlimi ni isene. ³⁴ Ni awusaka miitho

* 7:7 Isaya 29.13

* 7:10 Ukhuma 20.12; Dt 5.16

* 7:10 Ukhuma 21.17; Lv 20.9

wirimu ahohihimerya, eeraka: 'Effatha' manaaya 'wiihule.' ³⁵ Manyaru yahonhulya namarweele, nlimi nawe nahonthukuwa ni ahopacera wuuluma ratta. ³⁶ Yesu aheera wiira hinhimerye ntthu itthu yeraneele, nanso waatepawe waateliha, phaatepaya umwarusela. ³⁷ Atikhinacaka, yaanawiira: Cothene nopanka cotikhineeha, heewiha atthu uhiwa, ni wuulumaciha atthu oohuulumaca.

8

Mikatthe cinawincereriya imaara yonapiili

Mt 15.32-39

¹ Mahuku ale, ukhala wiira wahotthukumana tho mphwinko muulupale na atthu khayarina yoolya, Yesu aheehana owiitthuca awe ni ahaahimerya: ² Ukiiriha ihaaya mphwinko ula. Nna va ahovira mahuku mararu anari ni mi ni kharina yoolya. ³ Kaalaseraka cicale woohilyetthu, wiira arwe mmwanyaya anaahala ukhwa mahile ni iphiro, kontha akina akhumile uttayi. ⁴ Owiitthuca awe yahomwaakhula: Nohala woorya cani ntthu waaliha nkatthe, watakhwani va? ⁵ Nanso ahaakoha: Nrina mikatthe mikavi? Yahaakhula: Mithanu na miili. ⁶ Aholamula wiira atthu yunkome vathi. Ni, akusaka mikatthe mithanu na miili, ahoreeriha, ahomyaniha ni ahaavaha owiitthuca awe, wiira yakawele na ale yahaakawela atthu. ⁷ Yahaana tho asihopa vakani. Ahoreeriha ni aholamula wiira yaakawele. ⁸ Yaholya mpaka urupala, ni ikalakathela cahanle nyo owiitthuca awe yahottottela ithuttu thanu na piili. ⁹ Atthu ale yaari elufu cese (4000). Wahoolo ahaalasera. ¹⁰ Ni awelaka vano nkalawani ni owiitthuca awe, ahorwaa mittetthe co Talmanuta.

Mafarisi anelepela ikanyero

Mt 16.1-4

¹¹ Yahowa mafarisi yapacenre unyakulihana ni Yesu ni woontteha yahoonlepela ikanyero yo wirimu. ¹² Yesu ahihimeryaka ni nrima wothene, aheera: Nlattuni weesiyani nihimo nna ninalepelela ikanyero? Khweeli kinawuhimeryani wiira nihimo nna khanin-hala uvahiya ikanyero hata vakani. ¹³ Ni aahiyaka, ahokela nkalawani, mpaka ulapuwela ikhopela ikina.

Miropo co mafarisi ni ca Heroti

Mt 16.5-12

¹⁴ Owiitthuca yaholiyala uwaya mikatthe, ni nkalawani khayaarina tho waari nkatthe mmoca paahi. ¹⁵ Yesu aheerela: Moone, nkhole miitho mmwehaka ratta miropo co mafarisi ni miropo ca Heroti. ¹⁶ Na ale yahopacera uvanyihana, yopuwelaka wiira waaciye uhikhalana nkatthe. ¹⁷ Yesu nanso, weewilyawe moolumo ale, ahaahimerya: Nlattu isiyan moopelaka mwaha o itthu yohikhalana nkatthe? Nanlelo khannahelelela ni khandeeweha? Nri ni nrima woturumala. ¹⁸ Nahaana miitho ni khannona? Nhana manyaru nanso kanneeva ni khannopuwela.* ¹⁹ Ithuttu kavi coocara ni coohala caattottenlenyu, wamyanihilyaka mikatthe mithanu kaakawelaka atthu elufu thanu? Yahaakhula: Khumi na piili. ²⁰ Ni wamyanihilyaka mikatthe saapa pwaavahaka atthu elufu cese, mwacarihile ithuttu kavi cokalakathela co mikatthe? Yahaakhula: Saapa. ²¹ Ni anaweerela: Nanlelo khandeeweha?

Ntthu oohoona navonihiya

²² Yesu ni owiitthuca awe yahophiya o Petsayita ni yahomwiihera ntthu oohoona, anlepelaka wiira ankwanye. ²³ Ahommarela ntata ntthu oohoona ni ahonrweha nceresere ithoko, ahonhela isenye mmithoni mwawe, ahonthatela matata nuunkoha: Unawoonaka itthu? ²⁴ Ule ahooteesa miitho ni aheerela: Kinawoona atthu, yeettaka ankhala toko miri. ²⁵ Ahonthatela tho matata mmiithoni, ni ule ahopacera woona uparapara, ni ahovona, oonaka rattaratta uttayi ni uparapara ciithu cothene. ²⁶ Yesu vano ahonlamulela urwaa uwaani, ni ahomwiirela: Uhikele mena umawaani.

Peturu nanrumelela Yesu Mwana a Nluku

Mt 16.13-20; Lk 9.18-21

²⁷ Yesu ahoonwa na owiitthuca awe, akelaka umawaani co Sesareya wo Filipe. Mphironi ahaakoha owiitthuca awe, eeraka: Atthu ayo aneera wiira Mi kipani? ²⁸ Yahomwiirela: Yohani Mpatisa, akina Eliya, ni akina tho aneera wiira uri mmoca mwa anapiyu. ²⁹ Ni ahaakoha: Ni nyu nneera Mi kipani? Peturu ahaakhula: We uri Kristu.* ³⁰ Ahaalamulela vano, wiira ahinhimerye ntthu itthu ila.

Yesu nahimya imaara yoopacera wiira naahala uhuvihya ni wiiviya

Mt 16.21-23; Lk 9.22

* 8:18 Isaya 6.9-10 * 8:29 Yohani 6.68-69

³¹ Wahoolo ahopacera weethuciha wiira Mwanawe Pinattamu naahala uhuva venci ni ukhottiya ni mahumu, ni oolupale a mayasataka, ni mayowantikha, mpaka wiiviya ni wunwelela anavinre mahuku mararu; ³² ni anawahimerya itthu ila wohakuwa-khuwa. Peturu ahomwiihana Yesu ni ahopacera unkuphula. ³³ Yesu nanso arukunuwaka, ni awehaka owiitthuca ahonkuphula Peturu, eeraka: Uthame wiitho aka, Sotwani, kontha khummwacera citthu ca Nluku, nanso paahi citthu ca atthu.

³⁴ Eehanaka mphwinko wa atthu wamoca ni owiitthuca awe, aheerela: Ntthu, atthunaka ukithhara, eerune mwaneene, akuse nsalapa awe ni akithhare.* ³⁵ Nlattu, ntthu nohala uphavela woopola ukumi* awe unanrihya, ni unhala unrihya nlattu wo miyano, ni nlattu wo Nhupi Wooreera nowowopola. ³⁶ Enhala ukhuma isiyani, ntthu uphwaya ittuniya yothene ni arihaka nnepa awe? ³⁷ Atthuna ntthu nohala uvaha isiyani wo wakakhaniha nnepa awe? ³⁸ Ntthu mweeco nohala wuliya muru nlattu wo Miyyano ni nlattu wo moolumo aka wamiithoni wanloko nna nookosakosa nimwalaanne ni Mi, cicammo, Mwanawe Pinattamu naahala wuliya muru nlattu wa ale aphiyaka o nnemani wa Athumwane wamoca ni Ancelo attackatifu.

9

¹ Yesu ahaahimerya tho: Khweeli kinawuhimeryani wiira akina mwaala ari vava kxanhalu ukhwa ahinaya woona omwene wa Nluku uwaka ni ikuru caya.

Wiitatusa wa Yesu
Mt 17.1-8; Lk 9.28-36

² Anavinre mahuku siita, Yesu ahaakusa Peturu, Yakopu ni Yohani, ni ahaaweliha veekhaya, mwaako woorekama. Ni aheetatusa wamiithoni waya. ³ Coowara cawe cahothatuwa coowarya, cooteela usilili toko khaawo mayokattha vathiva uwoorya utteeliha ciicale. ⁴ Ahaakhumelela Eliya wamoca ni Musa ni ooyeli yanawuulumaca ni Yesu. ⁵ Peturu ahomwiihara Yesu: Mwalimu oreera ukhala vava, niteke marapattha mararu, nimoca na waa, nikina na Musa nikhwawe na Eliya. ⁶ Kontha khayaacuwelela itthu yaahimiyawe nlattu yanawoova venci. ⁷ Ni nahokhuruwa nihutte nakhunenle ni ntthuuci, ni nahokhuma ncu nnihutteni neera: Ula mwanaka oofentiya. Yooyo mwiiwe. ⁸ Nenna nna, awehaka, khayamoonne tho ntthu, ari Yesu veekhawe.

⁹ Wakhuruwaya mmwakoni, Yesu ahaalamulela wiira ahihimerye ntthu itthu yoonayya, mpaka wahoolo Mwanawe Pinattamu nonwelenle mwaatthu ookhwa. ¹⁰ Ale yahotthara moolumo ale, nanso yaanakohana ayayoru manaaya, 'wunwelela mwaatthu ookhwa.' ¹¹ Ni yahonkoha yiiraka: Mayowantikha aneerelani wiira woopacera Eliya phinhala uwa? ¹² Ahaakhula: Aye, Eliya, awaaka woopacera naahala weesa wanipuroni waya citthu cothene, nanso yantikhiye isiyani ya Mwanawe Pinattamu, wiira nalamuliya uhuva venci, nuunyoholiya. ¹³ Ni mi mweeco kinawuhimeryani: Eliya ahowa, ni yahompankela cothene catthunaya, toko caantikhiye.*

Yesu ahonvonihani ntthu oowerenya icilicili
Mt 17.14-21; Lk 9.37-43

¹⁴ Naphile waryaya owiitthuca awe ahoona mphwinko muulupale wa atthu warukurenrye ayoca, ni mayowantikha anyakulihanaka na ale. ¹⁵ Amoonakaru Yesu yahotikhina ni yahotthimakaka unkoha isalama. ¹⁶ Ni ule ahaakoha ale: Nnonyakulihanani? ¹⁷ Ntthu mmoca mwa mphwinko ule, ahomwiihara: Mwalimu, kihowihera mwanaka, rina nnepa woohuulumaca. ¹⁸ Wammaraka vale, unamphatela vathi ni ule napacera ukhuma niphooru, ucekesa miino ni phuumaka teyeye. Kihaalepela owiitthuca aa wiira yoomole ncini, nanso khayoonrye. ¹⁹ Yesu aheerela: Nyu, nloko noohikupali, kinhala ukhala ni nyu mpaka yakhani? Kinhala wuvilelani mpaka yakhani? Nkiwiihere woono. ²⁰ Yahommwiihera. Nimoonaakaru Yesu, ncini nahompukunyaa mwanhima ni ikuru, mpaka umphatela vathi, ni ahopacera uphirikyaa akhumaka niphooru mwano. ²¹ Yesu ahaakoha athumwane: Itthu ile inomwiiiryanyaa ikhumelo yakhani. Na ale yahaakhula: Ikhumelo mwanamwane, ²² ni imaara cinci nahommonyera wamooroni ni mmasini wiira amwiive, nanso wooryaka vale upanka itthu, unoonele ikiriri, nuunikhavihere. ²³ Yesu ahomwiihara: Wooryaka! Ntthu nokupali citthu cothene cinawooryanyaa. ²⁴ Nenna nna, athumwane mwana oyo yahokhuwa: Kinakupali; nkikavihere uhikupali waka! ²⁵ Yesu, oonaka wiira atthu enci yanawa, aholamulela nnepa woonanara ni aheerela: Nnepa wohuulumaca ni wohiwa, Mi kinawulamulela, ukhume wamwana ola, nuuhinturuwele tho. ²⁶ Ni nnepa, ukhuwaka ni wicipulacaka ni ikuru, wahokhuma. Mwanhima ahokhala

* 8:34 Mt 10.38; Lk 14.27

* 8:35 Mt 10.39; Lk 17.33; Yohani 12.25

* 9:13 Malakiya 4.5

toko ookhwa, mpaka atthu enci wiira hokhwa. ²⁷ Nanso, ammaraka ntata, Yesu ahom-musa, ni ule aheemela.

²⁸ Ukelawawe mpani, owiitthuca yahonkoka veekhawe: Nlattuni hiyano khandoonrye woomola? ²⁹ Ahaakhula: Nloko nna ninoomoliya ni iswali ni utthuka paahi.

Yesu nahimya imaara yonapili uhuva ni ukhwa wawe
Mt 17.22-23; Lk 9.43b-45

³⁰ Akhumaka wonwo yahottupulaniha ilapo yo Kalileya, ni Yesu khatthuna wiira acuweliye ni ntthu, ³¹ nlatu anavira eetthuchihaka owiitthuca awe ni anaweerela: Mwanawe Pinattamu naahala urwehiya mmatatani mwaatthu anhala umwiiva, nanso, nakhwile nowowunwelela anavinre mahuku mararu. ³² Nanso ayo khayeeewehile nu-lumo nne, ni yanamoova unkoha.

Tipani nohala ukhala muulupale cinene?
Lk 9.49-50

³³ Yahophiya uKafarnaum, ni, anari uwaani, Yesu ahaakoha: Mwavanyihanani mphironi? ³⁴ Yahomaalaca, nlatu mphironi yanavanyihana ayayoru, wiira tipani ri muulupale mwaale. ³⁵ Unkomaka, Yesu aheehana owiitthuca awe khumi na eeli ni ahaahimerya: Ntthu aphavelaka ukhala muulupale, eepanke mwankani mwaatthu, ni akhale nrumeyi a atthu othene. ³⁶ Ni ankusaka mwanamwane, ahomweesa iriyari aya, ahommarela ni aheerela: ³⁷ Ntthu nomwaakhela mwanamwane toko ula mwancina naka, nokaakhela Miyano, ni ntthu nokaakhela Mi, khankaakhela Mi, nanso Ule kirumile.

Ntthu hinoniina, nawiraana ni hi.
Lk 9.49-50

³⁸ Yohani ahonhimerya: Mwalimu, nihomoona ntthu oomolaka macini mwancina naa, ni ntthu ule khannithara, ni nihomwaateliha. ³⁹ Yesu ahaahimerya: Nhimwaatelihe, nlatu khaawo nopanka cotikhineeha mwancina naka phukaapa mi nenna nna. ⁴⁰ Ntthu hinoniina, nawiraana ni hi. ⁴¹ Ntthu novahani ikoopu yo maasi wiira mmurye nlatu wokhala owiitthuca awe Kristu, khweeli, kinawuhimeryani, khankela ahalelaka itthuvo awe mena vakani.

Cookosiha
Mt 18.6-9; Lk 17.1-2

⁴² Ntthu nohala unkosihana mmoca mwaasinamwane ala ankikupali Mi, fatari atthukeleliye nsiko mmo nsilo noosileliya ni avonyeriye mpaharini. ⁴³ Ntata naa nookosihaka, uthikile. Unareera ukela wokumini ni ntata noopahuwa, wahohiyana ukhalana matata oomeli ni urwaa umooroni oohinttiphyaa. ⁴⁴ Wonwo uhinkhwa asunku, ni mooro khunttiphyaa.* ⁴⁵ Nnya naa nookosihaka, uthikile. Unareera ukela wokumini unapahuwile, wahohiyana ukhalana oomeli uvonyeriyaka umooroni. ⁴⁶ Wonwo uhinkhwa asunku, ni mooro khunttiphyaa. ⁴⁷ Ni niitho naa nookosihaka, uphele. Unareera ukela umweneni wa Nluku ni niitho nimoca, wahohiyana ukhalana oomeli uvonyeriyaka umooroni. ⁴⁸ Wonwo uhinkhwa asunku, ni mooro khunttiphyaa. ⁴⁹ Phimaana khula ntthu naahala ulukiya ni mooro. ⁵⁰ Maakha phi itthu yooreera; nanso yathatuwaka ooririya, ammolukiya ni isiyani? Nkhalaneke maakha mwanyu ni mweetteke ni mpuha ntthu ni nkhwawe.

10

Uthelana khumwalaaniya
Mt 19.1-12; Lk 16.18

¹ Nakhumile wonwo, ahokela ntthethe wo Yutteya ni ukhopela mooloko Yorttani, ni mphwinko unathukumanne tho nipuro naryawe, anaweetthuchiha tho, toko calemalenlyawe.

² Yahomwattamerya mafarisi ni yahonkoha anttehaka: Iri yooreera nlopwana wamwalaana amwaarawe? ³ Ahaakhula: Musa holamulenleni isiyani?

⁴ Yahomwaaakhula: Musa holevela waavaha iwarakha yoomwalaana, ni waahiya. ⁵ Yesu ahaakhula tho: Nlatu woolipa winyu nrima phuvahilyaweni nlamulo nno. ⁶ Nanso, wupattusoni wolapo, Nluku ahompanka nlopwana ni nthiyana. ⁷ Phimaana, nlopwana naahala waahiya athumwane na anumwane ni nokookhala na amwaarawe. ⁸ Ni ooyeli ankookhala irutthu imoca. Phimaana, khankhala tho eeli, nanso irutthu imoca.* ⁹ Vano, yooluttanihiya ni Nluku, khimwalaanihiya ni ntthu.

* 9:44 Isaya 66.24

* 10:8 Mpattuwelo 2.24

¹⁰ Anaphile uwaani, owiitthuca awe yahonkoha tho ithu ile. ¹¹ Yesu ahaahimerya: Ntthu nohala wamwalaana amwaarawe ni waathela akina, neetta uluva ni nthiyana ule, ¹² ni nthiyana ammwalaanaka mannawe nuutheliya ni nkina, neetta uluva.

Yesu nawareerihira amirawo
Mt 19.13-15; Lk 18.15-17

¹³ Yahomwiihera asinamwane wiira aakwanye, nanso owiitthuca yahakuphula ale yawihile asaana. ¹⁴ Yesu, oonaka ithu ile ahonyonyiya ni aheerela: Mwalevele, amirawo akiweele, ni nhoomole, nlatu omwene wa Nluku uri wa waya. ¹⁵ Khweeli kinawuhimeryani, ntthu hinhala waakhela omwene wa Nluku toko mmirawo, kxanhala ukela wonwo. ¹⁶ Wahoolo ahaakusa vayawani phwathatelaka matata ni ahaareerihira.

Oothaciri wowoopiha
Mt 19.16-22; Lk 18.18-23

¹⁷ Wakhumilyawe eettaka ni iphiro, ahomwattamerya ntthu atthimakacaka, ni akhoromelaka ahonkoha: Mwalimu ooreera, kipankekeni wiira kiphwanye ukumi woohimala? ¹⁸ Yesu ahonhimerya: Nnokihanelani ooreera? Khaawo ooreera hikhanle Nluku paahi. ¹⁹ Unacuwela malamulo: Uhiive, uheette uluva, uhiinye, uhoothe, uhithepye, waalemelihe athumwanaa na anumwanaa.* ²⁰ Ahomwaakhula: Mwalimu, cothene nnya kihosunka ikhumelo mmirawo. ²¹ Yesu ammwehesecaka, ahomfenta, ni ahomwaakhula: Inawuhaleela ithu imoca paahi; Urwee, watumihe cithu cothene cirinaa, waavahe nsurukhu uyo atthu oothwenya, ni ommokhalana nhakhu wirimu; uwe ni ukithhare. ²² Nanso, weewilyawe moolumo ale, ahothulana ni ahothama ni icuku, nlatu arina mihakhu cinci.

²³ Awehaka nceresere, Yesu aheerela owiitthuca awe: Urikarika venci, atthu oothaciri ukela wumweneni wa Nluku. ²⁴ Owiitthuca wahooma uwanoni, wowiwa moolumo ala. Nanso Yesu ahopwahera: Asaana aka, cirikarikilyaya ukela wumweneni wa Nluku, ale ankhuluvela mihakhu. ²⁵ Khavarikile uvira nkamira mwithe wo sinkano, uho-hiyana ukela thaciri wumweneni wa Nluku. ²⁶ Ale yahotikhina wootepe nanlelo ni yanawiiirelana ayayoru: Vano, tupani nohala woopwa! ²⁷ Awehecesaka, Yesu ahaakhula: Na atthu khinooryaniya, nanso ni Nluku cithu cothene cinawooryaniya. ²⁸ Peturu ahopacera unhimerya: Hi nihohiya cothene nihottharani. ²⁹ Yesu ahaakhula: Khweeli kinawuhimeryani wiira khaawo ntthu nohala uhiya inupa awe, asunnawe, asirokorawe, athumwane na anumwane, asaana athuna imatta awe nlatu wo Miyano, ni nlatu wo Nhupi Wooreera, ³⁰ phihaakhela mpaka imaara iminya, nanano ukati ula urihula, inupa, asunnawe, asirokorawe, anumwane, asaana ni imatta, wamoca ni womolanihaciya, ni wahoolo ukumi woohimala. ³¹ Enci oopacera ankokhala uwiheerya, ni uwiheerya ankokhala oopacera.

Yesu nahimya imaara yoneeraru coohuva ni ukhwa wawe
Mt 20.17-19; Lk 18.31-34

³² Owiitthuca yaanaweetta ni iphiro, awelaka uYerusalemu, ni Yesu anaweetta uhooolo waya. Yanatikhina ni yaanantthara ni woova. Ahaakusa tho owiitthuca khumi na eeli, ahopacera wahimerya ithu yahala umwiiranela, ³³ eeraka: Mwiiwe, ninawela oYerusalemu, ni Mwanawe Pinattamu naahala urwehiya mmatatani moolupale a mayasataka ni mayowantikha, na ale anaahala ummaanela umwiwa nuunrweha waasenci. ³⁴ Anaahala untarawa, unsuwela wiitho, umwapsyulaca nuumwiwa, nanso nihuku noneeraru naahala wunwelela.

Ulepela wa asaana a Sepetteu.
Mt 20.20-28

³⁵ Yakopu ni Yohani, asaana a Sepetteu, yahomwattamerya ni yahomwiirela: Mwalimu, nimphavela, unipankele yothene inhalehu wulepela. ³⁶ Yesu ahaakoha: Nnophavela kuupankeleni isiyani? ³⁷ Yahomwaakhula: Wumweneni waa, nunkome, mmoca mono nlopwana, ni nkina mono nthiyana. ³⁸ Yesu ahaakhula: Khannocuwela ithu inlepelenyu. Nnawoorya uwurya ikoopu inhalaka uwurya, ni waakhela upatiso unhalaka waakhela? ³⁹ Yahomwaakhula: Aye, ninawoorya. Yesu ahaahimerya: Nnowowurya ikoopu inhalaka uwurya, ni nnowopatisiya ni upatiso unhalaka upatiseriya, ⁴⁰ nanso, wunkoma mono nlopwana athuna nthiyana kahi phi Mi kinvaha, anovahiya ale asunkeriyi. ⁴¹ Akina khumi, yiwakaru ithu ile, yahonyonyiya ni Yakopu ni Yohani. ⁴² Yesu aheehana ni aheerela: Nhocuwela cimpankaya alamuli onlaponi wiira acuwanehe iyulupale aya mmalokoni ni mahumu aya. ⁴³ Nanso ni nyuva khunhala ukhala commo. Ntthu nophavela

* 10:19 Ukhuma 20.12-16; Dt 5.16-20

ukhala muulupale mwa nyu eepanke nrumeyi, ⁴⁴ ni nophavela ukhala oopacera mwa nyu eepanke ipoththa ya atthu othene, ⁴⁵ nlatu Mwanawe Pinattamu khaawile uvareliya nteko, nanso uvara nteko ni uvaha ukumi awe wiira oopole atthu enci.

Oohoona o Yeriko

Mt 20.29-34; Lk 18.35-43

⁴⁶ Yahophiya uYeriko. Wakhumaya uYeriko ni owiitthuca awe, ni mphwinko muulupale, Partimeu, mayoolepela oohoona, mwanawe Timeu, ahonkoma nceresere iphiro aphavela ulola. ⁴⁷ Weewilyawe wiira Yesu o Nasaree anavira, ahokhuwa: Yesu, Mwanawe Taviti, ukoonene ikiriri. ⁴⁸ Atthu enci yanankuphula wiira ammaalihe, nanso anapwaha ukhuwa khula imaara wootepa eeraka: Mwana a Taviti, ukoonene ikiriri. ⁴⁹ Yesu aheemela ni aheera: Mmwiihane. Yahomwiihana nthu uhoona yiiraka: Ulupe nrima, wunwe, nawiihana. ⁵⁰ Ni ule, arulaka ikacako awe, ahotupha ni ahorwaa waYesu. ⁵¹ Yesu ahonkoha: Untthuna kupankele isiyani? Oohoona ahaakhula: Mwalimu, koone. ⁵² Yesu ahonhimerya: Urwee, ikupalelo aa ihowoopola. Ni nananoru ahoona ni ahontthara Yesu mphironi.

11

Yesu nakela atthapeliyaka uYerusalemu.

Mt 21.1-17; Lk 19.28-40; Yohani 12.12-19

¹ Naattamenrye uYerusalemu, vakhiviru ni Petifaki ni Petaniya, coco ni mwako Olivera, Yesu ahaaruma owitthuca awe eeli, ² ni ahaahimerya: Nrwee iwaani yowaattamana, mwakelaka nnamphwanya mwaapuru ootthukiya, hinaya uweliya ni nthu. Mwantthukule ni nkiwiihere. ³ Akhalaka nthu nookohani, nlatuni mpankaka ciicammo. Mwaakhule Apwiya anamphavela, ni ankwuturuselani wowakuvyaca. ⁴ Yahorwaa phumphwanyaka mwaapuru natthukeleliye wankhorani, mphante wovate woluwani, ni yahontthukula. ⁵ Ni atthu yaari wonwo yahokoha: Nnopankani muntthukulaka mwaapuru? ⁶ Yahaakhula toko Yesu cahimenrawe, ni yahaahiya urwaca. ⁷ Yahonrwehela Yesu mwaapuru uyo, yahonkhunela cowara caya, ni Yesu ahomwela. ⁸ Atthu enci yaanawatala cowara caya mphironi, akina yamwarusela miritha cikithi caathikinlyaya mmattani. ⁹ Atthu yahoonle na ale yantthara yanakhuwa: Hosaana, noreeriya nowa mwancina na Apwiya. ¹⁰ Ushoreeriya omwene umwa wa athumwanihu Taviti. Hosaana wonculu.* ¹¹ Ahophiya uYerusalemu, Yesu ahokela Inupa ya Nluku, ni namanle uweha citthu cothene canrukurenrye, wahokhala yocoocilo, ahokhuma, phurwaka uPetaniya ni owiitthuca awe khumi na eeli.

Mwiri wo nhokorokho oonalaphiya

Mt 21.18-22

¹² Wasilyaya wicisu wakhumaya uPetaniya, Yesu yahommola itala. ¹³ Oonaka utayi mwiri wonhokorokho waari ni matakshuru aya makithi, ahorwaa uweha wakhala wiira uhaawo nhokorokho wowiima, nanso attameryaka, khaphwanyile, aphwanyile matakshuru paahi, kontha khawari ukati wowiima mihokorokho. ¹⁴ Aheerela vano: Hikhale tho nohala ulya cowiima caa. Ni owiitthuca awe yaheewa itthu ile.

Mayothumiha anawomoliya.

Mt 21.12-17; Lk 19.45-48

¹⁵ Yahophiya uYerusalemu, ni akelaka Inupa ya Nluku ahopacera woomola mayothumiha, na ale yathuma wonwo, ahokakhela vathi meeca a atthu yaakakhaniha, ni ihice ca atthu yathuma ikhunnta. ¹⁶ Ni khaalevela wiira ikusiye itthu yakhuma Inupa ya Nluku. ¹⁷ Ni anaweethuciha eeraka: Ihantikihiya:

Inupa aka inowowihaninya inupa yoswali uneethi wothene.*

Nanso nyu nhotatasa nikhuku na namwiinya.* ¹⁸ Oolupale a mayasataka ni mayowan-tikha yaheewa itthu ile, ni yaanaphavela mananna umwiiva, nanso yaanamoova, nlatu mphwinko wothene wanawuminya mwaano ni meetthuchiho awe. ¹⁹ Wiila waya, yahorwaa utaa waya iparasa.

Mwiri wonhokorokho unawuma.

²⁰ Uvira waya, wicisu, yahoona mwiri wonhokorokho unoomile, ni mitithari caya cothene. ²¹ Ni Peturu oopuwelaka, ahomwiirela Yesu: Wooneke mwalimu, mwiri wonhokorokho ulaphilyaa, uhooma. ²² Yesu aheerela: Munkupali Nluku. ²³ Khweeli kinawuhimeryani, nthu eerelaka mwako ula: 'Wiiiphele nipuro niryaa wivonyere upahari',

* 11:10 Macipo 118.25-26

* 11:17 Isaya 56.7

* 11:17 Yeremiya 7.11

ni ahaanyihereke munrimani mwale nanso akupaliki wiira ithu ihimilyawe inaahala wiiranyaa; khweeli, inawwiiranyaa. ²⁴ Phimaana, kinawuhimeryani wiira cithu cothene cinhalenyu ulepela nswaliki, nkupaliki wiira nnawaakhela, ni nnapattha. ²⁵ Mwemelaka vale wiira nswali, mwakhalanaka mwamweetthu ni nkhiinyu, munleveleke wiira Athumwaninyu, ari wirimu, yuuleveleleni cookosa cinyu. ²⁶ Nlattu, mwahaleveleleke akhwinyu, Athumwaninyu ari wirimu kxanhala ulevelela cookosa cinyu.

Ikuru awe Yesu yoolamula

Mt 21.23-27; Lk 20.1-8

²⁷ Yahoturuwela uYerusalemu, ni Yesu eettaka Mpani mwaNluku, oolupale a mayasataka, mayowantikha ni mahumu, yahomwaattamerya ²⁸ ni yahoonkoha: Umpanka cithu nnya ni nlamulo nawani? Ulamulenle tipani upanka cithu nnya? ²⁹ Yesu ahaakhula: Hata ni mi, kinawukohani ithu. Nkaakhule vano kinaahala wuhimeryani cineeraka woopanka cithu nnya ni nlamulo nawani. ³⁰ Upatisu wa Yohani waari wo wirimu, atthuna wa atthu? Nkaakhule. ³¹ Yahopacera ukohana ayayoru, yiiraka: Neeraka, wo wirimu, naahala wiira, 'Nhinkupalenleni mweeco?' ³² Neeraka, wa atthu, ninawoova mphwinko. Nlattu othene yanamoono Yohani toko nnapiyu. ³³ Umwiisoni yahomwaakhula: Khanincuwela. Ni Yesu aheerela: Hata ni Mi akinohimeryani ni nlamulo nawani kimpankaka cithu nnya.

12

Nlikanihero na mayolima imatta yo vinyu.

Mt 21.33-46; Lk 20.9-19

¹ Yesu ahopacera woolumacera ni malikanihero: Ahaawo ntthu aanle imatta yo vinyu, ahopophela nkucu, ahothipa nlitti no waameliya ivinyu ni ahoteka ipwaro. Wahoolo ahaahiyera ananteko arwaka ikwaha awe yoottayi. ² Ukati woohephiya, ahonruma nrume yi awe wiira aakhele nuusu no cowiima co mmattani. ³ Ale nanso, yahommara, yahomwaatta nuunturusela uttuli wohiitthu. ⁴ Ni ahonruma nrume yi nkina. Ni uyo tho yahompwesa muru ni yahontarawa venci. ⁵ Ahonruma nkina, ni ule yahomwiiva. Ahaaruma akina enci, na ale yahaatta ni akina weeva. ⁶ Nahalenle nlelo mwanawe oofentiya, umwisoni ahonruma ule, eeraka: Anaahala unlemeliha mwanaka. ⁷ Nanso, ananteko yaheerelana ayayoru: Ule phinkokhalana imatta ila! Nrwee, nimwiive, ni imatta inakhala yawihu. ⁸ Yahommara ni yahomwiiva, nuunrihela nceresere imatta. ⁹ Mwaneene imatta ile nohala upankani? Nahala uturuwa ni weeva ananteko ayo, ni wahoolo, naahala waavaha imatta ananteko akina. ¹⁰ Khansomile cowantikhiya cittakattifu?

Nluku nikhottiye ni mayoteka,

nihothatuwa nluku no wanlothoni nowokolela inupa.

¹¹ Ithtu ila inkhuma wa Apwiya,

ni iri yoothamaliya wamiithoni wihu.*

¹² Yaanawavya ummara, nanso yanawoova mphwinko, nlattu yaheeweha ratta, wiira nlikanihero nne naaca yaayo. Yahonhiya ni yahorwaca.

Nsoko wa Sesari.

Mt 22.15-22; Lk 20.19-26

¹³ Wahoolo yahonrumihela mafarisi ni maherotiyano akina wiira ammare mmoolu-moni. ¹⁴ Amwaattameryaka yahomwiirela: Mwalimu, nihocuwela wiira uri nlopwana eekhweeli, khaawo nonramelaa, nlattu khumweha makhalo a ntthu, nanso nawiitthucihya iphiro ya Nluku, toko cinkhalaya yeekhweeli. Nihimerye, iri ithu yooloka atthuna yoohiloka unvaha nsoko Sesari? Ninvahe atthuna nihinvaha? ¹⁵ Yesu acuwelaka wototha waya, ahaakhula: Nnokittahacerani? Nkiwiihere nikopiri, koone. ¹⁶ Yahomwiiera ni ahaakoha: Yawani ila yocaphariya, ni yowantikhiya ila? Yahaakhula: Ya Sesari. ¹⁷ Yesu aheerela: Mumvahe Sesari ithu ya Sesari, ni Nluku ithu ya Nluku. Ni yahotikhinaca venci.

Nlahanya wo wunwelela

Mt 22.23-33; Lk 20.27-40

¹⁸ Wahoolo yahowa masatuseu, ale aneera khuwo wunwelela wa atthu ookhwa, yahomwaattamerya, ni yahonkoha Yesu: ¹⁹ Mwalimu, Musa honantikhela wiira ntthu ankhwelaka munnawe, pwahiyaka amwaarawe woohikhalana asaana, nhimaawe nalamuliya unthela nthiyana oohinnya wiira ahiye ipyo ya munnawe.* ²⁰ Vano yahaawo asunna saapa, ni oopacera uyo ahonthela ni ahokhwa woohahiya asaana. ²¹ Oonayeeli

* 12:11 Macipo 118.22-23 * 12:19 Dt 25.5

ahonthela nthiyana ahinye, ni uyo ahokhwa woohahiya asaana, ni ooneeraru uyo waheeranyaa ciicammo, ²² ni othene saapa yahokhwa woohahiya asaana. Wiimaleloni waya nthiyana uyo ahokhwa. ²³ Vanhala wunweleliya, nthiyana nohala ukhala amwaara awani, nlatu asilopwana saapa ale yahonthela nthiyana ule? ²⁴ Yesu ahaakhula: Nyu nnowitheyaca nlatu woohicuwela cowantikhiya cittakattifu hata ikuru ca Nluku. ²⁵ Phimaana wanhalaya wunwelela mwaatthu ookhwa, khuwo utheleya, mena khuwo uthelana, nanso ammokhala toko ancelo o wirimu. ²⁶ Nanso itthu inaciya mowunwelelani mwaatthu ookhwa, khansomile ikitapu ya Musa, itthu yeeranele ni nikukhu napharela woohivya, toko Nluku caamuulumacenryawe eeraka:

Mi kiri Nluku a Aprhamu, Nluku a Isaaki, ni Nluku a Yakopu?*

²⁷ Khankhala Nluku a atthu ookhwa, nanso Nluku a atthu akumi. Nyu khanreere weetta ni ututhi.

Nlamulo nootepa wunuwa.

Mt 22.34-40; Lk 10.25-28

²⁸ Ahomwaattamerya mayowantikha eewile avanyihanaka, ni oonaka wiira Yesu aakhunle ratta, ahonkoha: Phinni nlamulo noopacera o malamuloni othene? ²⁹ Yesu ahaakhula: Noopacera phi nna:

Wiiwe Israel, Apwiya Nluku ihu pha Mwaneene Nluku veekhaya.

³⁰ Wafente Mwaneene Nluku aa,

ni nrima aa wothene,
ni nnepa aa wothene,
na ankhili aa othene,
ni ikuru caa cothene.*

³¹ Nonayeeli phi nna:

Umfente nkhwaa toko we o mwaneene.*

Khaniwo nlamulo noopwaha ala. ³² Mayowantikha yahomwiirela: Ureera cinene, Mwalimu, khaawoothile eenryaa wiira Ule ri veekhawe ni khaawo tho nkina noompwaha Ule; ³³ nuumfenta ni nrima wothene, ni ankhili othene, ni nnepa wothene ni ikuru cothene, nuumfenta nkhwaa toko mwaneene, iri itthu yootepa woovikana isataka coopahiya ni coovelelihiya cothene. ³⁴ Yesu, oonaka wiira ntthu ule ahaakhula ni nruku, ahomwiirela: Khuri uttayi ni omwene wa Nluku. Ni khariwo tho unkoha itthu.*

Mesiya ni Taviti.

Mt 22.41-46; Lk 20.41-44

³⁵ Eethucihaka Mpani mwa Nluku, Yesu ahokoha: Mayowantikha ahimiyaka cani wiira Mesiya phiri mwanawe Taviti? ³⁶ Taviti mwaneene, athoonyeriyaka ni Nnepa Nttakattifu, heera:

Apwiya yaheerela Apwiya aka:

Wonkome moonoo aka nlopwana, mpaka

Mi keese eenani aa vathivaya manyaa aa.*

³⁷ Taviti mwaneene namwiihana, Apwiya. Nokhalaka cani mwanawe? Ni mphwinko muulupale wanamwiiwa ni utteeliya nrima.

Yesu nawaattikittha aalimu o malamulo

Mt 23.1-7,14; Lk 20.45-47

³⁸ Wowiithuciha, Yesu anawiira: Nkhale miitho, mwisunke ni mayowantikha unacivela uthoonyera coowara coorekama nuukohiya isalama mmapuwani; ³⁹ wonkoma mapuro uhoolo nnsinakokani ni mapuro anliya isukuhuulu. ⁴⁰ Anawalyacera anankwele yoothereryaka ni iswali cootaliva. Ala anowowaakhela ihukhumu yootepa.

Yoovaha ya nankhwele oohuva.

Lk 21.1-4

⁴¹ Nonkomile nipuro naheliya coovelela yawehaka atthu yahela nsurukhu nkasani mwe. Mathaciri menci yanahela nsurukhu mwinci. ⁴² Ahowa nthiyana nankwele oothwenya, ahelaka makopiri meli ooyevaca, manaaya nikupatta nonecese. ⁴³ Eehanaka owi-itthuca awe, Yesu ahaahimerya: Khweeli kinawuhimeryani wiira nthiyana ula nankhwele oothwenya hohela woopwaha atthu othene ahenle nkasani yo nhakhu. ⁴⁴ Nlatu, othene yahrenle yohalahala muthacirini mwaya, nanso nthiyana oothwenya ahenle yothene yarinawe, ni khahalanne itthu hata yankani.

* 12:26 Ukhuma 3.6 * 12:30 Dt 6.5-6 * 12:31 Lv 19.18 * 12:34 Lk 10.25-28 * 12:36 Macipo 110.1

13

Yesu nahimya utankuliya yo Inupa ya Nluku.

Mt 24.1-2; Lk 21.5-6

¹ Wakhumaawe Mpani mwa Nluku owiitthuca mmoca ahonhimerya: Mwalimu, moone, maluku menci ale ni cootekiya nnya! ² Yesu ahaakhula: Unawoona cootekiya nnye cuulupale? Khaninkela naahalaka nluku nimoca waculu nluku nikhwaya, cothene cim-motankuliya.

Uhuvu ni uttharattthariya

Mt 24.3-14; Lk 21.7-19

³ Ni nonkomile mmwako wo Olivera uhoolo waya Inupa ya Nluku, Peturu, Yakopu, Yohani ni Anteree, yahonkoha ntthikini: ⁴ Unihimerye wiira citthu nnye cinhala wiiranyaa yaakhani, ni ikanyero inhala uthonyera wiira citthu nnye ciri vakhiviru. ⁵ Yesu ahopacera wahimerya: Mwisunke wiira hikhale ntthu noothepyani. ⁶ Kontha, anaahala uwa atthu enci mwancina naka yiiraka 'Phi mi!' mpaka wathepya atthu enci. ⁷ Mwiwaka cuulumaciya cokhotto, ni myaha cokhotto, nhituthuwe. Citthu nnye cinalamuliya wiiranyaa nanso khunakhalaka mwiso. ⁸ Nloko nimoca ninhala uvaraana ni nloko nikhwaya, omwene mmoca ni omwene nkhwaya. Ilapo inaahala uthukumela mapuro makina, ni immovola itala. Citthu nnye ciri mapacerero woona coowerya.

⁹ Nkhale miitho! Anaahala wurwehani upwaroni, nnaahala wapsyuliya nnsinakokani. Nnaahala weemesiya wa miithoni wa mayansatoro ni mamwene nlattu wo Miyano, wiira mmahe usaahiti wamiithoni waya. ¹⁰ Nanso woopacera Nhupi Wooreera unaahala uhimeriya maloko othene. ¹¹ Vano mwakusiyaka wiira moolumaciye makhuce, nhoove ithu inhalenyu uhimya. Nanso nhimye ithu inhalenyu uvahiya ukati yooyo, kahi mweeco nyuva nnohala wuulumaca, nanso Nnepa Nttakattifu. ¹² Munna naahala unrweha okhwani munnawa, ni athumwane mwanawe; ni asaana amowuulumacera makhuce athumwanaya, mpaka weeva. ¹³ Ni nnaahala wiinananyina nlattu wo ncina naka, nanso ntthu nohala ukhalana nthiti mpaka umwisoni, nowowoopwa.

Icuku yuulupale o Yutteya.

Mt 24.15-28; Lk 21.20-24

¹⁴ Moonaka citthu co miikho cikhumelalaka toko itankuleliyo wahimphwanelaya ukhala (nosoma uyo eeweehe), vano ale ari uYutteya atthawele mmwakoni. ¹⁵ Ari wancarani ahikhuruwe hata ahikele mpani wiira akuse citthu caya. ¹⁶ Ari mmattani ahituruwele uwaani wiira yakuse coowara caya. ¹⁷ Atakhaliye pha ale ari ni irukulu, na ale anamwiha asaana mahuku ale! ¹⁸ Nswali wiira ithu ile ihiiiranye ukati weyi-ita. ¹⁹ Nlattu mahuku ale cohosiya cinkokhala toko caharyaya ukhalakaru, ikhumelo wapattusilyawe Nluku ittuniya, mpaka nnavu, hata khacinkela cakhalaka tho. ²⁰ Ni yahari Apwiya akhuwehaka mahuku ale, hata ntthu khoopwa, nanso nlattu wa atthu oothanliya naahala ukheveha. ²¹ Akhalaka ntthu nohimeryani: 'Mesiya ri vava!' atthuna, 'Umoone wonwo!', nhikupali, ²² kontha anaahala wunwa amesiya oowootha ni anapiyu oowootha ni ankopanka ikanyero ni cootikhineeha wiira yaathepye, wanooranyaya, hata oothanliya. ²³ Nanso nyu, mwisunke; kihohimeryani cothene marapururu.

Uwa wa Mwanawe Pinattamu.

Mt 24.29-31; Lk 21.25-28

²⁴ Nanso mahuku ale, anamanle mahuviho ale, ncuwa ninaahala uripela, ni mweeri khunhala waarya, ²⁵ iththoottwa cinaahala umora wirimu, ni ikuru conculu cinaahala upukunyiya. ²⁶ Vano naahala wooniya, awaka mmahutteni Mwanawe Pinattamu ni ikuru cuulupale ni waarya. ²⁷ Nahala waruma ancelo awe ni wathukumaniha atthu yathanliyawe mittethe co micese cophyoo, umalenyaya ilapo nuumalenyaya irimu.

Nlikanihero no mwiri wonhokorokho.

Mt 24.32-44; Lk 21.29-36

²⁸ Mwiitthuce, mweeco, nlikanihero no mwiri wonhokorokho. Miritta caya cakhalaka miheenyaa, ni capaceraka uphuwa, nhocuwela wiira iyiiita iri vakhiviru. ²⁹ Ciicammo nyu, moonaka ukumelela citthu nnya, ncuwele wiira Mwanawe Pinattamu ri vakhiviru, wankhoro. ³⁰ Khweeli kinawuhimeryani: Khanimmira nloko nna cihiranele citthu cothene nnya. ³¹ Irimu ni ilapo cinaahala uvira, nanso moolumo aka kahnahala uvira.

Khaawo ancuwela nihuku hata ukati.

³² Nanso khaawo nocuwela nihuku nne, hata ukati ule, mena ancelo o wirimu, mena Mwana, nanso Athumwane paahi phincuwela. ³³ Nkhale miitho, nrontte! Nlattu khaanocuwela nihuku ninhalaya uphiya ukati ule. ³⁴ Uri toko ntthu alakenle ikhwaha awe,

ahiyaka inupa awe, ahaahiyera iyuulupale arumeyi awe, khula ntthu ahovahiya nteko woovara, ni ahonlamulela mayokhalaha wiira arontte. ³⁵ Vano nrontte, nlatu khandocuwela ukati unhalaawe uwa mwaneene itthoko; toko yococilo, atthuna uhiyu iriyari, atthuna uneepile nthupi, atthuna wicisu, ³⁶ wahikhumelele wiira, nawile ni wututuserani, huphwanyeni nrupaka. ³⁷ Itthu inohimeryakani nyu, kinahimerya atthu othene: Nrontte!

14

Ayutta anawuulumaca makhuce.

Mt 26.1-5; Lk 22.1-2

¹ Yahanle mahuku meeli uphiya isukuhuulu yo Pasikuwa ni nihuku ninliyaya mikatthe coohimiropo, oolupale a mayasataka ni mayowantikha yanawaavya mananna unthuka wo makhuce nuumwiiva. ² Yanawiira: Itthu ila ihiiriye mahuku osukuhuulu wiira atthu ayo ahipanke ipokoho.

Yesu nattikittheliya makhura oonukhela uPetaniya.

Mt 26.6-13; Yohani 12.1-8

³ Yesu nari uPetaniya, nonkomile wameeca mpani mwawe Simoni omakunttula, ahowa nthiyana, acisile iphotiri yo nluku ya alapasturo inheliya makhura oonukhela yeehaninya narttu, anthumihya ncurukhu mwinci, napwesile iphotiri, aheethela makhura mmuru mwaYesu. ⁴ Nanso akina yahonyonyina, yiirelanaka ayayooru: Ariheliyeni ciicammo makhura ala? ⁵ Yanawoorya uthumihya ni ncurukhu iminya tharu, mpaka wakawela atthu oothwenya. Ni yahonkuphula nthiyana ule. ⁶ Yesu nanso aheera: Nhiyeke. Munkuphulelaka isiyani? Hokipankela itthu yooreera; ⁷ Kontha, atthu oothwenya phinakhala-neenyu, ni mwatthunaka nnawoorya waapankela cooreera, nanso miyano akinkhala ni nyu mahuku othene. ⁸ Ale ahopanka itthu yoonryaya. Ahoottiha ni makhura irutthu aka ahoolelihaka uvithiya waka kihinaaya ukhwa. ⁹ Khweeli kinawuhimeryani, wiira mwiilaponi mothene unhalaya ulalyaa Nhupi Wooreera, inaahala tho uhimiya itthu yapankilyawe wiira upuweleliye.

Yutta nawuuluma makhuce

Mt 26.14-16; Lk 22.3-6

¹⁰ Vano, Yutta Iskariyoti, mmoca mwaale khumi na eeli, akenle woolupale a mayasataka wiira amulume makhuce Yesu. ¹¹ Weewilyaya moolumo ale, cahaatteela mirima ni yahovanela ummaha nsurukhu. Yutta anawavya ukati wontumiha Yesu.

Yesu nawalyana Owiitthuca awe ikwaha yoomaliha

Mt 26.17-19; Lk 22.7-13

¹² Nihuku noopacera no mikatthe coohimiropo, ukati wavelelihiya mwakhontwa o Pasikuwa, owiitthuca yahonkoha Yesu: Nnotthuna ulokiherya vayi nipuro noonlya Pasikuwa? ¹³ Ahaaruma owiitthuca eeli ni aheerela: Murwee uparasa. Nnaahala umphwanya ntthu oocisa mwaapu wo maasi. Muntthare, ¹⁴ ni unkelaawe, munhimerye mwaneene inupa: Mwalimu nakoha: Inupa inhalaka umaka iri vayi, kinlyaka Pasikuwa ni owiitthuca aka? ¹⁵ Ni naahala wuthonyerani nsana nuulupale uculu nooreerihya ni nowaaya; mwanilikohere nenno. ¹⁶ Akhumaka owiitthuca awe, yahorwaa uparasa, ni yahophwanya toko cahimeryaya; ni yahontthonkomanaha Pasikuwa.

¹⁷ Wiila waya, Yesu ahophiya na owiitthuca awe khumi na eeli. ¹⁸ Anonkomacile alyaka, Yesu aheera: Khweeli kinawuhimeryani, mmoca mwa nyu, nolya ni mi, naahala ukuuluma makhuce. ¹⁹ Yahanca ucukulaca, yiirelanaka ayayoru: Kahi thi mi? ²⁰ Yesu ahaakhula: Phi mmoca mwa nyu khumi na eeli, nokilyana nttiisi nimoca. ²¹ Nlatu, Mwanawe Pinattamu narwa, toko cantikhelyawe, nanso natakhalia ntthu nohala unthumiha! Phatari ahiiyariye.

²² Walyaya, Yesu ahokusa nkatthe ni nareerihile, ahomyaniha ni ahaavaha owiitthuca awe, eeraka: Nkuseke, nlyeke, ila phi irutthu aka. ²³ Wahoola ahokusa ikikhompe, ahosukuru ni ahaavaha ni othene yahowurya. ²⁴ Ni ahaahimerya: Ila phi iphome aka, iphome yo waatana wonaanano, invuviheriya atthu enci. ²⁵ Khweeli kinawuhimeryani wiira akinhala tho uwurya yowiima ila yo viteera mpaka nihuku ninhalaka uwurya tho wumweneni wa Nluku. ²⁶ Aneepile ncipo, yahokhumaca arwaka umwako wo Olivera.

Yesu nahimya wiira Peturu naahala unkhotta.

Mt 26.31-35; Lk 22.31-34; Yohani 13.36-38

²⁷ Yesu ahaahimerya: Nyu othene, uhiyu ula, nnaahala uhiya ikupalelo nlatu wo miyano, kontha ihantikhiya:

Kinanrakaliha nhakheli ni ikhontwaa cinkomwaryaca.*

²⁸ Nanso kinonwelenle, kimmowuhoolelani wokela uKalileya. ²⁹ Peturu aheera: Hata othene ahiye ikupalelo aya, nanso mi, mena. ³⁰ Yesu ahomwaakhula: Khweeli kinawuhimeryani, ilelo uhiyu ula, nthupi uhinaya wiipa imaara piili, unakikhotta imaara tharu. ³¹ Nanso Peturu ahopwahera wakhula ni ikuru eeraka: Hata kilamuliye ukhwa ni nyu, akinookhottani. Ni othene yahoolumaca ciicale.

Yesu uYetsemani

Mt 26.36-46; Lk 22.39-46

³² Yahorwaa nipuro neehaninya Yetsemani, ni Yesu ahaahimerya owiitthuca awe: Munkome vava mi kiswaliki. ³³ Ahonkusa Peturu, Yakopu, ni Yohani, ni ahanca woova ni ucukula. ³⁴ Ahaahimerya: Nnepa aka unacukula, icuku yo nokhwa. Nkhale vava ni nrontte. ³⁵ Apwahaka vakani, ahowuluwela vathi ni ahoswali wiira wooryanyaa, ukati ula ukipwahe. ³⁶ Ni ahohimya: Apa, Tiithi; Nyu nnawoorya cothene. Nkitamihe mmahuvihoni! Nanso, cihipankiye cinthunaka, nanso cinthuneenyu. ³⁷ Uturuwa wawe, aphwanyile arupaka, ni ahomwiirela Peturu: Simoni unarupa? Khawoonrye wiliphila iwora imoca? ³⁸ Mwiliphile ni nswaliki wiira nhithokociye. Nrima unatthuna ratta, nanso irutthu khinlipa. ³⁹ Ahorwaa tho uswalini, akulelaka moolumo yaayo. ⁴⁰ Ahoturuwa, ni ahaaphwanya arupaka kontha miitho aya yahocara ikhove. Ni khayoono yomwakhula. ⁴¹ Ahowa imaara yoneeraru mpaka waahimerya: Mpaka nna nnaarupa ni nnamumula tho? Wahotosa! Ukati uhophiya. Mwanawe Pinattamu naahala urwehiya nmmatatani mwaatthu ookosakosa. ⁴² Muunwe, Nrwee! Kitumihile uyo hophiya.

Utthukiya wa Yesu.

Mt 26.47-56; Lk 22.47-53; Yohani 18.1-11

⁴³ Yesu oolumacaca nanlelo phaphilyawe Yutta, ari mmoca mwaale khumi na eeli, ni mphwinko muulupale wakhumile woolupale a mayasataka, mayowantikha ni mahumu ni warina ikatana ni ikopo. ⁴⁴ Namakhuce ahaahimerya ikanyero eeraka: Nohalaaka unkoha isalaama, phi yooyo, mumvare ni munkuse natthukiye ratta. ⁴⁵ Uphiya wawe, ahomwaat-tamerya ni ahomwiirela: Mwalimu! Ni ahonkoha isalaama. ⁴⁶ Yahommara Yesu, ni yahonthuka. ⁴⁷ Vano, mmoca mwaale eemenle wonwo, ahokumiha ikatana ahorakaliha ipottha ya nkholupale a mayasataka, ahonthikila nnyaru. ⁴⁸ Yesu ahaahimerya: Nkhumile ni ikatana ni ikopo uwa ukitthuka, toko mayohukha. ⁴⁹ Kaari ni nyu mahuku othene mpani mwa Nluku, kiitthucihaka ni khamwakitthukile. Nanso wiira citthariheleliye toko caantikhiiyaya. ⁵⁰ Vano, anhiyaka, othene yahotthawa.

⁵¹ Ni ahonthara mmirawo mmoca eekhunlenle ikuwo. Yahommara, ⁵² nanso ahiyaka ikuwo ile, ahotthawa pwitipwiti.

Yesu upwaroni yo Ayutta

Mt 26.57-68; Lk 22.63-71

⁵³ Yahonrweha Yesu wankholupale a mayastaka wathukumannyaya othene oolupale a mayasataka, mayowantikha ni mahumu. ⁵⁴ Peturu ahonthara uttayittayi mpaka nhina ipuwa ya nkholupale a mayasataka. Peturu wonkomilyawe wamoca ni ananteko ootthaka mooro. ⁵⁵ Vano, oolupale a mayasataka ni mayothukumana othene yaavya osaahiti, wowiira amwiive Yesu, nanso khayaaphwanyile. ⁵⁶ Enci yaanahimya cowootha, nanso cahimilyaya khaweerana. ⁵⁷ Ahaawo yeemenle ni uromola yowootha ila yiiraka: ⁵⁸ Hi nihomwiiwa ahimiyaka: Kinhala ukwanyula inupa ila, itekiye ni matata a athu, ni mahuku mararu kinaahala uteka ikina yoothitekiya ni matata a athu. ⁵⁹ Nanso, hata ciicammo usaahiti aya khaweeranne. ⁶⁰ Vano, muulupale o mayasataka aheemela iriyari aya athu yathukumanne ni ahonkoha Yesu: Khunakhula ithu nhina osaahiti ommahaya athu ala? ⁶¹ Yesu nanso ahomaala ni khaakhunle ithu. Muulupale a mayasataka ahonkoha tho: We uri Kristu, Mwana a Nluku Ooreerihya? ⁶² Yesu ahaakhula: Kiri mi, ni nnaahala umoona Mwanawe Pinattamu nonkomile moono nlopwana wa Nluku Okuru, ni awaka mmahutteni o wirimu. ⁶³ Vano, muulupale a mayasataka ahaahula coowara cawe ni aheera: Nimphavela tho vayi osaahiti? ⁶⁴ Mwanamwiiwa ukufuru nwo. Nneera cani? Na athu othene yahonhukumu ukhwa. ⁶⁵ Wahoolo, akina yaanapacera unsuwela, yahonkhunela wiitho ni ikuwo numwaatta yiiraka: Uhimiyace nnapiyu! Ni mayorontta yahonkusa numwaattakaca.

Peturu nanruna Yesu

Mt 26.69-75; Lk 22.54-62; Yohani 18.15-18,25-27

⁶⁶ Peturu neemenle vate wapuwani, ahophiya nanteko mwanthiyana a muulupale a mayasataka, ⁶⁷ ni umoona wawe Peturu ootthaka mooro, ahomwehecesa ni ahomwiirela:

* 14:27 Zakariya 13.7

We khweeli wari ni Yesu o Nasaree. ⁶⁸ Ule nanso ahoruna, eeraka: Akinoncuwela, hata akineeweha inhimya iyo. Wahoolo ahokhumela vate iluwani, ni nthupi waheepa. ⁶⁹ Nanteko mwanthiyana, umoona wawe tho, ahaahimerya atthu yaatamananyawe: Ula phi mmocaruru. ⁷⁰ Nanso ahoruna imaara yonapiili. Ukati vakani tho, ale yaari mmo, yahonhimerya Peturu: Khweeli we phi mmocaruru, kontha uri nkalileya. ⁷¹ Nanso aholapha ni aholupela eeraka: Akinoncuwela nthu nnomwaacenyu. ⁷² Ni nenna nna nthupi waheepa imaara yonapiili. Vano, Peturu ahoopuwela itthu yahimilyawe Yesu: Nthupi uhinaya wiipa imaara piili, we unaahala ukiruna imaara tharu. Ni vava ahopacera wunla.

15

¹ Usakaru, yahothukumana oolupale a mayasataka wamoca ni mahumu ni mayowantika, ni mayonthukumano othene; ni unthuka waya Yesu, yahonkusa ni yahommelela waPilatu.

² Pilatu ahonkoha: We uri Mwene a Ayutta? Yesu ahomwaakhula: We uhohimya. ³ Ni oolupale a mayasataka yahonriyelela cithu cinci. ⁴ Pilatu ahonkoha tho eeraka: Khunakhula itthu? Woone, cithu cinci cinriyeleliya na atthu ala. ⁵ Yesu nanso khaakhunle tho itthu, ni Pilatu ahotikhina.

Yesu ahohukhumwinya wiiviya

Mt 27.1-2,11-26; Lk 23.1-7,13-25; Yohani 18.28-19.16

⁶ Nihuku nosukuhuulu, Pilatu aholemalela unthukula nantthukiya mmoca yantthunaya atthu. ⁷ Ahaawo nlopwana mmoca, eehaninya Parapasi, atthukiye wamoca na anaporonka nlatu yamwiivile nthu ukati wonkhitto. ⁸ Mphwinko wa atthu, wahonwa ni wahopacera ulepele itthu yalemaleniyawe wapankela. ⁹ Pilatu ahaakhula: Nnotthuna wiira kutthukuleleni Mwene a Ayutta? ¹⁰ Nlatu ahocuwela wiira oolupale a mayasataka yamwiihenre nlatu woonrama. ¹¹ Nanso oolupale a mayasataka yanatheperya mphwinko wiira phatari Pilatu unthukule Parapasi. ¹² Pilatu ahaakoha: Kinhala umwiiriha isiyani ula nnomwiihanenyu Mwene a Ayutta? ¹³ Na ale yankhuwaca tho: Unkhomele wansalapani! ¹⁴ Vano Pilatu aheera: Tthekileni? Nanso ale yanakhuwaca: Unkhomele wansalapani! ¹⁵ Pilatu, atthunaka wamaaliha atthu ale, ahaataphulela Parapasi. Ni aholamula wiira Yesu apsuliye ni akhomeliye wansalapani.

Yesu nawapsuliya

Mt 27.27-31

¹⁶ Anakhotto yahonkusa upwaroni ya nsatoro, ni yaheehaninya anakhotto othene. ¹⁷ Yahomwariha ihancu yookhwiila, ni yahomweesa ikhilempa yo miiwa wamuru wawe. ¹⁸ Wahoolo yahopacera unkoha nretele yiiraka: Salaama, Mwene a Ayutta! ¹⁹ Yanamwaatta wamuru ni nthale ni yanansuwela ni ankhomelaka yananlapela. ²⁰ Wamanlyaya untarawaca yahonrula ihancu yokhwiila ni umwariha tho cawawe. Vano yahonkusa wiira akhomeliye wansalapani.

Yesu nakhomeliya wansalapani

Mt 27.32-44; Lk 23.26-43; Yohani 19.17-24

²¹ Yahommara athumwane Alisantere ni Rufu, eehaninya Simoni o Sirene aakhuma umawaani ni ahokanyererihiya ukusa nsalapa. ²² Yahonrweha nipuro neehaninya Kolokootha, manaaya, nipuro nokohi. ²³ Yahommaha ivinyu yootakanitheriya ni mira, nanso ahokhotta uwurya. ²⁴ Wahoolo yahonkhomela wansalapani. Ni akawelanaka cowara cawe, yahopanka mwaavi wiira yoone yahalaawe uphwaya khula nthu. ²⁵ Yaari iwora yoneeruru wakhomeliyawe wansalapani. ²⁶ Waculu wawe yahantikhiya yariyeleliyawe: MWENE A AYUTTA. ²⁷ Yahokhomeliya wamoca ni Ule, mayohukha eeli, mmoca, moonoo nlopwana, nkina moonoo nthiyana. ²⁸ Ciicammo coothariheleliya cowantikhiya cineera: Ahaalikeliya na atthu oonanara nrima.* ²⁹ Atthu yaavira ayo, yanaruwana, apukunyaka muru, yiiraka: We! Watankulaca Inupa ya Nluku ni uteka tho mahuku mararu. ³⁰ We wicoopole o mwaneene nuukhuruwe wansalapani! ³¹ Oolupale a mayasataka ni mayowantika yanateehana, yiiraka: Hoopola akina ni khanoorya wicoopola mwaneene. ³² Akhuruwe naanano wansalapani uyo Kristu, Mwene o Israel, wiira nimoone ni ninkupali. Na atthu ale yakhomeliye ni Ule, yanaruwana.

Ukhwa wa Yesu

Mt 27.45-56; Lk 23.44-49; Yohani 19.28-30

³³ Waphilyaya ukati woorthana iphiphi yahokhunela ilapo yothene mpaka yococilo. ³⁴ Uphiya waya yococilo Yesu ahokhuwa ni ncu noorunya: Eloi, Eloi, lama sapaktani!

* 15:28 Isaya 53.12

Manaaya: Nluku aka! Nluku aka! Ukihiyenreni veekhaka?*

³⁵ Umwiiwa waya, akina yaari wonwo, yaheera: Moone, nomwiihana Eliya! ³⁶ Mmoca mwaale ahothimakaca uwiha ntthoche nooheliya makari ahotthukelela muntathini ni ahommaha wiira awurye, ni ahohimya: Noone wiira Eliya nawa unkurusela vathi. ³⁷ Akhuwaka ni ncu noorunya, Yesu ahokhwa. ³⁸ Vano ikuwo yo Mpani mwaNluku yahaahuwa iriyariru ukhuma uculu mpaka vathi. ³⁹ Muulupale a anakhotto eemenle cooco wariyawe Yesu, umoona wawe akhwaka ciicale, aheera: Khweeli ula ari Mwana a Nluku!

⁴⁰ Yahaawo tho athiyana yemenle uttayi amwehaka; mwaale ahaawo Mariya Mantalena, Mariya anumwane Yakopu mwankani ni Yosefi, ni Saloome. ⁴¹ Wariyawe Yesu uKalileya yaayo yahonthara nunvarela nteko, ni athiyana akina enci yanvelenle wakenlyawe uYerusalemu.

Yesu navithiya mmahiyeni

Mt 27.57-61; Lk 23.50-56; Yohani 19.38-42

⁴² Wiila waya, hapo wari ukati wowiitthenkaciya nihuku nontivela, ⁴³ ahowa Yosefi o Arimateya, humu oocuwanyaa ni ootitthima, akhuluvenle uwa waya omwene wa Nluku, alipile nrima wokela waPilatu ni aholepela nrutthu wa Yesu. ⁴⁴ Ni Pilatu ahaakaaka wiira wawe wiira hokhwa, ni amwiihanaka muulupale anakhotto ni ahonkoha akhala wiira khwile mwakhalayi. ⁴⁵ Ni nahimeriye ni muulupale uyo, nrutthu ahovahiya Yosefi. ⁴⁶ Yosefi nathumile ikuwo, ahokurusa nrutthu wansalapani, ni ahokhuneela ni ikuwo eyo. Wahoolo ahommitha mmahiye yathipiye wamwalani ni ahopirikisela nluku nuulupale wankhora wo mahiye. ⁴⁷ Mariya Mantalena, ni Mariya anumwane Yosefi yahoona nipuro navithiyawe.

16

Yesu honwelela

Mt 28.1-10; Lk 24.1-12; Yohani 20.1-10

¹ Uvira waya nihuku no ntivela, Mariya Mantalena, Mariya anumwane Yakopu ni Saloome yahothuma makhura oonukhela ni yahorwaa uttikitthela nrutthu wa Yesu. ² Wicisu ncuwa nikhumaka nihuku noopacera nosumana, yahorwaca umahiye. ³ Yanawaakaaka yiiraka: Tipani nokela unipirikisela nluku nno wankhora wo mahiye? ⁴ Nanso, awehaka, yahoona wiira nluku nopirikiseliya nceresere ni nari nluku nuulupale cinene. ⁵ Ukela waya mmahiye yahomoona mmirawo nonkomile moono nlopwana, awanre ihancu yooteela, ni yahotuthuwa. ⁶ Uyo nanso, ahaahimerya: Nhituthuwe. Nnomwavya Yesu o Nasaree akhomeliye wansalapani. Honwelela, khaawo va. Moone nipuro namweesilyaya. ⁷ Vano, murwee, mwahimerye owiitthuca awe ni Peturu wiira Yesu naahala wuhoolelani uKalileya. Wonwo nnaahala umoona toko coohimenryaweni.

⁸ Akhumaka umahiye yanathhawa ni uthukumela nlattu wo woova. Khayanhimenrye ntthu itthu ile nlattu wo woova.

Yesu aheeconeha

Yohani 20.11-18

⁹ Nonwelenle, wicisu aya nihuku noopacera isumana, Yesu ahonkhumelela woopacera Mariya Mantalena, yola ankumihilyawe macini saapa. ¹⁰ Uyo ahorwaa wacuweliha ale yakhanle ni Yesu, yeetta acukulaka ni yiikhupanyaka. ¹¹ Ale nanso, wiira waya wiira Yesu ri nkumi, ni Mariya ahomoona, khayaakupanli.

¹² Wahoolo aheeconeha nnana nkina wasilopwana eeli yeetta ni iphiro, arwaaka umawaani. ¹³ Ayo yahoturuwa wiira yacuwelihe akhwaya, nanso na ayo khayaakupanli.

Yesu nawaakhumelela owiitthuca awe.

Lk 24.50-53; At 1.6-11

¹⁴ Wahoolo waya, ahaakhumelela owiitthuca awe khumi na mmoca alyaka, ni ahaakuphula nlattu wohikupali ni uturumala waya nrima, kontha khayaakupanli ale yamoonne nonwelenle. ¹⁵ Ni aheerela: Murwee ilapo yothene mwaalake atthu othene ni Nhupi Wooreera. ¹⁶ Ntthu nohala ukupali ni upatisiya naahala woopwa, nanso ntthu hinhala ukupali, naahala uhukhumwiya. ¹⁷ Ikanyero cinhala waatthara atthu ookupali phi nnya: Mwancina naka, ankwomola minepa coonanara, ankwuuluma moolumo oonaanano; ¹⁸ ankovara inwaa, ni yawuryaka itthu yowiiva, khinhala wapanka itthu; ammowathatela matata aretta, na ale anaahala uvona.

¹⁹ Vano, Apwiya Yesu anoolumanne owiitthuca awe yahakheleliya wirimu, ni ahonkoma moono nlopwana wa Nluku. ²⁰ Vano arumeyi yahokhuma ni yahorwaa ulaka mapuro othene ni Apwiya yahaakavihera, yoneehaka nuulumo na Apwiya ni ikanyero cavelenle.

* 15:34 Macipo 22.1

Yakopu

¹ Mi Yakopu, ipoththa ya Nluku ni ya Apwiya Yesu Krisitu, kinasalameeha mahimo khumi na meeli, amwareenle mwilaponi mothene.

Nroromelo noomalela

² Asunnaka, nkhalane utteeliya cinene wophwanyakani ukati woottehattehiya, ³ ncuwelaka wiira nroromelo ninyu nno nalawihiyaka phinkhalanaya nlipihero. ⁴ Nlipihero nihaana nivaraka nteko woomalela wiira nyuva nkhalale oomalela, weeyiintthu ni wohihaleela itthu. ⁵ Wakhala wiira haawo hirina ankhilli, anlepele Nluku, navaha athu othene woohimatthepwa ni nawaakawa. ⁶ Nanso alepele nuuroromela woohaakanyaca; kontha ule nakanyaca ri toko mawimpi ompharyaa, ankusiya ni wuutuwanyinya ni iphyoo. ⁷ Uyo huupuwele wiira nawaakhela itthu ya Apwiya, ⁸ maana ri nthu oohilakela ni oohilipelela iphiro cothene cineettawe.

Oothwennya ni Oopuha

⁹ Munnihu oothwennya atteeliye nlatu wowuunuwihiya, ¹⁰ ni oopuha atteeliye nlatu wuwiiyeviha, kontha nacuwela wiira mahuku awe ari vakani toko ithutu contakhwani. ¹¹ Ncuwa noopaka ni nivihaka, yowaaliya inawuuma, ni ithutu aya inanyaala ni ureera waya waanamala. Ciicammo, mayoopuha naakhala onyaala mphironi mwawe.

Utthema uttehattehiya

¹² Horeeriya nthu noovilela waphiyaka ukati woottehattehiya; kontha, alawihiyaka, nowa uvahiya ikhwerempa yookumi, yeeyo Apwiya yaroromelihilyaya ale anafenta. ¹³ Hikhale neera, attehattehiyaka eeraka: Nluku phinkittheha. Kontha khanlamuliya uttehattehiya ni itthu yoonanara ni uyo khaawo nonttehawe. ¹⁴ Uhiya commo, khula nthu nottehattehiya ni wunlela wawe citthu, vano wunlela wawe nwo wantepelaka unamooryaca. ¹⁵ Vano wunlela nwo wanttokothelaka untothola itaampi; ni itaampi iyo inontothola nookhwa.

¹⁶ Asunnaka oofentiya, nhithepiye. ¹⁷ Khula ivahiya yooreera ni khula itthuwo yoomalela inkhuma wirimu, cikhuruwaka wa athumwanaya waarya, ahinrukunuwa toko mithuuci cihirina nipuro noweemela. ¹⁸ Ni wootthuna wawe, ule honipattusa ni nuulumo neekhweeli, wiira nkhalale nlipu nokhiyumpe cawe.

Wuulumaca ni weettela nuulumo na Nluku.

¹⁹ Asunnaka oofentiya, nkiiwe: Nyu ncuweleke nnya citthu nnya: nthu phi nthu nola-muliya ukhala owaakava wiwa, oohipuphela wuulumaca, ni oopica uviruwa; ²⁰ kontha uviruwa wa nthu khunphwanyihya isariya ya Nluku. ²¹ Phimaana, nhiye unyala winyu nwo ni coonanara cimpankenyu nnyo, nkuse ni imaani nuulumo niphatteeliyenyu nno, nenno nihaana ikuru woowopola iroho cinyu.

²² Vano, nkhalale oweettela nuulumo, nhimakele wiwa paahi, mwithepyaka veekhenyu. ²³ Kontha, nthu eewaka nuulumo nno ni heettelaka, nolikana toko nthu neewehera waloolani, oonaka ikhove awe yeephattuwelo. ²⁴ Wahoolo neewehenrene naathama, ni wowaakuvyaca naaliyala weenyaya ikhove awe iyo. ²⁵ Nanso ule nohelelela aviriyana nlamulo noomalela, nlamulo nowoopola, akhanyereraka weettela, wohiira wiwa nu-uhiya, nanso woorya uvarela nteko, ula nthu ula nokhala ooreerihya mpaka ni nteko umpankawe uyo.

²⁶ Nthu eehelaka ukhala nattiini, ahiyaka ulokiha nlimi nawe, nanso phiihtepyaka, ittiini awe iyo iri yo mahala. ²⁷ Ittiini yomaana ni yeekhweeli inoncivela Nluku Athumwanihu, phi ila: Waathotola akhwaacuni ni minankhwele ukati unhuvaaya ni wiisunka omwaneene woohinyala toko cineettiyaya ntuniyani.

2

Wohaahawulaniha atthu

¹ Asunnaka, nakupaliki Apwiya ehu Yesu Kirisitu aneene uttitthima, nihaahiyaniheke atthu ayo. ² Phimaana, awaaka nthu mapuro anthukumanenyu, oonwara nnela owooru mmakokhoni mmo, nawaracile ikuwo comaana, wahoolo phikelaka tho nthu nkina oohuva ni oothaaleliya, ³ vano phaahawulanihaka wowaakhelela vaa, ni phimwiirelaka oowaraca ikuwo comaana uyo: Nyu vaa, mmweke mowunkomeke va nipuro noolemela nuuphwanenleeni. Vano oohuva uyo phimwiirelaka: We, weemeleke vaa, atthuna uweke wawonkomeke waryaka va. ⁴ Mwapankaka ciicammo nheehawulaniha ayaayoru ni nheepanka mayahukhumu owuupuwele coonanara. ⁵ Nkiiwe, asunnaka oofentiya: Nluku

haathanla atthu owooninya uhuva mwilaponi wiira akhale athaaciri muukupalini ni akhale mayoophwanya umwene wo wirimu waalupelenlyawe ale anonfenta. ⁶ Nanso, nyu akina vaa, nnawannyohola mayoohuva. Khaanakhala athaaciri phinootulumuni? Khaanakhala yaayo phinoorwanani upwaroni onoolumiya milattu? ⁷ Khaanakhala yaayo phinnyohola ncina nomaana ninromoleliyeenyu?

⁸ Nyu mweettela malamulo o omwene wa Nluku, mwanapanka toko cinhimyaya cow-antikihiya:

Unfente nkhwa toko cineefentaa umwaneene*, unapanka yooreera. ⁹ Nanso, mwaahiyanihaka atthu nnopanka itaampi, ni nnaahala uhukhumwinya ni malamulo toko mayoothekaca. ¹⁰ Ule noorya weettela malamulo othene, nanso phivonyanihaka nipuro nimoca, nalikeleliya ukosera othene. ¹¹ Phimaana, ule eenre: Nheette uluva, ciicammo holamula eeraka: Nhiive.* Vano, waheetteke uluva, nanso unawiiva, unkhala ntthu oovonyiha nlamulo. ¹² Toko cineerenyu ni cinoolumacenyu, mpankeke ciicammo ncuwelaka wiira nnohala uhukhumwinya ni nlamulo nowi-ithawala. ¹³ Kontha ule hirina ikiriri naahala uhukhumwinya wohi ikiriri. Ikiriri cinatthema ihukhumu.

Nroromelo nohikhalana coopankiya ninkhala nookhwa

¹⁴ Asunnaka, nohala uphurani ntthu neera: Mi kihaana nroromelo nanso woohivarela nteko? Unoona wiira nanno nroromelo nno khaninoopola. ¹⁵ Akhala wiira mwanunninyu athuna mwanrororinyu hothaaleliya athuna hovoliya itala yo khula nihuku, ¹⁶ ni mmoca wa nyu phimwiirelaka: Urweke ni mpuha, wawareke ni walyeke womaana, wohinvaha imphavelawe; mpankileni yooreera? ¹⁷ Ciicammo, nroromeloru paahi, noohivareliya nteko, ninkhala nookhwa.

¹⁸ Vano haawo nohala wiira: We uhaana nroromelo, ni mi kihaana miteko. Ukithoonyere nroromelo naa noohimiteko ni mi kinawuthonyera nroromelo naka ni miteko caka. ¹⁹ We unakupali wiira ri Nluku mmoca paahi. Wahoreera! Ciicammo asotwani anakupali ni anattetemela! ²⁰ We, oomphuku! Khuncuwela wiira nroromelo noohivareliya nteko khanirina icaayira? ²¹ Aparahamu athumwanihu ookhalayii, khayavahiye isariya nlattu wo miteko waanvaherenraaya mwanaya Isaki wanipuroni noosataka*. ²² Vano wooneke wiira nroromelo ni miteko cineetta wamoca, ni nroromelo nimaliheriya ni miteko. ²³ Coo phitthariheleliyaya yowantikihiya yiiraka: Aparahamu honkupali Nluku ni hoheeliya ukhala nasariya, ni uyo heehaninya mpwanawe Nluku. ²⁴ Mooneke wiira ntthu novahiya isariya nlattu wo miteko, woohikhala nroromeloru. ²⁵ Wanlikana toko puuta Rahapi; waavahiyawe isariya nlattu wopanka yooreera, aavahaka nipuro athu oohottela ni wathonyera iphiro ikina. ²⁶ Ciicammo irutthu yohiroho inkhala yookhwa, philikanaya nroromelo nohikhalana coopankiya ninkhala nookhwa.

3

Usinnta Nlimi

¹ Asunnaka, nhunlele ukhala othene mayoosomiha, maana nhocuwela wiira hii, ni-neettuciha, phi hii ninkela utepa uhukhumwiya. ² Othene ninakosa wo mananna oovirikana. Ntthu aahikeseke nlattu wo wuulumaca, uyo ri nttuntthu, ciicammo nawoorya usunka irutthu awe yothe. ³ Nahelelaka iyuma malaku okhavalu wiira cini-welele, ciicammo ninawoorya weethiha irutthu aya yothe. ⁴ Nthonyero enyu ukhale wokalawa; cinookhalaru cuulupale ni cittinkihiyaka ni iphyoo cuulupale, cineettihiya ni ileemi yankani cinene, toko cinthunawe nocika. ⁵ Ni ciicammo phinlikanaya, nlimi waryaya ithu yankani iri mwiirutthuni, ninawiittotopa nlattu woopanka citthu cuulupale.

Nkoonani, itakhwa yuulupale impariheliyaya ni mooro mwankani. ⁶ Phi ciicammo, nlimi nihi niri mooro; nlimi niri ituniya yotaampi. Ninaheliyeene iriyari yorutthu ihu ninaannanariha irutthu yothe, ninaparihela makhalalo ookumi, ni mpaka ni nno ninapariheliya omooroni. ⁷ Phimaana ikhapila cothene conama, coovava, cowiipurula ni compharyaa cinasinnttiya ni cinsinnttiya na atthu, ⁸ nanso nlimi khaawo ntthu noorya usinnta. Niri noonanara woohimala ni noocara nrette wo wiiva. ⁹ Ni nanno, ninantitthimiha Pwiya Athumwanihu; ciicammo ninawaalapha atthu, apattusiye oolattana ni Nluku. ¹⁰ Malaku mamoca yaayo paahi, inakhuma iparakha ni ikilapho. Asunnaka, khavanreera wiira citthu nnya cikhalake coo. ¹¹ Uhopaca woona waluusi akhumaka maasi oociva na ayo ootumpurya nipuro nimoca nanno? ¹² Asunnaka, nrrole uhopaca wiima

* 2:8 Lv 19.18 * 2:11 Ukhuma 20.13-14 * 2:21 Mphattuwo 22.1-14

maphepu atthuna mphepu wiima nrale? Hata vakani, khawanoorya iluusi yo maasi ootumpurya ukhuma maasi oociva.

Ankhili ankhuma wirimu

¹³ Tipani iriyari inyu ri aankhili ni oocuwelaca? Aathonyihere makhalelo omaana nuupisa nrima wa ankhili. ¹⁴ Waahikhaleke commo, munrimani mwinyu mmo nhaana urama wootepa ni wiihelela, vano nhiittotoppe ni nhoote nveehaka ikhweeli. ¹⁵ Ala ankhili ala, khaankhuma wirimu, nanso ari omwiilaponi moomu; khaanakhala o munnepani, nanso asotwani. ¹⁶ Phimaana nipuro niri uramana ni wiihelela, ciri iporonka ni coonanara cinci. ¹⁷ Nanso ankhili ankhuma wirimu ari ooreera, osalaama, onnema, eemaani ni oocara ikiriri, ookumiha mihokorokho comaana, oohihawulaniha ni oohi-ithepya. ¹⁸ Ni wosalaama phinwiihaya isalaama ale anaala nhokorokho wosariya.

4

Upatthani wontuniyani

¹ Cinkhumelela vayi ikhotto nnyo ni waanaca winyu ayaayoru nwo? Cinkhuma nkhwiluni cinaana mwirutthuni mwinyu mmo. ² Nnakhalela nttima ca akhwinyu ni khannophwanya. Nnawiiva ni nnarama nanso khannophwanya. Makhalelo enyu ari owiiva ni waana ikhotto. Nnavekela nanso khannakhela, kontha khannovekela ratta. ³ Nnophavela mwaphwanyaka nrihakaceleke nkhwiluni mwinyu mmo. ⁴ Nyu mayooluva, khannocuwela wiira upatthanana ituniya unkhala mwiinani awe Nluku? Ule nophavela ukhala mpwana awe ituniya, neepanka mwiinani a Nluku. ⁵ Atthuna nnoona wiira waari wopure cihimilyaya cowantikhiya ciiraka: Nnepa univahilyawe wiira ukhale ni hii uhaana ihace? ⁶ Nanso uyo nanivaha nnema nuulupale. Phimaana cowantikhiya ciiraka: Nluku nawaarusanana owiittotopa nanso nawaavaha nnema oowiyeviha.*

⁷ Phimaana, mmwiiwelele Nluku. Munkhottele sotwani ni uyo phinhalawe wuutthawani. ⁸ Mphiyeke wa Nluku, ni uyo phinhalawe wuuphiyerani! Anataampi, nnyaweke ni nrapiheke nrima, nyu anamirima miili. ⁹ Ncukuleke ni muunleke. Mwakakhaniheke uthyaa ni wunla, utteeliya ni ucukula. ¹⁰ Mwiivevihe wa miithoni wa Apwiya ni ayo phinhalaya uwunnuwihani.

Nhaapanane

¹¹ Asunnaka, nhaapanane. Ule nomwaapa munnaawe atthuna unhukumu munnaawe, noolumacera yoonanara ni nohukumu malamulo. We wamakelaka uhukumu malamulo, khuneettela, nanso wiyeesile ukhala mayoohukumu. ¹² Nlamuli ni hukumu ri mmoca paahi, yoole noorya woopola nuukwanyula. Vano we, tipani oonhukumu nkhwaa?

Wiisamiha

¹³ Vano nviriyane, nyu nneeresa: Ilelo atthuna meelo, ninaarwa iparasa yonese, ni ninkookhala mwakha mmoca nimweettaka nakoso nuuphwanya nhakhu. ¹⁴ Nyu khancuwenle itthu inhala wuukhumelelani meelo. Ukumi inyu uyo unookhala isiyani? Nyu nri toko itthapwe inkhuma ni ukati vakani inamwaryaca. ¹⁵ Uhiya wuulumaca commo, fatari wiira: Apwiya yatthunaka ni anivahaka ukumi, ninapanka ila ni ile. ¹⁶ Nanso, nna, nnasamela citthu cinoopuwelenyu upanka. Wiisamiha toko coo inkhala itthu yoonanara. ¹⁷ Phimaana muupuwele ratta: Ule nocuwela wiira nolamuliya upanka yoooreera, pihipankaka, naakosa.

5

Nviriyane, nyu mathaaciri!

¹ Vano nviriyane, nyu mathaaciri! Ncukule ni munle mwanlattu wo mahuviho anhalu wuphwanyani. ² Mihakhu cinyu nnyo, ikuwo cinyu ni coolya cinyu, cihontta ni ciholiya ikuttihi. ³ Iwooru inyu ni ipheeta enyu cihonyela urenci. Vano urenci uyo phinhalu ukhala saahiti owuuttonkani ni wuulalihani toko waneerihaya mooro. Nyu nthoacirera mahuku oomalela. ⁴ Mooneke. Ncurukhu wa ananteko yoorula mmattani mwinyu ayo, nhaalivaka, unakhuwela wuttonkakani nyenyu vaa. Wiikhupanya wa anakanyari uhophiya mpaka mmanyaruni mwa Apwiya a anakhotto. ⁵ Nyu nheetta mpuhaka ni nhovolela ikhwilu cothene cucivenleni vathi va. Nhorittimalihera mirima cinyu nnyo nihuku noohitiya. ⁶ Nnanhukumu nuumwiiva nasariya, wohiwiirihani itthu.

Uvilela muhuvani

* 4:6 Ikano 3.34

⁷ Phimaana asunnaka, nkhole oovilela, mpaka wanhalaya uwa Apwiya. Kinawoona mayoolima navilela awehereryaka yoolya yo mmattani, mpaka wammwaya ipula coopacera ni coomalihera. ⁸ Ciicammo nyu nkhole oovilela ni oolipa nrima, kontha uwa wa Apwiya uri wakhiviru. ⁹ Asunnaka, nhittokuttani ayaayoru wiira nhihukhumwinye. Hukumu uyo ri wankhora! ¹⁰ Asunnaka, niwehere minapiyu coolumaca mwa ncina na Apwiya, ciinryaya woohuva nuuvilela. ¹¹ Kinawoona nineerela ahoreeriya ale yisunkile ni uvilela. Nnawiiwaka uvilela wa Yopi ni nhoona yaceenryaya. Apwiya ari oocara uthunku ni ikiriri.

¹² Asunnaka, hata mwiirihye cani, nhilupele nromolaka wirimu, atthuna vathi va, ni hata itthu phi itthu iheliye nhilupelele. Yakhalaka khweeli, mwiireke khweeli, yakhalaka mena, mena, wiira nhihukhumwinye.

Iswali yowaamini

¹³ Wariyari winyu vaa haawo nohuva? Aswaliki. Haawo tteeliye? Eepeke icipo coolmeliha. ¹⁴ Wariyari winyu vaa haawo nowerenya? Arume urweliya ahooleli okereeca, wiira yoonswalele ni anttikithele makhura, mwancina na Apwiya. ¹⁵ Iswali yowaamini navona nretta ni Apwiya anaanwusa; ni wakhala wiira nookosa, naleveleliya. ¹⁶ Phimaana, nlaphulule itaampi cinyu nnyo waakhwinyu ni nswalelaneke wiira nvonihye. Ulapa wa nasariya uhaana ikuru yoolipa. ¹⁷ Eliya aari ntthu, oolikana makhalelo ayo toko hii. Ule ahoswali venci wiira ihirupe ipula, ni khweeli ilapo yothene khayaarupile ipula mpaka umala myakha miraru ni nuuso. ¹⁸ Ahaakulela tho uswali, vano irimu yahovaha ipula vathi nuumela mihokorokho.

¹⁹ Asunnaka, wariyari winyu vaa akhalaka ntthu hiile ikhweeli, vano aturuselihiyaka ni nkhwawe, ²⁰ ncuwele wiira ule nonturusiha nataampi warukurerya cawe, nawoopola iroho awe wuukhwani ni cinakhuneelya itaampi cinci.